

दूरस्थ एवं ऑनलाइन शिक्षा केंद्र

CENTRE FOR DISTANCE & ONLINE EDUCATION

जम्मू विश्वविद्यालय

UNIVERSITY OF JAMMU

**जम्मू
JAMMU**



पाठ्य-समग्री

STUDY MATERIAL

बी.ए. डोगरी (सत्र- III)

B. A. DOGRI (SEMESTER -III)

पाठ्यक्रम संख्या डी.जी 301

COURSE CODE DG 301

पाठ्यक्रम शीर्षक

कहानी

**TITLE OF THE COURSE
POETRY**

पाठ संख्या 1-20

LESSON No. 1 to 20

सत्र त्रिया

SEMESTER III

**Dr. Hina Abrol
Course Co-ordinator**

**Dr. Jatinder Singh
Teacher-Incharge**

इस पाठ्य-समग्री का प्रकाशन सरबन्धी अधिकार
दूरस्थ एवं ऑनलाइन शिक्षा केंद्र, जम्मू विश्वविद्यालय कोल सुरक्षित ऐ।

BA DOGRI

Course Contributors

Dr. Padam Dev Singh
Asstt.Professor
Dogri Deptt.
University of Jammu

Dr. Sheetal Sharma
Asstt.Professor
GDC
Jammu

Dr. HinaAbrol
Course Co-ordinator

Dr. Jatinder Singh
Teacher-Incharge

Review, Content Editing/Proof Reading
Dr. Jatinder Singh
Lecturer in Dogri, CDOE, University of Jammu, Jammu

© Centre of Distance and Online Education, University of Jammu, Jammu, 2025

<http://www.distanceeducationju.in>

Published on behalf of the Centre for Distance & Online Education, University of Jammu

पाठ्यक्रम
स्नातक त्रिया सत्र

Course No: DG 301
Time : 3 Hrs.

Title : Poetry
Maximum Marks : 100
Examination Theory: 80
Internal Assessment: 20

कविता

पाठ्यक्रम

1. आधुनिक डोगरी कविता – भाग-2
2. डोगरी साहित्य चर्चा

निर्धारित पुस्तक :

डोगरी साहित्य चर्चा – प्रो. लक्ष्मी नारायण, प्रकाशक – डोगरी संस्था, जम्मू।

ध्याएं दे स्हाबे पाठ्यक्रम दी बंड

ध्याऽ – 1 – आधुनिक डोगरी कविता भाग-II च संकलत कविताएं चा कु'नें द'ऊं पद्यांशें दी सप्रसंग व्याख्या। (20 अंक)

ध्याऽ – 2 – आधुनिक डोगरी कविता भाग-II च संकलत कविताएं दे कवियें दे व्यक्तित्व ते कृतित्व पर सोआल। (20 अंक)

ध्याऽ – 3 – डोगरी साहित्य चर्चा पुस्तक दे पैहले त्र'ऊं ध्याएं पर आधारत सोआल (20 अंक)

ध्याऽ – 4 (अ) पाठ्यक्रम आस्तै निर्धारत दौनें पुस्तकें पर आधारत लोहके जबाव आहले सोआल (5x2=10 अंक)

(आ) पाठ्यक्रम आस्तै निर्धारत दौनें पुस्तकें पर आधारत वस्तुनिष्ठ सोआल (10x1=10 अंक)

स्नातक त्रिया सत्र

विशे – डोगरी

विशे-सूची

पाठ संख्या	विशे	सफा नं.
1-2	आधुनिक डोगरी कविता भाग-II चा सप्रसंग व्याख्या (पाठ लेखक – डॉ. पद्मदेव सिंह)	3-12
3	आधुनिक डोगरी कविता भाग-II चा सप्रसंग व्याख्या (पाठ लेखिका – डॉ. शीतल शर्मा)	13-19
4-8	आधुनिक डोगरी कविता भाग-II च संकलत कवियें दा व्यक्तित्व ते कृतित्व (पाठ लेखक – डॉ. पद्मदेव सिंह)	20-67
9-12	आधुनिक डोगरी कविता भाग-II च संकलत कवियें दा व्यक्तित्व ते कृतित्व (पाठ लेखिका – डॉ. शीतल शर्मा)	68-108
13-15	डोगरी साहित्य चर्चा पुस्तक पर आधारत सोआल (पाठ लेखिका – डॉ. शीतल शर्मा)	109-131
16-17	आधुनिक डोगरी कविता भाग-II पर आधारत लोहके जबाव आहले सुआल (पाठ लेखक – डॉ. पद्मदेव सिंह)	132-138
18-19	डोगरी साहित्य चर्चा पर आधारत लोहके जबाव आहले सुआल (पाठ लेखिका – डॉ. शीतल शर्मा)	139-151
20	वस्तुनिष्ठ सोआल	151-155

नोट : त्रौनें पाठे (लैसननें) च चार – चार कविता – अंशों दी सप्रसंग व्याख्या कीती गेदी ऐ ।

रूपरेखा

- ♦ **उद्देश्य**
- ♦ पाठ–परिचे
- ♦ पाठ–प्रक्रिया
- ♦ पैहले कविता – अंश दी सप्रसंग व्याख्या
 - (i) कविता–अंश दी पाठ्य सामग्री ते उसदा संदर्भ
 - (ii) कविता – अंश दा प्रसंग
 - (iii) कविता अंश दी व्याख्या
- ♦ **उ'थै कविता –अंश दी सप्रसंग व्याख्या**
 - (i) कविता – अंश दी पाठ्य समग्री ते उसदा संदर्भ
 - (ii) कविता – अंश दा संदर्भ
 - (iii) कविता – अंश दी व्याख्या
- ♦ **त्रिये कविता – अंश दी सप्रसंग व्याख्या**
 - (i) कविता – अंश दी पाठ्य समग्री ते उसदा संदर्भ
 - (ii) कविता – अंश दा प्रसंग
 - (iii) कविता – अंश दी व्याख्या
- ♦ **चौथे कविता – अंश दी सप्रसंग व्याख्या**
 - (i) कविता – अंश दी पाठ्य समग्री ते उसदा संदर्भ
 - (ii) कविता – अंश दा प्रसंग
 - (iii) कविता – अंश दी व्याख्या

- ♦ **विद्यार्थियें दे अभ्यास आस्तै कोई चार कविता अंश पाठ्य पुस्तक थमां**

नोट : इससै चाल्ली दुए लैयन च बी चार – चार कविता – अंशों दी सप्रसंग ते अभ्यास दित्ते गेदे न ।

(1.1) उद्देश्य

- (i) कविता – अंश दी व्याख्या पढ़ने परैन्त विद्यार्थी उ'ने कविताएं दे पूरे संदर्भ कन्नै परिचित होई सकडन ।
- (ii) कविता – अंश च कवि द्वारा व्यक्त कीते गेदे वचारे दी गूढ़ ते विस्तृत जानकारी प्राप्त करी सकडन ।
- (iii) प्रसंगे समेत व्याख्या पढ़ने परैन्त विद्यार्थी विशेष – समग्री गी शैल चाल्ली समझने ते उसदे बारे च अपने विचारें गी व्याख्यात्मक रूपा च प्रगट करने दी समर्थ प्राप्त करी सकडन ।

(1.2) पाठ परिचे

इस पाठ च 'आत्म-नवेदन' 'कलयुग' 'मजूर' 'प्यार होए बस प्यार होए', च'ऊ कविताएं दे पद्यांशें दा प्रसंग दस्सियै व्याख्या कीती गेदी ऐ ।

(1.3) पाठ – प्रक्रिया

- (i) हर इक कविता – अंश आ पैहले परिचे दित्ता गेदा ऐ , जिस च कविता दे सिरलेख, कविता दे कवि ते पाठ्य-पुस्तक दा नांऽ जिस च ओह कविता-अंश प्रकाशित ऐ ।
- (ii) हर इक कविता – अंश दा उसदी कविता-विशेष दे संदर्भ प्रसंग दस्सेआ गेदा ऐ, जिस कन्नै उस कविता –अंश दा कविता- विशेष दी विषे-वस्तु कन्नै सरबन्ध व्यक्त कीता गेदा ऐ ।
- (iii) कविता-अंश च बखाने गेदे विचार दी व्याख्या कीती गेदी ऐ तां जे विद्यार्थी उस विचार गी शैल चाल्ली समझी सकन । एह व्याख्या उस विचार दे संदर्भ च होर-होर मसालां देइयै पुष्ट कीती गेदी ऐ, जिस कन्नै विद्यार्थियें दी विचार-शक्ति च प्रौढ़ता आई सकै ते ओह आपूं गी कुसै विचार गी खोहल्लियै समझाने च समर्थ होई सकन । होई सकै ते विचार कन्नै सरबन्धत क्षेत्र चा मसालां , युक्तियां ते दलीलां देइयै विचार दी पुष्टी करने च बी समर्थ होई सकन ।

(1.3.1) पैहला कविता अंश ते उसदी सप्रसंग व्याख्या

“भोले-भाले फाडी लोकें लश्ट-पश्ट निं जांजा ऐ ।
नां छल-छिद्दर गंडी ब'नदे सिद्धे चलना भाखा ऐ ॥
एह वेदांत ऐ रमजें भरेआ घर-घर कुन्न पढ़ाना सा ।
सूध सभाऊ जनता गितै सौखा कुन्न बनाना सा ॥”

(i) संदर्भ

डोगरी कविता दियां एह सतरां साढ़ी पाठ्य पुस्तक 'आधुनिक डोगरी कविता' भाग-2 चा लैतियां गेदियां न । कविता दा सिरलेख 'आत्म-नवेदन' ऐ ते उसदे रचनाकार स्वामी ब्रह्मानंद तीर्थ होर न ।

(ii) प्रसंग

इ'ने सतरें च कवि ने वेदान्त दे सार ते अभिप्राय गी जनसाधारण तगर पजाने आस्तै इक गै गल्लै गी केई ढंगे कन्नै, केई चाल्ली दे अदाहरण देइये समझाने दा जतन कीते दा ऐ । स्वामी ब्रह्मानंद हुंदा एह ज्ञान अनपढ़ ते पढ़े-लिखे दे दौनें चाल्ली दे लोकें आस्तै ऐ ।

(iii) व्याख्या

एह सारा गोचर जगत् ईश्वर दी गै सत्ता ते अस्तित्व दा विराट ते साकार रूप ऐ । इस साकार जगत गी चलाने आहली, चेतन बनाई रखने आहली शक्ति ‘‘केहड़ी ऐ ? कनेही ऐ ? कुथै ऐ ? ते कि’यां ऐ? ओहदा अस्तित्व किस चाली कन्नै ऐ ?

इस किस्म दे सुआल गै रहस्यमयी शक्ति गी जानने ते पन्छानने आहले पाससै कुसै बी जिज्ञासु गी लेई जाने आहले पैहले बिन्दु न । असल च एह सुआल गै उस निराकार शक्ति दा घेरा न जिसी खोहलना गै ओहदी सत्ता ते अस्तित्व गी जानना ऐ । इस सारी स्रिष्टी गी चलायमान रखने आहली, नियमत ते संतुलत ढंगे कन्नै क्रियाशील बनाई रखने आहली शक्ति दी रहस्यमता दे बारै च समझाने आस्तै स्वामी होरें सरल ते सौचे उदाहरण देइयै आम जनतस आस्तै इस कविता गी रचेआ ऐ । जि’यां उ’दिये इ’नें पंक्तियें च इ’यै गल्ल आक्खी गेदी ऐ । ‘आत्म-नवेदन’ कविता माहनू गी आत्म ज्ञान करोआंदी होई उसदी भौतिक जगत च व्याप्त संसारी माया रूपी अज्ञानांधकार दी नींद त्यागियै उस चा उडने आस्तै सचेत करदी ऐ, इक ऐसा विवेक भरदी ऐ जे माहनू एह सोचने आस्तै मजबूर होई जंदा ऐ एह झूठी माया सिर्फ कसाइयें दी मिट्ठी छुरी आंगर ऐ । अर्थात् इस माया दा वास्तविक सुआद कौड़ा ऐ । मनुक्ख मकड़े आंगर जाल बुनियै आपमं उस च फसी जंदा ऐ । फही छड़कदा ऐ ते केई किसम दे दुख भोगदा ऐ पर उस जाल दियां तारां अर्थात् दुखदायक दुनियाबी परिस्थितियां माहनू थमा नेई छड़ोदियां । हर थां दुख गै दुख न पर फही बी इस माया गी छोड़ना माहनू आस्तै सप्पै दे मूह किरली ऐ । स्वामी ब्रह्मानंद हुंदे अनुसार जेहड़ा माहनू इस माया गी त्यागियै उस ब्रह्मा च लीन होई जंदा ऐ । ओह फही उस अमरत्व गी प्राप्त करी लैदा ऐ ।

स्वामी हुंदा लेखन डोगरी साहित्य च अपना टकोहदा थाहर ते रखदा ऐ पर जिस असान तरीके नै वैदान्त गी समझाया ऐ ओह ओहदे कोला ज्यादा म्हत्त्वपूर्ण ऐ । उ’नें वेदान दी गल्ल इन्नी असानी नै समझाई जे वेदान्त जनेह गूढ़ विशे दी गुत्थी अपने आप दमागा च खुल्ली जंदी ऐ ।

(1.3.2) दू’आ कविता-अंश ते उसदी सप्रसंग व्याख्या

‘‘कदूं बक्हाया कलयुग ने जे लोको पाप कमाओ, बेईमानी हर चीजे दे बिच मुगता खुट्ट मलाओ । जां आखेआ दालत ऐ बिच झूठी देओ गुआही , जां चोरे दै कन्नै होइयै इसनै स’न्न दुआई।’’

(i) संदर्भ

एह कविता-पंगतियां साढ़ी पाठ्य-पुस्तक ‘आधुनिक डोगरी कविता’ भाग-2 चा ‘कलयुग’ नांS दी कविता च लैतियां गेदियां न । इसदे लेखक – कवि न श्री रोमाला सिंह भडवाल होर ।

(ii) प्रसंग

कवि रोमाल सिंह भडवाल होर मूल तौरा पर प्रगतिवादी सोच दे कवि न ते कर्म च विश्वास रखदे न पर कन्नै गै सच्ची – सच्ची गल्ल आक्खने दे हामी बी न, इ’यै गल्ल ऐ जे उ’दी लेखन-शैली च साफ – गोई दा गुण बड़ा टकोहदा ऐ । ‘कलयुग’ नां दी कविता च बी ओह आधुनिक युगै दियें खामियें-बुराइयें गी उच्ची सुआलिया गलानी च गुहाड़दे होई नमां त्रिष्टीकोण प्रकट करदे न ।

(iii) व्याख्या

कवि आखदा जे बीहमी सदी दे जीवन गी सब लोक तरक्की पसंद ते विज्ञानी युग गलाइयै अपनी उपलब्धियों दी चर्चा करदे फिरदे न पर कवि इस सब कैसे कन्नै सन्तुष्ट नेई । उसदा आखना ऐ जे बेशक भामें तरक्की दे कम्म बी होआ दे होउन पर समाज च बुनियादी तौरा पर आनी बस्सी दियां बुराइयां अजें उत्थें गैं । अपने इस मनषे गी बुहास्सरने आस्तै कवि कलयुग गी भैड़ा आखने दी बजाए चंगा आख्या करदा ऐ की जे बुराई कलयुग दी देन नेई ऐ ओह ते साढ़ी मानसिकता कन्नै जुड़ी दी ऐ । सहाड़े समाज च शराब, जुआ, गुज्झखोरी, मलावट दा बोल-बाला ऐ , एह पूरे मुआशरे च कैसर दे रोग जांही अपनियां जड़ां फलाई चुकी दी ऐ । इसदा इलाज मुश्कल जरूर ऐ पर नामुमकान नेई । अज्ज दे समें च मलावट दा बड़ा जोर ऐ । कोई बी चीज अज्ज खालस नेई थ्हांदी । नकारी मर्च-हल्दी गी गै दिक्खो उस च बी सस्ते पदार्थ दी मलावट होंदी ऐ । दुद्ध जिसी सहाड़े पराने लोक अज्ज बी रतन मिथदे न ते दुद्धें आहले भांडे गी छल्लियै ओहदा धोन बी दुद्धे च पान्दे न । पर दूए पासै दोधी ने ओहदे च शैल मातरा च पानी पाए दा होंदा ऐ । अज्ज माहनू च लुब्ध-लालसा बधदी जा करदी ऐ । उसदी इच्छाएं दा कदें ऐंत नेई होंदा । बल्कि उसदे मनै दे लुब्ध रूपी सागर च इच्छाएं दे छल्ल अपने पूरे जोवनै पर होंदे न ।

उसदे सोहल मनै च नित नमीं लालसा जनम लैदी ऐ ते ओह उसी पूरी करने गितै जेन – केन प्रकारेण हर संभव ते छल दा बी सहारा लैना पौंदा ऐ ।

लोकें च इक आम धारणा ऐ जे कलयुग च इ'नें सारियें बुराइयें दा जोर होना ऐ । पर कवि दी सोच उ'ंदे कशा बकखरी ऐ ।

(1.3.3) त्रिया कविता-अंश ते उसदी सप्रसंग व्याख्या

मेरी झौंपड़ी जुआड़ी,
केई लैंदे मैहल चाढ़ी ।
आ'ऊं दिन रात बुढ़ां,
पही बी मनो-मन कुढ़ां ।

(i) संदर्भ

एह कविता अंश साढ़ी पाठ्य-पुस्तक 'आधुनिक डोगरी कविता' भाग-2 चा लैता गेदा ऐ । कविता दा शीर्षक 'मजूर' ऐ ते इसदे कवि न श्री शिवराम 'प्रेमी' होर ।

(ii) प्रसंग

इ'ने पंगतियें च कवि दा इशारा उस समाजी निजाम बकखी ऐ जिस च जुल्मी जाबर लोक, जेहड़े आपूं ककख भन्नियै दोहरा तगर नेई करदे पर मेहनतकश मजूर लोकें दी सारी कमाई धड़ल्ले नै खुसियै ऐश करदे, मौज मनांदे ते मैहले च रौहंदे न ते ओह मजूर जेहड़ा दिन रात इक करियै कम्म करदा उसगी अपनी मेहनत दे दानें दा इक दाना बी नसीब नेई होंदा ते दुएँ लेई मैहल खडेरने आहला आपूं झौंपड़ी च रौहंदा ऐ । इस चाली दी बंड-व्यहार गी कवि ने गलत गलाए दा ऐ ते आस किती दी ऐ जे इक दिन ओह सवेर होग जदूं सबनैं गी अपना हक्क थ्होग ।

(iii) व्याख्या

इस कविता च कवि दा लैहजा रोह ते गिले भरोचा ऐ । ओह आखदा ऐ जे जिस समाज च लोकें गी जीने दे हक बरोबर नेई होन सगुआं जेहड़ा कम्म करै ओह भुक्खा मरै ते जेहड़ा बेहल्ला फिरै ओह

चूरियां—मलाइयां खा एह कुत्थों दा इंसाफ ऐ । इस कविता च कवि दा उद्देश्य समाज बेन्याई दी नीति पर गै नेई जोरो—जाबरी हक्क मारने आहली शोष्णी नीति पर करारी चोट कराना ऐ । साढ़े समाज च एह सब मुंढा थमां गै होंदा आया ऐ जे जोरा आहला अपने जबरी तरीकें कन्नै मासूम गरीबे ते माड़े लोकें पर कैहर ढांदा आया ऐ जोरा आहले दा सत्तें बीहें सौ आहली बाख ऐहमें गै नेई बनी दी । जमाना भामें कुतूँ दा कुतै पुज्जी गेदा ऐ पर शोषन दे तौर—तरीकें दे दाऽ पेच उत्थे गै हैन। मेहनत करने आहले दा अपनी मेहनत दी कमाई पर कदें हक नेई रेहा बल्कि उसगी अपने मालक उसदे अन्नदाता दी किरपा—द्विष्टी बक्खी दिक्खना पौंदा रेहा ऐ । उसदी इच्छा होग तां बचे—खुचे दा किश उसदी नज़र करी देग वरना ओह मेहनतकश मजदूर करसान सूंक सुट्टियै सबर करी लैग ।

कवि ने इस कविता—अंश च अपना इ'यै नज़रिया स्पष्ट कीते दा ऐ ते जित्थै मनुक्खें गी जीने दे बराबर हक—हकूक नेई थोन, जित्थै इक भुक्खै ढिड्ड सेई जा ते दुए ते पैरें च रूलै जा दुए दे गल—गल होऐ

ते सभने थमां चुभने आहली गल्ल ते एह जे जित्थै गरीबें दे लहु—परसें पर सरमायादार ऐश करन ते आपूं मैहलें च रौहन ते मजूर बचारे मेहनत करने दे बाबजूद बी झौपड़िये च रौहन उत्थै कोई केह इंसाफ दी उम्मीद करी सकदा ऐ ।

(1.3.4) चौथा पद्यांश ते उसदी सप्रसंग व्याख्या

नां जमां नेई तफरीक होऐ,
नां जरब नां कोई तक्सीम होऐ,
दुनिया दे लाग पलेचे शा
बस मुक्त मेरा संसार होऐ
बस सच्चा—सुच्चा यार होऐ
जो अंदर होऐ, उ'यै बाहर होऐ
बस प्यार होऐ, बस प्यार होऐ ।

(i) संदर्भ

एह कविता—अंश साढ़ी पाठ्य पुस्तक 'आधुनिक डोगरी कविता' भाग—2 चा लैता गेदा ऐ । कविता दा शीर्षक ऐ 'प्यार होऐ बस प्यार होऐ' ते इसदे कवि श्री दर्शन दर्शो होर न । एह कविता—अंश उ'दी कताब 'कोरे काकल कोरियां तालियां' च संकलत उ'दी कविता 'प्यार होऐ बस प्यार होऐ' चा लैता गेदा ऐ । इस कताबा पर उ'नेंगी साहित्य अकादेमी पुरस्कार बी थोई चुके दा ऐ ।

(ii) प्रसंग

कवि ने अपनी कविता च अहसासें, जज्बातें, मनुक्खी कदरें, मनुक्खी जीवन दे मकसदें गी इस चाल्ली कन्नै तपाशेआ ते सजाया गेदा ऐ जे ओह अहसास पाठके दे अपने अनुभव ते जजबे बनी जंदे ने । कवि दा मन मनुक्खता, मनुक्खी होंदा, ओहदी भलाई—बेहतरी, खुशहाली ते विकास लेई फिकरमंद ते दुआगोऽ रौहंदा ऐ । कवि दा मन्नना ऐ जे हिरखै कन्नै रौहना माहनु दा सभाऽ ऐ, ओह प्यार कन्नै रौहना चाहदा ऐ ।

(iii) व्याख्या

अज्ज सबूरी मुनक्खता लेई विश्व-शान्ति दा मुद्दा सारें शा अहम ऐ । एह बी सब जानदे न जे इस लेई नफरत गी मटाइयै रूहें च प्यार बसाने दी लोड़ ऐ । प्रस्तुत कविता-अंश च बी कवि ने प्यार दे म्हत्त्व गी उजागर कीते दा ऐ । पर इसलेई किश जतन, उपचार दरकार न । प्यार दी थां मल्लियै बैठी दी नफरत गी कड़ढना पौग । कवि दे गूढ़ चिन्तन ने इसदे कारण बी तुप्पी कड़ढदे दे न ते उपाऽ बी, कवि इस उपाऽ सफलता बारै आशावान ऐ । कवि दे आक्खने दा मतलब ऐ ते हिरख-प्यार इक नेही चीज ऐ जेह्डी कुसै दे मनै च कुसै दुए आस्तै बसदी ऐ ते कुसै उच्ची किस्मत आहले दे भागें च होंदी ऐ । अर्थात्

जिसदे मनै च हिरख-प्यार दा नाता पलदा ऐ ते जिस आस्तै एह नाता होंदा ऐ ओह लोक बड़े भागवान् होंदे न । समाज गी व्यवस्थत, अनुशासत ते स्वस्थ रूपै च दिक्खनै आस्तै उत्थूं दे बसीनकें च सभ्यता, सदाचार, शिष्टाचार ते एकता जनेह् गुणें दा होना बड़ा लाजमी ऐ । पर एह सब किश तां गै सम्भव होई सकदा ऐ जे हर इक दा आपूं च हिरख-प्यार होऐ । हर कोई दुऐ दे सुख-दुख गी अपना सुख-दुख समझै, कुसै दे बी दिलै च कुसै दे प्रति भेदभाव, वैरभाव ते छल-कपट दी भावना नेई होऐ । हर कोई सिर्फ अपने गै सुआर्थ तगर सीमत होइयै नेई र'वै । मनुक्खै च एहकड़े गुधें गी विकसत करने आहली ते माहनू गी दिली तौरा पर माहनू कन्नै जोड़ने आहली हिरख-प्यार दी भावना गी लेइयै गै एह कविता लिखी गेदी ऐ । कवि दा मन लोक दे हिरदे रूपी सागर चा सारे भरम-भलेचा रिड़कियै हिरख-प्यार जगाना चाह्दा ऐ । ऐसा प्यार जित्थै सारे इक-मिक होई जाहन ।

(1.4) अभ्यास

ख'ल्ल दित्ते दे कविता-अंशे दा संदर्भ ते प्रसंग दस्सियै व्याख्या करो :-

(i) सभने गी एह धोखा दिंदा,

केई-केई रूप बटांदा ।
उच्चियां-लम्भियां टाहरा लाऽ,
निं दिक्खै हुट्टा मांदा ।
बडे नलज्जे देऐ गड़ाके,
जिसलै कोई करलांदा
अंदरो-अंदरी खुरचै नीहां ,
नित्त बने गी ढांदा ।

(आधुनिक डोगरी कविता, भाग-2, सफा 88)

(ii) मेरा इक दुखांत ऐ लोको,

मे बी कलाकार दे ताई,
लेखक-चित्रकार दे ताई,
जिस बेल्लै किश,करना चाहन्नां,
बहारी तोते- चिट्टे इल्लड़
कन्नै गै चुक्के जंदे न ।
कन्नै गै इन्कारी होई जा
इ'नें इल्लड़े दे कन्नै गै
कलाकार बी मरी जंदा ऐ,

चित्रकार बी मरी जंदा ऐ
काव्यकार बी मरी जंदा ऐ ।

(आधुनिक डोगरी कविता, भाग-2, सफा 92)?

(iii)

अऊ आं उत्तर-बैहनी मेरा साथ किं कोई,
इत्थै शैह गै शैह ऐ साथी मात निं कोई
बगदी बत्ता शा उल्टी में बम्त शंगारी
नदिया दे बाहे शा पुट्टी तारी मारी ।

(आधुनिक डोगरी कविता, भाग-2, सफा 93)

(iv)

सवेरै हर सवेरै गै
तू माए चाऽ सजाए हे
जे तेरे हिरख-ममता दे सुन्हाके शीश मैहलें दी
बलौरी बारादरिया पर
कदें कोई लाल लिश्कै-जो
चमकदे सूरजै साहीं
बखैरै तार किरणें , दे सुनैहरी तार
जिंदे चा
सनोचै तान खुशियें दी
सवेरै हर सवेरै ।

(आधुनिक डोगरी कविता, भाग-2, सफा 101)

(1.5) सहायक पुस्तकतां

1. आधुनिक डोगरी कविता, भाग-2
2. डोगरी साहित्य दा इतिहास, लेखक शिवनाथ
3. डोगरी साहित्य दा इतिहास, जितेन्द्र उधमपुरी ।

.....

- (2.1)
- कु'न दब्बेआ सेहा दा त्रक्कला,
दुनिया दीया मुहाली ?
बंदे दा ऐ बंदा बैरी,
बज्जी गई पड़तली ।
इक-दुए दा - टुक्कन छौरा,
बिगड़ी गई परनाली ।
मूह अड़डे दा चु'ल्ल ते चौकें,
खाल्ली बज्जै थाली ।
मान-मलाहजे जली गे सारे,
समे दिया कठेआली ॥
'साथी' , हिरख रेहा निं मासा ,
निकली गेआ दुआला ।
उट्ठ मनुक्खा , जाग मनुक्खा,
समां देऐ दा आला ॥

i) संदर्भ

प्रस्तुत सतरां साढी पाठयु पुस्तक 'आधुनिक डोगरी कविता' दे भाग-2 चा 'मनेआदी आला' नाऽ दी कविता थमां लैतियां गेदियां न । इस कविता दे कवि न गोगा राम साथी ।

(ii) प्रसंग

कवि ने इ'नें सतरें च साधारण जीवन-यापन-च खैदल पाने आहलियें इखलाकी ते समाजी बुराइयें बक्खी सारत कीती दी ऐ । कवि ने कन्नै गै मनुक्खे दे आपसी बरोध उप्पर गी दुख प्रकट कीते दा ऐ ।

(iii) व्याख्या

कवि आखदा जे दुनिया च आपसी हिरख समोध बिल्कुन घटदा जा करदा ऐ । अज्जकल हर इक माहनू इक-दुए दा बैरी ऐ ते कोई बी इक-दुए दा छौरा तगर नेई लैदा । माहनू-समाजी दी स्थिति दे मुंह मलाजे दा स्तर बी खत्म होंदा जा करदा ऐ । कोई बी घर ऐसा नेई ऐ जित्थै बक्खरे-बक्खरे चुल्ले नेई बला करदे होन । हुन समां ऐसा आई गेदा ऐ भ्रा-भ्रा दे खून दा प्यासा होई चुकेदा । कवि ने सधारण जीवन-जापन च खौदल पाने आहिलियें समाजी बुराइयें ते आपसी बरोध च तनोतनी बक्खी इशारा करदे होई माहनू गी जागने दी प्रेरणा दिती ते अपनी सार ते समें गी पन्छानों, नेई ता मनुक्खी जीवन खत्म होई जाहग । आपसी बरोध कन्नै कदें बी समाज च सुधार नेई होई सकदा ।

(2.2)

सुरगे दी गल्ल नेई लाऽ अड़ेआ,
जस्स अपने देया दा गाऽ अड़ेआ ।
एह देस फुल्लें दा खारा ई ।
एह देश असें अत्त प्यारा ई ।

एह साढ़ी अकखीं दा तारा ई ।
 एह त्रैलोकी थमां न्यारा ई ।
 तूं एहदा मान बधाऽ अडेआ ,
 सुरगै दी गल्ल नेई ला अडेआ ।

i) संदर्भ

प्रस्तुत सतरां साढ़ी पाठयु पुस्तक 'आधुनिक डोगरी कविता' दे भाग-2 चा 'सुरग देस' दी कविता थमां लैतियां गेदियां न । इस कविता दे कवि ने किशन स्मैलपुरी ।

(ii) प्रसंग

कवि ने इ'नें पंगतियें च डुग्गर प्रदेश दी महिमा दा वर्णन कीते दा ऐ ।

(iii) व्याख्या

कवि आखदा जे डुग्गर प्रदेश बी सुरग कशा घट्ट सुंदर नेई ऐ असेंगी अपने देसा दा मान बधाना चाहिदा ऐ । इस दियां वादियां, फाड़-मदान धारां ते धूड़ां, पक्खरू, फुल्ल बूहटे इस प्रदेश गी होर बी सुंदर बनांदे न । इसदा मन भाना वातारण इसदी खूबसूरती गी होर चार चन्न लांदा ऐ । एह प्रदेश असेंगी सारें कोला प्यारा ऐ ते साढ़ी अकखीं दा तारा बी ऐ कि जे इसदी सुंदरता दी जिन्नी बी मसाल दिती जा ओह घट्ट ऐ । डुग्गर प्रदेश दी जिन्नी बी महिमा दा बखान कीता जा घट्ट ऐ , इत्थै माता वैश्यां देवी, बावे आहली माता दा वास ऐ ते इत्थूं दे लोक बी बड़े पूजा पाठी न । इत्थूं दे दरिया, फाड़, नदियां, नाले सारे गै इसदी शौभा गी बधांदे न ते इ'यै मुल्क दा असेंगी यश बधाना चाहिदा ऐ । कवि आखदा ऐ जे साढ़ा डुग्गर प्रदेश स्वर्ग कोला घट्टन नेई ऐ । त्र'ऊ लोकें च इसदी म्हत्ता ऐ ते इसदी असेंगी शोभा गी बधांदे होई म्हेशां एहदा गुणगाण करना चाहिदा ऐ ।

(2.3)

फाड़ पट्टी में टकाए,
 सौहने शैहर में बसाए ।
 आपू दुखें बिच्य जीनां,
 जैहर घुट्ट-घुट्ट पीन्नां ।

i) संदर्भ

प्रस्तुत सतरां साढ़ी पाठयु पुस्तक 'आधुनिक डोगरी कविता' दे भाग-2 चा 'मजूर' नांS दी कविता थमां लैतियां गेदियां न । इस कविता दे कवि न शिवराम प्रेमी ।

(ii) प्रसंग

कवि ने इ'नें सतरें व मजूर- दे रूप च माहनू दी बेबसी दी गल्ल कीती दी ऐ जे मजूर जीवन दे औखे पैडे थमां निकलदे होई बड़डे शैहरें दा निर्माण करदा ऐ ।

(iii) व्याख्या

इ'नें सतरें च कवि ने मजदूर दी स्थिति उप्पर रोशनी पाई दी ऐ । मजदूर म्हेसा दिन-रात कम्म करदा ऐ, इक्क चक्की च पसोंदा आवा करदा ऐ । उसदी मैहनत, लगन आहली बक्खी कुसै दा बी ध्यान नेई जंदा ते

उसी म्हेशां गै दुखें, कष्टें दा सामना करना पोवा करदा ऐ । जिस मजूर दी मैहनत दा लोहा मन्ना चाहिदा ऐ उसदी हर बारी बेकदरी होंदी ऐ ।

मजूर औखें थमां औखा कम्म बी करदा ऐ ते शैल ते सुंदर शैहरे दा निर्माण बी करदा ऐ । बगैर मजदूर दे इ'नें शैहरे गी बसाना बड़ा मुश्कल गै नेई नामुमकन ऐ । मजूर आपूं म्हेशा दुखें च रौहदा ऐ कि जे इगर उसी मजुरी नेई थोए तां उसदे घरै दा खर्चा बी नेई चली सकदा । ओह दुख, तकलीफें गी म्हेशां तरदा रौहदा ऐ ते अपनी बेबसी ते लाचारी बारे बोल्ली बी नेई सकदा । जेहड़ा जीवने दे इ'नें औखें पैडे थमां निकलदे होई बड़्डी-बड़्डी इमारतें दा निर्माण करदा ऐ उसदी एह हालत बड़ी गै दुखदायी ऐ ।

(2.4) खेलां करदे दुनिया दे बिच बन्न-सबन्नी खेलां
कलयुग ने गै ज्हाज बनाए कलयुग ने गै रेलों ।

i) **संदर्भ**

प्रस्तुत सतरां साढ़ी पाठयु पुस्तक 'आधुनिक डोगरी कविता' दे भाग-2 चा 'कलयुग' नांS दी कविता थमां लैतियां गेदियां न । इस कविता दे कवि न रोमाल सिंह भडवाल ।

(ii) **प्रसंग**

कवि ने इ'नें सतरें च कलयुग दी मैहमा दा वर्णन कीते दा ऐ ।

(iii) **व्याख्या**

कवि ने इ'नें सतरें च कलयुग समां बड़ा गै न्यारा ऐ जेहदे च दुनिया दी बक्खरी गै तस्वीर नजरी औंदी ऐ । अज्ज दे दौर च माहनू ने इन्नी तरक्की करी लैती ऐ जे ओह चन्न तगर पुज्जी गेदा ऐ । साईस दे समें च माहनू इन्ना विकसित होई चुकेदा ऐ जे अज्ज सड़क उप्पर दौड़ दियां गड़ियां जे ज्हाज बगैरा बी इस्सै समें दी देन न । कवि आखदा ऐ जे इस युग दी में केह सिफत करां, दुनियां च नमिये-नमिये कलाएं दा निर्माण बी इस समें दी म्हत्तवपूर्ण देन न । आखने दा भाव एह ऐ जे इस दौर च माहनू ने तरक्की दियां मंजला बी तैS कीतियां ते दुनिया गी नमें आयाम बी दित्ते ।

B.A. Sem. III (Poetry)	DOGRI	UNIT-I LESSON No. 3
---	--------------	--------------------------------------

3.1 “इं’दा र्होली-र्होली जिद्दा-जिद्दा कीता

में अपना पैडा आपूं गै सिद्धा कीता

रोड़ ते कंडे में हत्थें नै चुगगे सारे

मेरे साथें एह रस्ते बी पुगगे सारे

फ्हाड़ें दे हिरदे चा हुंदे लीक कराई

पुट्ठी उत्तर-बैहनी दी में कत्थ सनाई

इत्थै दिन गै दिन ऐ साथी रात निं कोई

अ’ऊं आं उत्तर-बैहनी मेरा साथ निं कोई।”

(उत्तरबैहनी)

संदर्भ — प्रस्तुत सतरां साढ़ी पाठ्य पुस्तक ‘आधुनिक डोगरी कविता’ दे भाग-II चा ‘उत्तरबैहनी नांS दी कविता थमां लैतियां गेदियां न। इस कविता दी कवित्री न ‘पद्मा सचदेव’।

प्रसंग — प्रस्तुत कविता इक प्रतीकात्मक कविता ऐ जिस च जीवन जीने लेई उत्तरबैहनी नदी आंगू उल्टी मुहार फड़ियै जीने दा हीला तुप्पने दी रम्ज समझाई गेदी ऐ ते दस्सेआ गेदा ऐ जे उत्तरबैहनी नदी दे जीवन थमां प्रेरणा लैनी चाहिदी ऐ जे माहनू गी मुश्कल परिस्थितियें थमां घबराइयै कदें बी पिच्छें नेई हटना चाहिदा ते अपने लक्ष्य दी प्राप्ति आस्तै हर संभव कोशश करनी चाहिदी ऐ।

व्याख्या — प्रस्तुत सतरें च उत्तरबैहनी नदी आखदी ऐ जे में अपने रस्ते अप्पूं तैS कीते, में इक्कले गै रस्ते बनाए, सारी मुश्कलातें गी पिच्छें छोड़ियै अगगें गै अगगें निकलदी गई। पही उ’नें मुश्कलातें गी गै र्होल बनाई लैता ते उंदियें जिदें-जिदें अपनी मंजिल आहले पाससै अगगें बधदी गई अर्थात् चलना गै अपना लक्ष्य बनाया ते उ’नें ऊंचाइयें गी चीरदे होई चलदी रेही। रस्ते च औने आहलियां मसीबतां, परेशानियां ते जद्दो-जैह्त कन्नै डटियै मकाबला करियै अपना मार्गदर्शन अप्पूं कीता। मेरे साथें-साथें चलने आहलें दा रस्ता बी साफ होई गेआ। में अपने कन्नै-कन्नै उ’दा बी कल्याण कीता

ते उनेंगी बी कदें नेई रुकने दी प्रेरणा दिती। चाहे रस्ते च जिन्नियां बी रुकावटां आइयां पर में कदें नेई रुकी ते म्हेशां प्हाड़े दे सीने गी चीरदे होई अगें गै अगें बधदी गई। में अपने—आपै च इक मसाल कायम कीत्ती जे पुट्ठे रस्ते होइयै बी सीद्दे कम्म कीते दे दूए गी जीने दा उदाहरण दस्सियै एह प्रस्तुत करने दी कोशश कीत्ती ऐ जे जीवन च कदें बी हार मन्नियै पिच्छें नेई हटना चाहिदा बल्कें उ'नें मुश्कलातें दा सामनै थमां मकाबला करना चाहिदा ते अपने इरादें गी बुलंद करियै कामयाबी हासल करनी चाहिदी। मैं इ'नें नामेदियें, नामोशियें ते नाकामयाबियें गी अपने रस्ते ते अपने प्रवाह च कोई जगह नेई दिती बल्के मेरे कश उज्जाला गै उज्जाला ऐ।

3.2 “ते इक होर सफा नमां

साढ़े इतिहासै दा

लिखि गेआ गभरू, जुआन मस्ताना ओह

नांऽ जि'दा डीडो हा।

डोगरें दी धरती दे भाग तदूं मंदे हे,

हाकमी बदेसी ही,

दौर हा गलामी दा

लोटियें ते धाड़ें दा

सैहमी दी गैरतू गी पच्छ रोज लगदे हे,

डोगरे गै किज ओल्लै,

उस जाबरी दे पिट्ठू हे।

सब किज दिक्खी सुनी

प्रण पाया हा डीडो न —

‘इस पापै गी मटाने गितै मेरी तलवार ऐ,

ते बैरियें ते धाडुएँ ते मेरी तलवार ऐ।”

(ते बाकी इतिहास)

संदर्भ — प्रस्तुत पद्यांश साढ़ी पाठ्य पोथी ‘आधुनिक डोगरी कविता’ भाग—II च संकलित कविता ‘ते बाकी इतिहास’ थमां लैता गेदा ऐ। इस कविता दे रचनाकार पद्मश्री ‘प्रो. रामनाथ शास्त्री होर न’।

प्रसंग — प्रस्तुत कविता च कवि ने डुग्गर दे लोक नायकें दा वर्णन कीत्ते दा ऐ। उंदे मताबक डुग्गर-प्रदेश दा इतिहास इ'नें नायकें आस्सेआ रचेआ गेदा ऐ जेहड़े देशभक्ति दी मसाल कायम करदे न। उंदे कारनामें दा बखान बड़ी बरीकी कन्नै चित्रित कीत्ते दा ऐ। उनेंगी बहादर होने दा श्रेय हासल ऐ जि'नें अपनी जिंदू दी परवाह कीत्ते बगैर डुग्गर-प्रदेश दी आन, बान ते शान आस्तै प्राण त्यागी दित्ते। डोगरें गी अपने इतिहास गी साम्भियै रखने आस्तै बिनती कीत्ती दी ऐ।

व्याख्या — प्रस्तुत सतरें च कवि ने डोगरें दे इतिहास गी लिखने आहले, जि'नें इतिहास दे सफें च इक नमां सफा जोड़ेआ हा डुग्गर दे महा बलिदानी मियां डीडो दे कारनामें दी गल्ल कीत्ती दी ऐ। डुग्गर-प्रदेश दे हालातें दा जिक्र करदे होई कवि गलांदे न जे जदूं साढ़े देशै च हाकमें दा राज हा, गलामी दा दौर हा, लुट्ट-मार दा बोल बाला हा, साढ़ी आम लुकाई पर अत्याचार होआ करदे हे, डोगरें दा जीन बड़ा मुश्कल होई गेदा हां तां इस म्हान लोक नायक मियां डीडो ने अपने-आपै च प्रण लेआ हा जे ओह इस डुग्गर-प्रदेश गी इ'नें हाकमें थमां मुक्ति दोआग। इंदे बंधनं थमां अज़ादी लेई उ'नें अपने प्राणें तगर दे त्याग बड़ी असानी कन्नै देई दित्ते। अज्ज दे समें च उंदे कारनामें दी जै-जै कार कीत्ती जंदी ऐ जि'नें डुग्गर धरती उप्परा पापें दा खात्मा करी दित्ता ते इक बारी फही समाज च लोकें गी जीने दा सुनैहरा मौका दित्ता।

3.3 "अ'ऊं चेतें दे सागर डुब्बा

सोचा करनां जोर लाइयै

रोकी लैं हुन गल्लै गी -

पूरी-पूरी ताकत कन्नै

आखां इसगी - 'हून खड़ोई जा!

पूरी देआं सब इसदे छिंडे

की जे इस बिच गुण बड़े न।"

(न्यारा घराट)

संदर्भ — प्रस्तुत सतरां साढ़ी पाठ्य पोथी 'आधुनिक डोगरी कविता' भाग-II च संकलत कविता 'न्यारा घराट' थमां लैतियां गेदियां न। इस कविता दे रचनाकार 'प्रकाश प्रेमी' होर न।

प्रसंग — प्रस्तुत कविता च कवि ने डुग्गर प्रदेश दे लोकें गी उंदे अतीत कन्नै जोड़ने दा सफल प्रयास कीते दा ऐ। अज्जै दी नमी पीढ़ी केई चाल्ली दियें चीजें थमां बेखबर होई चुकी दी ऐ। उनेंगी उ'नें चीजें दी म्हत्ता बारै कोई ज्ञान नेई बल्के एह लोक मते सारे नाएं थमां बी बेखबर न। इ'यां गै कवि ने इस कविता राहें डुग्गर प्रदेश च बरतोने आहली इक दरोहर 'घराट' दा जिकर कीते दा ऐ।

व्याख्या — प्रस्तुत सतरें च कवि ने घराट दा वर्णन करदे होई अपनी मानसिकता गी गोहाड़े दा ऐ जे पैहलें-पैहलें इस समाज च घराट दी किन्नी म्हत्ता ही। एह डुग्गर दे लोकें लेई इक मशीन दा कम्म करदा हा, एह लोकें दी रोजी-रोटी दा साधन हा। कवि सोचें च डुब्बे दा सोचदा ऐ जे जिसलै इसदी समाज गी जरूरत होंदी ही तां इसदी किन्नी कदर ही पर समें दे कन्नै-कन्नै इसदी जरूरत खत्म होई गई। इसदा अस्तित्व लुप्त होई गोआ ते इसदे लेई अज्ज एह स्थिति ऐ जे एह इन्ना बे-गौरा होई चुके दा ऐ। ओह गलड़ जेहड़ा इन्नी पीड़ा बर्दाशत करियै पानी दे जोरा कन्नै चलियै चक्की चलाने दा कारण बनदा हा। अज्ज इ'यां सक्खना गै घुमकी जा करदा ऐ हर आंदा-जंदा माहनु इसगी चलदा दिक्खी'जा दा ऐ पर इसदी वेदना गी कोई नेई बुज्झा करदा। उसदी गुणवत्ता गी कोई नेई समझा करदा। घराट दी इस स्थिति गी दिक्खियै कवि अपने-आपै च बड़ा मसूस जन होई जंदा ऐ ते सोचें दी गैहराइयें च डुब्बियै ओह अपनी पूरी ताकत कन्नै उस चलदे गल्लै गी रोकी लैना चाहदा ऐ। इक बारी फही इस बदलौंदे समाज गी इ'नें दरोहरें बारै सचेत करना चाहदा ऐ जे इंदी साढ़े जीवन च किन्नी जरूरत ऐ पर कुतै-ना-कुतै अज्ज एह सब्ब किश साढ़े समाज चा लुप्त होंदा जा करदा ऐ। इसगी सम्हालियै रखना साढ़ी जिम्मेवारी गै नेई बल्के साढ़ा फर्ज बी ऐ।

3.4 “सोची-सोची केह ऐ दुनियां, होर बधदे गै पलेच,

खोहलना ते होर पाओ, इक नेहा गुंझल ऐ एह।”

(गज़ल)

संदर्भ — प्रस्तुत शेऽर 'आधुनिक डोगरी कविता' भाग-II च संकलत कविता 'वेदपाल दीप' हुंदी गज़ल थमां लैता गेदा ऐ।

व्याख्या — प्रस्तुत शेऽर च गज़लकार ने इस समाज दा जिकर बड़ी शिद्दत कन्नै कीते दा ऐ। ओह अपने मनै दी वेदना गी प्रगट करदे होई आक्खा करदा ऐ जे एह दुनिया अपने-आपै च इक उलझन ऐ इक ऐसी उलझन जिसगी अगर सुलझाने दा जत्न करो तां एह होर उलझी जंदी ऐ। हर

इक माहनु च घृणा दी भावना बद्धी जा'रदी ऐ, इक-दुए कन्नै नफरत करदा ऐ, समाज च प्यार-भाव दा लोप होई गेदा ऐ। इस उलझन गी समझना बड़ा औक्खा होई गेदा ऐ। एह इक कदें नेई मुकने आहली बत्त ऐ, जेहदी कोई मंजल नेई, कोई ठकाना नेई। कवि दा मनना ऐ जे सोची-सोची में थक्की गेआ, हारी गेआ पर इसदे पलेच बद्धे गै जा'रदे न। भामें जिन्नी बी कोशिश करी लै एह गुंझल खुल्लने दे बजाए होर पेई जा'रदे न। समाज च माहनु इक-दुए गी समझने दे बजाए उ'नें उलझने गी बढ़ावा देआ करदे न।

3.5 अभ्यास आस्तै किश गद्यांश

- खल्ल दित्ते गेदे कविता अंशें दा संदर्भ ते प्रसंग दस्सियै व्याख्या करो :-

(i) "पत्थर उसलै परसिज्जलदे

जिसलै कोई लाश टंगोई जंदी

मुहां दे मुलाहजें दी दुनियां,

अक्खें दी शरमै, शरम करै।

लब्भें दी हुब्बें दी काहरें।

बज्झी दी सारे कम्म करै।

लोड़े-थोड़े दी नगरी च,

ताहनें-मीहनें दी कीमत ऐ।

अपनी गै खुशियां हस्सने आं,

अपनी गै गमियें रोन्ने आं।

दुनियां दी दारी भाखी नेई

अस दुनियांदारी जे होन्ने आं।" (आधुनिक डोगरी कविता, भाग - II, सफा - 82)

(ii) फीता कटिटयै चीफ गेस्ट जित्थे आई बौहदा

उस कन्नै उट्ठी मिलदे न

अदब दे नांS शा डरने आहले

हर थां हामी भरने आहले

कलाकार दे धुरा गै दोखी
चाहमां पींदे, पैंचे लैंदे,
गल्ल कुतै बी टिकन नेई दिंदे

अदबी शातर—चिट्टे इल्लड़।” (आधुनिक डोगरी कविता, भाग — II, सफा — 91)

(iii) “भर दपैहरीं धुप्प सोहै दी

जदूं कदें बी चमकन लगदी,
तां चेतै किश जलदे—तपदे
मनै दी इक तार गी ल्हांदे
जान लगीं दे पिछड़े—पिछड़े
फिरना लगदे, छौरे ऐसे
बेदन दे, अक्खीं दे अगगे
नजर खड़ोंदी उस नदियै पर
जले—बले दे बूट्टै उप्पर
सुन्नम—सुन्नी पनचक्की पर
जिसदे थल्लै गल्ल खड़ोता
अति पुराना—गैर होएदा
पर तां बी ओह पक्खे उसदे
उसी फेरना जतन करा दे।”

(आधुनिक डोगरी कविता, भाग — II, सफा — 103)

(iv) “मिगी चढ़दी भ्यागा नै

मेरे मालक गलांS पाई
बा—बर्दी कोलड़े लाई
घरा दा कड़्ही लांदे न,
ते अ’ऊं लाचार डंगर जन
समाजी कागदै उप्पर
मूंहैं च बिसल पाइयै
लक्का गी घोटिटयै कस्सी

सिरै—र तुरला सुट्टियै

गपाल—अष्टमीं दी गवा आंगर

मते किश हार पाइयै

खड़ोई जन्नां चरस्तै च।” (आधुनिक डोगरी कविता, भाग — II, सफा — 121)

(v) “बत नेई छोड़ी कुसै हालै च बी मंजलै तगर,

गल्ल बक्खरी टुरदे—टुरदे थां—कथां बैठे हे अस।”

(आधुनिक डोगरी कविता, भाग — II, सफा — 82)

रूपरेखा

♦ उद्देश्य

इस यूनिट दे पाठें गी पढ़ने परैन्त विद्यार्थियें गी अपने पाठ्य-क्रम (सेलेबस) च लग्गे दे डोगरी कवियें दे जीवन परिचे ते डोगरी साहित्य गी उंदे योदान दे बारे च सरोखड़ जानकारी होई सकग । इसदे इलावा विद्यार्थियें च इ'ने कवियें दी कविता दे भाव ते कला दौनें द्रिष्टियें कन्नै मूल्यांकन करने दी समर्था बी पैदा होग ते विद्यार्थी इ'ने कवियें दे जीवन ते उंदी काव्य-सिरजना सरबन्धी सुआलें दे उत्तर देने दी योग्यता हासल करी सकडन ।

♦ पाठ – परिचे

इस यूनिट च त्रै पाठ न जिन्दे च डोगरी दे प्रमुख कवियें (प्रो. रामनाथ शास्त्री, वेदपाल दीप, अश्विनी मगोत्रा, किशन स्मैलपुरी दे जीवन-परिचे ते डोगरी कविता-साहित्य गी उंदे जोगदान दी चर्चा कीती गेदी ऐ । पाठ त्रै च प्रो. रामनाथ शास्त्री ते अभिशाप दे जीवन परिचे ते उंदी काव्य-सिरजन बारै विस्तृत जानकारी दिती गेदी ऐ ते चौथे पाठ च वेदपाल दीप दे जीवन परिचे ते उंदी कला-सिरजना बारै ते पञ्चमें च प्रकाश प्रेमी हुंदे जीवन परिचे ते काव्य-सिरजना बौर विस्तृत जानकारी दिती गेदी ऐ ।

♦ पाठ-प्रक्रिया

इस यूनिट दे सभने त्र'ऊं पाठे च :-

- (i) कवि-विशेष दा जीवन परिचे ते रचना प्रक्रिया
- (ii) कवि-विशेष दियां रचनां ते मान-सम्मान ते
- (iii) कवि-विशेष दी काव्य-सिरजना दा मूल्यांकन कीता गेदा ऐ ।

कवियें दे जीवन-परिचे ते डोगरी कविता-साहित्य गी उं'दा जोगदान

रूपरेखा

(4.1) उद्देश्य

इस पाठ गी पढ़िये विद्यार्थियें गी डोगरी दे सिरमौर कवि प्रो. रामनाथ शास्त्री हुंदे जीवन-परिचे ते डोगरी कविता – साहित्य गी उं'दे नमूल्ले योगदान बारे विस्तृत जानकारी हासल होग ते प्रो. रामनाथ शास्त्री दे व्यक्तित्व ते कृतित्व दे बारे च विद्यार्थी कुसै बी किस्मा दे सुआलें दे उत्तर देने च समर्थ होडन ।

(4.2) पाठ – परिचे

इस पाठ च प्रो. रामनाथ शास्त्री हुंदे व्यक्तित्व ते कृतित्व सरबन्धी जोड़दी जानकारी दिती गेदी ऐ ।

(4.3) पाठ-प्रक्रिया

- (i) प्रो. रामनाथ शास्त्री दा जीवन परिचे
- (ii) प्रो. रामनाथ शास्त्री दियां रचनां ।
- (iii) प्रो. रामनाथ शास्त्री दे कविता-साहित्य दा मूल्यांकन ।

(4.3.1) प्रो. रामनाथ शास्त्री ते डोगरी कविता-साहित्य गी उं'दा योगदान ।

i) जीवन-परिचे

डोगरी गी तैहरिक दा रूप देने आहले ते डोगरी साहित्य च बहुमुखी प्रतिभा दे धनी प्रोत्र रामनाथ शास्त्री कविता दे खेतर च नुमाया थाहर रखदे न । शास्त्री हुंदा जन्म 15 अप्रैल 1914 ई. गी माड़ी ग्रां च पं. गौरी शंकर हुंदे घर होआ । इ'ने अपना व्यावसायिक जीवन स्कूल अध्यापक दे तौरा पर शुरू कीता हा ते फही 1943 ई. च प्रिन्स आफ वेल्ज कालेज (जी.जी.एम.साईंस कोलज) च हिन्दी ते संस्कृत दे प्रोफैसर नियुक्त होए। कालेज थमां रटैर होने पर 1971 ई. च जम्मू यूनिवर्सिटी दे डोगरी रिसर्च सैल दे सीनियर-फेलो नियुक्त होए ते फही 1975-76 च जम्मू-कश्मीर कलचर अकैडमी च डोगरी –डोगरी डिक्शनरी दे 'चीफ अडीटर' नियुक्त कीते गे ते डिक्शनरी दे छे भागें दा सम्पादन कम्म सपूरा करिये उत्थूं दा सेवा निवृत्त होए। शास्त्री होंदे साहित्यिक जीवन दा आरम्भ हिन्दी च लघु-कथाएं कन्ने होआ । गुलाब सिंह ते दाता रणु उं'दियां दो सफल रचनां न । उ'ने एकांकी नाटक, गद्य, गीत ते लेख लिख । एह 'हिन्दी साहित्य मंडल' दे मन्त्री हे ते हिन्दी दी उन्नति आस्तै इ'दा बड़ा योगदान ऐ । सन् 1944 ई. च कश्मीर छोड़ो दा आन्दोलन शुरू होआ । उस बेल्लै डोगरी च कवतां छडे पं हरदत्त ते दीनूभाई पंत गै लिखदे हे । इ'ने दिनें भारत दे भिन्न-भिन्न प्रदेशें च अलाकाई भाषाएं दे हक्कै च आन्दोलन जोर पकड़दा जा करदा हा । एहदा डोगरी प्रेमियें उप्पर प्रभाव पौना कुदरती हा । रामनाथ शास्त्री ने समें दी इस जरूरता गी दिखदे होई डोगरी आस्तै जी-जान लाई दिती । इ'ने किज साथियें कन्ने सन् 1943 ई. च 'डोगरी संस्था' दी स्थापना

कीती जिसने डोगरी दे कन्ने-कन्ने डोगरी बोलने आहले लोकें आस्तै बी म्हत्वपूर्ण कम्म कीता । कला संगीत ते साहित्य दे खेतरे च डोगरें दे घटदे मान-गौरवा गी परयिँ स्थाप कराने आस्तै इस संस्था ने कम्म कीता । एह उं'दी इनथक्क मेहनत दा गै नतिजा ऐ जे अज्ज भामें ओह साढ़े विच्च नेई हैन पर उं'दे मार्ग-दर्शन च गै डोगरी गी अट्में शैडयूल च जगह मिली ते उं'दा एह मार्ग दर्शन अगै बी डोगरी दे साधकें गी प्रेरत रौहग ।

(ii) साहित्य-सिरजना

शास्त्री होर इक यर्थाथवादी ते प्रगतिशील विचारें दे लेखक न । प्रो. शास्त्री होरें कवता लिखना चिरैं शुरु कीती । शुरु च उनें कहानियां लिखियां ते पैहला डोगरी नाटक- 'बावा जित्तो' इ'नें गै लिखेआ जेहड़ा बड़ी सफलता कन्नै केइयें थाहरें स्टेज उपपर खेडेआ गेआ । सन् 1948 ई. च 'जागो डुग्गर' संग्रैह च होर कवियें कन्नै उं'दियां कवतां बी पैहलो पैहलो प्रकाषत होइयां ।

डोगरी साहित्य च प्रो. रामनाथ शास्त्री हुंदी बहुमुखी जतिभा दे दर्शन होंदे न । इ'नें डोगरी साहित्य दी हर विधा गी अपनिऐं सफल रचनाएं कन्नै बनाया - सोआरेआ ते समृद्ध कीता । इ'दी रचनाएं च कविता, गीत, कहानी, नाटक, निबन्ध-लेख आलोचना बगैरा औंदे न । इसदे अलावा हिन्दी, संस्कृत अंग्रेजी आदि दुइये भाषाएं दियें रचनाएं दे डोगरी अनुवाद बी खासी मात्रा च कीते दे न । डोगरी साहित्य गी शास्त्री हुन्दे योगदान दा ब्यौरा इस चाल्ली ऐ :-

धरती दा रिन	(कविता संग्रैह)
तलखियां	(गज़ल संग्रैह)
बदनामी दी छां	(कहानी संग्रैह जिस उपपर 1076 ब'रे दा साहित्य अकादेमी पुरस्कार प्राप्त होए दा ऐ)
झांकियां किरणां	(एकांकी संग्रैह)
बावा जित्तो	(नाटक)
बावा जित्तो	(बावा जित्तो दे जीवन दा ब्यौरा ते कारक दा साहित्यक मूल्यांकन)
नमां प्रां	(नाटक, दीनूभाई पंत ते रामकुमार अबरोल हुंदे कन्नै मिलियै लिखे दा)

इसदे इलावा शास्त्री होरें संस्था दी त्रैमासिक पत्रिका 'नमीं चेतना' दे नब्बे दे करीब अंके दा ते होर बी खासियें पुस्तकें दा सम्पादन कीते दा ऐ ।

अनुवाद कम्म च शास्त्री हुंदा योगदान खासा ते टकोहदा ऐ । शास्त्री हंदिंयें डोगरी प्रति सेवाएं गी दिखदे होई रियासती कल्चरल अकादमी ने इ'नेंगी 'रोप आफ ऑनर' जम्मू यूनिवर्सिटी ने डी.लिटं दी उपाधि कन्नै सम्मानत बी कीते दा ऐ । इसदे इलावा इ'नेंगी 1991 ब'रे च सरकार पाससेआ पद्मश्री दी उपाधि कन्नै ते जुलाई 2001 च साहित्य अकादेमी दी सारें कशा बड़्डी सदस्यता (Fellowship) कन्नै बी सम्मान कीता गेआ ऐ ।

(iii) प्रो. रामनाथ शास्त्री हुंदे कविता-साहित्य दा मूल्यांकन

डोगरी साहित्य च प्रो. रामनाथ शास्त्री हुन्दी बहुमुखी प्रमिभा दे दर्शन हुंदे न । इ'नें डोगरी साहित्य दी हर विधा गी अपनिऐं सफल रचनाएं कन्नै बनाया-सोआरेआ ते समृद्ध कीता । पर इत्थै साढ़ा सरबंघ सिर्फ हुंदी काव्य साधना कन्नै ऐ, जेहदे सुरें कन्नै सुर रलाइयै डुग्गर समाज, धरती ते जनता दे जीने दा

मरम बखानदे सेई होंदे न । कवता दे खेतर च शास्त्री हुन्दियां दौ प्रमुख पौथियां, 'धरती दा रिण' (कवता संग्रह) ते तलखियां (डोगरी गजलें दा संग्रह) डोगरी काव्य जगत दियां खास उपलब्धियां न ।

बहुमुखी साहित्यिक प्रतिभा दे मालक प्रो. रामनाथ शास्त्री हुंदी कविता सिर्फ इक मनोरंजक कविता गै नेई बल्के ज्ञानवर्धक, लाह पजाने आहली, पथ प्रदर्शक ते माहनू जीवन दे उत्थान आसतै कोई नां कोई सनेहा देने आहली बी ऐ । डोगरी काव्य-जगत च भामें इंदी इक गै कविता-संग्रह 'धरती का रिण' प्रकाशित ऐ पर इन्दियें कविताएं दा कैन्वस बड़ा मोकला ऐ । डुग्गर समाज ते डुग्गर प्रकृति दे सन्हाकड़े चित्रण, मातृभाषा डोगरी कन्नै डूहगा हिरख, सच्ची साधना दी म्हत्ता, समाजी परिवर्तन दी ताहग आदि बारै कवि दे मौलिक भाव बुद्धि-तत्व दी सगोसारी च पाठकें ते श्रोतें दे दिलो-दमाग उप्पर सुहानी तस्वीर बनाई जंदे न । इंदी कवता रूपी तरक्की दे कला दे भाव पक्ख रूपी दोयै पल्लड़े सामापन बनाई रखने दे धर्म गी नभांदे सेई होंदे न ।

'धरती दा रिण' कविता-संग्रह च शायद गै कोई ऐसा विशे होग जिसी शास्त्री हुंदी कान्नी ने मुखरत नेई कीता । इंदी कविता विशे दे कन्नै बुद्धि दी भुख बी मटांदी ऐ । कोई बी साहित्यिक रचना तां गै सफल ते चिरा भर टकाऊ बनी सकदी ऐ जेकर ओह पढ़ने ते सुनने आहलै दे मनोरंजन दे कन्नै-कन्नै कोई सिक्खमत देइयै उनेंगी किश लाह पजा । मन ते अकल, बरगद , अमर ऐ मनुक्खता, मेरे मनै रा भेती, नमी पीढ़ी आदि कवितां इस्सै बशेशता गी प्रगट करदियां न ते माहनु दे अंतर्मन गी झनकोर करादियां न । 'मन ते अकल' कवता च कवि ने मनुक्खी भावनाएं दा यथार्थवादी चित्तर पेश कीते दा ऐ । मनै दी डबरते अथाह ऐ ते इसदी सोच अनहोनियें गल्लें ते ला-हासल चीजें बक्खी द्रौड़ी पौंदी ऐ , व अक्ली दी नीरन मनै दियें मरादें गी नकाम ते बेमेना समझादे होई उसी ठाकदी ते ओहदी मूर्खता पर हसदी-गुडकदी ऐ, पर मन मस्ताना ठाकदे-ठाकदे बी अपने हठै दा जैहर पी गै लैंदा ऐ ते बाद च रोंदा, कल्पदा, पच्छोतांदा ते अकली गी गै दोस दिन्दा ऐ :-

“ते दिन्दा दोस अकली गी जे उसने भेत ख ोले, रोहै दी नौखरें कन्नै डरान्दा पच्छ लाने गी।”

इंदी कविता च मन ते बुद्धि दा समन्वय ऐ जिंदे च भाव ते विचार घुले-मिले सेही होंदे न । पर जे तुलनात्मक द्रिष्टी कन्नै दिक्खेआ जा तां इंदी कविता गी बुद्धि-प्रधान आखेआ जाग जिसदा साक्षात प्रमाण “मन ते अकल” कविता च मिलदा ऐ :-

‘अकल सोचै जे मेरे आखै जे एह मूंहजोर मन लगदा इसी अपजस नेई थहोंदा, इसी ठोकर नेई लगदी” ।

इंदी कविता इंदी विचारशील प्रकृति ते दार्शनिक द्रिष्टी दी परिचायक ऐ ते कुतै-कुतै एह कविता इंदे विचारें दी गै व्याख्या सेही होंदी ऐ । कुसै बी इक शीर्षक दा सहारा लेइयै ते फही उस शीर्षक दे ब्हानै अपने ज्ञान दियां परतां खोहलना शुरू होई जंदे न ते कविताएं इच विचारें दी झड़ी जन लग्गी जंदी ऐ ।

इंदी कविता च सिर्फ भावना दा गै प्रवाह ऐ, भावना इच बेहियै ते इक रूखे होइयै लिखदे चलना इलेंगी चंगा नेई लगदा अर्थात एह भावें कन्नै बुद्धि तत्व दा बी ताल-मेल बनाई रखदे न । इंदी कविता चिंतन दी भट्टी इच तपियै शुद्ध ते पवितर होइयै ते भावें दे दरेआ चा न्हाइयै निर्मल होई दी, उपमा, रूपक आदि अलंकारें कन्नै सज्जी दी, डुग्गर प्रदेश दी नारी दा प्रतिनिधित्व करदी सेही होंदी ऐ । कवि हुंदे अनुसार कविता ऐसी होनी चाहिदी ऐ जेहड़ी समें दे बंधन शा बाहर होऐ अर्थात समां बी सिर झकाइयै अगगै निकली जा ते कविता दी सत्ता ते सच्चाई इच कोई फर्क नेई पवै । अपनी कविता राहें इनें पाठकें तोड़ी ज्ञानबर्धक सद्विचार पजाने दा प्रयास कीते दा ऐ, जिस करी इंदी कविता इच दार्शनिकता ते चिंतन दी

प्रधानता ऐ । इ'दी कविताएं दा अन्दरला पक्ख इन्ना मता सशक्त ऐ जे सिर्फ कविताएं दे शीर्षक पढ़िये इन्दे सूखम भावें ते विचारें दा अनुमान नेई लगदा ।

‘बरगद’ नां दी कविता इस कवि ने बोहड़ी दे सूखम ते अनगिनत बीएं कन्नै स्रिष्टी इच अनगिनत जमने ते मरने आहले लोकें दी तुलना कीती दी ऐ जि'दें चा किश इस लोक गै अपले वंगे कम्मं कन्नै अपना नांS बनाई सकदे न ते चिर काल तक बनी रौहदे न:7

“सरेआ दे दाने शा लौहके
इक—इक बीऐ अन्दर केह ऐ ?
बोहड़ी दा ओह बूहटा बरगद ।
किन्ने बीS पर बरगद बनदे ?
किन्नी बीS एह जमदे — मरदे ?
अनगिनत एह जमदे—मरदे ।
कोई कोई पी बरगद बनदा ।
बीज अनेकां धरती पर
अनगिनती एह जमदे—मरदे ।
जीव—प्राणी इस दुनिया च,
कोई—कोई गै गान्धी बनदा ” ।

दार्शनिक विचारें दे अलावा कुतै—कुतै कवि ने आम लोकें दे जीवन इच विरह—वेदना दे बी किश द्रिश प्रस्तुत कीते दे न । शास्त्री होरें डोगरा जीवन दे बक्खरे—बक्खरे पैहलुएं पर कवतां लिखिदयां न । कदें ओह उनें'गी सवेत होने दा प्रोत्साहन दिंदे न, कदें उ'दी सुस्ती ते जड़ता आस्तै उ'दी आलोचना करदे न । घरेलू दृश्य बी उ'नें बड़ी स्पष्टता कन्ने चित्रित करते न । जि'यां पैसा कमाने आस्तै गेदे कैते दी विरह दी मारी दी गोरी दा दुख ते समाज दे सख्त बंधन कोलां लचार इक जोआन विधवा जेड़ियां खाहशां बी जोआन न । ‘चक्की’ कवता इक ऐसी जोआन जनानी दे बारे च लखोई दी कवता ऐ जिसगी कनकै ते मक्कें दा आटा रातीं बी पीहना पौंदा ऐ, जिस बेल्लै ओहड़ी सस्स—ननान गूढी नींदरा सुती दियां होंदियां न ।

“तेरे बाजू इत्त घर हिरखी नि होर कोई
अस दमैं जागनियां, बाकी सारे सौंदे न ”

जि'या चक्की दे द'ऊं पुड़ें इच दाने चात्म होई जंदे न उ'आं गै बजांगन दियें हीखिये ते औसियें दे दाने बजांग रूपी चक्की इस भजदे जंदे न :8

“दाने तेरे पुड़ें बिच चाएं—चाएं जंदे न,
मौती दा ऐ भौ जित्थै हिरखै दे धन्दे न
दाने मेरी हीखियें ते औसियें दे इ'यां गै
पकें पुड़ें बिच आई भज्जी फिस्सी जंदे न ।”

इस वियोगी वर्णन दे अलावा शृंगार इस दे सहयोगी पक्ख दे अर्न्तगतकिया ऐसे चित्तर बी तोआरे दे न जित्थे शृंगार दा शुद्ध ते पवित्तर रूप मिलदा ऐ —

“इकदम फही चुपचाप जन छाई गई
मुट्ठी-मुट्ठी बूंद त्रिप-त्रिप करी पौन लगी
अम्बरा दे हिरखी सनेह मिले धरती गी ।”

कवि ने प्रकृति-चित्रा दे बी बड़े सजीव ते मनमोहक चित्र प्रस्तुत कीते दे न । सन्नासर दा चेता करियै
कवि गी जे किश महसूस होंदा ऐ उसी कवि ने केई दियें हिरदे गी छुहने आहलियें उपमाएं कन्नै व्यक्त
कीते दा ऐ —

“चानचक्क औंगली गी कंडा जि'यां डंगी जा,
वासना दा लोरा जि'यां अक्खियें गी रंगी जा ,
जन्न प'वै पानिया च बधै जि'यां ओहदा घेरा,
इस्सै चाल्ली सन्नासर चेता मिगी आवे तेरा ।”

कवि दी द्रिष्टी छड़ी प्रकृति दे द्रिष्यें गी गै नेई दिखदी बल्के अन्तस गी छूहने आहली बी ऐ । इ'दी कविता
च असें गी उं'दा डोगरी (मातृभाषा) प्रति हिरख-प्यार किन्ना गैहरा ऐ— ओहदे दर्शन बी होंदे न —

“हस्सना ते रोना जि'यां सिक्खना निं पौंदा ऐ
अंग-अंग माहनुएं दे लहु जि'यां रौहंदा ऐ ।
भाषा कन्नै माहनुएं दा उ'यै नेहा नाता ऐ ,
माहनु न यामें भाषा उन्दे गितै माजा ऐ ।”

बहुमुखी भावे दा चित्रण शास्त्री हुंदी कविता दी खूबी ऐ । पर उं'दे च बी संघर्ष, साणना, मेहनत, कर्मठता
जां फही दार्शनिकता दे भाव मते चेचे ते मते टकोहदे न । कवि इस दुनियादारी दे नचारें थमां परै हटियै
उस अदृश्य, अगोचर, परेक्ष ते रहस्यमयी दुनिया बारै बी सोचदा ऐ , रहान होंदा ऐ ते बड़ा सतर्क होइयै
उस शक्ति गी जानने दी कोशश बी करदा ऐ —

“एह कुन जो इ'यां आई जंदा, चुप चाप गै कोल खड़ोई जंदा ,
मी घूरी-घूरी दिखदा ऐ, फही लाल ते पीला होई जंदा ।
पनछान कदूं दी एहदे नै, एह मैहरम कदू दा मेरा ऐ ।
अपनी मरजी ने इ'ई जंदा, पाई लैन्दा आईयै घेरा ऐ ।”
दार्शनिकता दा सुन्दर उदारहण —
“हर लैहर कनारे गी हाम्बै,
पर कदें कनारे रुकदी नेई ।
जिज्वर न्हरे दे घेरे न,
लोई दी मंजल मुकदी नेई ।”

कवि ने ईश्वर दी उस रहस्यमयी सत्ता गी प्रकृति दे कण-कण बिच दिक्खने ते उसर जानने दा प्रयास
कीते दा ऐ । जित्थै कवि गी प्रकृति दे खूबसूरत द्रिष्य अपने पाससै खिचदे ते प्रभावित करदे न उत्थै गै
उस प्रकृति दी चेतन शक्ति ने बी प्रभावित कीता ऐ ।

हिरख-प्यार दे बारें च बी कवि दा नजरिया बड़ा मौकला ऐ । कवि दी हिरखा सरबंधी व्याख्या दे अनुसार हिरख कुसै बी इस व्यक्ति, परिवार, राष्ट्र जां समाज तगर गै सीमत नेई बल्के एह हिरख कवि दी व्याख्या अनुसार देशकाल दी सीमाएं दा उलंघन करी जंदा ऐ, जिस करी एहदे च अमरता आह्ला गुण समाई जंदा ऐ ।

कवि दे अनुसार प्रीत रूपी किरण न्हरे गी लोई च परिवर्तित करी दिंदी ऐ, प्रलय आहले तूफान गी दिरखा दी कोमल तंदे इच कसोई जंदे न ते इस दिव्य हिरखा अगै मौती दा हर हीला हारी जंदा ऐ –

“मौती दी पतझड़ हारी गई, जीवन दे फुल्लें-लियें शा,
प्रलया दे मरुथल हारी गेख हिरखा दी रौसली गलियें शा ।
प्रीत दी किरणें दे छहोंदे, न्हरे च चानन होई जंदे
तुफान बवण्डर, हिरखै दी, कोमल तंदे च कसोई जंदे ।”

कवि ने अपनी कविताएं राहें हिरख-प्यार गी हर इक पासेआ दिक्खने दा जतन कीता ऐ । जेहड़ा हिरख “हिरखै दी संजीवनी” इस अमर, अथाह ते अलौकिक ऐ । उससै हिरख प्यार गी ‘मीरां’ नां दी कविता च मन दी मस्ती कन्नै प्राप्त होने आह्ला मन्ने दा ऐ । अर्थात् जिन्ने चा मना इच उस मस्ती दी लगन नेई जागै इन्ने चिर भखमी टल्ले, हत्थें च खड़तालां जां दुए बाहरी चिन्न हिरख पैदा नेई करी सकदे । हिरख दा एह अनमुल्ला साज मन दी मस्ती कन्नै गै मिलदा ऐ । इस मन दी मस्ती आहले प्यार-हिरख गी प्राप्त करने आस्तै अपने आप गी मटाना पौंदा ऐ –

“भसम केइयें अमी जिन्दू ते भखमी गल फसाए न,
ब’सुर मीरां दे थहोंदे नेई, अलख भाएं सौ जगाई ऐ ।
मनै दा ताल नेई जागै तां एह खड़ताल कित कारी,
मटाइयै आप मिलदी जो ओह मस्ती कुन्न पाई ऐ ।”

इसदे अलावा कवि दी नजर छड़ी हिरखी गलियें चा गै नेई गुजरदी बल्के समाज च माहनू दे दुखें ददे(गी बी दिखदी चलदी ऐ ‘कतल’ नां दी कविता इस दुखा गी थाहगने दा स्पष्ट उदारण ऐ ।

“जेहड़ा पानी दी छाती पर कुतै कोई जखम होंदा ऐ उसी तुस बुलबुला आखो”

कलापक्ख दी द्रिष्टी कन्नै बी शास्त्री हुन्दी कविता दा डोगरी कविता च उच्चा थाहर ऐ । बनकदे-फबदे शब्दें दी नरतून, भाषा गी सुन्दर ते भावें गी असरदार बनाने आहले अलंकारे दा प्रयोग बी शास्त्री हुन्दी कविता गी नरोआ गुहाड़ दिन्दे न ।

अभ्यास

खल्ल दित्ते गेदे सुआलें दा परता देओ ।

1. प्रो. रामनाथ शास्त्री हुंदे कविता साहित्य दा मूल्यांकन करो ।
2. प्रो. रामनाथ शास्त्री हुंदे व्यक्तित्व ते कृतित्व बारें जानकारी देओ ।

3. रामनाथ शास्त्री दी कविता बरगद बारै विस्तारपूर्वक लिखो ।

सहायक पुस्तकां

1. डोगरी साहित्य दा इतिहास – जितेन्द्र उधमपुरी
2. पद्मश्री प्रो. रामनाथ शास्त्री व्यक्तित्व ते कृत्तव-डोगरी डिपार्टमेंट
3. डोगरी कविता प्रमुख रूझान – डॉ. वीणा गुप्ता

(4.4) कवि अभिशाप ते उंदे काव्य साहित्य दा मूल्यांकन

i) जीवन-परिचे

कुलदीप कुमार 'अभिशाप' होंदा जन्म रामनगर च 8-10-1953 च श्री ज्ञान चन्द होंदे घर होआ । दसमीं क्लास तक एह रामनगर च गै पढ़े ते पही ऊधमपुर जाइयै दाखल होई गे । बी.ए. तगर एह ऊधमपुर कॉलेज च पढ़े । इसदे परैन्त इ'नें उर्दू च आनर्स बी कीता । पही सन् 1980 च इ'नें अंग्रेजी विषे च एम.ए. दी डिग्री कीती , इसदे बाद पही जिसलै जम्मू यूनिवर्सिटी डोगरी च एम.ए. दियां क्लासां शरु होइयां तां इ'नें 1984 दे पैहले बैच च गै डोगरी च एम.ए. बी करी लेई । घरै दी आर्थिक स्थिति खरी नेई होने करी इ'नें कई नौकरियां कीतियां ते कन्ने-कन्ने प्राईवेट पढ़ाई बी करदे रेह । एह मानसर मैहकमा इरिगेशन च त्रै महीने वर्क-सुपरवाइजर रेह । इ'नें कोओपरेटिव सोसाइटी उधमपुर ते चनैनी च बतौर क्लर्क कम्म की कीता । इ'दी पक्की नौकरी मैहकमा हार्टीकलचर च 1977 च लग्गी ते सन् 1982 ई. तगर इससै मैहकमे च क्लर्क का कम्म करदे रेह । जून 1982 गी एह शिक्षा विभाग च अध्यापक नियुक्त होऐ ते इसलै अंग्रेजी विषे दे लैक्चरर दे औहदे पर नियुक्त न ।

ii) साहित्यक जोगदान :-

कवि अभिशाप होरें लौहकी बरेसा च गै लिखना शुरू करी दिते दा हा । डोगरी भाषा च इ'नें डोगरी दे प्रसिद्ध कवियें वेदपाल दीप, यश शर्मा, कहरिसिंह मधुकर, दीनू भाई पंत बगैरा थमां प्रभाव त होइयै सन् 1970 च लिखना शुरू कीता । इंदी रचनाएं दा ब्यौर इस चाल्ली ऐ -

1. 'काली चिड़ी' (कविता-संग्रह) कवि अभिशाप हुंदा एह पैहला कविता संग्रह 1990 च प्रकाशत होआ । इस संग्रह च 15 लम्बियां कविता न ।
2. 'लालसा' अभिशाप हुंदा दूआ कविता संग्रह 1992 च प्रकाशत होआ । इस संग्रह च 70 कविता न । इस संग्रह पर इनेंगी साहित्य अकादेमी पुरस्कार बी थहोए दा ऐ ।
3. 'खलार' इंदा त्रिया कविता संग्रह सन् 1997 च प्रकाशत होआ ।

कवि अभिशाप होरेंगी बक्ख-बक्ख संस्थाएं पाससैआं सम्मान बी कीता गेदा ऐ ।

iii) काव्य साहित्य दा मूल्यांकन

अभिशाप होंदी कविता शुरु थमां गै सोच भरोची रेही । इंदा पैहला संग्रह 'काली चिड़ी' सिर्फ सोच भरोचा गै नेई बल्के प्रतीकात्मक बी ऐ । आखने दा भाव एह ऐ जे जि'यां काली चिड़ी जेह्डी अक्सर न्हरे च उडदी उे न्हरे गी चीरेद होई अपना रस्ता बनाई लेंदी ते उ'आं गै एह संग्रह बी पर्याप्त हद तगर समाज च फैले दे न्हरे गी चीरियै इक आशा दी किरण आहने दी आस लेइयै औंदी बझोंदा ऐ । डोगरी दे काव्य खेतर च काफी हद तगर इ'नें डोगरी कविताएं दे रूके दे पानिये गी चलाया, इक हलचल आहंदी । इससै

चाल्ली 'खलार' नांS दा कवता संग्रैह बी पर्याप्त हद तगर सोचे दा खलार ऐ । 'खलार' दियां मतियां हारियां कवितां अज्जै दे वातावरण गी स्पष्ट करदियां न ।

अभिशाप होंदा साहित्य सोचें-विचारें दे गुंझले कन्नै उलझे दा ऐ । इंदे काव्य साहित्य च भाएं कुसै बी किस्म दा रुसान की नेई होए पर होंदा ओह पूरी चाल्ली कन्नै चिंतन युक्त ऐ । कविताएं अक्सर सामराजी शक्तियें द्वारा होने आहले अत्याचारें दी झलक बी मिलदी ऐ । जिसदे कारण लोकें च नराशा बझोंदी ऐ । अभिशाप होरे लोकें दी मानसिकता गी चंगी चाल्ली नै समझदे होई अपनी कविताएं द्वारा उ'नेंगी सुर दित्ते दा ऐ । इंदी कविता मूक समाज दी भाषा दा कम्म करदी ऐ । पर इक किसम दे समाजिक वातावरण दे बावजूद बी कवि च अध्यात्मवादी दार्शनिक सोच बी कुतै-कुतै लभदी ऐ । किश इक मुखस रुझान जेहड़े इंदी कविता च मिलदे न ओह इस चाल्ली न -

iv) हिरख प्यार दी भावना :

समाज गी व्यवस्थित ते स्वस्थ रखने आस्तै उत्थूं दे लोकें च शिष्टाचार, सदाचार ते एकता जनेह गुण लभदे न जि'यां

“मिलन सूरज ते सागर दा
मेरी कलमै। दे बूहटे'र
माला फुल्ल-कलियें दी
सजरे हार दूरै दे
मती मस्ती नै झूलदे हे
मेरे अखर मेरे मेरे पखरू
चूनड़े चूठा सोचें दी ।”

v) एकता दी भावना

कवि अभिशाप होरें आपसी भेद-भाव गी छोड़ियै सभने गी इक-मिक होऐ दे ते इक रंग च रंगोए दा दिखना चाहरे ने जिस च बाहरले धर्म दे नांS उप्पर बने दे रंग-बिरंगे सारे चिन्न उस न्हरे च समाई जाडन जित्थे कोई रंग नेई लब्धै -

“कुदरत नै बी के सोची
इन्ने रंग खलारे' न
के मन्दर मस्जद' न
के धर्म दुआरे ' न
एह काश कदें साकी
इक होंरा मैखानां
नजरी नै नजरीमिलदी
इक होंदा पैमाना ” ।
“धरतिया दी छातिया च वाज इ'यै आ'रदी
सूरजै दी रागनी बी गीत इयै गारदी
हिरख प्यार ममता आहली जोत स्थिलदी जा'रदी
आदमी दी सोच जि'यां आदमी गी खा'रदी ।
ओ साथिया, ओ सज्जनां ओ बेलिया ओ मित्तरा
प्यार कर शेगार कर ।”

vi) प्रकृति चित्रण

असल च मनुक्खै दा प्रकृति कन्नै इक स्भाविक तोरा पर गै सरबंघ ऐ जिस करी ओह प्रकृति थमां बक्खरा होइयै नेई रेही सकदा । पही अभिशाप जनेहा इक संवेदनशील कवि प्रकृति थमां प्रभावित होए बिन कि'यां रेही सकदा ऐ । एह प्रकृति दे मनुक्खै कन्नै जम्हांदरु सरबंघ दा गै प्रमाण ऐ जे अपने बपचन ते जुआनी दे बीते दे सनैहरी खिनै गी चेता करदे बेल्ले जिसलै कवि उस पिछले वातवरण गी मानसिक अक्खिये कन्नै दिक्खियै ओहदा वर्णन अपनी कविता च करदा ऐ तां प्रकृति दे बक्ख-बक्ख उपकरण ओहदी अभिव्यक्ति च स्भाविक ढंगे कन्नै अपने आप गै समाई जंदे न –

“सुहानी स'जां दी गोरा
इ'नें लैहरें दी छाती च
नमां संगीत छेड़ी ऐ
सजान्दे हे पजेकी गी,
पक्खरु गीत गांदे हे
मिलन धरती ते अम्बर दा ।”

vii) व्यंग्यात्मकता

अभिशाप होरें मतियें हारियें कविताएं च व्यंग दी झलक बी मिलदी ऐ । हिन्दोस्तान दी वर्तमान स्थिति उपर अभिशाप होंदी प्रतिक्रिया च मिलने आहले व्यंग च औचित्य दिक्खने जोग ऐ जित्थे विश्व भाईचारे दी आड़ च भारती सभ्यता दा पञ्चमी करण होंदा जारदा ऐ । इस मिट्ठी छुरी आहली महीन मार गी अभिशाप होरे व्यंग्यात्मक ढंगे कन्नै इस चाल्ली प्रस्तुत कीता दा ऐ ।

“मेरी कलम बेची
डूटे गी खिच्ची
भज्जे – त्रट्टे
सुमरु भरोचे
सिनकू नै खादरे
एह गरसाल बाल्ले
मुडै दी माला गलै च लपेटी
खूली दमाकै नैं
खडाली गी खुंडी
खडाली मरुंडी
खडाली मरुंडी
कंधै च बरगे दा
नीएं च अरगे दा
ऐटम धालोफी
लोथें दी पल – पल
औहती देआ दे,
सन्धि करा दे
विश्व शान्ति दी ।”

viii) रहस्यवादी विचार :

अभिशाप होंदी विचारशल कविताएं च रहस्यवादी विचार केई थाहरे पर मिलदे न । इस सारी झिण्टी गी चलायमान रखने आहली नियमत ते व्यवस्थित ढंगे कन्नै क्रियाशील बनाई रखने आहली शक्ति दी रहस्यमता दे बारे कवि दे सूखम विचार इस चाल्ली न :-

“मेरी भड़कना तेरी भड़कनां
मता नाजक कोई रिश्ता ऐ
कदें तूं कोल बैठे दा
कदें तू दूर सेही होनां
फर्क किश नीं
फर्क ते लक्खां
तूं कुदरत दा तेरी कुदरत
औ कुदरत दी मती सुन्दर
मती प्यारी कोई मूरत आं।”

ix) कर्मशीलता दा सनेहा :

कर्म खेतर दी बत्ता पर चलने ते अगगै बधने दी आस लेइयै चलने आहले कवि अभिशाप होर इ'यै सनेहा दिंदे ने जे :-

“गीत मंजल दे गांदे चलो साथियो
पैर अगड़े बछांदे चलो साथियो
कम्म कोई बी औखा, नामुमकन नेई
कोशिशें करो कोशिशं रज्जिये
छोड़ी आलस दलीद्र ते एह नींदरां
सुत्ती हिम्मत जगांदे चलो साथियो ।”

x) संघर्ष ते क्रांति दा सुर :

कुसै बी प्रगतिवादी कवि च संघर्ष ते क्रान्ति दा सुर-मिलना इक साधारण गल्ल ऐ । के जे जीवन च अगगै बधने आस्तै मुनक्खै गी संघर्ष ते करना गै पौंदा ऐ ते संघर्ष अपनी चरम सीमा उपपर पज्जने पर केई बारी क्रान्ति दा रूप बी धारण करी लैंदा ऐ ।

“काली चिड़ी” कविता संग्रह च कवि अभिशाप दे द्रिष्टीकोण च बी संघर्षवाद ते क्रान्ति दा सुर गुझदा ऐ । कवि समाज दी विकृत व्यवस्था गी सुधारने आस्तै क्रान्ति आहनना चांहदा ऐ । ‘समर्पण’ कविता च कवि दे शब्द न :-

“तुप्पा करनां कवता दी उस पडती गी
जिसदा इक-इक अक्खर लभदा
रोज म्यागा फैल्ली-फैल्ली खबबली उपपर
पद फही बी की ओह पडगी
अज्ज बी मेरे शा दूर मतै किश ?

किश अक्खर जन, किश बिन्दु जन
मृग तृष्णा आंगर मेरी अक्खी दे
पड़दे'र मनै रे खेड़े खरज उप्पर
परती-परती चमका करदी ।”

इस्सै चाल्ली 'वरदान' च बी क्रांति दा सुर मिलदा ऐ जिस धरती मां उप्पर घटने आहली बेन्याई दी गल्ल
कीती गेदी ऐ –

की मां तेरा कोमल चारा । जीन चलाई
फूका करदे मां पुत्तर तेरे ?
की दुद्ध जैहर बनियै डंग लाई जंदा ,
माऊ दी छाती फही गी तूं चुपचाप
खड़ोती जुगै-जुगै शा दिक्खा करनी ?

.....

कवियों का जीवन – परिचे ते डोगरी कविता – साहित्य गी उं'दा योगदान

रूपरेखा

(5.1) उद्देश्य

इस पाठ गी पढ़िये विद्यार्थियों गी डोगरी दे सिरसौर कवि “श्री वेदपाल दीप ते किशन स्मैलपुरी हुंदे जीवन—परिचे ते डोगरी कविता साहित्य गी उंदे नपुल्ले योगदान बारे विस्तृत जानकारी हासल होग ते वेदपाल दीप ते किशन स्मैलपुरी दे व्यक्तित्व ते कृतित्व दे बारे च विद्यार्थी कुसै बी किस्मा दे सुआलें दे उत्तर देन च समर्थ होडण ।

(5.2) पाठ – परिचे

इस पाठ च वेदपाल दीप ते किशन स्मैलपुरी हुंदे व्यक्तित्व ते कृतित्व लोडचदी जानकारी दिती गेदी ऐ।

(5.3) पाठ—प्रक्रिया

- (i) वेदपाल दीप का जीवन – परिचे
- (ii) वेदपाल दीप दियां रचनां
- (iii) वेदपाल दीप दे कविता साहित्य का मूल्यांकन
 - (i) किशन स्मैलपुरी का जीवन – परिचे
 - (ii) किशन स्मैलपुरी दियां रचनां
 - (iii) किशन स्मैलपुरी दे कविता साहित्य का मूल्यांकन
 - (iv) वेदपाल दीप ते किशन स्मैलपुरी डोगरी कविता साहित्य गी उं'दा योगदान ।

(5.3.1) जीवन—परिचे

अज्जै कोला मता चिर पैहलें वेदपाल दीप होरे आपूं गै अपने इक पेपर च लिखेआ हा जे अगर डोगरी चा मधुकर, दीप, यश ते पद्मा गी कड़्डी दित्ता जा जां डोगरी साहित्य दी उ'यै हालत होग जि'यां नादरशाह नै दिल्ली इक बारी फही लुट्टी लेई होऐ । एह गल्ल मते ब'रें परैन्त बी उन्नी गै सच्च ऐ जिन्नी अदूं ही । 'दीप' हुंदी गजल दी सोच दूर पताल तगर झूहगी ऐ । दीप होरें डोगरी शायरी कन्नै उ'यै कीता, जेहड़ा गालिब नै उर्दू शायरी कन्नै कीता ।

'वेदपाल दीप' हुन्दा जन्म 3 जून 1929 गी जम्मू शैहरा च पं अमर चंद धर्मट्ट होंदे घर होआ । इन्दे पिता मैहकमा इन्कम टैक्स च सुपरिटेन्डेंट हैं । जि'नें दिनें एह स्कूल पढदें हे उ'नें दिनें च गै इंदा इक हिन्दी कविता संग्रह 'दो सैनिक' नां कन्नै छपेआ हा फही उ'नें दिनें च गै इक शृंगार इस प्रधान इंदी बीहें सफे दी

लम्मी कविता 'शल्या' छपी जेहड़ी बड़ी मशहूर होई । सन् 1952 च इ'ने लखनऊ विश्व-विद्यालय चा हिन्दी च एम.ए. कीता ते कोई सरकारी नौकरी नेई करदे होई इ'ने राजनीति दे खेतर च अपनी गैँड रखी । डोगरी संस्था दे सम्पर्क च औनं उपपर इ'ने डोगरी च लिखना बी शुरू करी दित्ता ते सन् 1948 च राष्ट्रपिता महात्मा गांधी दी हत्या उपपर 'बापू दे संघी कपूत' शीर्षक कन्नै इक लम्मी कविता लिखी, कविता च साम्प्रदायकता उपपर व्यंग कीता गेदा हा ।

इंदियां माता जी शान्ति देवी होर इक पढ़ी लिखी दियां महिला हियां । वेदपाल दीप घरै च टिक्का पुत्त हो ते पढ़ाई-लखाई च म्हेशां फस्ट औंदा हा । माता जी दा वेदपाल दीप कन्नै बड़ा लाड हा ते ओह इ'नेगी 'मुन्ना' आखदियां हियां । हिन्दी, उर्दू ते अंग्रेजी त्रौनें भाषाएं च इ'नेगी म्हारत ही । अपने विद्यार्थी जीवन च इ'नेगी साहित्य-सिरजना च रुचि होई पेई, अपने कालेज दी पढ़ाई दे दरान इ'नेगी हिन्दी च काफी अच्छियां कवितां लिखियां ते एह कालेज दी पत्रिका दी डोगरी सैक्शन दे सम्पादक बी रेह ।

दीप होर पढ़ाई च अब्बल औंदे हे ते , इंदा दस्तखत बी बड़ा शैन हा । दसमीं च रियासता च फस्ट औने मगरा दीप 1945 ई. च उसने दे प्रिंस आफ वेल्ज कोलज (अज्जै दे साईस कालेज) च दाखल होई गेआ । ओह कालेज च 'रोल नम्बर वन' दे नांइ कन्नै मशहूर हे पर थेहड़ी देर दे बाद गे दीप दी दिलचस्पी पढ़ाई च घटन लगी पेई ओह कालेज च स्टूडेंटस यूनियन ते साहित्यक गतिविधियां च हिस्सा लैन लगी पे । कन्नै-कन्नै मुलखै च आजादी दी लड़ाई तेज होने करी उसदी दिलचस्पी इस पाससै बी बधन लगी पेई । जुआनी दी डुआठन पर पर धरदे गै उसदे अंदर हिरख-प्यार दे भाव बी जागन लगी पे । उसदा मन उसदे म्हल्ले च रौहने आहली कौशल्या नां दी कुडी आल्ल खचोन लगा, ओह स्कूल पढ़दी ही । दीप ने उस उपपर इक लम्मी कविता 'शल्या' लिखी ओड़ी ।

दीप हुंदी कविता उस समाज दी नुमांइदगी करदी ऐ जेहड़े च ओह आपू रौहंदे न । चरम देव सिंह निर्दोश, कुलदीप जिन्द्राहिया, जितेन्द्र शर्मा ते केहरि सिंह 'मधुकर' जनेह साहित्यकारें कन्नै इंदी दोस्ती ही । आपू बी इक फक्कड़ सभाइ दे माहनू हे । इससै करी एह रंग भेद नसल शा उपपर समता दे हाम्मी हे । फर्को-फर्की सब मिटी मुक्की जा ते सबै इक्क जनेह होइ जान । उं'दा द्रिष्टीकोण समाज च समता आहनने आह्ला हा । इस फक्कड़ ते साफ-गो शायर कशा डोगरी कविता-गजल गी केई तलचां पर बे-रैहम मौत उसगी तौले गै 4 फरवरी 1995 गी डोगरी साहित्य दी इस फुलवाड़ी च खंडाड़्यै लेई गई ।

ii) साहित्य सिरजना

दीप होरें सन् 1948 च डोगरी भाषा च लिखना शुरू कीता ते 1948 ई. च गै राष्ट्रपिता महात्मा गांधी हुंदी हत्या पर 'बापू दे संघी कपूत' नांइ दी इक लम्मी कविता डोगरी भाषा च लिखी । इस लम्मी कविता कन्नै गै दीप ने डोगरी च काव्य-सिरजन दा अपना मुसल्सल सफर शुरू करी दित्ता । 'नमीं अजादियें', बदली गई दुनियां जा बदली गई अक्ख', 'बदला नै सिज्जी दी सं'जां', कल हा में कल्ला मेरे साथी निं गनोन अज्ज, मैखाने, फालतू कम्म आदि सुन्दर ते भावपूर्ण कविता लिखियां । अपनी कालेज दी पढ़ाई दे दरान इ'ने हिन्दी च काफी अच्छियां कवितां लिखियां ते एह कालेज दी पत्रिका दी डोगरी सैक्शन दे सम्पादक बी रेह । इ'दी 'शल्या' नांइ दी कविता बड़ी सुंदर ते प्रवाहपूर्ण ही, दूआ शंगार रस च ही ते काव्यात्मक गुणें कन्नै मालामाल ही, जिसदी बड़ी चर्चा होई । इस च दर्द-बेदन बी हा, रोमांस बी ते भाषा-प्रवाह बी अनोखा हा । 'दो सैनिक नांइ दा लौहका हारा कविता संग्रह बी हिन्दी च छपेआ जिस च राजनैतिक वचार ते क्रांतिकारी भावना प्रबल ही । इंदी पैळली कविता ही -

डोगरें लोकें दी गल्ल केहू आखनी
 रौहदे न बनाइयै सारें कन्नै ।
 रस्ते च इंदे भाएं कण्डे खलारो
 मिलदे न फुल्लें दे हारे कन्नै ।

डोगरी कविता च दीप दी पन्छान इक गजलगो शायर दे रूपा च टकोहदी ऐ । इंदे गजल संग्रैह 'अस ते आं बनजारे लोक' 1968 ई. च छपेआ जेहड़ा डोगरी गजल साहित्य दे बगीचे दा पैहला फुल्ल आखेआ जाई सकदा ऐ । दीप ने डोगरी च उसलै गजल लिखी जिसलै टामें-टामें साधक गजल दी इस रियाज च लग्गे दे हे ते बत्त अजें बनाने जोगी ही । उसदी बनाई दी एह पगडंडी अज्ज इक सरोखड़ रस्ता बनी गेदी ऐ । ते गजलगो शायरें दा इक सरोखड़ काफला इस बत्तै दा मैहरम बनी गेदा ऐ । 'अस ते आं बनजारे लोक' पर इनेंगी रियास्ती कल्चरल अकैडमी दा पुरस्कार बी प्राप्त होऐ दा ऐ ।

iii) वेदपाल दीप हुंदे कविता-साहित्य दा मूल्यांकन कवि अपने समाज दा प्रतिनिधि होंदा ऐ । असली च कवि उयै होंदा ऐ जेहड़ा अपनी कवता च समाज दी सच्ची व्याख्या करी सकै । जीवन केहू ऐ ते उसी किंया जाचेआ परखेआ जाई सकदा ऐ । एह पक्ख कवि दी कवता च खुल्लना चाहिदा ऐ ।

दीप बी समाज दा प्रतिनिधि कवि ऐ । उसदे मताबक जीवन दा अमरत प्राप्त करने आस्तै पैहले अनुभूतियें ते समाज दी बेदनें दा जैहर पीना पौंदा ऐ ते समाज च होने आले अत्याचारें दे न्हरे गी दूर करने आस्तै दिव्ये आंगर जलना पौंदा ऐ । एह दुक्ख झल्लिए गै अमरत दा सुखाप्त होंदा ऐ । कवि आखदा ऐ जे जीवन च संघर्ष करदे होई गै अस अपने सनैहरे भविकख दा निर्माण करी सकनें आं । इसदे आस्तै साढे रस्ते भाएं किन्ने औखे ते कष्टकारी होन असें रूकना नेई चाहिदा । जेकर अस कम्म कीते बगैर पैहलें गै सुख दी चाह करचै तां साढा लक्ष्य दूर उठी जंदा ऐ । ओह आखदा ऐ –

राह डिब्ब-खडिब्बी पार करी,
 जिन्दगी दे नाडू ने बुज्जेआ ।
 पछरै रस्तै पेइयै औखा
 किज घेर सफर होई जंदा ऐ ।

कवि दीप गी समाज दे बुरे रस्म-रवाजे कन्नै बड़ी खिज ते असन्तोश ऐ । ओह उसी बदलना चाहदा ऐ । उसी किस्मतू दे भरोसे छोड़ना कवि गी मन्जूर नेई ऐ । उसी अपनी शक्ति पर इन्ना विश्वास ऐ जे उसी एह कम्म करने आस्तै कुसै दे सहारे दी लोड़ नेई ऐ । असल च समतावादी कवि गै प्रगतिवादी दे हामी होंदे न इस्सै करी वेदपाल दीप होरें आदर्शवादी ते व्यक्तिवादी विचारें आहले कवियें आंगर पिछले समें कन्नै जुड़ी रौहना ठीक नेई समझेआ ते अगें बधने दी सोच आम लोकें च भरदे होई आखेआ –

“गोआची गोआ ऐ बरेतिया च नमीं घास पा,
 पछोकड़ै बलग नेई, जने-खने शा राह निं पुच्छ ।”

अर्थात् कवि इक-दुए गी पुच्छी पुच छियै समांऽ नेई गोआना चाहदा ते बीते दे समेंऽ बारै सोची-सोचियै अपना भविकख होर नेई खराब करना चाहदा । जीवन च कर्महीन होइयै बेही रौहना कवि गी इ'यां सेही होंदा ऐ जे जि'यां एह जिंदगी बी इक भार जन ऐ तां गै कवि कोला अपने आप गै बलोई जंदा ऐ –

“कीता निं कक्ख, साह इ-यां लभन चढ़ै दा सूद
 जिदंगी इ'यां जि'यां देना कुसै दा करज ।”

अर्थात जेहड़े अपने जीवन च किश नेई करदे उ'नेंगी आखरकार पश्चाताप करना पौंदा ऐ —

“कीती नीं जि'नें नाह—नुक्कर
ओह दूर दराडे जाई पुज्जे
जो सोच दलीलां ऐह करदे
बैठे रे हत्थें गी मलदे रेह”

दीप हुंदी कविता उस समाज दी नुमांइदगी करदी ऐ जेहदे च ओह आपूं रौहदे न । एह रंग भेद नसल शा
उप्पर समता दे हाम्मी हे । फर्को—फर्की सब मिटी—मुक्की जा ते सबै इक्क जनेह होई जान । उं'दा
ट्रिष्टीकोण समाज च समता आहने आहला हा । जि'यां हेठ लिखी दियें पंगतियें च —

“होलिये आ होलिये जा
कुसै दे हल्ले न चिट्टे ते शैल ।
कुसै दी चादरा उप्पर ऐ मैल,
छाई जा खुशी ते र'वै नेई शैक ।
इक नेह लभन सारे एह लोक ।”

वेदपाल 'दीप' हं'दी जिंदगी च कावय—सिरजना दा जिन्ना थाहर ऐ उन्ना गै सियासत दा बी है । पर एह
ओह सियासत नेई जेहदे च अपने जाति नफे दी कोई लालसा होऐ । एह ओह नरोई सियासत ही जेहदे च
जन जन दी भलई दी उं'दे उत्थान दी भावना दा नेक उद्देश्य रचे बस्से दा हा । दीप अपनी मुंढली जिंदगी
कोला गै इस सियासत दा रंगा च रांगाए दे हे । ओह यूथ फैंडरेशन दे स्टुडेंट फैंडरेशन दे सरकारी
कारकुनें ते संस्थाएं दे नेता बी । एह मार्क्सवादी विचारधारा दे हामी हे । सैह इंदी कविता 'फालतू कम्म'
च मार्क्सवादी विचारधारा गी बड़े सुनक्खे ढंगा कन्ने पेश करदे होई मुनाफे दी व्याख्या कीती गेदी ऐ:—

मेरा क्याफ़ा ऐ
इ'यै फालतू कम्म
जेहदा भी मुआवज़ा नेई थहोंदा
मुनाफा ऐ ।
जेहदा में नौकर आं
इस्सै दे बलबूते पर, ब'नदा साफ़ा ऐ ।

दरअसल दीप होरें इस कविता च अपने माध्यम कन्ने इक मजदूर दी स्थिति दी तर्जमानी कीती दी ऐ ते
पूंजीवादी अर्थव्यवस्था लुटेरी अर्थव्यवस्था आखे दा, जिसदी नीह इक मजदूर ऐ ।

इस्सै चाल्ली अपनी 'मैखानें' कविता च बी दीप होरें द'ऊं किस्में दे मैखानें दा वर्णन कीते दा ऐ । इक ओह
मैखाना ऐ जित्थै बड़डे—बड़डे अफसर ते नेता लोक जनता दे हक्का दा सारा पैसा ते दौलत अपने
ऐशपस्ती च लटांदे न ते दूआ ओह मैखाना ऐ जित्थै लोकें गी रूट्टी दे बी तरले लगदे न । कनेही
विडम्बना ऐ । इ'नें भ्रष्टाचारी—दुराचारी ते मीर लोकें गी इत्थै इज्जत ऐ, रूतबा ऐ ते मेहनत मजूरी करने
आहले गरीबे दी मिट्टी पलीत ऐ । क्या सुंदर बोल न कविता दे :—

“फर्कोफर्की दी दुनियां च बक्खरे—बक्खरे मैखानें न
जाम—जाम कन्ने टकाराइयै
मस्त पियक्कड़ बचकाने न

सुआद तदूं पीने दा जारो
जिस दिन मैखाने टकराडन ।”

आम आदमी दे संघर्ष ते गरीबी, कर्जाऊ जीवन दा बी उ'नेंगी पूरा एहसास ऐ । कवि इससै भाव दा चित्रण इस चाल्ली करदा ऐ :-

रिश्ते ते नाते बनदे नेई साढ़े,
फिकरा दी राती, चिन्ता दे ध्याड़े ।
पैसे सिरा, पर कर्जा दे चाढ़े,
अगें-अगें खबरै होना केह ?

दीप हुन्दे काव्य च डुगार ते डोगरें दी अकासी बी सुन्दर ढंगे कन्नै होई दी ऐ -

“बागे दे बिच जिंयां फुल्लें दी क्यारी ऐ,
क्यारी दे बिच जिंयां मोतिये दा फुल्ल ।
इयां गै दुनियां च हिन्दोस्तानी न,
ते उ'दे च डोगरे देसा दा मुल्ल ।”

शंगार रस दी बड़ी सुंदर ते प्रवाहपूर्ण लम्मी कवता 'शल्या' जिस च उ'नें अने म्हल्ले च रौहने आहली कोशल्या नांS दी कुड़ी कन्नै हिरख होई जाने पर लिखेआ हा काव्यात्मक गुणें कन्नै मालामाल ही, जिसदी बड़ी चर्चा होई ।

“शल्या मुझको देख करती
जब मैं छत पर पढ़ने जाता
वह भी भागी-भागी जाकर
नीचे से बस्ता लाकर
झूठ-मूठ पढ़ने लग जाती,
मैं भी कुछ न पढ़ने पाता ।”

वेदपाल दीप डोगरी दा आगू कवि हा, जिसदी कविता जीवने दे यर्थाथ दे बन-सबन्नं रंगे गी तर्जमानी करने करी हर बेल्ले हर परिवेश च अपना मान-मुल्ल स्थापत करने आहली ऐ । अपनी कविताएं राहें उ'नें जो किश आखने दा जतन कीता ओह सभनें दे अन्तस गी छूहने आहला , मसीबतें दे न्हरे च उदमें दे दिये बालियै संघर्ष दी बत रोशन करने आहला ऐ ।

खीर च उ'दे शेयर राहें मैं एह गल्ल हांहै दोई जंदी ऐ जे दीप कु'न हा ते डोगरी साहित्य च उसदा केह मुकाम हा ।

“कोई उस्ताद कीता नां कोई तकरीब सिकखी,
हुनर गजलै दा ऐसा, क औंदा निं सखाए ।
मुकदी ऐ खीर 'दीप' दी गजलें पर आनियै,
कुदरै चलै जे डोगरी दे शायरें दी गल्ल ।
'दीप' बैतल ते खोआंदा, बो इ'नें गजलें परैत
बिचो-बिच मन्नदे न हून लोक कलाकार बी ऐ ।

अभ्यास

खल्ल दित्तें गेदे सुआलें दा परता देओ ।

1. वेदपाल 'दीप' हुंदे व्यक्तित्व दे कृतित्व पर लोऽ पाओ ?
2. वेदपाल 'दीप' हुंदे कविता-साहित्य दा मूल्यांकण करो ।
3. वेदपाल 'दीप' दी कविता मैखाने ते शल्या कविता बौर अपने विचार प्रकट करो ।

सहायक पुस्तकां

1. डोगरी कविता प्रमुख रुझान – डॉ. वीणा गुप्ता
2. वेदपाल 'दीप' रचना संसार – मोहन सिंह
3. डोगरी साहित्य दा इतिहास – जितेन्द्र उधमपुरी ।

(5.3.2) कवि किशन स्मैलपुरी ते डोरी साहित्या गी उं'दा जोगदान

i) जीवन-परिच

डोगरी दे नामवर गीतकार 'गजले दे उस्ताद' ते कवि किशन स्मैलपुरी हुंदा जन्म तसील साम्बा दे इक मशहूर ग्रां स्मैलपुर च होआ । इंदे पिता पंडित सुन्दर दास राजा रामसिंह हुंदे पूजा विभाग च मलाजम हे । इंदी माता जी दा नां 'मैहरी हा । इंदी इक भैन ही जिसदा ब्याह अरनियां च होआ ।

स्मैलपुरी हुंदा ब्याह लौहकी उमरी च गै होई गेआ । उंदी धर्मपत्नी साम्बा नगरे दे इक जगरीदार घराने चा ही । उसका प्यौके आह्ला नां 'रुकमणी' हा जेहड़ा उस समें दे रवाजा मताबक सौहरे घर आइयै बदलोई गेआ ते ओह 'रुकमणी' थमां 'संसारदेई' खुआन लगी पेई । स्मैलपुरी हुंदा 27 जनवरी 1981 गी इंदे निवास स्थान गांधी नगर च सुर्गवास होई गेआ । किशन स्मैलपुरी हुंदी पढाई दा श्रीगणेश स्मैलपुर ग्रां दे इक सरकारी स्कूल दे मास्टर तुलसीराम कशा होआ । स्मैलपुरी हुंदा शौक क्रिकेट खेदना बी हा । विद्यार्थी जीवन च गै इंदी क्रिकेट दे खढारी होने दी चर्चा दूरा-दूरा तगर जाई पुज्जी दी ही । फलस्वरूप इन्नेगी महाराजा प्रताप सिंह हुंदी शाही टीम च शामिल करी लैता गेआ ते बीह रपेऽ म्हीना बजीफा बी थोन लगी पेआ । शायरी करने दे कन्नै-कन्नै स्मैलपुरी होर नाटक ते संगीतकला च बी म्हारत रखदे हे । आखेआ जंदा ऐ जे इंदे घरा कश मरासियें दा इक घर ही जिंदे कन्नै इंदे बौहन-खडोन मता ही । संगीत कला च रुचि इन्ने गर उंदे साथ थाना गै थोई ही ।

ii) रचना –

1. मेरियां डोगरी गजलां 1973 ई.
2. मेरे डोगरी गीत 1974 ई.
3. श्री वैशणों (हिंदी च), असूज
4. फिरदौस वतन (उर्दू नज्मा) 1961 ई.

इसदे इलावा मते सारे लेख, कवतां, गीत, गजलां नामीं पत्र-पत्रिकाएं च छपे ।

iii) किशन स्मैलपुरी हुंदे कविता-साहित्य दा मूल्यांकन

किशन स्मैलपुरी हुंदी कविता दा मुंढला सुर देश प्यार आह्ला रेहा । उंनें मातृभूमि गी माऊ दे सतुल्ल मनदे होई 'फिरदौस सक बढ़कर है यह मेरा वतन डुंगर' कविता संगैह छपोआया । इंदे गीतें दा मुख

तौरा पर विशे शंगार ऐ, बशवक भगती सरबंधी रचनां बी इ'ने कीती दियां न । स्मैलपुरी हुंदी कविता दी भाषा आम फेह्म ऐ ते लोकगीतें दी तर्जमानी करदी ऐ । इ'ने गीतें गजलें दे लावा दोहे, कुंडलियां सवैये, छन्द, चौपाइयां बी लिखी दियां न ।

किशन स्मैलपुरी होरें अतीत ते गौरव गी बी अपनी रचनाएं च थाहर दित्ते दा ऐ :-

‘उत्थें गै बावा जित्तो ने सिर हक्कै खाता दित्ता हा ।
पर फूकी दस्सेआ इक बारी जुल्मा दा उसने पित्त हा ।
मैं जिसदे नां दा अज्जै तब, पापें दे पर्वत ढंदा ऐ,
औं उस मुलखै दा पैछी आं, ओ डुग्गर देस खुआंदा ऐ ।
(डोगरी पैन्छी)

कवि किशन स्मैलपुरी गी अपने मातृभूमि कन्नै अनसम्भ प्यारे ऐ । उंदी नजर च डुग्गर भूमि सुरगै कोला बी मती शैल ऐ । अपनी मातृभूमि आस्तै कवि दे मनै च अपार श्रद्धा ऐ । डुग्गर भूमि दा गुणगान करदे कवि गलांदा ऐ :-

‘सुरग दी गल्ल निं ला अड़ेआ, (सुरगै दी गल्ल)
जस अपने देसा दा गा अड़ेआ’ (सुरग-देस)

कवि किशन स्मैलपुरी होर डोगरें दे स्भाऽ-सुआतम कन्नै बी शैल चाल्ली कन्नै वाकफ हे । अपनी इक रचना च डोगरें दी प्रशंसा ओह इ'ने शब्दें च करदे लभदे न :-

“भाखा लाई-लाई बांहदे ते रांहदे
हस्सी-हस्सी बढदे ते नच्ची-नच्ची गांहदे
बैहले कदें बी नि बौहन्दे
इ'ने ठंडे प्हाड़े दे लोक सदा राजी रौंहदे ।”
(गीत)

किशन स्मैलपुरी दी कविता च प्रकृति चित्रण बी मता होए दा मिलदा ऐ । डुग्गर दियां धारां कवि दी नजरी च शलैपे ते शीतलता दियां प्रतीक न । उंदे शब्दे च :-

“चल कुतै ठंडियां धारा चैचलो ।
चल कुतै ठंडिया धारा
तपी-तपी धरत तरामें आंगू होई दी
शिकल दपैहरी कैहसी फिरनी बतोई दी ।”

(5.4). अभ्यास

इ'ने कवियें दे जीवन ते काव्य-सिरजना बारै अपने विचार लिखो :-

- i) किशन स्मैलपुरी
- ii) प्रो. रामनाथ शास्त्री
- iii) स्वामी ब्रह्मानंद

(5.5) सहायक पुस्तकां

- i) डोगरी साहित्य दा इतिहास, जितेन्द्र उधमपुरी
- ii) साढ़ा साहित्य 2006
- iii) साढ़े साहित्यकार – प्रो. वीणा गुप्ता

.....

कवियें दा जीवन – परिचे ते डोगरी कविता – साहित्य गी उं'दा योगदान

रूपरेखा

(6.1) उद्देश्य

इस पाठ गी पढ़ियै विद्यार्थियें गी डोगरी दे मशहूर कवि श्री अश्विनी मगोत्रा ते दर्शन दर्शी हुन्दे जीवन-परिचे ते डोगरी कविता-साहित्य गी उं'दे नमुल्ले योगदान बारै विस्तृत जानकारी हासल होग ते इं'दे व्यक्तित्व ते कृतित्व दे बारे च विद्यार्थी कुसै बी किस्मा दे सुआलें दे उत्तर देने च समर्थ होगन ।

(6.2) पाठ – परिचे

इस पाठ च अश्विनी मगोत्रा ते दर्शन दर्शी हुन्दे व्यक्तित्व सरबन्धी लोड़चदी जानकारी दिती गेदी ऐ ।

(6.3) पाठ-प्रक्रिया

अश्विनी मगोत्रा ते डोगरी कविता – साहित्य गी उं'दा योगदान ।

- (i) अश्विनी मगोत्रा हुदा जीवन-परिचे ।
- (ii) अश्विनी मगोत्रा हुंदियां रचनां ।
- (iii) अश्विनी मगोत्रा दे कविता-साहित्य दा मूल्यांकन ।
- (i) दर्शन दर्शी हुंदा जीवन – परिचे
- (ii) दर्शन दर्शी हुंदियां रचनां
- (iii) दर्शन दर्शी दे कविता साहित्य दा मूल्यांकन

(6.3.1) जीवन-परिचे

डोगरी शायरी च अश्विनी मगोत्रा इक टकोहदा नांइ इक पन्थान ऐ जिसदी गजल उसदे जीवन दे तलख-तजरबें दी अक्कासी करने करी उसदी शख्सीयता दी शनाखत करांदी ऐ । डोगरी दे इस होनहार शायर दा जन्म 9 सितंबर 1948 ई. च जम्मू च इक प्रतिष्ठित बैहमण परिवार च होआ । इं'दे पिता जी दा नांइ हरिचंद मगोत्रा हा । अश्विनी होर चार भ्रांइ ते इक भैन हे । अश्विनी समनें थमां लौहका हा इसकरी एहदे पर सभनें दा दबदबा हा जिसदा अश्विनी गी बड़ा मलाला हा ते ओह घुटन मसूस करदा हा । 1962 ई. च पिता जी दा काल होने पर अश्विनी ने मनमर्जी दा सफर शुरू करी दिता जित्थुं तगर अश्विनी दी पढ़ाई-लखाई दा सरबन्ध ऐ इं'नें बिखड़े हालों दे गर्दिशें दे बाबजूद बी अश्विनी ने आनर्स डोगरी (शिरोमणी) ते बी.ऐ. तगर शिक्षा प्राप्त कीती । उस जमाने च बी.ए. पास गी खरी नौकरी थहोई जंदी ही पर अश्विनी दी किस्मत उमर – भर उस कन्नै रूसी दी रेही इसकरी उसी कोई मुस्तकल तै शैल नौकरी नेई थहोई । पही खज्जल-खुआरी दा दौर शुरू होआ – अज्ज इक थाहर ते कल दुए थाहर । खज्जल खुआरी करी सुभाइ खुंधकी होई गेआ इं'यै बजह ऐ जे 1966 ई. च रीजनल रिसर्च लबाटरी च नौकरी ते थहोई पर

द'ऊं ब'रें प्रोबेशन पीरीयड च कुस्सै गल्ला पर खुंधक खाइयै इस्तीफा देई उड़ेआ । खैर इस दौर ने अश्विनी दे अन्दर सुत्ते दे इक लेखक गी बझालेआ। सैह अश्विनी ने डोगरी च तुकबंदी करना शुरू करी दित्ता। पर जिंदगी दी बसर आस्तै कम्म रोजगार बी जरूरी होंदा ऐ फलस्वरूप कम्पोजिंग दा कम्म सिखेआ ते प्रिंटिंग प्रेस च कम्म करियै जीवन निर्वाह कीता । अश्विनी मगोत्रा दा ब्याह 19 जून 1979 ई. च अमृतसर दे इक मध्यबर्गी गोस्वामी परिवार च होआ । इ'दी पत्नी दा नांऽ मधु ऐ । ब्याह परैन्त पंज ब'रै एह अपने पैतृक घर फतू चगान बड़डे – बेहडे च रेह ते बाद च जलाहके म्हल्लै कराए दे इक कमरे च र'वा करदे न। माली हालत ठीक नेई होने करी पिछलें 15एं-16एं ब'रें थमां इसलै खसता-हाल कमरे च र'वा करदे हे ते इ'यै झुल्ल बड़ा देआ पत्तरा' दे लेखक दी कर्म भूमि रेही। अश्विनी मगोत्रा हुंदे दो न्याणें : सुपुत्री पूजा ते सुपुत्र अंकुश ।

सन् 2001 च अप्रैल महीने लौहकी जनेही मांदगी करी चानचक्क गै जीवन डोर त्रुट्टी गई जिस कन्नै डोगरी दे साहित्य जगत च इक खलाऽ बनी गोआ ।

ii) साहित्य-रचना :

24एं-25एं ब'रें दी बरेसू च जेकर कुसै साहित्यकार दियां पैन्नी सोच ऐ सरोखड़ असरदार तर्जेंब्यां आहलियां रचना जि'दी अदबी हल्कें च खास चर्चा होंदी ऐ – छपदियां न तां इत्थूं दा अंदाजा होई जंदा ऐ जे उस लेखक दे अंदर उसदे होश सम्हालदे गै उसदी रचनात्मक सोच दे बीऽ पौंगरनस शुरू होई पे होने न । एह गल्ल पूरी उतरदी ऐ डोगरी दे काबल गुज्जे गौरोफिक आहले शायर अश्विनी मगोत्रा पर जिनें डोगरी साहित्य जगत गी अपनी कविता , लम्मी कविता, आधुनिक काव्य, जगल ते कहानियें कन्नै सगोसार कीता ऐ । इ'दियें रचनाएं दा ब्यौरा इस चाल्ली ऐ :-

1. खुबटियां (कविता संग्रह, 1973 च)
2. खीरली बंदू (कहानी संग्रह , 1974 च)
3. लैहरां (लम्मी कविता, 1975 च)
4. मेरी बस्ती मेरी लोक (गजल संग्रह, 1981)
5. झुल्ल बड़ा देआ पत्तरा (आधुनिक काव्य, 2001)
6. पूनी-पूनी बट्टी रात (गजलें दा कुल्लियात, 2002)

3. अश्विनी मगोत्रा हुंदा डोगरी काव्य – जगत गी योगदान

आधुनिक डोगरी कविता च अश्विनी मगोत्रा दी अपनी टकोहद ऐ, अपनी पन्छान ऐ । प्रगतिवादी रुझान ते मोकली सोच – इसदी कविता दे प्रमुख सुर न । भामें ओह जमाना ते हालात उपपर बेबसी दे बेचारगी मसूस करदा ऐ जां व्यंग ते कटाक्ष दे लैहजे च उस उपपर गुज्जी चुब्ब करांदा ऐ जां पही इ'नें सभनें दा बरोध करने आस्तै इन्कलावी साददा दिंदा ऐ ते इकजुट होइयै इ'दा मकाबला करने आस्तै ललकारदा ऐ एह सब उसदी सोच दे तरक्की पंसदी रुझान दी अक्कासी करदे न । जेकर अश्विनी मगोत्रा दी कविता दा सुखमता कन्नै अध्ययन कीता जां ता च जेहडे सुर चेचे तौरा पर मुखरत होंदे सनोचदे न उ'दे च उद्दम, हौसला, संघर्ष ते आशावाद दा सुर, हकीकत पंसदी ते यर्थाथवाद दा सुर आहला मनुक्खी कदरें गी अपनाने दा सुर इष्के-मजाजी थमां इष्के हकीकी गी हासल करने दा सुर बगैरा प्रमुख न ।

i) लैहरां – इक लम्बी कविता (1975)

एह इक प्रतीकात्मक काव्य ऐ जिस च कवि गी – मनै दियें गैहराइयें च डोब्बा लाने दा मौका मिलदा ऐ। भावें दियें लैहर चा लैहरां निकलदियां न जेहड़ियां अपना दायरा बधां दियां अगड़िया बधदियां ते पही कठें नै टकराइयें आपूं लीन होई जंदियां ते दूइयें लैहरें गी जन्म दिंदिया न । इ'नें लैहरें दे सागर च कवि ने हिरख-प्यार, आशा-निराशा, चिन्ता-झूरे, करुणा-संवेदना आदि दे भावें गी डक्के दा ऐ । इस लघु काव्य दी खूबी एह ऐ जे इसदिये लैहरें रूपी बंधे च रवान्नी ते सिलसिला बरोबर बने दा रौहदा ऐ । इक अद्ध अंध दा नमूना ऐ :-

चबकखैं लैहर ही जीवन दी इक छाई दी,
फिरी बी धरतियां अंदी हा किश फिरा'रदा ।
धरत चुप्प जन लभदी ही किश घटोई दी ,
कोई बुआल हा छाती च तो फिरा'रदा ।।

लैहरां दे जन्म कशां पैहले वातावरण किन्नां पटोए-पटोए दा खडुत्त जमूद दी इन्तहा गी भोगा दा ऐ जिस च सिर्फ न्हेरा गै न्हेरा ऐ, लोई दी कोई किरण नेई जीवन दा कोई चिन्न नेई ब्हाऽ सैहमी-सैहमी दी जुगें-जुगें दी ठार जम्मी दी नां कुतै सुरकन नां हलचल नां साहें दी गै भरवन-गर्मेश कुतै, बस चबकखैं मौती दा अरलू गै ऐ व्यापे दा – गास चुप्प हा/बेजान जन खडोते दा । आपराजी ही न्हेरे दी बरस न्हेरा हा / बड़ी गै डोल जन चलदी । हवां बझोदी ही कोई नां छेड़ ही हलचल । नां कोई चेहरा हा। कोई बी छेड़-छडूका नां चि'न्न जीवन दा समां हा छोटमां सारै चबकखैं छाए दा जुगै दी ठार ही । सारे गै इ'यां जम्मी दी । अलापन राग ऐ मौती ने जि'यां लाए दा ।

लैहरां नां दी लम्मी कविता च बन-सबन्नियै लेहरें दा सिलसिला खाऽ दवांऽ ऐ लैहरें चा लैहरां निकलदियां न, टुरदियां न घेरे बन्नां दियां अगड़ियां बधदियां न तै कर्मठता गी निरंतरता देने आस्तै कठें दे टकराव कन्नै लैहरें चा होर मतियां लैहरां जन्म लैदियां न । एह सपूरा सिलसिला इक नदी दरेआ ते समुंदर आंगर ऐ ।

ii) झुल्ल बड़ा दे आ पत्तरा :- 1. नारी बगे ते बड़ै दे बुहटे दा साथ काव्य दा रंग सज्जने बाझ होने दे भाव कन्नै होऐ दा ऐ । इस करी शुरू च बजोग दा समान कठोर ऐ दा ऐ । बन्न सबन्ने चेते दी कुदरैं ठंडी छां ऐ ते कुदरै मकदे आवे । मिलने घड़ियें दा सुहाना चेता दी बेण सूल बनियै उंगदा ऐ जे छाती च बलदे बजोग दे भाबड़ होर दून होई उठदे न ।

समूलचे काव्य च कोई कथ जां कथानक नेई बस बजोग दा भाव ते अहसास गै इसदा मुख्य विशेष ऐ जां असासा ऐ, जिसगी लेचाक ने बड़ें नरोए ढंगा कन्नै पेश कीते दा ऐ ।

“सज्जनैं बाझ दुआसियां ते चित्त कमलाया ।
झुल्ल बड़ा देआ पत्तरा तुगी सज्जनै लाया ।।
चित्त सम्हालां जागियां केई ली-बलीके ।
शैरें डंग करा'रदे किश होर बधीके”

बजोगन नारी दे बजोग दा काव्य च कवि ने इस चाल्ली वर्णन कीते दा ऐ, अश्कें नारी दे आत्म कथा बी बद्ध कवि दा चारा दहानू होई गोदा ऐ , इ'नें काव्य- सतरें च इस बेदन दी किन्नी शिद्दत ऐ, किन्नी झूंहगी ऐ एह बेदन इसदा अंदाजा सैहज गै होई जंदा ऐ । नारी बेदन गी इन्नी गैहराई कन्नै समझना अश्विनी होर गै करी सकदे हे कोई दुआ नेई । बजोगी नारी गी कुसै चाल्ली बी रमान नेई इत्थूं तगर जे बीते दे

समय दियां गल्लां जिसले ओह् चेतें करन लगदी ऐ तां एह् चेतें बी उसगी अपने जिस्मा उपपर छांटे आंगर बझोंदे न ।

“सेहमीं दी जन सेच र’वै डरी—डरी दी ।
जींदे जी बी सेही होई एह् मरी—मरी दी ॥
कदें कुतै ते झुल्ली जंदा कोई फनाका ।
छांटे आंगर जिंदू उपपर देऐ लसाका ॥”

कवि दी बजोगन दे जीवन च सुखे गै दुख न ते ओह् इ’नें दुखे कन्नै जीने दी हुन इ’न्नी आदी होई चुकी दी ऐ जे उसगी हुन एह् दुख अपने साथी बझोंदे न ते उसगी लगदा ऐ जे उसदा जीवन हुन इंदे कन्नै—कन्नै गै चलना ऐ ।

थाहर पछानूं बे—पन्छानूं होइयै मिलदे ।
सोच—पक्खरू इक्कै थाहरा बि’लदे ॥
दुख बझोंदा उसलै जि’यां अम्मां—जाया ।
ढुल्ल बड़ा देआ पत्तरा तुगी सज्जनै लाया ॥

पर पता नीं की इन्नें दुख ते तकलीफा झलने दे बाद बी बजोगन नारी गी इक हिखी ऐ अपने साथी दे औने दी ते इस्सै हीखी कन्नै ओह् अपना जीवन हंडा दी ऐ ।

“रात—रात भर चित नमाना कंबदा रौहदा ।
तिल—तिल करिये तेल दिये दा संभदा रौहदा ॥

2. नारी मैहमा ते धरती दी म्हानता बारै

इस काव्य दा मुख्य उद्देश्य धरती ते नारी दी म्हता—महानता ते मैहमा गी स्वीकारना ते कवि अपने इस उद्देश्य च पुरी चाल्ली सफल बी होए दा ऐ । कवि ने नारी गी कुल रिस्त्रिटी दा निर्माता आविखयै उसदे बजुद गी स्वीकारें दा ऐ ते उसदी समाज च अपेक्षा दा जिम्मेवार ओह् पुरुष गी मन्नदा ऐ

“नारी ते निर्माता ऐ नेई कदें बगाडै ।
स्त्रिटी खातर एह् ते अपनी रत्त बी साडै ॥
मर्द रेहा ऐ आदकदीमी शा गै भोगी ।
दिक्खने गी गै जोराबर एह् मना दा रोगी ॥

स्त्रिटी दी निर्माता होइयै बी उसी समाज च ओह् थाहर नेई लब्बा जिसदी ओह् हकदार ही । नारी दी महानता गी कदें कुसै समझनें दी लोड निं बुज्झी, सगुआं इसदा हर कुसै शोषन गै कीता ऐ , खास करी मर्द ने । होर ते होर निक्कें होंदे माऊ—बब्बै दे घर बी उसगी जागतै कशा हीन मिथियै उसदी बेकदरी गै होंदी आई ने । कसूर जागत करन तां निक्खर कुड़िय गी पौंदी की ते पुरुष प्रधान समाज च एह् नजरिया आदकदीमी शा चलदा आया ऐ । जागत् जम्मै ते बधाइयां—बघावें गोने ते गुड़ मटेआइयां बंडोनियां ते कुड़ी जम्मै ता सोगें मूंह भज्जी जाने । पही लाने—खाने ते परोस पालमां च बी फर्को फर्की जागतै गी सजरी ते कुड़ियै गी बेही । कवि कुड़ियें ते जागतें च कोई फर्क मसूस नेई करदा संगुआ उसदी नजर च कुड़ियां जागतें थमां बेहतर होदियां न गल्ल सिर्फ नजरिये दी ऐ जेकर अस अपना नजरिया बदलचे तां कोई फर्क नेई रेही जाहग ।

‘भन्नन त्रोड़न जागत, कुड़ियें ऐहमें मीहने ।
 टल्ला जा सनोई, अम्बर कि’यां सीने ॥
 धीआं सील बी, मां—बापू दी अक्खी रड़कन ।
 पुत्तर होन प्यारे भामें जम्मन कप्फन ॥

कवि ने अपने काव्य राहें नारी दी महानता गी दर्शाने दी कोशष कीती दी ऐ ते कवि गी इस गल्ला दा गुस्सा बी जे नारी जरनीक, सील सुआतम ते जनमदातरी होने दे बावजूद बी म्हेशां लटोंदी रेही ते इस पुरष प्रधान समाज ने अपने अहम कारण कदें बी उसदी कावलिय गी नेई मन्नेआ पर शायद एह कवि दे गे विचार हे जे अज्ज नारी दी स्थिति ओह नेई रेही जेहड़ी पैहले ही ।

“इस धरती पर हर नारी दी व्यथा ऐ सांझी ।
 इक्कै धर्म ऐ सांझा इसदी कथा ऐ सांझी ॥
 जनमदातरी होइयै बी एह खालमखाली ।
 हर जुगै च माहनू अगै रेही सुआली ॥

3. डुग्गर संस्कृति दा बखान

डुग्गर संस्कृति रज्जी—पुज्जी दी ऐ ते मगोत्रा होरें गी बी अपनी संस्कृति दी महानता दे बारै च पुरी जानकारी ऐ इससै करी डुग्गर संस्कृति गी अपने काव्य राहें उ’नें शैल चाल्ली गुहाड़े दा ऐ । डुग्गर दा नरोआ प्रकृति—चित्रण रूत्तां—ब्हारां करसानकी उदम हौंसलें, रंग—नजारे, बचपुने दे भलोके चेतें, निर्मल हासे, बूढ़ गड़ाके, खेढां—खडालीं, डुग्गर दे पर्व—तेहारें रीति—रवाजें दे निग्घे कोसे रंग ते सन्हाकड़े दक्ख—नराते चूटी कंजकां काहन—गोपियां, बाह्वे दा मेला, लोहड़ी दा तेहार, छज्जा—डंडारस दा इक—इक पक्ख इक—इक दक्ख सन्हाकड़ा होइयै उग्घड़े दा ऐ ।

डुग्गर संस्कृति दे आदर्श दा बखान इस काव्य—कृति दी दूई प्रमुख विशेषता ऐ । खास करी डुग्गर पर्व—तेहारें, बर्ते नत्तें मेले— मसाधें दे मौकें पर कीते जाने आहले अनुष्ठानें दे कन्नै—कन्नै नरोए द्रिश्यें दे चित्रण बड़े सजीव ते चित — छुहने न । नराते दे पर्व पर कुड़ियें आसेआ रली मिली सात्रा राहना देव दी स्थापना करना, बडलै उठियै रौज तवी न्हौन जाना, पही पचैलन आसेआ साखें गी पानी देना, रोज स’जां रलियै किट्ठे होई चुटी करना, पही रातीं लै माता दी आरती, भेटां ते भजन—कीर्तन करना । नौमी आहलें रोज कंजका पुजनियां ते राती लै काहन—सखियें दा दक्ख सजाना । नौमी आहले रोज गै बाह्वे माता काली दे मंदरै च बड्डे भारी गैहमा—गैहमी ओहले मेले च शरधालू भगते दा किट्ठे होइयै उत्सव मनाना, तुआहीं कुड़ियें आसेआ किट्ठे रली—गीत —भेटां गादें माता दी प्रतीक सात्रा गी विदेआ करना जां प्रवाहना सब किश बड़ी बरीकी कन्नै चित्रेआ गेदा ऐ, जिसगी पढ़ियै डुग्गर दी प्रादेशक संस्कृति दा ब’रका ब’रका उग्घड़ी औंदा ऐ

“आए नराते कुड़िये — चिड़ियें खेढ रचाई ।
 सेही होंदा ऐ पत्तनं एप्पर ब्हार ऐ छाई ।
 मूंह न्हेरें इक निकली ऐ कंजकें दी टोल्ली ।
 इब्बी रानी, उ’ब्बी रानी कोई निं गोल्ली ॥”
 “अजग ओपरी रौनक लभदी चौक बजारें ।

श्रद्धा ते विश्वास झलकदा चेहरें सारे ॥
 अज्ज बझोए आसां सब दियां पूरियां होइयां ।
 मूहां—मंघियां न अज्ज मुरादां सबगी थोइयां ॥
 “अट्ट नराते रक्खे नौमें कंजका होइयां ।
 जिन्नी सेवा उन्नियां उसी मुरादा थोइयां ॥
 नौमीं ध्याड़े चैहल—पैहल ऐ अन्दरें—बाहरे ।
 हवन वायना मन मौहदी ऐ गली बजारें ॥

4. बड़े दे बूहटे दी मैहमा

इस काव्य — कृति च कवि ने पौराणिक सांस्कृतिक तै वैज्ञानिक सभनें द्रिष्टयें दा समन्वय करदे होई ‘बड़े दे बूहटे दी मैहमा दा बखान अपनी कृति दे सिर लेख ‘झुल्ल बड़ा देआ पत्तरा’ गी बड़े सरोखड़ ते सुलझे दे ढंगा कन्नै अपने उद्देश्य च सार्थक सिद्ध कीते दा ऐ ।

कवि ने बड़े गी परम देव—रिशी दे रूपे च चित्रत कीते दा ऐ जसदा उल्लेख साढ़ं धार्मिक ग्रंथे च बी मिलदा ऐ ।

“धरती उपपर तेरी पूजा होंदी आई ।
 हर पैरा पर तुगी मानता थोंदी आई ॥
 तेरी मैहमां देवलोके इच सारे गांदे ।
 ब्रह्मा आइयै आपूं तेरे सीस नुआंदे ॥”
 कवि न बड़े दे बूहटें गी परम ब्रह्मा दा रूप मिथे दा ऐ ।
 “तेरे गुण दै देव—रूप होने दे साखी ।
 शिव करदे न आपूं बेहियै तेरी राखी ॥
 ब्रह्मा दा वरदान मिथी सब पूजा करदे ।
 रिशी—मुनी सब आपूं तेरा पानी भरदे ॥

एह ऐसा परोपकारी बुहटा ऐ जेहड़ा ब्हाऊ दा सारा प्रदूशन चूसियै स्वच्छ ब्हाऊ दा संचार करदा ऐ ते ब्हाऊ दे रोग—कटानुएं दा नाश करियै कुल सिाटी गी नरोआ जीवन दिंदा ऐ । नरोए चपामस दी द्रिष्टी कन्नै अज्जै दे प्रदूषत माहैल च बड़े दे बूहटे दा म्हतव कुंन नेई जानदा ? कवि अश्विनी मगोत्रा ने बी इस काव्य च बड़े दे इ’नें सभनें गुणें दा सुन्दर ढंगै कन्नै वर्णन कीते दा ऐ ।

“तू झुल्लें तां पवन—फनूके चलदे इ’यां ।
 मौती सेजा सुआस नमें न थोंदे जि’यां ॥
 तेरे कन्नै छहोइयै पवन पवित्तर होंदी ।
 उसदे हर इक साह गी गति नराई थोंदी ॥
 उसदा घुट्टन सब थकेमां चूसी लैन्नां ।
 उस शा उसदी सब दूषता खूसी लैन्नां ॥
 उस च अचरे रोग किटाणू तें ऐं मारें ।
 होई निरोगी फिरै डोलदी अंदर—बाहरें ॥
 जैहर सबूरा लेइयै सब गी जीवन बंडे ।
 तूं निं भाखी निंदेआ चुगली नां गै भंडे ॥

तेरे अन्दर जीवन दा हर गुण समाया ।
झुल्ल बड़ा देआ पत्तरा तुगी सज्जनं लाया ॥
ते कवि कामना करदा ऐ ते बड़े दे बूहटें दी मेहमा म्हेशा इ'यां गै बनी र'वै ते धरती पर उसदी पूजा होंदी
र'वै ।

“झुल्ल – झुल्ल ते अपने इज्जत-मानै कन्नै ।
जस्सै आहले डाहले छहोन शमानै कन्नै ॥
धरत कदे निं थक्कै तेरे चर्चे गांदी ।
होर होए फलदायी तेरे भाग सरांहदी ॥”

5. आधुनिक परिवेश दी अक्कासी

इस काव्य दी उत्कृष्टता दा सारें शा बड़डा प्रमान आधुनिक परिवेश दी अक्कासी ते, जिस च जमाने दी
दुख दी रग पन्छानना ते हालात दे तकाजे गी समझदे होई माहनू दे अंदर आने बड़े दे आंतकी राक्षस दा
खात्मा करियै नरोए माहौल दी कामना करना ऐ ।

अज्ज पूरा संसार आंतकवाद दे खतरे थमां चिंतित ऐ ते इतिहास गुआए ऐ ते अजें तकर जदूं बी धरती पर
युद्ध होआ ऐ उ'न्न म्हेशां इस धरती पर विनाश गै विनाश कीता ऐ युद्ध दे भैड़े नतीजे गी कवि ने अपनी
कृति राहें गुआहड़े दा ऐ ।

“एह औदा तां स्तू दी पन्छान निं रौहदी ।
मानवता दे पिंडे अन्दर नि जान रौहदी ॥
खिड़दी कलियें दे हास्से कमलाई जंदे ।
मौती आहले बदल घनेरे छाई जंदे ॥”

कवि ने युद्ध गी मानवता दा दुश्मन गलाए दा ऐ ते इस गी तबाही मन्नै दा ऐ । ओह इसगी अक्खी दा
अ'न्ना ते गुंगा बोला मन्नदे न जेहड़ा इक वारी छिड़ी जा पही काबू च नेई आंदा ।

“गुंगा, बोला, अक्खी दा एह अ'न्ना होंदा ।
विश्वासें दे घेरे अन्दर एह निं रौहदा ॥

अभ्यास

खल्ल दितें गेदे सुआलें दा परता देओ ।

1. ‘झुल्ल बड़ा देआ पत्तरा’ काव्य च कवि अश्विनी मगोत्रा ने नारी जात ते धरती दे बारे च जेहड़ा
वर्णन कीते दा ऐ उसी अपने शब्दें च लिखो ।
2. ‘झुल्ल बड़ा देआ पत्तरा’ काव्य च वर्णत प्रकृति ते सुन्दरता ते रितुएं सरबन्धी पद्याशें दा विप्लेषन
डुंगर संस्कृति दे संदर्भ च करो ।
3. ‘झुल्ल बड़ा देआ पत्तरा’ काव्य च नारी बेदन छाई दी ऐ । उदाहरण देइयै स्पष्ट करो ।
4. ‘झुल्ल बड़ा देआ पत्तरा’ काव्य च कवि द्वारा बड़े दे पत्तरें गी संबोधत करने दी केह मन्शा ऐ ?
स्पष्ट करो ।

सहायक पुस्तकां

1. डोगरी कविता प्रमुख रूझान — डॉ. वीणा गुप्ता
2. साढ़े साहित्याकर — डॉ. वीणा गुप्ता
3. शीराज़ा अगस्त सतंबर 1985 — कल्चरल अकादमी, जम्मू ।

(6.3.2) श्री दर्शन दर्शी हुंदा जीवन — परिचे ते डोगरी कविता — साहित्य गी उंदा योगदान

i) जीवन-परिचे

दर्शन दर्शी हुंदा जन्म 25 मार्च 1949 ई. च डुग्गर दी प्रसिद्ध साहित्यिक धरती भड्डू च होआ । इंदा पूरा नांऽ दर्शन कुमार वैद ऐ । एह पढ़ाई-लखाई च मुंढा थमां गे तेज हे ते अपनी कलासा च फस्ट औंदे हे । इंनें भड्डू दे हाई स्कूल थमां 1963 च मैट्रिक पास कीती ते साईस कालेज थमां बी.एस.सी. कीती । इसदे परैत जम्मू यूनिवर्सिटी थमां अंग्रेजी विशे च एम.ए. कीती । दर्शन शर्मा होरें शुरु च अध्यापक रेह ते फही अंग्रेजी विशे दे स्कूल लैक्चरर रेह । इससै दौरान इंनें के.ए.एस. दी परीक्षा पास कीती ते डिप्टी सैकरटरी दे ओहदे पर नियुक्त होए । एह मैहकमा तालीम च ऐडमनिस्ट्रेटिव अफसर बी रेह ते इसदे बाद किश चिर जम्मू च रीजनल टांसपोर्ट आफिसर बी रेह ते इसदे परैत एडीशनल सैक्टरी बने ते जम्मू-कश्मीर सैक्रेटिएट च बी इससै ओहदे पर रेह । बक्ख-बक्ख औहदे पर समें-समें पर नियुक्ति परैत हून सेवामुक्त होइयै साहित्य सिरजना च लगगे रे न ।

ii) रचना :

दर्शन दर्शी होरें गी विद्यार्थी जीवन थमां गे साहित्य कन्नै रूची रेही । इंनें छेमीं-सत्तमी जमाता च केई उच्चकोटी दे उपन्यास ते दूइयां रचनां पढ़ियां ते उं'दे थमां प्रभावत बी होए । दर्शी होरे शुरु-शुरु च तूद भाषा च लिखदे हे ते इंनें गी गज़ल लिखने दी शैल म्हारत ऐ । डोगरी भाषा च इनें 1980 एं दे दशके च लिखना शुरु कीता । हूनै तगर इं'दे दो कविता ते इक उपन्यास प्रकाशत होए दा ऐ ।

i) कोरे काकल कोरियां तालियां (कविता-संग्रह)

ii) स'जां झांकन दुआरी-दुआरी (कविता संग्रह)

iii) गास ओपरा धरत बगान्नी (उपन्यास)

3. डोगरी कविता गी दर्शन दर्शी हुंदा योगदान :

कविता लेखन च दर्शन दर्शी हुंदा खास थाहर ऐ । इं'दी कविताएं च इक कशा इक सुन्दर भाव दी तर्जमानी होई दी ऐ । इं'दी कविताएं च बहुरंगी तस्वीरां झलकदियां न । इं'दियां मतियां सारियां कवितां स्वछंद न । इंनें अपनियें कविताएं च समाज दे हर पैहलू गी उजागर कीते दा ऐ । समाजक चित्रण, फाड़े च व्याप्त समस्याएं, शोषन बगैरा दा वर्णन बड़े सरोखड़ ढंग कन्नै कीते दा ऐ । इं'दी कविताएं च प्रमुख विशे इस चाल्ली न :

i) प्रकृति चित्रण

कवि दर्शन दर्शी होरें अपने जीवन दा मता सारा हिस्सा फाड़े च गुजारे दा ऐ ते एह फाड़े ते फाड़ें दी सं'दरता कन्नै चंगी चाल्ली परिचित न । इंनें अपनियें कविताएं च फाड़े, सैलतन, ठंडियें फुहारें, नाडुएं ते नाले ते धारें दे वर्णन कीते दे न ।

कविता च प्रकृति-चित्रण दे बारै च एह भाव दिक्खो ।

“खुल्ले दरब्बड़ सैल्ले सैल्ले
टामें टामें चिट्ठे बट्टे
कंडै कंडै लम्में बूटे
मंजो मंजी छर छर नाडू
आरें पारें उच्चियां धारां”
“चादर सिज्ज फुहार पौआ दी
नखरै नखरै धुड़िया धूरां
टिब्बै टिब्बै चरदियां मिड्डां
नालैं नालैं फिरदे डंगर
फेरो फेरी धारू कूहलां
धान पैलियां सूरू मक्कां ”

ii) फाड़ें च व्याप्त शोषण :

कवि दर्शन दर्शी होरें जिथें इक पाससै फाड़ें दी सुंदरता ते प्रकृति चित्रण दा जिकर कीते दा ऐ
उत्थें दुए पाससै फाड़े दी बुराइयें गी बी बांदे करने दी कोशिश कीती दी ऐ । शाहूकारें ते सरकारी मलाजमें
आसेआ आम लोकें दे कीते जाने आहले शोषण गी बी अपनी कविताएं राहें बांदे कीते दा ऐ । जां इ'यां
आक्खी लैओ जे कवि ने छड़ी फाड़ें दी सुंदरता दा गै बखान नेई कीते दा उत्थें व्याप्त बुराइयें गी बी बांदे
कीते दा ऐ । जि'यां –

“लाटू दी लो ते लारी
जित्थें अज्ज बी सुखना ऐ
मरदे मरीज गी जित्थें
चेल्ले नचार दे
जित्थें लोहडू अज्ज बी स्कूल नीं,
बस डंगर चरादे
लचारियें च जित्थें माहनूं
मान धसदा
उ'नें कुदरैं ते फाड़ें
मेरा देसा बसदा।”
“सुन्नियां धारां
पीलियां नारां
सूहा टोपू लट्ठा- गाटू
ब्याज पैसे रसदे – बसदे
लोक ते सारे उज्जड़े दे जन
ध्याड़े करदे नसदे – नसदे ।”

iii) आधुनिक सुर

इ'यां ते पूरा विश्व बेअमनी दी जंदरी च कसे दा ऐ पर साढ़ी अपनी स्यासत दे आतंकवाद ने
शायरें दी संवेदना गी मता लहुलुहान कीते दा ऐ । कविताएं च नेकां थाहरें कवि दे मनै दी चिंङ साफ
सनोचदी ऐ ।

जिसलै बी ओह खून, गोली दी गल्ल जां खबर सुनदा ऐ तां उसदे कालजै पीड़ बसोंदी ऐ तां गै ओह अपनी कविता राहें गोली मारने आहले गी जिन्दगी दी कामना कन्नै सम्बोधत करदा ऐ ।

“एहदे शा पैहलें
जे दुए पाससै दी गोली
तुगी आई लगै
कुसै कुप्पड़ दे ओहल्लै
लम्मा पेड़यै
चिंतेंआं अड़ेआ
जे गोली गोली गै
लगदे गै सिद्धा
लहु कढदी ऐ ।”

iv) हिरख – प्यार

दर्शी हृदियें कविताएं द हिरख – प्यार दी भावना दे सुर होंदे लब्दे न । उंदी कविताएं दा हिरख-प्यार छड़ा आशिक माशूक आहला प्यारे नेई । ओह पूरे संसार च रौहने आहले माहनुएं दे प्यार दी गल्ल करदे न । कुतै –कुतै उंदा एह प्यार अपनी मातृ भाशा आस्तै बी झलकदा ऐ ।

अज्ज पूरी मनुक्खता लेई विश्व-शान्ति दा मुददा सारे शा अहम ऐ । एह बी सब जानदे न ते इस लेई नफरत गी मटाइयै रूहें प्यार बसाने दी लोड़ ऐ । ‘बस प्यारे होऐ’ कविता दियां किश सतरां प्रस्तुत न:-

“नां जमां नेई नेई तफरीक होऐ
लां जरब नां कोई तक्सीम होऐ,
दुनिया दे लाग पलेचें शा
बस मुक्त मेरा संसार होऐ
इक सच्चा-सुच्चा यार होऐ
जो अंदर होऐ, उंऐ बाहर होऐ
बस प्यार होऐ, बस प्यार होऐ ।

मिली बेहियै गल्ल-बात करियै गी मते सारे आपसी मतभेद दूर कीते जाई सकदे न । गल्ल-बातां राहें समाधान दी जुगता दी प्रमाणकता दा बसाह दुआंदे होई कविता दा आखना ऐ –

“तारीख गुआए ऐ
वार्ताएं चा केई बारी
उग्गेआ ऐ अमन
ते फैल्ली गेआ ऐ
आर-पार

सुखे दा सनेहा बनियै
बात जारी रौहै
शांति अमन ।
इन्ने बी अड़ियल नेई ।”

जेकर कोई अपनी दर्द पीड़ नेई बुज्झी सकै तां उन्न दुए दी केह बुज्झनी । संवेदना गै इ'ये ऐ । संवेदना ते बेजान दी पीड़ नी बुज्झी लैन्दी ऐ ते भाषा ते जींदी-जागदी चीज मन्नी जंदी ऐ । डोगरी दी पीड़ हर डोगरा शैल चाल्ली जानदा ऐ ते अपनी-अपनी समर्थ कन्नै बुहास्सरदा बी ऐ । डोगरी भाषा प्रति अपनी कविता च दर्शन दर्शी होरें किश इस चाल्ली बुहास्सरे दा ऐ ।

“तो एह —
जे सरमौकल गी समझी डरौकल
गासे शा बंचत कराने दा प्लान ऐ ।
इ'शं बी होंदा ऐ केह ?
चिड़ी सत्तरंगी त्रबकी
‘डोगरें ते डोगरी नै
तां इ'यां गै होऐ रदा मड़ी ।”

5. बेसंदोखी दा सुर :

दर्शी हुंदी किश कविताएं च लोकें च फैलदी बेसंदोखी ते इक-दूए थमां अगगें बधने दी लग्गी दी होड़ बगैरा दे सुर बी मुखरत होंदे न । कवि दा आखना ऐ जे अज्ज माहनू गी अपने धन-दौलत दी खुशी घट्ट ऐ ते दूए दा धन-दौलत दिक्खियै असंतोश दी भावना बधा करदी ऐ । अपनी संपत्ति तुच्छ मात्र सेही होंदी ऐ । जि'यां —

“कटोरे च सागर पाइयै
बुक्कें च धरत सजाइयै
खुश हे अस
अपने आपा च राजा हे ।
के इक दिन नजर
लुआंग खाई गई
गुआंडी दे घर मोई
झांकी दुआई गई
दिक्खेआ जे —
गुआंडी नै सागर
त्रांबड़ी च पादा ऐ
ते धरतू गी छैल
बड़डे बेहड़े सजांदा ऐ
उस दिन छा अस
राजे थमां रंक होई गेदे आं ।”

कवि दा मन मनुखता, मनुखी होंद ओहदी भलाई—बेहतरी, खुशहाली ते विकास लेई फिकरमंद ते दुआगोऽ
रौहंदा ऐ । कवि दा मन्नना ऐ जे हिरखै कन्नै रौहना माहनु दा सभाऽ ऐ, ओह प्यार कन्नै रौहना चांदा ऐ
—

“इन्सान हिरखे भरोचा समुंदर,
इंसान दी फितरत नेई जग यारो ”

इं'दी कविताएं च मर्म ते संवेदना गी छूहने दी प्रवृत्ति कवि गी इक सच्चे मानवतावाद दे रूपै च स्थापत
करदी ऐ । इस चाल्ली अस आखी सकने आं जे दर्शी हुंदी कविताएं च माहनू दी कदर ते मनुखता दा
धर्म पालने दा सनेहा बड़े उच्चे सुरै च मुखतर ऐ ।

.....

B.A. Sem.-III	DOGRI	UNIT-II
(Poetry)		LESSON No. 7

कवियें दा जीवन – परिचे ते डोगरी कविता – साहित्य गी उंदा योगदान

रूपरेखा

(7.1) उद्देश्य

इस पाठ गी पढ़ियै विद्यार्थियें गी डोगरी दे सिरमौर कवि – केहरि सिंह मधुकर' ते कवि चरण सिंह, बसंत राम बसंत हुदें जीवन परिचे ते डोगरी कविता साहित्य गी उंदा नमुल्ले योगदाने बारे विस्तृत जानकारी हासल होग ते इस कवि दे व्यक्तित्व ते कृतित्व दे बारे च विद्यार्थी कुसै बी किस्मा दे सुआले दे उत्तर देन च समर्थ होउन ।

(7.2) पाठ – परिचे

इस पाठ च केहरि सिंह मधुकर' ते कवि चरण सिंह, बसंत राम बसंत हुन्दे व्यक्तित्व सरबन्धी लोडचदी जानकारी दिती गेदी ऐ।

(7.3) पाठ–प्रक्रिया

केहरि सिंह मधुकर' ते कवि चरण सिंह, बसंत राम बसंत ते डोगरी कविता – साहित्य गी उंदा योगदान ।

- केहरि सिंह मधुकर हुंदा जीवन–परिचे ।
- केहरि सिंह मधुकर दियां रचनां ।
- केहरि सिंह मधुकर दे कविता–साहित्य दा मूल्यांकन ।

चरण सिंह, ते डोगरी कविता – साहित्य गी उंदा योगदान ।

- चरण सिंह दा जीवन – परिचे
- चरण सिंह दियां रचनां
- चरण सिंह दे काव्य साहित्य दा मूल्यांकन

बसंत राम बसंत ते डोगरी कविता – साहित्य गी उंदा योगदान ।

- बसंत राम बसंत दा जीवन – परिचे
- बसंत राम बसंत दियां रचनां
- बसंत राम बसंत दे काव्य साहित्य दा मूल्यांकन

(7.3.1) कवि केहरि सिंह मधुकर ते डोगरी कविता – साहित्य गी उंदा योगदान

- जीवन–परिचे

डोगरी साहित्य दे गासा च 'मधुकर' तरक्की पसंद कवि ते चमकदे तारें च इक न । डोगरी दे मन्ने परमन्ने दे कवि केहरि सिंह मधुकर दा जन्म 28 नवम्बर 1929 ई. गी सांबा तसील दे गुढा सलाथिया गां च होआ । मधुकर दे पुरखे अक्सर फौज च सेवारत रेह । इ'दे दादा कप्तान हे ते पिता कृपाल सिंह मेजर । माऊ'बब्बै दे इक्कले पुतर होने करी इ'नेंगी घरै च बड़ा लाड-प्यार थोआ । इ'नें दसमीं तगर दी शिक्षा एस.पी.एम. (SPM) राजपूत स्कूल च हासल कीती ऐ बी.एस.सी. कालेज (SP College) श्रीनगर ते गांधी मैमोरियल कालेज जम्मू थमां कीती ।

'मधुकर' होरें साहित्य सिरजना अपने कालेज दे जीवन च शुरू कीती ही । पैहले एह हिंदी च लिखदे हे । इ'दी कविता 'नर्तकी' गी बड़ी प्रसिद्धी थोई । इससै चाल्ली हिंदी गीतें कारण बी इ'नेंगी कालेज च ते कोलज थमां बाहर बी बड़ी वाहवाही थोई ।

ii) साहित्यक योगदान

मधुकर होर डोगरी दे श्रेष्ठ कवि न । उ'नें डोगरी कविता गी इक नमां जीवन बख्खोआ ऐ, इक नमीं रंगत दिती ऐ । भाव, विचार, कल्पना ते कला दे अधार पर उ'दियां रचनां उच्च कोटि दियां न । उ'दे काव्य च शंगार ऐ, शलैपा ऐ, वेदना ऐ ते इक प्रवाह ऐ । इक आम आदमी दी गल्ल ऐ, पूरे राष्ट्र दी गल्ल ऐ ।

1940 एं दा दहाका डोगरी साहित्य ते खास करियै डोगरी कविता आस्तै बड़ा म्हत्त्वपूर्ण हा । खास करियै 1947-48 दे समें च मुलखा दी बंड ते पाकिस्तानी हमलें कारण रियासता दा म्हौल बड़ा खौदल आह्ला हा । कवि लखारियें गितै एह सब किश चनौती जन बनियै खड़ोते दा हा सैह प्रदेश दे लखारियें बी अपना कर्तब समझदे होई अपनी मातृभाषा राहें लोकें गी समझाने ते प्रेरत करने दी बत्त अख्तयार कीती । डोगरी कवियें डोगरा वीरें दे बलिदानें ते उ'दे बहादरी भरोचे कारमानें पर अत्यन्त जोशीलियां कवितां ते गीत लिखे जि'नेंगी उ'नें गां-गां, नगगर-नगगर च कवि सम्मेलन च पढ़ेआ । इ'नें कवि सम्मेलन जनता दे अंदर उत्साह जगाने च रामबाण दा कम्म कीता ।

1950 एं तगर पुजदे-पुजदे अफरा-तफरी दा वातावरण किश छटोई गेदा हा लोकें च हून अपने गै प्रदेश जां समाज बारै सोचने दी भावना नेही रेही दी हून उ'दा द्रिष्टीकोण बी मोकला होन लगी पेदा हा । एह इ'यै समां हा जदूं मधुकर ने बी डोगरी च काव्य सिरजना शुरू कीती ही । मधुकर ने इक कदम होर अगें आनियै परानियै कुठित धारणाएं गी लुआंघदे होई डोगरी कविता गी विशाल परिवेश दिता । "देसा गी बनाना ते मटाना तुंदे हत्थ ऐ।" इक ऐसी कविता ही जिस च समूलचे देसै दी जनता गी देसा गितै कर्तबें दी चेतावनी दिती गेई ते सम्प्रदायिक संकीर्णता आहली भावनाएं दी त्रिकखें शब्दें च नुक्ताचीनी कीती गेई । कवि दे शब्दें च :-

फिरका परस्ती दी अग जेहड़े लांदे न
देसा आहली एकता दी नीहें गी ल्हांदे न
हथियां दे पैरे खल्ल पैर जिं'यां सारे औन,
इस पापा अगें पाप सारे हार खाई बौहन ।

उ'आं बी डोगरी आस्तै मधुकर हुंदा मता योगदान ऐ । इ'दियां रचनां इस चाल्ली न :-

1. नमियां मिंजरां (कविता संग्रह)
2. डोला कु'न ठप्पेआ (कविता संग्रह)

3. मैं मेले रा जानू (कविता संग्रह)
4. पदम गोखडू (कविता संग्रह)
5. एकोत्तरशती (टौगर रविन्द्रनाथ हुदियें कविताएं दा अनुवाद)
6. अडीटर शीराजा डोगरी, साढा साहित्य, डोगरी लोकगीतें दा कठेरन,
डोगरी लोक कथां ते अकैडमी दियें किश होरने कताबें दा
सम्पादन

iii) मधुकर हुंदी काव्य-सिरजना दा मूल्यांकन

‘नमियां मिंजरा’ नांऽ दस इंदा कविता संग्रह 1954 बरें च छपेआ । दस संग्रह दियें मितयें कविताएं दे नांऽ नमी, नमां आदि विशेषने कन्नै शुरू होए दे न । जिंयां:- नमें गीत, नमीं चेतना, नमां इतिहास आदि । सच्चें गै एह कविता संग्रह इक चाल्ली कन्नै नमें ते प्रगतिवादी विचारें दा संकलन ऐ जिस च कवि ने प्राचीन परम्पराएं गी वुस्सत देइयै, विकास दी नमीं दिशा दिती दी ऐ । इस संग्रह दी कविता ‘चरखा’ बड़ी मार्मक ते भावें भरोची दी कविता ऐ । ओह कुसै कल्ली-कलापी विधवा नारी दे जीवन दी र्होल ऐ ते इस र्होल दे सहारे ओह अपने जीवन भर बदनसीबी दा मुकाबला करने दी समर्थ रखदी ऐ :-

इस्सै चरखे ने साथ दित्ता हा सुहागा दा,
इस्सै चरखे ने साथ गमी दा नभाया हा ।
सिरा दा ओह साईं जदूं मिगी छोड़ी गोआ हा ,
कत्तन गै मिगी तदूं एहदा कम्म आया हा ।

नमियां मिंजरां च गै असंगी ऐ जुआन दिलै दियां धड़कनां सनोचदियां न:-

अज्ज गुण्डियां – गुण्डियां धारा लभन,
बे आस नमानियां ब्दारां लभन ।

इंदा दूआ कविता संग्रह “डोला कुंन ठप्पेआ” ऐ । इस संग्रह दियां कवितां डोली, युगा दी आस, आदि डोगरी साहित्य दियां बेहतरीन कवितां न । ‘डोली’ कविता च घिस्थी जीवन दा शैल चित्रण ऐ । कुड़ियें दी उपमा मठोंदी फसला कन्नै दिती दी ऐ ते उं’दें माऊ-बब्बै दी तुलना उं’नें करसाने कन्नै कीती दी ऐ जेह्दे फसल रांहदे, पालदे ते पही उसी तयार करदे न । अक्सर एह रीत चली आई ऐ जे कनकां पक्कनें-बनने परैन्त करसानें कोल नेई रौंहदियां इंयां गै पली-पोसी दियां कुड़िया बी माऊ-बब्बै कश नेई रौंहदियां उं’नेंगी बखले घर कोई सौहरिये लेई जंदे न ।

मधुकर दे काव्य च समान्तशाही नजू ते शोषन दी नीहें पर खड़ोते दे नजाम बारै बड़ा बरोधी सुर उठदा लभदा ऐ ते प्रगतिवादी विचार उसदी कविता दी रूह सेही होंदे न । ‘कोहलू’ कविता उसदी इय विचार धारा दी बेजोड मसाल ऐ । कोहलू दा बैल अक्खीं पर पट्टी बज्झी दी होने कारण बिजन सोध दे इक्कै थाहरा पर चक्कर लांदा उमर बेहाई ओड़दा ऐ पर उस बचारे गी उस कठन मेहनत दा कोई सिला नेई थहोंदा इंयां गै अज्ञानता दे मारे दे बेजबान लोक बी अपनी कठन मेहनत दी कमाई दे कदें हकदार नेई होंदे उं’दी सारी मेहनतू दा फल ते पूंजीपति हाकम लेई जंदे न । कवि गी एह गल्ल रास नेई औंदी । उसदा खून खोलदा ऐ जे इस जुल्म-सितम गी खत्म कीता जा । पर उसगी विश्वास ऐ जे रली-मिली संघर्ष करने पर कोई कुसै दा शोषन नेई करी सकदा । इस बारै उसदे भाव न :-

रूप जुगै दा बदला करदा इक्कै पलटा खाना,
पलें खिनैं दी गल्ल छड़ी हुन बिंदक् जोर लाना ।

कवि अपनी कविता च दार्शनिक चिंतन दा सबूत बी दिंदा ऐ । 'युगा दी आस' च कवि आखदा ऐ –

एह बचपन मुंड जुआनी दा, एह नमीं पनीरी अमना दी,
एह लैहर मिला दी लैहरा ने, इक गंगा दी इक जमना दी ।

'युगा दी आस' कविता च बी कवि दा नजरिया बड़ा रचनात्मक ते प्रगतिवादी ऐ । ओह नेह युगा दा निर्माण करना चांहदा ऐ जित्थै सिर्फ हिरखे दी गै छां होऐ आपस चें हिरख होऐ :-

औं नमें युग दा गीतकार तां गीत में इ'दें गा करनां
औं इ'दें रस्ते सोता नां, औं इ'दी बत्त सजा करनां
हिरखा दे नीर बर्हा करनां, जे नमीं पनीरी सुक्कै नेई,
भाखें दे भाग जगा करनां, जे आस जुगा दी मुक्कै नेई ।।

मधुकर हुंदा त्रिया कविता संग्रह 'में मेले रा जानू' ऐ ते इस कविता संग्रह पर मधुकर होरें गी 1977 ब'रें दे साहित्य अकादमी पुरस्कार कन्नै सम्मानत बी कीता गोआ हा । इस संग्रह च बी बड़ियां सुंदर, प्रभावत ते प्रेरत करने आहलियां कवितां संकलत न । कोहलू , नमां इतिहास, तान जनेहियां कवितां जि'दे च कवि नै पूंजीवाद गी टनकारे दा ऐ लोकें गी शोषन दे खलाफ सुर बझालने लेई प्रेरत करदियां न । इसदे इलावा सारगर्भत सूत्रात्मक शैली च किश लौहकियां-लौहकियां कवितां बी 'बारां कवितां' सिरलेख दे तैहत् छापियां न, जि'दा बित भामें लौहका ऐ पर भाव बड़ा गूहड़ ते शिद्धत भरोचा ऐ । इ'नें भावं दे विशे न रोह, संदोख आदि । जि'यां :-

हुन साढ़ा इतिहास लखोना,
मिन्नती दे लश्कारे नै ।
एह बनना इतिहास नमां हुन,
थोड़े दी टनकारें नै ।
हुन इतिहास लखोना साथी,
हल्लै ते ललकारे नै ।
हुन साढ़ा इतिहास लखोना
कम्म ते रुजगारें नै ।

इ'दी कविताएं च आशावादी सुर बी लभदे न जेह्दे च समाज गी परतने दी स्हेई ते पक्की सोच घमचोल च पेदी ए । फही बी मनुक्खी इतिहास गी दिखदे न । जि'यां :-

जुग सदा रेहा ऐ लामें दा,
जुग सदा रेहा तलवारें दा ।
जुग सदा रेहा ताकत दा ,
दो चार करारें बारें दा ।।

इ'दा चौथा कविता संग्रह 'पदम गोखडू' 1989 ब'रें च छपेआ । इस संग्रह दियें कविताएं च बी भावें दी सुंदर सरोखड़ अभिव्यक्ति ते भाषा दा नरोआ गुहाड़ इ'दी उत्कृष्ट काव्य-कला दा प्रमाण दिंदे न। अक्सर

कविताएं दी भाव-भूमि जीवन दे तत्थ-तजरबें पर आधारत विचारें दी नीहें पर टिकी दी ऐ । 'कतल गराह' कविता दे एह बोल :-

एह झूठ ऐ, एह झूठ जे ,
कदें त्राह ने मारेआ,
जदूं कदें बी मारेआ
तदूं बसाह ने मारेआ

ते इ'यां गै 'शर्त' कविता दियें इ'नें सतरें च :'

बा अदब समें दे पारखियों
बे-अदबी अक्सर होई जंदी ।
पत्थर उसलै परिसज्जलदे,
जिसलै कोई लाश दंगाई जंदी ।।

कवि ने जो बी गल्ल आक्खी दी ऐ अपने जीवन च भोगे दे ते दिक्खे-भाखे दे तलख-त्रिक्खे तजरबें दे आधार उप्पर आक्खी दी ऐ जिस व कुतै शोश्न , कुतै जुल्मों-सितम ते कुतै धोखा ते बेईमानी पर करारा व्यंग कीते दा ऐ ।

इस्सै चाल्ली 'हास्सा' कविता च बी कवि दा नजरिया बड़ा सूखम ऐ । अज्जै दे इन्सानियत बरोधी युगै दे जीवन लेई ओह आधुनिकता दी आड़ च पलै करदी फिरकापरस्ती ते धार्मक संकीर्णता दी कबैहूतें गी जिम्मेदार ठहरांदा ऐ ।

फिरका परस्तियां ने नेहा ढालेआ समाज
धर्म दी धाक उल्लरी लेइयै नमें रिवाज
बंडे बंडारियें दी तदूं पिरत ही पेई
माहनू दी माहनू कन्नै बी पन्छान निं रेही ।

इसदे इलावा मधुकर दी कविता च दार्शनिक विचारधारा दी बी रंगत ऐ, अपना गुहाड़ ऐ । उसदी लगभग सभनें रचनाएं च दार्शनिक भावें दी सुंदर तर्जमानी लभदी ऐ । जियां :-

जो लैहर कनारा टपपे जाना
ओह लैहर कनारै होई जंदी ।
मिती दी गोदा सेई जंदी ।
मिती दे रंग रंगोई जंदी ।

मधुकर दी कविता दी सारें शा बड़डी खूबी उसदा अनसंभ शब्द-भंडार ते भाषा दा आप-मुहारा प्रवाह ऐ । मधुकर होरें छंदोबद्ध ते छंदहीन दमें चाल्ली दियां कवितां रची दियां न । भाषा दा शलैपा ते प्रवाह इन्ना सरोखड़ ऐ जे दूई भाषाएं दे लपजें दी बरतून अक्खदरी नेई ऐ । उपमा ते रूपक, प्रतीक बड़े शैल न ते इ'दी कविता गी सुआरदे न । मधुकर दी कविता जेकर नेई होंदी तां डोगरी दा कविता खेतर इन्ना समृद्ध नेई होना हा ।

मधुकर ने डोगरी गजल च बी प्रयास कीते पर इस विधा गी अगमें अपनाया नेई पर इ'दे गीतें दा खजाना अजें तगर अनछपेआ पेदा ऐ । मधुकर होर 24 अगस्त 2000 गी अपनी जीवन यात्रा सम्पन्न करियै परलोक सधारी गै ।

(7.3.2) कवि चरण सिंह

i) जीवन-परिच

चरण सिंह हुं'दी शख्सियत डोगरी साहित्य च अंग्रेजी कवि 'शैले' ते 'कीटस' आह्ला लेखा बझोंदी ऐ । भर जुआनी च चली बस्सने आहले कवि चरण सिंह हुं'दी कवि दा सुर बहुरंगी ऐ । आशा निराशा दी दरंगी झलक संघर्ष, निजी घुटन, जीवन यथार्थ ते प्रगतिवादी सूर सब किश इंदी कविता च मिलदा ऐ । एह इक प्रतिभाशाली कवि हे । इंदे भावें च प्रौढ़ता बी ऐ नमीं सोच ते भोगे दा यथार्थ बी इंदियां 'दो कींगरे', 'इक भुआखड़ क 'डेआरी भुक्खा रूहं ते 'जोत' डोगरी काव्य जगत दियां प्रतिनिधि रचनां मन्नियां जंदियां न । दो 'कींगरे' स्वछंद डोगरी कविता दा बेशक इक उज्जवल नमूना ऐ पर चरण सिंह दी इक मशहूर कविता प्रसिद्ध स्पेनिश कवि मिगुएल हर्नान्देज़ दी कविता 'प्यारे हमारे बीच उगा' थमां पूरी चाल्ली प्रभावत ऐ ।

कवि चरण सिंह हुंदा जन्म 22 अप्रैल गी तसील साम्बा च ठा. भगवान सिंह हुंदे घर होआ । पढ़ने-लिखने दा शौक इनेंगी बचपुने थमां गै हा । दसमीं पास करदे इनें शरद चन्द्र, प्रेमचंद ते रवीन्द्रनाथ ठाकुर होंदा मता हारा साहित्य पढ़ी लैते दा हा । इंदी पैहली रचना साईस कालेज जम्मू दी 'तवी' पत्रिका च 1957 ई. च छपी ही ते बाद च डोगरी संस्था दे सम्पर्क च औने पर इंदी निरंतर साधना शुरू होई गई । मार्च 1964 च इंदी कविता संग्रह 'जोत' छपेआ । प्रकृति, शंगार, संघर्ष, व्यक्तिगत अनुभव, नराश नमेशियें ते मौती सरबन्धी 28एं कविताएं दा एह संग्रह जम्मू-कश्मीर कल्चल अकैडमी आसेआ पुरस्कृत बी होआ । चरण सिंह हुंदी भाषा च इक अजब प्रवाह ऐ ।

i) साहित्य दा मूल्यांकन

कविता च कवि दी भाषा च इक स्वाभक प्रवाह ऐ । शब्द योजना, छंद बैहर ते मुहावरें दे प्रयोग दा ते शैली पर्याप्त हृद तगर प्रभाव पाने आहली ऐ । भाषा सजीवता ते संगीतात्मकता दे गुणें कन्नै भरपूर ऐ, सुंदर प्रतीक रंग-बरंगे शब्द चित्तर ते अलंकारे दा रौसलापन इंदी काव्य कला दे विशेष गुण न । कवि दी साधना दे नेकां रंग न । इंदी सोच, अभिव्यक्ति ते शैली च बखरापन ऐ । इंदी नजरें च सच्ची प्रीत सूली दी सेज ऐ । एह कुरबानियां मंगदी ऐ । दिखावे ते हवस शा एहदा मकाम बड़ा उच्चा ऐ :-

“साथी तोड़ नभाने गितै
दुख जीवन भर ढोना पौंदा ।
सच्चा हिरख कमाने गितै
मरियै मिट्टी होना पौंदा ।।” (हिरख)

इसदे इलावा इंदिये कविताएं च रोमांस ते शलैपे दा वर्णन बी मिलदा ऐ । इस चित्तर इस चाल्ली ऐ:-

“मधु भरोचा जीवन प्याला
जंदा डुल्ली - डुल्ली ।
सोचै, जे कोई रसिया आवै
जान कलावे खुल्ली ” (होली)

इंदियें कविताएं च सिर्फ हिरख-प्यार ते रोमांस दा गै वर्णन नेई बल्के कविता च केई थाहरें पर दार्शनिकता दे दर्शन बी होंदे न, जियां :-

“एह अकली दा गोरख धंदा
लोऽ पैहलें जां न्हेरा।” (भुक्खा रूह)

इ’दें इलावा किश इक कविताएं च रंग-बरंगा प्रकृति चित्रण दा जनारा बी दिक्खने गी मिलदा ऐ । जि’यां
‘बरसांत’ नांऽ दी इक कविता दियां एह पंगतियां इस चाल्ली न :-

“फिरी बिज्ज मिलकी, फिरी बदल छाए,
हरी धरत होई, नमें प्राण बस्से ।
गलें कींगरे दे मिगी डिग्गल हस्से ।”

ते नराशावादी सुर दा इक उदाहरण इस चाल्ली ऐ :-

“दिन नरास ते रातां दुआस नं ,
सोगर बुआजां गै जोकियां गास न ।
जिंद दुआसियें दे घेरे च आई,
मौत बी सैहल निं जीना बी फाही” ।
(दिन नरास ते रातां दुआसन)

इस नराशावादी सुर दा अर्थ एह नेई जे इ’दे काव्य जगत च नरा गै नरासा ऐ बल्के आशा दी किरण बी
कुतै-कुतै मिलदी ऐ । एह गल्ल बक्खरी ऐ जे नरासा दा सुर इ’दियें कविताएं च चढ़दा ऐ । इक
आशावादी सुर दा उदाहरण इस चाल्ली ऐ ।

“कल पूजग एह दुनिया मिकी,
अज्ज बेशक्क एह निंददी ।”

इ’दे काव्य दा शिल्प पक्ख बी कुसै गल्ला घट्ट नेई । कविता च अलंकारें दा चमत्कार ते छंदे दा प्रवाह
मनै गी मोही लैदा ऐ । हेठ लिखी दियें पंगतियें दा इक उदाहरण :-

“ओ मेरिये कविता कूजे
खोल-खोल एह बंद दुआर
सोह्न हीखियें भाव छुओल
डग-डग डोलन ।
सूहा सालू करै छपैलां
भेत पंजेबां खोह्लन।” (लामां-फेरे)

इसदे इलावा डोगरें दी शूरवीरता उप्पर गर्व करदे होई कवि ने लिखेआ ऐ :-

“गज-गज फुल्ले न सीने डोगरें दे
जेहदा नांऽ सुनियै अंग-अंग फड़कन
उस डुग्गर दे वानी-मवानिया गी,
मेरे भाव समूलचे, शेऽर अर्पण ।”

28एं बरें दी भर जुआनी च 22 जून 1969 दी रातीं बिजली दे शाक दी दुर्घटना कन्नै इस होनहार युवा
कवि दा काल होई गेआ ।

(7.3.3) कवि बसंत राम बसंत

i) जीवन-परिच

डोगरी साहित्य दे परपने साधक न । हास्य-रस दे कवि न । व्यंग-रक्ज इं'दी कविता दा बड़डा गुण ऐ । मुशायरें च बाह-बाही लुट्टने आहले परानी पीढ़ी दे परम्परावादी कवियें च 'बसंत राम बसंत' हंदा जन्म 1901 च कंढोली नगरोटा (जम्मू) दे कोल इक ग्रांड 'ढोक बजीरा' दे इक गरीब परिवार च होआ। इं'दी स्कूली पढ़ाई-लखाई भाएं नेई होई सकी पर कवि आह्ला इक भावुक मन ते दूरै दी सोच इं'दे कोल जरूर ही । बसंत राम होर जन कवि न ।

बसंत राम होरें सरकारी हस्पताल च बतौर खिदमतगार नौकरी कीती ते रटैर होने परैन्त 86-ब'रें दी उमरी तगर बी काव्य-रचना करदे रेह 'छड़ा', -खरा हा में ग्रांड' ते 'बसैत' इं'दियां मशहूर कविता न । एह सरल ते सादी भाषा च रची दियें अपनियें रचनाएं कन्नै मनोरंजन करदे हे । काव्य कला दी द्रिष्टी कन्नै किश त्रुटियां होंदे होई बी इं'दी कविता च इक रवानी ही ।

♦ रचना – हिरखी दीया (कविता संग्रह)

i) साहित्य सिरजना दा मूल्यांकन

हास्य-व्यंग इं'तर कविता दी प्राण-शक्ति ऐ, इं'दी पन्थान ऐ, इं'दी कविता दी प्रवृत्ति ते प्रकृति ऐ पर हास्य-व्यंग द्वारा जनता दा मनोरंजन दे इलावा एह रचना द्वारा कोई नां कोई लोकें गी सनेहा बी दिंदे चलदे न । हेठ लिखी दियां व्यंगात्मक पंगतियां समाज दी माली हालत ते गरीबी कन्नै संघर्ष करने आहले लोकें दा चित्रण बी बड़े मार्मिक ढंगै कन्नै करदियां न :'

“अमीरें दी एह वहानी ऐ,
असें केह बसैत मनानी ऐ,
बसैत मनांदे अड़ेओ ओह,
जिन्दै अंदर माया दी लोऽ,
जिन्दै अन्दर दाने ते भोऽ
असें रुट्टी बी मुश्कल खानी ऐ ,
असें केह बसैत मनानी ऐ ।।”

कवि ने 'बसैत' नांख दी कविता दे ब्हानै खलके दर्जे दे लोकें दियें आर्थक तंगियें कन्नै भरोचे दे जीवन दा चित्रात्मक वर्णन कीते दा ऐ । इं'दी कविता मनोरंजनात्मक ते संदेश बर्द्धक दौनें गुणें गी लैइयै चलदी ही लयात्मकता जां संगीतात्मकता कन्नै भरपूर होने करी मुशायरें आस्तै बड़ी कामजाब ते प्रभाव पाने आहली साबत होंदी ही ।

डोगरी काव्य-जगत दे प्रचार – प्रसार च इं'दी कविता दा डोगरी साहित्य गी काफी योगदान रेहा इं'दा अपना जीवन कलमकूला हा ते इक्कले जीवन च केह-केह दुख होंदे न इं'नेंगी पूरा-पूरा अनुभव हा । इस्सै करी इं'नें -छड़ा' नांऽ दी कविता च इक छड़े दा अनुभव भरोचा जीवन किस किस दा होंदा ऐ, ओह इक्कले जीवन गी कि'यां मसूस करदा ऐ , उसदा खूबसूरत चित्रण हेठ लिखी दियें हास्य-व्यंगात्मक पंगतियें च इस चाल्ली कीते दा ऐ :-

“नां नूहां पुत्तर गिल्लू ऐ,
नां डंगर बच्छा छिल्लू ऐ ।
नां कुक्कड़ तोता बिल्लू ऐ ॥
तां रौहदा मन ऐ चढ़े दा,
केह जीन बचारे छड़े दा ।”

नां धूफा दी नां जोती दी,
नां चुल्ल कुसै ने सोती दी ।
पानी बी सुक्के दा घड़े दा ॥
जे अक्ख कुत्तै भरमोई जंदी
जां दाली दी कड़छी थोई जंदी
तां सारे दी नजरी चढ़े दा ।

बाहर डंडे—सोटे खा करदा
घर पीड़ै नै करला करदा
ओहदे अंदर निं कोई जा करदा
भाएं होऐ ताप चढ़े दा
केह जीन बचारे छड़े दा ॥”

उप्पर लिखी दियें पंगतियें च दुख—दायक ते अभाव भरोचा छड़े दे जीवन दा सजीव चित्रण ऐ । पढ़े—लिखे
दे नेई होने करी एह अपनी भाशा च कलात्मकता नेई आहनी सकैं ते फलस्वरूप भाषा च सादगी झलकदी
ऐ पर लैऽ ते ताल दी द्रिष्टी कन्नै कविता मुहां बोलिदयां सेही होंदिया न ।

.....

कवियों का जीवन – परिचे ते डोगरी कविता – साहित्य गी उं'दा योगदान

रूपरेखा

(8.1) उद्देश्य

इस पाठ गी पढ़ियै विद्यार्थी डोगरी दे श्रेष्ठ कवि श्री गोगाराम साथी ते रोमाल सिंह भडवाल हुंदे जीवन दे बारे च ते डोगरी कविता साहित्य च हुंदे योगदान दे बारे च संपूर्ण जानकारी प्राप्त करी सकडन । इस समग्री दे अध्ययन दे बाद विद्यार्थी कवि दे व्यक्तित्व ते कृतित्व सरबन्धी सुआलें दे परतें देने च समर्थ होई सकडन ।

(8.2) पाठ – परिचे

इस पाठ च बखाने गेदे लोकप्रिय कवि गोगाराम साथी ते रोमाल सिंह भडवाल हुंदे जीवन ते काव्य–

(8.3) पाठ–प्रक्रिया

कवि गोगाराम साथी ते रोमाल सिंह भडवाल ते डोगरी कविता – साहित्य गी उं'दा योगदान ।

- (i) गोगाराम साथी का जीवन–परिचे ।
- (ii) गोगाराम साथी दियां रचनां ।
- (iii) गोगाराम साथी दी काव्य–सिरजना का मूल्यांकन ।

रोमाल सिंह भडवाल ते डोगरी कविता – साहित्य गी उं'दा योगदान ।

- (i) रोमाल सिंह भडवाल का जीवन – परिचे
- (ii) रोमाल सिंह भडवाल दियां रचनां
- (iii) रोमाल सिंह भडवाल दी काव्य–सिरजना का मूल्यांकन

(8.3.1) कवि गोगाराम 'साथी' ते डोगरी कविता – साहित्य गी उं'दा योगदान

i) जीवन–परिचे

डोगरी कविता दे खेत्तर च गोगाराम 'साथी' हुंदा नुमाया थाहर ऐ । एह ऐसे कवि न जि'नें घट्ट समें च अपनी साधना कन्ने चेची पन्छान बनाई लैती । गोगाराम साथी जम्मू–कश्मीर रियास्ती दी तसील भिंवर दे इक मश्हूर कसबे बटाला का रोहने आहला हा ओहदे पिता रियास्ती फौजा च लांगरी दे तौरा पर कम्म करदे हे । सन् 1919 ई. च उं'दी पलटन सिरिनगरा च ही ते उत्थें, उससै ब'रे 13 अप्रैल अर्थात बसाखी आहले ध्याड़े गोगाराम का जन्म होआ हा । गोगाराम सिर्फ पं'जें ब'रें दे हे, जिसलैं उं'दी माता का काल होई गेआ हा । ओहदे द'ऊं–त्र'ऊं ब'रें दे बाद गै उं'दे पिता जी का सुर्गवास होई गेआ । इससै करी उं'नें गी स्कूली पढ़ाई करने दी ज्यादा सुवधा नेई ही मिली सकी । घर–परिवार दी आजीविका चलाने आस्तै 19 ब'रें दी उमरी च गै इ'नें बी रियास्ती पलटनी च नौकरी करी लेई ही । सन् 1947 ई. तगर इ'नें गी

सिर्फ 9 बरें गै होए हे पलटनी दी नौकरी जे देसै दे अजाद होने कन्नै गै पाकिस्तान नांS दा इक नमां मुल्क बजूद च आई जाने कारण साढ़ी रियास्ती दी राज—व्यवस्था च बी इक बड़ा अदल—बदल होआ हा। एह फौज बी भंग करी दिती गई जिस करी गोगाराम साथी होर इस नौकरी थमां बेहल्ले होई गे । गोगाराम अपने परिवार कन्नै ज्यौड़ियां नांS दे कस्बे च चली आए। गोगाराम दा एह कठन जीवन संघर्षपूर्ण जीवन बी उसी कोई चेचा समाजी व्यक्तित्व देने दा कारण नेई ही बनी सकदा । पर एहदे च कोई शक नेई ऐ जे गोगाराम साथी गी डोगरी साहित्य दी खास करिये डोगरी कविता दी दुनिया च इक उल्लेखजोग साधक दे तौर पर मान्यता प्राप्त ऐ ते ओह मान्यता दा योग्य अधिकारी ऐ ।

गोगाराम साथी होंरे गी लिखने दी प्रेरणा उंदे गुरु स्वामी परमहंस शुम्भनाथ हुंदे थमां होई ही । इंदे त्रै कविता संग्रह 'दिक्खने आहली अक्ख नेई' 'हिरखी धागे' ते 'मनेआदी आला' डोगरी कविता जगत च अपना थाहर रखदे न ।

गोगाराम गी डोगरी दे कवियें दी बरादरी च जिस कविता राहें पैहली पन्थान होई ही, उस कविता दा शीर्षक हा 'दिक्खने आहली अक्ख नेई' । पर सूफियाना रंगत ओहदी काव्य—साधना च बड़ी बूहड़ी नजर औंदी ऐ। इंदी पैहली कविता दियां किश पंगतियां :-

“कोई अल्ला—ईश्वर बक्ख नेई
छड़ी दिक्खने आहली अक्ख नेई
कदें बुत्तें धूफ धखा करनां
कदें कन्धें सीस नुआ करनां
कदें लैहंदे—चढ़दे जा करनांतूं अंदर रखदा तक्क नेई
छड़ी दिक्खने आहली अक्ख नेई ।”

गोगाराम साथी दियें कविताएं च इस सूफियाना रंगत उप्पर पंजाबी दे सूफी शायर बुल्लेशाह दे कलाम दा असर बी नजरी औंदा ऐ :-

इं नें उच्चे तुम्मेने चढ़ी—चढ़ी,
तूं कूकां कुसी सुना करदा ?
कुतै पंजें भरनें होई होई,
सैखें गी फूकां ला करदा ।
एह भरम—भलेखे की पान्ना,
ओह सभनें दे विच्च बरसै दा ।”

गोगाराम साथी कवि होने दे नातै अपने समाज दे उं नें शोषत ते नादार साथियें गी इस दम्भपूर्ण स्वार्थ बारै हुशियार करना अपना कर्तव्य समझदा ऐ । आम आदमी अपनी बदहाली दा रोना रौंदा ऐ, अपने भागें गी गालियां कढदा ऐ, मायूसी च कुढदा ऐ, पर शायरी दी अक्ख खिल्लरी दी आपूं लुकाई दियें सोचें दे लौहके—लौहके घेरे कोला उप्पर उटिठयै हालात गी दिखदी , समझदी ते मसूस करदी ऐ । उसदी संवेदना, उसदा एहसास उसी कचोटदा ऐ ते उसदा दर्द गै उसदे कलाम च प्रतिध्वनित हुंदा ऐ ।

गोगाराम दी काव्य साधना दा मुंढला सफर इस्सै संवेदना दी अवाज कन्नै शुरू होआ हा ते 'मनेआदी आला' उसदी इस संवेदनशीलता दी आखरी व्यापक प्रतिक्रिया ऐ जि'यां :-

1. जींदे गी धिक्के मारे दा, मुर्दे गी हलवे चाढ़े दा ।
2. कोई भुक्खा कोला ऐ खंघे दा, तू तीर्थ लड़्डू बंडे दा ।
3. भाएं गले ग्राह न आई गोदे, पर कुसै गी देन निं बंडियै ।

‘मनोआदी आला’ उं’दी त्री रचना ऐ, जिसगी उ’नें लम्मी कविता दे रूप च लिखेआ । इस कविता च 58 पद न ते इ’दे राहें कवि ने समाजी शोषन दी दर्द-वेदन दे इलावा साधारण जीवन-यापन च खौदल पाने आहलियें इखलाकी ते समाजी बुराइयें बखी बी सारत कीती दी ऐ । जि’यां :-

“चंगे घर जे पंगे जम्मन, दिन आई जंदे माड़े
खुल्ली जंदी मुट्ठी मठोई देह बनी जंदे खाड़े ।
उग्धड़ी जंदे झुंड सिरैं दे, फैलन सूकां हाड़े ।

फिरकापरस्ती बारै गोगाराम बड़ी जोरदार तनवीह करदा ऐ – जि’यां :-

नोखी अग निं बलदी लभै, फूकी सुट्टे अंदर,
अंदरो-अंदरी करदी भुग्गे, के मसीत, के मंदर ।
खल्ला सहालो, उप्पर सुलगे, सुरकै अंदरो-अंदर,
‘साथी’ झुलसै पौद मनुक्खी, भड़कै जदूं जुआला ।।

इक होर पदे च ‘साथी’ दी सोचै दा घेरा बधी जंदा ऐ । ओह दुनिया दे देसैं, जाकतयें ते मनुक्खें दे अमन ते विकास गी डांवाडोल करी देने आहले आपसी बरोध ते आपसी तनोतनी गी लक्ष्य करियै आखदा ऐ-

कु’न दब्बेआ ऐ सेही दा त्रकाला दुनियां दी मुहाली
इक दुए दा टुकनन छौरा, बिगड़ी गई प्रणाली ।
मान मलाहजे चली गे सारे, समें दियां कटेआली ।

मनुक्खें दे इस आपसी बरोध पर दुख बुझदे होई कवि उ’नेंगी पैछी-परखुरं दी मसाल दिंदे होई ते सबक दिंदे होई इक कविता च इ’यां गलांदा ऐ :-

“इक रुक्ख पर करन बसेरा, बक्खरी-बक्खरी टोली
फंग रंग भाएं बक्खरे-बक्खरे, पही बी इक मजोल्ली
रात पवै तां समां बिहांदे, सांझे दुक्ख फरोली,
न्हैरी झक्खड़ जद बी झुल्ले , सब गै जंदे डोल्ली ।।

गोगाराम साथी दी कविता च सुफियाना भावें ते समाज-सुधार दी भावना दे इलावा संत कबीर जां पही डोगरी कवि परमानंद अलमस्त आहला लेखा उस प्रभु-प्रीतम इश्के-हकीकी च गलताज होने दा सुर बी बड़ा सुआया ऐ । जि’यां :-

“सुच्चे प्यार आहली भड गुच्छे-गुच्छे
में दम्म-दम्म घोटदी फिरां ।
पीनीं दिलें दे प्याले करी सुच्चे, में दम्म दम्म घोटदी फिरां ।
चढ़ी जा सरुर जिसी भुल्ले ओ शरीर गी
इक्क इक्क बिच्च दिक्खै ओहदी तस्वीर गी ।
नेइयों जात जमात कोई पुच्छे, में दम्म दम्म घोटदी फिरां ।

चर्खा साढ़े समाजी जीवन दे इक बड़े व्यापक घेरे कन्नै सरबंधत रेहा ऐ । डोगरी कवि श्री केहरि सिंह मधुकर ने अपनी इक कोमल कविता राहें चर्खे गी कुसै दी जीवन-यात्रा दा भरोसे-जोग साथी बनाइयै

चित्रत कीता हा । 'हिरखी धागे' नां दे कविता-संग्रह दे सफा 47 पर 'चर्खा शीर्षक कविता च कवि ने चर्खे गी मनुक्खी शरीर दे रूपै च चित्रत कीता ऐ -

एह चर्खा तेर जिसने घड़ेआ, घड़ेआ बड़ा कमाल कुड़े,
हंडदा'हंडदा उतरी जागी, रक्खें जे तू सम्हाल कुड़े ।
चूड़ै कन्नै चूड़ मिली दी, फर्क नेई बिच बाल कुड़े,
द'ऊ तंदू दी माहल फिरे दी, चर्खे दे बचकार कुड़े,
त्रक्कलें गी जे बल पेई जागी, खानी पौनी मार कुड़े ।
मैले कन्नै दाग होई जाने, एहदे अंदर-बाहर कुड़े ।
घर सज्जनं दे के लेई जागीर रेहा निं रूप-शंगार कुड़े ॥

गोगाराम साथी दी कविता दी भाषा-शैली बी बड़ी सैहज, सरल ते मुहावरें-खुआनें आहली ऐ । मुहावरें-खुआनें दा प्रयोग बड़ा आप-मुहारा, सैहज ते बनकदा - फबदा ऐ । किश प्रयोग इस चाल्ली न :-

1. पग रखियै घ्यो जो खंदे, उंदी सुफल कमाई ।
2. जि'नें गुरु दे खादे डंडे, ओह निं भुल्लन तालां ।
3. सुन्ना होऐ तां कदें निं मैहगी, पौंदी जरो घड़ी ।
4. बिल्ली राखी दुधै दी ते सुन्ने दी सन्यारा ।
5. द'ऊ बेड़िये ल'त्तां रक्खो कदें निं लगदे बन्ने ।
6. मुंह शीरी ते जग्ग जगीरी ।
7. सेवा बिस्थी कदें नि जंदी, थोई जंदा ऐ मेवा ।
8. अ'न्ना बंडै लड्डू साथी मुड़ी अपने गी आला ।

इस चाल्ली गोगाराम साथी ने बड़े लौहके जनेह दायरे च रेहियै समाजी ते आर्थिक तंगी-तुर्शियें दा सामना करियै ते शिक्षा दी स्तूल शां बंचत रेहियै बी डोगरी काव्य-जगत गी त्र'ऊं काव्य-पुस्तके दा नमुल्ला योगदान दिता । 20 मई 1984 गी ज्यौड़ियां थाहरा पर गै मांदगी दे कारण उ'दा सुर्गवास होई गेआ ।

(8.3.2) रोमाल सिंह भडवाल

डोगरी च कवता अजादी थमां पैहले लखोनी शुरु होई दी ही पर बल्लें-बल्लें इसदा काफला बधदा-मठोंदा गेआ । लखारियें दे इससै कारवां च मन्ने-परमन्ने दे कवि श्री रोमाल सिंह भडवाल होर बी न । खिलका कुरता, चूढ़ीदार पजामा, सिरै पर डोगरी पग, उच्ची लम्मी कद्ध-काठी, हत्थै च सोटी, मुंहादरे पर झलकदा स्वाभिमान उ'दे व्यक्तित्व दी टकोहदी पन्छान ऐ ।

भडवाल हुंदा जन्म 2 अक्टूबर 1922 ई. गी भडवाल राजपूतें दे घर भड्डू च होआ । इ'दे पिता ठा. मोती सिंह ते माता मसां देई धर्मक बचारे दे हे । इ'दा परोआर भड्डू दे शाही खानदान दी इक शाख हा । इ'दे पड़दादा ठा. महताब सिंह होर भड्डू दे राजगान दे बजीर हे । इ'नें अपनी शिक्षा भड्डू थमां ते फही रामनगर थमां प्राप्त कीती । भडवाल होर बचपन थमां गै होनहार हे । इ'दे च मैहनत ते लगन दा जज़बा हा । पढ़ने च रुचि रखदे हे । जमाता च अब्बल औने करी इ'नेंगी मनीटर बी बनाया जंदा हा ।

भडवाल होरें गी कौड़डी, गुल्ली—डंडा, फुटबाल, बास्केट—बाल, बाल—बाल, छाल—छड़प्पा दे कन्नै—कन्नै नाटक खेढने दा बी शौक हा । इंदे घरै दा गजारा तंगी—तोसी कन्नै चलदा पर एह गल्ल बक्खी ही जे गरीबी होंदे बी गरीबी बझोंदी नेई ही । पैसे दी इन्नी तंगी ही जे केई बारी मदरसे बी पुआहने पैरें जाने पौंदा हा ।

18 बरें दी बरेसै च महाराज हरिसिंह दे शकारखाने इंदी मैहकमा तवाजा दे तैहत्त दा गेम गार्ड लगने पर इंदी पैहली न्युवित्त रक्ख टंडेह उधपुर च होई । इस्सै नौकरी दे सिलसिले च इनेंगी डुगगर दे बक्खरे—बक्खरे ग्रां च फिरने दा मौका थोआ । 1980 ई० च एह उनताली बरे ते छ' महीने नौकरी करने परैत रटैर होई गे ।

भडवाल हुंदा ब्याह लगभग 25 बरें दी बरेस च ग्रांS गढ़ मालती तसील बिलावर दी माया देवी हुन्दे कन्नै होआ । पैहली पत्नी दे सुर्गवास होई जाने पर जन्द्राह दी सुमित्रा देवी हुंदे कन्नै इनें ब्याह करी लेआ ।

भडवाल होरें अपनी पैहली कवता 'धगवाल दा मेला' 1948 ई० च लिखी ते इसदे बाद 'ललारी' लिखी । भडवाल हुंदी परोआर पूजा—पाठी हा । इस करी उंदा रुझान अध्यात्म पाससै होना स्भावक गै हा । 1988 ई० च इंदी इक कताब ब्रह्म ऋषि दूधाधारी हुंदे पर अधारत 'गुरु अष्टक' छपी । गुरु अष्टक च महाराज दूधाधारी जी दी स्तुति, कव्वाली, गुरु लीला, गुरु अष्टक बगैरा गुरु कन्नै सरबंधत कविता न ।

महाराज श्री दूधाधारी बढर विचित्र माया जी,
अंत तोआड़ा हितकारी भक्त दा नेइयों पाया जी ।
महाराज दा सहारा लेइयै जो चरणे बिच्च आया जी ,
तत्काल मैं रुढ़दा बेहड़ा, उसदा बन्ने लाया जी ।

इंदा 35 अक्खरी ज्ञान—गुटका गी छपी गेआ ऐ । भडवाल होर अपनी कविता सहें जीवन दी अटल सच्चाई थमां बी भलोके लोकें गी आगाह करदे न । इंदे मताबक जीना झूठ ऐ पर मरना जीवन दी अटल सच्चाई ऐ :-

एह थोई देह मनुक्खै दी ते मंदे कम्म करना ऐ,
नेई रेहदा याद तुगी मूरखा, इक रोज मरना ऐ ।

इस्सै चाल्ली मैहनतकश ते होनहार मुंह दिखदा गै रेही जंदा ऐ । समाजै च फैला करदी सफारश नांS दी बुराई गी दिक्खियै कवि दा भलोका मान दुखी होई जंदा ऐ जे सैहबन गै इक कविता जन्म लैदी ऐ:-

गोरे गे हुने कालें गी दिक्ख,
उंदियें अपनियें चालें गी दिक्ख ।

साढ़े समाज च शराब—जुआ बगैरा जेहड़ियां बुराइयां दिनो—दिन मतियां फैला करदियां न । अज्ज दा नौजुआन इंदे च उलझदा जा करदा ऐ ते जेकर इयै इनें बुराइयें च फसी जाडन तां देश दा केह बनग । जुआन तक्के गी इनें बुराइयें शा सचेज करदे होई भडवाल होर आखदे न :-

जुआ खढांदा तां इयै शराब,
माहनू मरांदा तां इयै शराब
असें नि पीनी ए चुक्को सघंद,
आखै भडोआल पही लुट्टो हा नंद ।

गुज्झखोरी दा अज्ज सारे बोल-बाला ऐ । एह पूरे मुशायरे च कैसर दे रोग साहीं जड़ां फलाई चुकी दी ऐ ।
गुज्झखोरें दा चित्रण भडवाल होरें बड़े सरोखड़ ढंगै कन्ने इ'नें पंक्तिये च कीते दा ऐ :-

एह माहनू कुत्थुआं आए न
जि'नें सिद्धे ढिड़ड बधाए न ।
इ'यां गै- दिनें-दपैहरी इ'नें पाए दा न्हेरा
इक थों बधियै इक लटेरा ।

अज्ज पूरे विश्व च आंतकवाद फैले दा ऐ ते रोज गै धर्म दे नांऽ उप्पर कुतै नां कुतै लड़ाई-झगड़ा होंदे
रौहदे न । किश लोक अपने माफद आस्तै धर्म दे नांऽ उप्पर भलोकी जनता गी गुमराह करियै लड़ां दे न ।
भडवाल होर इस थमां बी बे-खबर नेहे । इ'नें लोकें गी समझानें आस्तै 'इज्म दी तलोआर' नांऽ कविता
लिखी । जि'यां :-

तेरे रंग नराले दिक्खे इज्म दिए तलोआरे ।
तूं पब्बें दे भार खड़ोइयै उच्चे लानी नारे ।
चलदी फिरदी फेरा करनीं , तूं फिरके दी माला,
ऐसी दुनिया भुट्ट बनाई कोई निं समझै चाला ।

देश-प्रेम ते वरता भरोचियां केई कवितां इ'दे संग्रैह च शामिल न । उ'दे चा मुख न डोगरा देस, अमर
शहीद, भारती वरी, छब्बी जनवरी, पैहठ दी लड़ाई , चीन दी लड़ाई, शहीद विक्रम सिंह जरनैल बगैरा ।
भडवाल होर अपनी धरती गी वीर-बहादुरें दी, धरती मिथदे न ।

ए ईन भरोचे वीरें दा देश,
ए ढाल, तलवारें दे तीरें दा देश,,
ए मीरे दा देश, ऐ पीरें दा देश,
ए बांकिये शैल तरवीरें दा देश, ।

भडवाल होरें किश लम्मियां कविता 'दुआ परेह', सिद्ध पुरुष बाबा लच्छी राम, कौरस श्री धन्ना भगत, पैहठ
दी लड़ाई बगैरा लिखियां । इ'नें नारी नांऽ दी इक लम्मी कविता अपनी लाड़ी थमां थोई । चौथे सर्ग च
लिखदे न :-

पत्नी कोला लब्धे मिक्की कोई नारी परमान ।
नारी जीवन लिखने दा तां गै होआ ग्यान ।
ब्याह-शादी दे छे-सत्त कारण कीते इस कमाल ।
तां गै छाती तानियै चलदा भडवाल ।

कवि ने डुग्गर दी आंचलिकता गी बी बड़ी खूबसूरती कन्ने दर्शाए दा ऐ । कविता पढ़ियै अस दावे कन्ने
आक्खी सकनेआं ते इ'नें बड़े सरल शब्दें ते अलंकृत भाषा कन्ने नारी दा सजीव चित्रण करियै इक सराहन
जोग कम्म कीता ऐ ।

♦ भाषा शैली :-

भडवाल होरें अपनी कविताएं च वर्णनात्मक शैली दा प्रयोग कीते दा ऐ । इ'दा भाव पक्ख बड़ा सशक्त ऐ ।
इ'नें अपनियें कविताएं च उपमा, रूपक दा बड़ा सरोखड़ प्रयोग होए दा ऐ :-

आशा दियां सूइयां लेइयै झूठे हार परोंदा
मोरै आंगरे पैचडुएं गी दिक्खी-दिक्खी रौंदा ।

कुतै-कुतै इ'नें बेजान गी सजीव बनाइयै बड़ी गै सुन्दरता कन्नै शब्दे च परोए दा ऐ :-

सौन म्हीना चढेआ बरखा ब'रदी ऐ
इक मटेआर खड़ोती सोचा करदी ऐ
ए मस्ताना जोगी अज्ज योवन दे बिच आया
ए ब'री-ब'री निं रजदा, इस ऐसा कैहर कमाया ।

नारी कविता च इ'नें अतिशयोक्ति अलंकार दा प्रयोग बी कीते दा ऐ ।

जि'यां - ब्रह्मा, विष्णु, इसने मोही ले
अपनी माला बिच्च परोई ले
तां मन्नां जे चुस्की जान जां कोई इसगी तोहमत लान ।

कविताएं च आम भाषा च बरतोने आहले मुहावरें-खुआनें दा बी प्रयोग कीते दा ऐ । उं'दियें कविताएं गी पढ़ियै डुग्गर दे भलोके लोक उं'दा रैहन-सैहन अक्खीं अगगें घुम्मी जंदा ऐ । इं'दियें मतियें कविताएं च डुग्गर धरती दी खुशबू औंदी ऐ ।

.....

कवियें दा जीवन—परिचे ते डोगरी कविता—साहित्य गी उंदा योगदान

रूपरेखा

9.1 उद्देश्य

इस पाठ गी पढ़ियै विद्यार्थी स्वामी ब्रह्मानंद तीर्थ ते शिवराम दीप हुंदे जीवन दे बारे च ते उंदे कविता साहित्य दे बारे च जानकारी कठेरी सकडन। ते इ'नें कवियें दे सरबंधे च सोआलें दे जबाव देने च समर्थ होई सकडन।

9.2 पाठ—परिचे

इस पाठ च डोगरी कवि स्वामी ब्रह्मानंद तीर्थ ते शिवराम दीप हुंदे जीवन ते काव्य—साधना सरबंधी जानकारी दिती गेदी ऐ।

9.3 पाठ—प्रक्रिया

9.3.1 कवि स्वामी ब्रह्मानंद तीर्थ ते डोगरी कविता साहित्य गी उंदा योगदान

- (i) स्वामी ब्रह्मानंद तीर्थ हुंदा जीवन परिचे।
- (ii) स्वामी ब्रह्मानंद तीर्थ हुंदियां रचनां
- (iii) स्वामी ब्रह्मानंद तीर्थ दी काव्य सिरजना दा मूल्यांकन

9.3.2 कवि शिवराम दीप ते डोगरी कविता साहित्य गी उंदा योगदान

- (i) शिवराम दीप हुंदा जीवन परिचे।
- (ii) शिवराम दीप हुंदियां रचनां
- (iii) शिवराम दीप दी काव्य सिरजना दा मूल्यांकन

9.3.1 कवि स्वामी ब्रह्मानंद तीर्थ ते डोगरी कविता साहित्य गी उंदा योगदान

(i) जीवन परिचे

डोगरी भाषा दे प्रसिद्ध कवि स्वामी ब्रह्मानंद तीर्थ हुंदा जन्म सन् 1891 ई. गी अखनूर तहसील दे ग्रांऽ गढ़ी च होआ। इंदा असली नांऽ संसार सिंह हा। इंदे पिता मियां सिंह हुंदा काल उस्सलै होआ जिस बेल्लै एह चौथी जमाता च पढ़दे हे। पिता जी दी मृत्यु परैन्त इ'नेंगी फौजा च भरती होना पेआ, तां जे घरा दा निर्वाह चली सकै। इस करियै एह रघु प्रताप युनिट च भरथी होई गे, ते तौले गै नायक बनी गे। इसै दरान इ'नें रुड़की च सर्वेयर दी ट्रेनिंग कीती। पर इंदा फौजी दी नौकरी थमां ध्यान घटदा गोआ जिस दे परिणाम सरूप इ'नेंगी फौजा दी नौकरी थमां कड़्ढी दित्ता गोआ। फौजी नौकरी छोड़ने परैन्त एह रणवीर गौरमेण्ट प्रैस्स च बतौर कलर्क कम्म करन लग्गी पे। 26 ब'रें दी उमरी च उंदा ब्याह नूरपुर (कांगड़ा) दे इक अच्छे राजपूत घराने च होआ। इंदा घरेलू जीवन बड़ा गै दुखपूर्ण रेहा। ब्याह दे किश चिरें परैन्त गै इंदी घरैआहली ते पही बच्चे दी बी मृत्यु होई गई। इत्थूं गै इंदे च बैराग दी भावना उस्सरी पेई ते इ'नें सन्यास लेई लेआ ते स्वामी ब्रह्मानंद तीर्थ खुआन लगे।

स्वामी जी दे जानकार दस्सदे न जे उ'नें द'ऊं बारी पैदल चार धाम दी यात्रा कीती ही। भारत दे बक्खो-बक्ख हिस्सें च मजूद प्रमुख तीर्थे दा उंदा भ्रमण लगभग छे ब'रें शा बद्ध चलदा रेहा हा। पही 1930 ई. च ओह जम्मू वापस पुज्जे। 1932 ई. च मैहकमा धर्मार्थ पासेआ स्वामी जी गी जम्मू दे प्राचीन तीर्थ पुरमंडल दा मैहत बनाया गोआ। 1962 ई. गी उ'नें बडलै त्रै बजे कन्नै प्राण छोड़े।

(ii) स्वामी ब्रह्मानंद तीर्थ हुंदियां रचनां

स्वामी ब्रह्मानंद तीर्थ होरें डोगरी भाषा च अध्यात्मिक विशे गी लेइयै जेहड़ियां महत्त्वपूर्ण रचनां दित्ती दियां न उंदा ब्यौरा इस चाल्ली ऐ :-

- (1) श्री ब्रह्मा संकीर्तन
- (2) गूंगे दा गुड़
- (3) गुप्त गंगा

- (4) मान सरोवर
- (5) अमृत वर्षा
- (6) ब्रह्मानंद भजन माला

(iii) स्वामी ब्रह्मानंद तीर्थ दी काव्य सिरजना दा मूल्यांकन

डोगरी साहित्य च स्वामी ब्रह्मानंद हुंदी कविता दा इक बखरा गै थाहर ते गुहाड़ ऐ। डोगरी कविता दी समूलची यात्रा ऐ। जिस चाल्ली कवि लोक संस्कृति, लोक-वार्ता ते खासकरी लोक-गीतें दा आसरा लेइयै अपनी रचना च शैलीगत ते वस्तुगत गुहाड़ आनदे न, उस्सै चाल्ली स्वामी ब्रह्मानंद ने भारत दी ज्हारां ब'रें पुरानी वेदांत दी बरासत गी कविता च आनियै अपनी संस्कृति गी व्यक्त कीता ऐ। वेदांत ते लोक-वार्ता दमैं संस्कृति दे जरूरी अंग न। आधुनिक जुगै च जिस चाल्ली कवि लोक विचारवाद गी कवता दे अंदर प्रवेश करांदे न, किश उस्सै चाल्ली स्वामी जी ने वेदांत दे तत्व-दर्शन दी भारती आस्था गी अपनी कवता दे मझाटै स्थापत कीता ऐ। उनें लोकवार्ता दी परंपरा थमां बी आसरा लेआ ऐ।

जदूं स्वामी जी दे सादे पर प्रो. रामनाथ शास्त्री उंदी कुटिया च पुज्जे तां 'गुंगे दा गुड़' नां दी पोथी पढ़ियै रहान रेही गे। रहानगी कन्नै उ'नें पुच्छेआ – "स्वामी जी, तुसैं कविता लिखना कदूं शुरू कीती?" स्वामी होरें परता दित्ता – "तुस लोक अक्सर ब्रह्मण सभा दे बेहड़े च डोगरी दे कवि सम्मेलन करदे रौहंदे ओ! मेरी कुटिया च तुंदी बाज पुजदी रौहंदी ऐ। बल्लें-बल्लें मेरे मना च ए विचार बनेआ जे इनें नौजवानें साईं में बी डोगरी च लिखने दी कोष की नेईं करां? डोगरी मेरी मां-बोल्ली ऐ ते मेरे कच्छ आखने आस्तै मता किष ऐ – सोचेआ जे जेकर वेदांत पर कोई रचना होई सकै तां में मातृभाषा दे रिण दी इक-अद्ध किस्त देई सकड। इयै मूल प्रेरणा ही जिसने एह सब लिखाया ऐ।

श्री ब्रह्म संकीर्तन दे 'श्रवण प्रकरण' च अपने मनतव ते वेदांत दे म्हत्तव गी उनें इस चाल्ली स्पष्ट कीते दा ऐ – "डुंगर देस इक प्राचीन संस्कृति ते संस्कारें आह्ला देस ऐ। डोगरी भाषा च इस्सै मूजब वेदांत आंदा ऐ। जेहड़ा आदमी अपने गुरु कशा इसी मन-चित लाइयै समझग, ओह देवतें शा बी उच्चे पद दा अधिकारी होग। जेहड़ा ज्ञान दे इस परम पवित्तर मार्ग गी अपनाग ओह आपूं मोक्ष

प्राप्त करग ते अपने पितरें गी बी तारग। ओह चुरासी लख जूनें दे आवागौन गी भुगतने कोला बची जाहग ते ओह परमधाम दा बासी बनियै आनंद प्राप्त करग। जेह्दे लोक वेदांत दा पठन-पाठन करियै इसदे मर्म गी समझदे न, ओह इसदी मैहमा दूएँ गी गाइयै सनांदे न –

“बड़े जतन ने इसगी पढ़ियै, भेद इसदा जो पांदे।

गाई सुनाई इसदी मैहमा लोकें बिच फलांदे।”

डोगरी च कवता रचने दा, स्वामी जी दा उद्देश्य इयै ऐ जे वेदांत दे गूढ़ ग्यान दी पन्छान डुग्गरवासियें गी कराई जा। इसकरी उंदा कवता दा विषे-वस्तुगत घेरा वेदांत संप्रदाय तगर सीमत ऐ।

9.3.2 कवि शिवराम दीप ते डोगरी कविता साहित्य गी उंदा योगदान

(i) जीवन परिचे

डोगरी दे मन्ने-परमन्ने दे कवि ते गजल गो शायर श्री शिवराम दीप हुंदा जन्म 14 सितम्बर 1945 ई. गी जम्मू शैहरा च होआ। इंदे पिता श्री सुंदरदास जी तरखानी दा कम्म करदे हे। दीप होर पंज भैन-भ्राड हे ते सभने थमां लौहका होने करी अपने माऊ बब्बै दे अत्त लाडले हे। 1963 ई. च इंदे पिता दा काल होई गेआ ते किश गै चिरै परैत इंदी माता होर बी स्वर्ग सधारी गेइयां। घरै दी हालत तंग होने दे बावजूद बी इनें अपनी बी.एस.सी. दी पढ़ाई जारी रखी। इनें 1982 ई. च एम.ए. उर्दू फर्स्ट पोजीशन कन्ने पास करियै गोल्ड मैडल प्राप्त कीता। शिरोमनी डोगरी करने परैत 1994 ई. च “उर्दू गजल दी रोशनी च डोगरी गजल” विशे उप्पर पी-एचडी. दी डिग्री हासल करी लैती। शिवराम दीप हुंदा ब्याह 1976 ब'रे च श्रीमती विमला देवी कन्ने होआ। इ'नेंगी ड्राईंग दा बी बड़ा शौक हा। दीप होरें किष चिरै तगर जम्मू रेडियो च बतौर कापिस्ट कम्म कीता ते पही रियास्ती कल्चरल अकैडमी दे डोगरी शब्द कोश विभाग च बतौर Assistant Editor कम्म करदे रेह। इ'नें शीराजा डोगरी दे सम्पादक दे औहदे पर बी कम्म कीता। एह डोगरी भाशा दी बदकिस्मती ऐ जे 1997 ई. दे जनवरी-फरवरी महीने च इ'नेंगी जानलेवा कैंसर दी बमारी ने आनी घेरेआ ते दिल्ली दे AIIMS च करीबन अठ नौ महीने इलाज करोआने दे बावजूद बी 20 जनवरी 1998 ई. गी ओह इस संसार गी छोड़ियै परलोक सधारी गे।

(ii) शिवराम दीप हुंदियां रचनां

शिवराम दीप होरें 1967–68 ब'रें च साईस कालेज जम्मू च पढ़दे-पढ़दे कालेज दी पत्रिका 'तवी' दा सम्पादन बी कीता। इससै थमां उंदे लेखन दी शुरुआत होई। इससै दौरान उंदा पैहला गीत 'फुलवाड़ी' पत्रिका च छपेआ हा। 1968 च डोगरी संस्था दे सम्पर्क च औने परैत इ'नें निरंतर लिखना शुरु कीता ते परिणाम स्वरूप 1969 च इंदा पैहला कविता संग्रह 'इक लीकर केई परछामें' नांऽ कन्नै छपियै सामने आया। इंदी रचनाएं दा ब्यौरा इस चाल्ली ऐ :-

(1)	इक लीकर केई परछामें	(कविता संग्रह)	1969
(2)	मांगमी लते दी दौड़	(कविता संग्रह)	1974
(3)	गमलें दे कैक्टस	(गज़ल संग्रह)	1981
(4)	पीड़-पखेरु सुन्ने गास	(कविता संग्रह)	1986
(5)	इक बारी दी गल्ल	(बाल कविता संग्रह)	1990
(6)	सवा सेर कनक	(नाटक) अनुवाद	
(7)	छबील अग्नी दी	(गज़ल संग्रह)	1997

इसदे अलावा इ'नें किष कताबें ते पत्रिकाएं दा संपादन बी कीते दा ऐ।

सम्मान

शिवराम दीप होरें गी सन् 1982 ई. गी "गमले दे कैक्टस" गज़ल संग्रह पर कल्चरल अकैडमी थमां पुरस्कार थहोआ ते 1984 ब'रे दा साहित्य अकादमी पुरस्कार मिले दा ऐ।

1992 ई. च बाल कविता संग्रह 'इक बारी दी गल्ल' पर 'बैस्ट बुक ऑफ दी इयर' कन्नै सम्मानित कीता गेआ।

'इक बारी दी गल्ल' पोथी पर उ'नेंगी 1994 ब'रे च लक्ष्मी शिव नाथ पुरस्कार बी मिलेआ।

(iii) शिवराम दीप दी काव्य सिरजना दा मूल्यांकन

शिवराम दीप हुंदे काव्य च हिरख-प्यार ऐ, शलैपा-बंगार ऐ, दर्द चिंतन ऐ ते इक संघर्ष ऐ। उंदी कविताएं च औने आहली कल्लै दी सोच बी ऐ ते इक पुख्तगी बी। उंदा मन्नना ऐ जे प्यार जीवन दा शंगार ऐ, इसदे बगैर जीवन नीरस होई जाह्ग। कवि दे शब्दें च :-

“सुहामी डगर ऐ, कोई गीत छेड़ो
एह हिरखी सफर ऐ, कोई गीत छेड़ो।”

‘इक लीकर केई परछामें’ कविता संग्रह च जीवन नांS दी कविता च कवि दा आखना ऐ जे लोकें दा मन्नना ऐ जे जीवन अमर ऐ ते एह कदें बी नेई मरदा ते नां गै इसी कोई मारी सकदा ऐ। एह जीवन कुसै नाडू आंगर निरंतर चलदा रौहदा ऐ ते शरीर गी बुलबुले दा रूप दित्ता गेदा ऐ जेहदे केई रूप बनदे ते मिसदे रौहदे न इ’यै नेह भाव व्यक्त करदी कविता दे बोल न :-

“ए जीवन गलान्दे छड़ा बुलबला इक पानी दा ऐसा
जो मौती दी इक्कै टकोरा दे कन्नै -मिसी जन्दा इ’यां।”
इ’यां गै कविता ‘लीक-बलीक’ च कवि ने इस दुनियां गी इक चित्तरशाला दे रूपा च मन्ने दा ऐ
जिस च एह भाव व्यक्त कीत्ते दा ऐ :-

“ए दुनिया। इक चित्तरशाला। भांत सुभांते
रंग-बरंगे चित्तर इत्थें। किष ते अति सुहामे-सुंदर।”

इस्सै चाल्ली दे भाव कविता संग्रह ‘पीड़ पखेरु सुन्नै गास’ च कविता ‘जिंदगी’ च जीवन गी ‘युगै दी पौथी’ दे इक ऐसे बरके दे समान समझेआ गेदा ऐ, जिसी कवि दे आखने मूजब, जिस च कोई विराम चिन्न नेई होने करी, अस पढ़ी ते सकनेआं, पर बिंद अड़की-अड़कियै ते अर्थ बी झक्की-झक्कियै कड़नेआं -

“इस युगै दी पोथी दा
बिना विराम चि’न्ने दे
इक बरका जन
रोज पढ़ने आं
अड़की-अड़कियै

अर्थ करने आं इक्की-झविकयै।”

कवि ने अपनी कविताएं च प्रकृति दे चित्र चित्रनें च चित्रकार दा कम्म कीते दा ऐ। कवि दी ‘चाननी’ कविता च प्रकृति वर्णन दा इक शब्द चित्र इ’यां ऐ :-

“रात चाननी झिल-मिल तारे,
अम्बर हीरे रेड़े दे
छर-छर करदे नाडू बगदे
सुर जीवन दे छेड़े दे।”

आधुनिक डोगरी कवता च मता रूझान सियासी खेतारा दियें ढोंगी प्रवृत्तियें उप्पर पर्दाफाश करना ते नां समझ भलोकी जनता गी गुमराही ते सियासी शोशन शा बचना ऐ। ‘मदारी’ कविता च दीप होरें सियासी नेताएं दी झूठी लाराबाजी ते रंग बिरंगी मुहारनियें पर तन्ज करदे होई आक्खे दा ऐ :-

“तेरी गल्लें, भाषनें दी
मुहारनी उ’ऐ परानी
रोज सुनियै अम्बी गेदे न
मेरे कन्नें दे परदे
ओह मदारी
तूं बड़ा एं चमत्कारी।”

कवि दी ‘मूंहलूहनी’ कविता भाएं पूरी मनुक्ख जाति जेहड़ी खोखले आदर्ष पालदी ऐ, पर व्यंग कसदी ऐ। परतक्ख तौरा पर सियासी लीडरें पर जेहड़े चिट्ठे टल्ले पशाकां लाइयै कुकर्म दा मैला ढोंदे न।

“अस पशाकां, चिट्ठियां लान्नें
ते ढोन्नें कालखां ते भ्रापे दियां।”

डुग्गर प्रदेश मनुक्खतावादी विचारधारा दा पुजारी ते सम्प्रदायक भाईचारे दी मसाल रे'आ ऐ पर धर्म दे ठेकेदारें अपनी सुआर्थ भरोची नीति करियै मनुक्खा गी फिंगर—फिंगर करी टकाया। भ्राएं—भ्राएं च हद्दां बन्ने लाए ते इक दुए दा बैरी बनाया। इस बारै 'सैनकां' कविता च कवि दा भाव इ'यां ऐ :—

“किष तेरी ग'लियें दे मुल्लां
किष मेरी ग'लियें दे पंडे।”

‘इक बारी दी गल्ल’ नामक बाल संग्रह च कोई चौदां बाल कवितां न। इ'नें कविताएं च कथ सनाने दे रोचक अंदाज गी गै अपनाया गेदा ऐ। जि'यां :—

“गल्ल सेयानें तां गै आक्खीं
एहके अंदर ब्हारां
इक सदा गै कल्लम—कल्ला
दुए मिलदे आरां।”

‘मांगमी लत्ते दी दौड़’ कविता संग्रह च दीप ने निराशा दे भावें गी इस चाल्ली बुहास्सरे दा ऐ :—

“मेरे अगें पिच्छै
पही खब्बै जां सज्जै
एह रातां गै रातां
घनेरियां रातां।”

हिरख प्यार दी दुनिया च शायर दा ख्याल बड़ा दुरुस्त ऐ। उंदा गलाना ऐ जे हिरखै गी मनै दी खौद्वल उ'ऐ लोक आखदे न जेहड़े कदें हिरखै दी गैहली चा लंघै गै नेई। हिरख ते मनै दा अनमोल जज्बा ऐ जेहड़ा रौके दे रुकदा नेई ते मोड़े दे मुड़दा नेई :—

“एह हिरख ते ऐ मनै दी खौद्वल, दमागै अंदर जांर खलबली
सुने न उ'ऐ गलांदे म्हेशां, जिनेंगी एहदे न बाह हैन्नी।”

प्रगतिवाद च धार्मिक शोशन दा बड़डा केन्द्र मन्दर ते मसीद मन्ने गेदे न। इ'नें थाहरें हिन्दू मुसलमान ते लब्बी जंदे न पर कोई मनुक्ख नेई लभदा। पुजारियें ते मौलवियें दी लुट्ट-धूड़ पर शायर दो इक शेऽर च व्यंग इस चाल्ली ऐ :-

“इ'नें तिलकें ते मनकें दे कदें धोखें च निं आएओ
जेहड़े खाल्ली न बिच्चा दा मते छनकार दिंदे।”

समाज दी व्यवस्था जित्थै मेहनतकष दुएं गी ते पालदा ऐ पर आपूं अपनी मनुक्खता दे बारै च कीते गेदे उंदे सुआल सारे समाजी प्रबंध पर इक सुआलिया चिन्न लाई दिंदे न। कवि दे इस रंग दा शेऽर इ'यां ऐ :-

“भुक्खा दो बारै च जदूं कीते सुआल किष।
मेरे लेई फैली गे बस्ती च जाल किष।”

दीप हुंदे काव्य च छंदोबद्ध शैली दी कविताएं दे कन्नै-कन्नै छंद मुक्त शैली च बी कविता लिखी दियां न। उ'नें अपनी गजलें च छुट्टियें ते लम्मियें बैहरें दा प्रयोग कीते दा ऐ। उंदी काव्यानुभूति सुंदर रूपकें, अलंकारे दे प्रयोग कन्नै होर बी सजीव होई गेदी ऐ। गजलें च समाजी स्थिति दी पकड़ तगड़ी ऐ :-

“इस ब'रे बी नशान्नी भेजेओ
मुस्करांदी निम्मो-झानी भेजेओ
मेरी बस्ती अत्थरुएं दे आहलड़े,
फड़फड़ांदी जिंदगानी भेजेओ।”

उंदा शरीर कसरी होने शा पैहलें हर मुषायरे, समाजिक गोष्ठियें च इस गजल गी बार-बार पढ़ने दा दीप हुंदा केह रहस्य हा इसदा पता उंदी बमारी षा लगदा ऐ। इसदे परैन्त ओह लम्मी निम्मोज्ञानी गी भोगन लगी पे। नमें म्हीनें, परैन्त डोगरी साहित्य दे हौंसले दे फरकदे दीप गी रात काली ते तूफानी उप्पर जित्त दर्ज करी गे ते सदा लेई अमर दीप जगाई बैठे। इसदे कन्नै गै डोगरी भाषा दे मैहलें दा इक होर थम्म समें दी सिनकू ने भोरी दिता।

9.4 अभ्यास आस्तै सुआल

1. स्वामी ब्रह्मानंद तीर्थ हुंदे कविता साहित्य दा मूल्यांकन करो।
2. शिवराम दीप हुंदे काव्य साहित्य पर लेख लिखो।

कवियें दा जीवन-परिचे ते डोगरी कविता-साहित्य गी उंदा योगदान

रूपरेखा

10.1 उद्देश्य

इस पाठ दे तैहूत विद्यार्थियें गी डॉ. ओ.पी. शर्मा 'सारथी' ते 'प्रकाश प्रेमी' हुंदे व्यक्तित्व ते कृतित्व कन्नै परिचित करवाना मुख्य उद्देश्य ऐ। तां जे विद्यार्थी इ'नें कवियें सरबंधी सोआलें दे जबाव देने च समर्थ होई सककन।

10.2 पाठ-परिचे

इस पाठ च डोगरी कवि डॉ. ओ.पी. शर्मा 'सारथी' ते 'प्रकाश प्रेमी' हुंदे व्यक्तित्व ते कविता साहित्य सरबंधी जानकारी दिती गेदी ऐ।

10.2 पाठ-प्रक्रिया

10.3.1 कवि डॉ. ओ.पी. शर्मा 'सारथी' ते डोगरी कविता साहित्य गी उंदा योगदान

- (i) ओ.पी. शर्मा 'सारथी' हुंदा जीवन परिचे।
- (ii) ओ.पी. शर्मा 'सारथी' हुंदियां रचनां
- (iii) ओ.पी. शर्मा 'सारथी' दी काव्य सिरजना दा मूल्यांकन

10.3.2 कवि प्रकाश प्रेमी ते डोगरी कविता साहित्य गी उंदा योगदान

- (i) प्रकाश प्रेमी हुंदा जीवन परिचे।
- (ii) प्रकाश प्रेमी हुंदियां रचनां
- (iii) प्रकाश प्रेमी दी काव्य सिरजना दा मूल्यांकन

10.3.1 डॉ. ओ पी शर्मा 'सारथी' ते डोगरी कविता साहित्य गी उंदा योगदान

(i) जीवन परिचे

डा. ओ.पी. शर्मा 'सारथी' होर डोगरी दे उ'नें लखारियें चा इक न जिनें अपने सषक्त लेखन कन्नै जिस विधा च बी साहित्य रचेआ, उसी दूर पजाया। उंदे गुणें, व्यक्तित्व ते कठिन परिश्रम गी दिक्खियै कोई आदमी मतासर होए बगैर नेई रेही सकदा।

डा. ओ.पी. शर्मा 'सारथी' हुंदा पिता-पुरखी ग्रां अंब घरोटा ऐ पर उंदा जन्म 19 अप्रैल 1933 ई. गी मटन कष्पीर च होआ। उंदे पिता मनसाराम शर्मा होर मैहकमा इन्कमटैक्स दी नौकरी करदे हे। दरबार मूव होने कारण 'सारथी' होर कदें जम्मू ते कदें कश्मीर औंदे जंदे रौहदे हे। इस लेई इंदी किष पढ़ाई जम्मू दे रणवीर हाई स्कूल ते किष श्रीनगर दे न्यू आर.आर. हाई स्कूल च होई। 1947 ई. दी भान च इंदी पढ़ाई छुड़की गई ही पर पही नौकरी दौरान इने 'बी.ए., आई.टी.आई. थमां आर्ट टीचरी दा डिपलोमा ते आर.एम.पी. दी डिग्री कीती।

डा. ओ.पी. शर्मा 'सारथी' हुंदी नौकरी सभने थमां पैहले आर्टिस्ट मिल्टरी पुलिस च आर्मी स्कीम आस्तै डिस्क बनाने ते कारें पर खुफिया नषान लिखने आस्तै होई। पही एह लोकें दियां तस्वीरां बनांदे रेह। 1958 च आर्मी आहलें सारे सिवलियन गी नौकरी थमां बर्खास्त करी दित्ता तां ओ.पी. शर्मा 'सारथी' होर बी उनें कर्मचारियें च शामिल हे खीर रिजनल रिसर्च लबारटरी च इंदी नियुक्ति होई गई ते पही उत्थै तरक्की-तरक्की करदे-करदे सीनियर आर्ट आफिसर क्लास-I दे औहदे तक पुज्जे। नौकरी दौरान उनें कई देश ते विदेश यात्रा कीतियां।

(ii) डॉ. ओ.पी. शर्मा 'सारथी' हुंदियां रचनां

'सारथी' होरें अपना लेखन साहित्य गजल कन्नै शुरू कीता। इंदे दो गजल संग्रह न :-

- (1) तंदा
- (2) परतां

इसदे इलावा इंदियां डोगरी दियां होर रचनां न :-

(1) सुक्का बरुद	(कहानी संग्रह)
(2) लोक गै लोक	(कहानी संग्रह)
(3) पागल दा ताजमैहल	(कहानी संग्रह)
(4) जातरा	(कहानी संग्रह)
(5) मकान	(उपन्यास)
(6) त्रेह समुन्दर दी	(उपन्यास)
(7) रेशम दे कीड़े	(उपन्यास)
(8) नंगा रुक्ख	(उपन्यास)
(9) पत्थर ते रंग	(उपन्यास)
(10) मंथन	(निबंध संग्रह)
(11) चिंतन	(निबंध संग्रह)

मान—सम्मान

- (1) इ'नेंगी इंदियें रचनाएं — 'सुक्का बरुद', 'रेशम दे कीड़े' ते 'पत्थर ते रंग' पर जे. एंड के. अकैडमी ऑफ आर्ट कल्चर एंड लैंग्वेजिज़ पासेआ पुरस्कार मिली चुके दा ऐ।
- (2) 'नंगा रुक्ख' उपन्यास पर इ'नेंगी साहित्य अकैडमी, नमीं दिल्ली पासेआ पुरस्कार मिली चुके दा ऐ।

(iii) डॉ. ओ.पी. शर्मा 'सारथी' दी काव्य सिरजना दा मूल्यांकन

'सारथी' होर गज़ल लिखदे मौकै अपने समाज दी अनुभूति गी गै व्यक्त करदे हे जेहकी समाज ने उंदी झोली च पाई दी होंदी ही ते ओह अनुभूति इन्नी तलख तजरबे ते सच्चाई पर टिकी दी होंदी ही जे उसी झुठलाया नेई जाई सकदा। अपनी रचनें राहें उनें मानवता ते सच्चाई दे गले घोटने आहले उनें मुजरमें गी इक चाल्ली गलमें दा पकड़ियै झंजोड़े दा जन ऐ जिनें समाज दी सुंदरता पर अपनी कुचालें राहें बदसूरती दा जाल तनी लेदा ऐ ते ओहदी बुनयादी कदरें गी गु'न्नियै सि'न्नू कड़्ढी टकाए दा ऐ। अपने आपा गी रैहबर आखने आहले पखंडियें पर व्यंग कसदे होई 'सारथी' होरें लिखे दा ऐ जे :-

“ओ बद्दल जिसने बरना हा बरी गोआ चूँबी नेई कीती
प नीतें खुट्ट हा जिंदै छड़े रौले सनांदे रेह।

अज्ज समाज दा हर प्राणी इक्कला ऐ। ओह जां ते अपनी करनियें कारण समाज ते रिश्तेदारें द्वारा
टुकराया गेदा ऐ जां उसी जानियै समाज ते सरबंधियें टुकराई दित्ते दा ऐ। गल्ल भामें किष बी होऐ
पर मजूदा ऐसे दौर दी तस्वीर खिचदा उंदा इक शेऽर इस चाल्ली ऐ :-

“पानी सारा सुक्केआ रेतै दा सागर रेही गोआ
साथ सारा खिंडेआ, इक्कला मसाफर रेही गोआ।”

एह गल्ल साफ ऐ जे ‘सारथी’ हुंदा लेखन इलहामिया होंदा हा। ओहदे आस्तै ओह जतन नेई हे
करदे। उंदा गलाना हा जे “जिसलै बी मिगी कोई शेऽर फुरदा ऐ तां में इस गल्ला दा ध्यान रक्खनां
जे के बीतेआ, कोहदे पर बीतेआ ते ओहदा असर के होआ।” इक बार रस्तै चलदे इक पत्थर
दिक्खियै उनें गी एह शेऽर फुरेआ हा जेहदे बैहर बजन पर उनें बाद च गजल लिखी ही :-

“में ते रेही आ बलगदा, फनकार आह्ला देग मिगी,
छप्पे दा में नक्श हा, पत्थर दा पत्थर रेही आ।

गायकी, संगीत ते उरुज दी जानकारी होने करी ‘सारथी’ होर भावें दी गहराई बारै बी ज्यादा ध्यान
दिंदे हे। इयै वजह ऐ जे उंदे शेऽरें च प्रतीकें, रूपकें ते चिन्नें दा प्रयोग मता होऐ दा ऐ।

10.3.2 कवि प्रकाश प्रेमी ते डोगरी कविता साहित्य गी उंदा योगदान

(i) जीवन परिचे

डोगरी भाषा ते साहित्य गी समृद्ध करने ते खास मकामै तगर पजाने च डोगरी दे जिन्नें साहित्यकारें
दा नांऽ बडे फखर कन्ने लैता जंदा ऐ उंदे च ‘प्रकाश प्रेमी’ हुंदा नांऽ बी इक ऐ। जिन्दी रचनाएं च
इक्क मौलिकता ते लेखन शैली दा इक्क नमांपन ऐ।

प्रकाश प्रेमी हुंदा जन्म 16 अगस्त 1943 ई. गी रामनगर दे कसूरी ग्रांऽ च पं. बेलीराम ते श्रीमति
पेसरो देवी हुंदे घर होआ। इंदे बचपन दे दिनै इन्दे घरा दी माली हालत खासी माड़ी ही ते उससै
तंगियै दे हाल च इन्नें अपनी पंजमीं तकर दी पढ़ाई कीती ते मिडल स्कूल घोरड़ी च दाखला लेई

लेआ। नौमीं ते दसवीं दे मतेहान हाई स्कूल रामनगर पास करने परैन्त एह अगली पढ़ाई लेई जम्मू उठीं गे ते 12वीं तक दी पढ़ाई गांधी मैमोरियल साईंस कालेज जम्मू च पूरी कीती। अगली पढ़ाई इ'नें प्राइवेट तौरा पर कीती ते इस्सै दौरान स्टेट दे मैहकमा तालीम च एह बतौर टीचर नियुक्त होई गे। एहदे परैत इनें जम्मू युनिवर्सिटी थमां त्रै एम.ए. दियां परीक्षां पास कीतियां। नौकरी दरान तरक्की करदे-करदे लैक्चरर दे औहदे तक पुज्जे ते उत्थूं रिटायर होनें परैत ठंडे पदर अपना मकान बनाइयै र'वा करदे न। एह अपनी नौकरी दे सिलसिले च जित्थें-जित्थें बी गे, डोगरी लखारियें गी कठेरियें इक संस्था खड़ेरदे रेह। इन्ना गै नेई इनें किष-इक दूई भाषाएं दे लखारियें गी बी डोगरी भाषा च लिखने दी नेक सलाह दिती ते उंदी मुहार इस पासै मोड़ी। एहदे इलावा एह डोगरी साहित्य मंडल रामनगर बंदरालता साहित्य मंडल रामनगर ते डोगरी संस्था जम्मू दे मेम्बर बी रेहदे न।

प्रकाश प्रेमी होर सच्चे-सुच्चे ते कड़ैली गल्ल मूहां उपपर आखने आहले शख्स न। सादा लबास, निक्का कद्द, उच्ची वाणी ते गल्ला-गल्ला इच हास्य ते व्यंग्य दा रला गै इंदी पंछान ऐ। इंदे अंदर सोंचें दा इक सागर ठाठां मारदा लभदा ऐ।

(ii) प्रकाश प्रेमी हुंदियां रचनां

इंदी रचनाएं च शोषतें लेई परेषानी, गरीबें दे जज़्बातें कन्नै खेढने आहलें प्रति गुस्सा, धार्मिक फसादें दा दुख, बधदे भ्रष्टाचार उपपर चिंता, एह सब किश साफ-साफ लभदा ऐ। एह चांहदे न जे हर कुसै गी ओहदी योग्यता ते मैहनत मताबक फल मिलै। प्रकाश प्रेमी हुन्दियां इसलै तक्कर चार रचना प्रकाशत होई दियां न, जिंदे च दौं पद्य ते द'ऊं गद्य न :-

- | | |
|------------------------------------|-----------------|
| (1) त्रुंबां 1980 ई. च हास्य व्यंग | (लेख संग्रैह) |
| (2) इक कोठा दस्स दुआर | (कहानी संग्रैह) |
| (3) बेद्दन धरती दी 1985 ई. | (महाकाव्य) |
| (4) ललकार | (कहानी संग्रैह) |

(iii) प्रकाश प्रेमी दी काव्य सिरजना दा मूल्यांकन

ललकार

इस कविता संग्रह च कवि ने अज्जकल दे परिवेष दी हर कुशीति उप्पर सरोखड़ व्यंग दे नषाने साधे दे न, कुदै परिवर्तन दी आस, कुतै पूंजीवादियें प्रति रोह ते कुदै भ्रष्टाचार गी लानत-त्राणत व्यंजनात्मक शैली च कीती दी ऐ। किष कवतां अजादी दी लड़ाई दे शहीदें गी समर्पित न ते किष समाज इच व्याप्त बुराइयें उप्पर चोट करदियां न।

प्रेमी हुंदा व्यंग कुदै-कुदै कोरा ते कुदै-कुदै हास्य रस कन्नै भरोचे दा ऐ। कवि देषै च व्यापत हर समस्या उप्पर चिंतित ऐ। शराब दी बुराई उप्पर लिखदे होई कवि जवान पीढ़ी गी सम्बोधित करियै इस ऐब शा छुड़कने दी सिक्ख दिंदा ऐ :-

“मौका अड़ेओ होश सम्भालो
सिद्धा सुच्चा रस्ता तालो
चार ध्याड़े जे जीना ऐ
नेहा पीना बी केह पीना ऐ।”

कवि ने अज्जकल दे समाज दी तस्वीर पेष करदे होई दस्से दा ऐ जे नूहें दी सड़ी मरने दे केई उदाहरण पढ़ने गी मिलदे न जिंदे च मुख कारण दाज घट्ट मिलना जां ओहदी बादधू चाह दस्सी दी होंदी ऐ। इस सारे दी मूल जड़ आम तौरा पर सस्सू जां ननानू गी गै दस्से दा होंदा ऐ। कवि ने अपनी इक कविता च इस भाव गी इ'नें शब्दें च भरोए दा ऐ :-

“कुतै सस्सू गैलन परती दी।
ते धीऽ फकोंदी धरती दी।
एह नारी दुशमन नारी दी।
जिस एहकी मत्त खलारी दी।”

धर्म दी बिगड़दी विचारधारा कवि गी चिंतित करदी ऐ, ओह मनदा ऐ जे सच्चा धर्म मनुक्खें गी आपस च जोड़दा ऐ, हर इक रिष्टें च हिरखै दी भावना गी जगांदा ऐ पर अज्ज किष सुआर्थी ते

शतृन्ने लोकें धर्म दी परिभाषा गी बदली दित्ते दा ऐ। बनावटीपन मता होई गोदा ऐ। उस बदली दी मानसिकता दा चित्रण कवि ने इस चाल्ली कीते दा ऐ :-

“मसीत-चर्च-मंदरें
खुदा दे घर दे अंदरें
खुदाई खलक खाने ते
विसें दी फसल राहने ते
त्यार हैल होंदा ऐ
चुबकखा भी बंडोदा ऐ।”

कवि दी इ'ने कविताएं च दिक्खेआ जाई सकदा ऐ जे एह कवतां मनुक्खी जीवन ते मनुक्खी अनुभूतियें दियां अभिव्यक्तियां न। कवि यर्थाथ रूपै च लोकें दी तकलीफें गी मसूस करदा ऐ ते उनें तकलीफें दे कारणें गी समझियै कवतां राहें आम-जन तक पज्जाना चांहदा ऐ।

‘बेदन धरती दी’ डोगरी च छपे दा दूआ महाकाव्य ऐ। एह महाकाव्य डोगरी साहित्य च इक अनमोल रत्न ऐ। एह इक नायिका प्रधान काव्य ऐ। एह महाकाव्य पौराणिक नारी पातुरें दी वेदना उप्पर आधारत ऐ। इस महाकाव्य दे नारी पात्र न – रेणुका, सुनैना, सीता बगैरा। प्रेमी हुंदे इस महाकाव्य च प्राकृतिक, भावगत, वात्सल्य-प्रेम, भगौलिक, चरित्रगत आदि विषे गी आधार बनाए दा ऐ।

गुड़कदे-गरजदे औंदे बदलें दी स्थिति पर रोषनी पांदे न। प्रकृति दे सुंदर दक्ख दी झलक प्रस्तुत करदे न :-

“दूर गुड़कदे बदल बज्झोंदे,
कैत कुसै दा आया
इक लज्जा ने दोहरी होंदी
होरनें हास्सा पाया।”

सीता स्वयंवर आस्तै विशेष तौर पर सजाई गोदी मिथिला नगरी च राजकुमारें दे औने पर उ'नेंगी सुरगै दी जाई मसूस होंदी ऐ।

राम-लछमन दी मानसिकता ते मिथिला नगरी दे सौंदर्य दी अभिव्यक्ति करदे कवि दे बोल न :-

“जाड़-बस्तियां-नदियां टप्पी,
पुज्जे मिथिला आई।
मिथिला सारी लगदी जि'यां,
सुरग पुरै दी जाई।”

वात्सल्य भाव दा वर्णन माता सुनैना आसेआ बालड़ी सीता गी लोरी देने दे संदर्भ च होंदी ऐ। लोरी दे बोल न :-

“सीता गी रानी खडांहदी ऐ रोज,
लोरी देई, गीत गांदी ऐ रोज।
शेई जा, तूं शेई जा, धरती दी धी,
खुषी मेरी लेई जा तूं धरती दी धी।”

इस महाकाव्य दी नायिका इक उदात्त चरित्र आहली महान नारी ऐ। ओह इक आदर्श नारी ऐ ते पूरी चाल्ली पति गी समर्पित ऐ। पति दी आज्ञा ते सेवा च बज्झी दी ओह इक महान् सती ए। प्रेमी होर डोगरी दे साहित्य च इक ऐसे प्रकाश पाने आहले लेखक न, जिनेंगी नज़र-अंदाज नेई कीत्ता जाई सकदा।

10.4 अभ्यास आस्तै सुआल

1. ओ.पी. शर्मा 'सारथी' हुंदी कविताएं दा भाव-पक्ष ते कला-पक्ष दी द्रिष्टी कन्नै मूल्यांकन करो।
2. प्रकाश प्रेमी हुंदे व्यक्तित्व ते कृतित्व पर रोशनी पाओ।

B.A. Sem-III (Poetry)	DOGRI	UNIT-II LESSON No. 11
--	--------------	--

कवियें दा जीवन—परिचे ते डोगरी कविता—साहित्य गी उंदा योगदान

रूपरेखा

11.1 उद्देश्य

इस पाठ दे अंतर्गत कवि डॉ. अरविन्द ते डोगरी दी पैहली कवित्री पद्मश्री श्रीमति पद्मा सचदेव हुंदे व्यक्तित्व ते कृतित्व कन्नै पाठकें गी परिचित करवाना मुख्य उद्देश्य ऐ तां जे छात्र उंदे सरबंधें च सोआलें दे जबाव देई सकने च कुशलता हासल करी सककन।

11.2 पाठ—परिचे

इस पाठ च डोगरी कवि डॉ. अरविन्द ते कवित्री पद्मा सचदेव हुंदे जीवन—परिचे ते कविता साहित्य सरबंधी जानकारी दिती गेदी ऐ।

11.3 पाठ—प्रक्रिया

11.3.1 कवि डा. अरविन्द ते डोगरी कविता साहित्य गी उंदा योगदान

- (i) डा. अरविन्द हुंदा जीवन परिचे।
- (ii) डा. अरविन्द हुंदियां रचनां
- (iii) डा. अरविन्द दी काव्य साधना दा मूल्यांकन

11.3.2 कवित्री पद्मा सचदेव ते डोगरी कविता साहित्य गी उंदा योगदान

- (i) पद्मा सचदेव हुंदा जीवन परिचे।
- (ii) पद्मा सचदेव हुंदियां रचनां
- (iii) पद्मा सचदेव दी काव्य साधना दा मूल्यांकन

11.3.1 कवि अरविन्द ते डोगरी कविता साहित्य गी उंदा योगदान

(i) जीवन परिचे

इक साहित्यकार साहित्य दे बादधे-विकास लेई बड़ी मेहनत ते लगन कन्नै कम्म करियै उस च अपना नांS बनांदा ऐ ते साहित्यकारें दी कतार च आई बाँहदा ऐ। हर इक साहित्यकार दी अपनी इक पंछान होंदी ऐ। पर जेकर ऐसे नांS साहित्य कोला बक्ख करी लैते जान तां साहित्य किष फिक्का जन बझोन लगी पौंदा ऐ। ऐसे गै नाएं च इक नांS ऐ –‘डा. अरविन्द’। जिं‘दियें कृतियें च इक सच्चाई ऐ, उंदा लिखने दा खास ढंग ऐ, गूढ चिंतन ऐ।

डोगरी भाषा दे विषिष्ट कवि, साहित्यकार ते कला प्रेमी डा. अरविन्द हुंदा पूरा नांS डॉ. अरविन्द रैणा ऐ। इन्दा जन्म 13 अक्तूबर सन् 1950 ई. गी जम्मू दी पक्की ढक्की दे म्हल्ले च रौहने आहले मन्ने-परमन्ने दे विद्वान डॉ. अनन्त राम शास्त्री ते श्रीमती शांति देवी हुंदे घर होआ। इंदे पिता डॉ. अनन्त राम शास्त्री हुंदा योगदान ते तरक्की आस्तै सराहनेजोग ऐ। डॉ. हुंदी माता जी सुलझी दियां ते घरेलू कम्मं काजें च निपुण महिला न। डॉ. होर त्रै भ्रास न ते इंदी इक भैन ऐ। डॉ. होर बचपन थमां गै बड़ी त्रिक्खी बुद्धि आहले ते संवेदनशील व्यक्तित्व दे मालक रेह न। इंदे घरा दा म्हौल साहित्यक रुचि-रुझानें आहला रेहा ऐ जिसदा प्रभाव इंदे व्यक्तित्व पर खास तौरा पर पेआ। एह बचपनै थमां गै पढ़ने-लिखने च खास रुचि लैंदे रेह। डॉ. अरविन्द हुंदी पढ़ाई दा श्री गणेश जम्मू दे सनातन धर्म हायर स्कैण्डरी स्कूल थमां होआ। इसदे परैन्त इ’नें अपनी एम.बी.बी.एस. दी पढ़ाई कश्मीर मैडिकल कालेज थमां पूरी कीती। डॉ. अरविन्द होर पेपे थमां डाक्टर न। डाक्टर दा पेपे अपना इंदा मुंढे थमां शौक रेहा हा जिसी इ’नें अपनी लगन ते साधना कन्नै हासल करी लैता। डॉ. अरविन्द हुंदा ब्याह 28 फरवरी सन् 1979 ई. गी जम्मू शैहरै च आभा खजूरिया दे कन्नै होआ। डॉ. अरविन्द हुंदे दो बच्चे इक जागत ते इक धीS ऐ। डाक्टर बनने दे शौक दे कन्नै-कन्नै पढ़ाई-लिखाई करना, संगीत सुनना ते गाना बी इ’नेंगी बड़ा पसंद हा। एह बचपनै च शौकिया तौर उप्पर कदें-कदें स्टेज उप्पर गांदे बी हे। कालेज च पढ़दे होई इ’नें किश इक गज़ला लिखियां जेहड़ियां एह गांदे बी हे। डॉ. अरविन्द होर बड़े गै संवेदनशील, खुष रौहने, सिद्धे ते आषावादी नजरियें आहले व्यक्ति न। एह बड़े गै मिलनसार व्यक्ति, सभनें कन्नै प्यार करने आहले ते हस्सियै

बोलने आहले न। इंदिये कविताएं गी पढ़ियै इ'यां बझोंदा ऐ जे एह अपने आपै कन्नै गै सुआल करा दे न ते अपने कोला गै उसदा हल पुच्छा करदे न।

(ii) डॉ. अरविन्द हुंदियां रचनां

डोगरी साहित्य दे खेतरे च औने आस्तै डॉ. अरविन्द होरें गी म्हौल अपने घरै च गै उपलब्ध हा। इ'दे घरै दा म्हौल साहित्यक हा। डोगरी साहित्य ते साहित्यकारें कन्नै इंदी पंछान बचपनै च गै सैहज-सभाएं होई गई। इस आस्तै इ'नेंगी डोगरी च लिखने आस्तै कोई मता सोचना नेई पेआ। लिखने दी शुरुआत ते इनें कालेज दी पढ़ाई दे दौरान गै कीती ही। 1973-75 दे समें च इ'नें अपनी पैहली डोगरी कविता 'बदलोंदे संदर्भ' लिखियै साहित्य दा मुंढ पाया जिसदे फलसरूप सन् 1989 च इ'दा पैहला कविता संग्रह 'मेरा सफर मेरे साथी' छपियै सामनै आया। ते सन् 1997 च इ'दा दूआ कविता संग्रह "खोज इक कविता दी ..." छपियै पाठकें तगर पुज्जा।

(iii) डॉ. अरविन्द दी काव्य साधना दा मूल्यांकन

'मेरा सफर मेरे साथी' डॉ. अरविन्द हुंदे पैहले कविता संग्रह च कुल 69 कवितां संकलत कीतियां गेदियां न। इ'नें कविताएं दा खास गुण एह ऐ जे एह कवितां माहनू दा स्तर उच्चा करदियां न ते माहनू दे अन्दर उगदे विचारें दा एहसास बी उसगी करादियां न। इंदी हर कविता दे रम्भ कोला लेइयै खीरे तगर विचार-तरंगें दियां लैहरां ठाठां मारदियां न। इस संग्रह दे मुख विषे न – समाजक, रिश्ते, मौत दे नेकां रंग, मनुखी जीवन ते समाज गी समझने ते इसदे उपर पेदे पड़दे गी गोहाड़ियै अस्तित्व दी खोज, जड़े थमां कटोई जाने परैन्त परतियै वापसी दी तृष्णा आदि दे भावें-विचारें दी बुनतर।

डॉ. अरविन्द होरें माऊ दे चेत गी लेइयै रची गेदी 'झुरियां' नांS दी कविता च वात्सल्य प्रेम ते ममता दे कोमल भाव गी गोहाड़े दा ऐ। इस कविता च इक माऊ दे जन्म कषा लेइयै बढेपे तगर दी बक्ख-बक्ख अवस्थाएं दा वर्णन बड़ी बरीकी कन्नै कीते दा ऐ। खास करियै उसदे च इक धीS, पत्नी, मां आदि दे रूपें पर रोषनी पाई दी ऐ। इस चाल्ली ओह जीवन च बल्लें-बल्लें खत्म होंदी जंदी ऐ ते कोई उसदे दर्द गी नेई समझदा पर कवि इक बारी परतियै अपनी माऊ गी इक कुड़ी दे रूपै च दिखना चाहदा ऐ। उंदे शब्दें च :-

राहड़े लेई रंग,
दपट्टे लेई कनारी
तविया दे पारा, पुल्ले ते रंगले गीहटें –
सब किष में तुई आहन्नी देगा,
इक दिन पही ओह कुड़ी बनी जा,
मां।
बस इक दिन। (झुरियां)

‘खोज इक कविता दी’ दूए कविता संग्रह च कुल 37 कवितां संकलत न। इस संग्रह च इ’यां बझांदा ऐ जे कवि सच्चें गै कुसै चीजै दी खोज करन लगगे दा ऐ जि’यां समां केह ऐ? जन्म-मरन केह ऐ? असेंगी जो किश इस समाज च लब्धा करदा ऐ जां जो किष साढ़े समाजै च होआ करदा ऐ उ’ऐ सच्च ऐ जां इसदे इलावा बी किश होर ऐ। इस समाजै च इन्नियां दुख तकलीफां ते बुराइयां की न? इ’नें सभनें सुआलें दी खोज इस संग्रह दी कविताएं च दिखने गी मिलदी ऐ। कवि अरविन्द होरें बाल मनोवृत्ति गी लेइयै रची गेदी ‘तुषु दा जुगनू’ नांऽ दी कविता च बच्चें दे कोमल भावें गी गोहाड़े दा ऐ। बच्चे ठीक ते गलत, मुमकन ते नामुमकन च फर्क भेद नेई करी सकदे। ओह सभनें गी अपने जनेहा समझदे न, भाएं ओह इक जुगनू गै की नेई होए। तुषु जुगनू कन्नै खेढदा-खेढदा थक्की जंदा ऐ ते उसगी लगदा ऐ जि’यां ओहदी मां उसगी मिलने आस्तै बलगा करदी ऐ उससै चाल्ली इस जुगनू दी मां बी उसगी बलगा करदी होनी ऐ। बाल-भाव दे इस सुनहरे शब्दचित्र गी कवि ने अपनी कविता च व्यक्त कीत्ते दा ऐ :-

राहड़े लेई रंग,
“खेढी-खेढी
जुगनू कन्नै
जिसलै थक्केआ
डब्बी खो’ल्ली
उसी गलाया
अपनी मम्मी कोल मैं चलेआ सौने गितै
जा! तुगी बी तेरी मां बलगा दी होनी।”

इस चाल्ली दिक्खेआ जा तां डॉ. अरविन्द हुंदा डोगरी जगत गी बड़ा टकोहदा योगदान ऐ। ओह कुसै बी चीज गी जि'यां ऐ उ'यां गै स्वीकारने दे बजाए उसदी पूरी खोज-पड़ताल करियै गै उसदे बारे च अपनी राऽ प्रकट करने आहली शख्सीयत न। एह बाहरी लिष्क-मिष्क ते झूठी वाहो-वाही दे हामी नेई न। एह अपने आप च मग्न रौहदे न। इंदियें कविताएं च गहन चिंतन ते विप्लेषन ऐ ते अपना गै इक विचार बिंदू ते शैली ऐ जेहड़ी उनेंगी डोगरी दे दूए कवियें शा बक्ख करदी ऐ उनेंगी कवता दी रचना आस्तै बौद्धिकता दा सहारा नेई लेना पौंदा बल्के ओह आप-मुहारे प्रवाह चा कोरजू सीरें आंगर फुट्टी निकली दियां न।

11.3.2 पद्मा सचदेव ते डोगरी कविता साहित्य गी उंदा जोगदान

(i) जीवन परिचे

अपनी काव्य साधना राहें डुग्गर, डोगरी ते डोगरें दी दूरा-दूरा तगर पन्छान कराने आहली शख्सीयत दा नाऽ पद्मा सचदेव ऐ। एह ओह इक्कली कवित्री ऐ जेहड़ी अपनी हौली बरेसा च गै डोगरी दी तैहरीक चलाने आहले कवि-लखारियें दे पैहले काफले कन्नै आनी रली ही। पद्मा सचदेव दा जन्म सन् 1940 ई. गी जम्मू शैहरा च हिन्दी ते संस्कृत दे विद्वान पं. जयदेव बडू हुंदे घर होआ जेहडे मीरपुर कालेज च संस्कृति दे प्राध्यापक हे। घरै च पढ़ाई-लखाई दा म्हौल होने करी पद्मा गी बचपन च गै संस्कृत दे श्लोक ते हिन्दी दे पद गाने दा बड़ा शौक हा। शुद्ध-उच्चारण ते सुरीले कैंठ दा कमाल हा जे हर कोई श्रोता इंदा श्लोक पाठ सुनियै मन्त्रमुग्ध होई जंदा। श्लोकें दे कन्नै-कन्नै डोगरी लोकगीतें गी गाने ते अपने पासेआ उंदे च होर बन्ध जोड़ने दी बिरती बी बचपुने च गै बड़ी हावी ही। पर 1947 ई. च पाकिस्तानी हमले दी हफरा-तफरी च मीरपुर थमां जम्मू औंदे होई इंदे पिता जी बस्से च गै खूनी हादसे दे शकार होई गे। पिताजी दे इस हादसे दा पद्मा दे क मनै पर बड़ा डूंहगा असर पेआ ओह इक दम अन्तरमुखी होई गई ते आत्म चिन्तन आहली बक्खी टुरी पेई। इ'यां उ'ंदे चिन्तन दे गुण बधन लगी पे। इंदा ब्याह 'वेदपाल दीप' हुंदे कन्नै होआ जेहड़ा सफल नेई रेहा। हून एह 'सिंह बन्धु' हुंदे कन्नै ब्याह बंधन च बज्झी दियां न। आकाषवाणी दिल्ली थमां बतौर अनौसर रटैयर होने परैन्त अज्ज-कल अपने घर गै काव्य-साधना च रुज्झी दियां न।

(ii) पद्मा सचदेव हुंदियां रचनां

सन् 1955-56 दे ब'रे च इक डोगरी कवि गोष्ठी च पद्मा ने जिसलै अपनी कविता 'एह राजे दियां मंडियां तुंदियां न' पढ़ी उसलै सबै पराने लखारी ते कवि प्रभावत होई गे, की जे उंदी पैहली गै कविता बड़ी सुंदर भावपूर्ण ते उच्ची सोच आहली ही। कविता दे बोल न :-

“मूंह पेदा ग्राह जि'नें खूसी लेआ,
 अनबनेआ लहू जि'नें चूसी लेआ
 साढ़े भुज्जने तड़पने रोन आहला
 दिन जि'नें शाहें गी दूसी गेआ
 साढ़े कम्बदे हत्थें गी सु'ट्टी सोटू,
 छुड़ेआ अक्खीं अगें निं इक लोटू,
 जेह्ड़े फंडियै साढ़े पटार लेई गे,
 उंदियां लद्दी दियां घोड़ियां तुंदियां न?
 एह राजे दियां मंडियां तुंदियां न।”

एह कविता अपनी मार्मक, शैली, जानदार भाषा ते पैन्नी द्रिश्टी दे कारण पद्मा हुंदियें उत्तम रचनाएं चा इक ऐ। इस च कवित्री ने मासूम जनता दा शोषन करने आहली, उस पर जुल्म ढाने आहली सामन्ती परम्परा पर करारी चोट कीती दी ऐ। इंदियें रचनाएं दा ब्यौरा इस चाल्ली ऐ :-

(1)	मेरी कविता मेरे गीत	(कविता संग्रह)	1969
(2)	तवी ते चन्हां	(कविता संग्रह)	1976
(3)	न्हेरियां गलियां	(कविता संग्रह)	1982
(4)	पोटा-पोटा निम्बल	(कविता संग्रह)	1987
(5)	उत्तरबैहनी	(कविता संग्रह)	1992
(6)	धैथियां	(चमुखे संग्रह)	1999
(7)	अक्खर कुंड	(कविता संग्रह)	2002
(8)	इक ही सुग्गी	(उपन्यास)	2004
(9)	चित्त-चेते	(आत्मकथा)	2007
(10)	रत्तियां	(चमुखे संग्रह)	2009

सम्मान

भारती भाषाएं गी पद्मा सचदेव हुंदियें इ'नें नमुल्लियें सेवाएं करी डुग्गर दी इस महान कवित्री गी राष्ट्री-अंतराष्ट्री स्तर दे केइयें प्रतिष्ठत सम्मानें कन्नै सम्मानेआ गेआ ऐ जिस उपपर पूरे डुग्गर गी फखर ऐ। इ'नें सम्मानें दा मुख्तसर ब्यौरा इ'यां ऐ :-

1. 'मेरी कविता मेरे गीत' कविता संग्रैह उपपर 1971 ब'रे दा साहित्य अकादमी पुरस्कार।
2. 'न्हेरियां गलियां' कविता संग्रैह पर 1983 ब'रे च जम्मू-कश्मीर कल्चरल अकैडमी दा पुरस्कार।
3. 'पोटा-पोटा निम्बल' कविता संग्रैह पर 1988 ब'रे च. जम्मू -कश्मीर कल्चरल अकैडमी दा पुरस्कार।
4. 1989 ब'रे च जे. एण्ड के. रोब ऑफ ऑनर ते उत्तरप्रदेश अकैडमी, लखनऊ थमां सौहार्द पुरस्कार।
5. 1990 ब'रे च हारमोनी पुरस्कार।
6. 1993 ब'रे च राजा राम मोहन राय कला श्री पुरस्कार।
7. 'कोई नेई दूआ' अनुवाद पर 2000 ब'रे दा साहित्य अकादमी पुरस्कार।
8. 26 जनवरी 2001 गी भारत दे राष्ट्रपति हुंदे आस्सेआ पद्म श्री पुरस्कार।

(iii) पद्मा सचदेव दी काव्य साधना दा मूल्यांकन

पद्मा हुंदे पंजें कविता संग्रैह दियें कवितायें च बन्न-सबन्ने भाव ते भाषा दा सन्हाकड़ा जोग ऐ। कुतै नारी प्रति समाजी परम्पराएं दा क्रूर रवैया ते कुतै नारी दियें सोहल हीखियें ते आसें-मेंदें प्रति पुरुष वर्ग दी लापरवाही ते उसदे शोषन दे उदगार, कुतै देश प्यार ते खास करी मातृभूमि ते मातृभाषा कन्नै अथाह हिरख ते लगाऽ, कुतै अम्बड़ी, बावल ते देसै दे मन्दे दे छुआले लैंदे भाव, कुतै उद्दम हौसले दी मषाल फड़ियै संघर्षे दी बत्ता चलने ते अपने बजूद दा लोहा मनवाने दा सुर ते कुतै देस-बदेषें च व्यापी दी अषांति ते त्रुटदियें मनुक्खी कदरें पर निम्मोज्ञानी दे सुर पद्मा हुंदी कविता च नरोआ गुहाड़ भरदे न।

‘देस नकाला’ कवित इ‘यै जनेही गै कविता ऐ जिस च कवित्री न कुड़ियें दे ब्याह दी रीता दी ‘देस नकाले’ दी संजा दे कन्नै तुलना कीती दी ऐ। कोमल सद्धरें ते अरमानें कन्नै पली मठोई कुड़ी गी सौहरे घर जाइयै किस चाल्ली दे तस्से स्हारने पौंदे न एह मारमक वर्णन इस कविता च इ‘यां ऐ :-

“कु‘न आखदा देस नकाला नेई?
सालूं फट्टे दा बुक्किलां मारां कि‘यां?
पानी कड़्ढां कि‘यां, माल चारां कि‘यां
मेरे सालूएं गी केई खुंघियां न,
किश लौहकियां न, किष डूंहगियां न,
सारे चेतें, न मेरे प्योकड़े दे,
संग साधनें दे, बीर लौहकड़े दे,
मिगी रोंदियां गी डोलै पाया जि‘नें,
घर अपने जा—गीत गाया जि‘नें,
घर सौहरियें जीन सखला नेई,
कु‘न आखदा देस नकाला नेई।”

डोगरी च पद्मा सचदेव हुंदे कविता संग्रैह ‘मेरी कविता मेरे गीत’, ‘तवी ते चन्हा’, ‘न्हेरियां गलियां’, ‘पोटा—पोटा निम्बल’, ‘अक्खर कुंड’, ‘उत्तर बैहनी’ ते चमुखें दे संग्रैह ‘धैंथियां’ ते ‘रत्तियां’ अपना चेचा ते म्हत्तवपूर्ण थाहर रखदे न।

पद्मा सचदेव हुंदी कविताएं दी इक खास विषेषता एह ऐ जे इंदी कविताएं च अपने जीवन दियें नराषाएं, नकामियें ते वेदना दी अभिव्यक्ति होंदी ऐ जिसदा ब्यौरा प्रस्तुत ऐ :-

“पीड़ा दा ऐ शैहर जिस बिच्च रौहनीन आं,
हिखी दी इक लैहर जिस बिच्च बौहनी आं।”

नारी मनै दी कोमल भावनाएं दी अभिव्यक्ति बी उंदी कविताएं च दिक्खने गी लभदी ऐ। ‘मेरी कविता मेरे गीत’ नांS दे संग्रैह दियां कवितां नारी सुआतम कन्नै जुड़ी दियें अनुभूतियें ते तांगे मेदें गी बड़े सैहज भाव कन्नै अभिव्यक्त करदियां न। ‘मेरा मन्दा कि‘यां बुज्जो मेरी हिक्खी कि‘यां जानो’ इक

लोकप्रिय रचना ऐ, जिस च डुग्गर धरती दे नरोए शलैपे, उसदे नदियें, नाडुएं सरें—दरियाएं ढक्कियें—टिब्बुएं, रुक्खें—बूहटें, धारें—ब्हारें, मंदरें—मसाधें, देवी—देवतें, राह—रीतें, गोरियें—गभरुयें, छिल्लुएं—बक्करियें यानी कण—कण, पत्तर—पत्तर, डाहली—डाहली गी चेतै करियै मनै दा मंदा बुहासरेआ गोदा ऐ :-

“बड़े हिरखे ने बोबो आखदे गि’ललू नेई दिक्खे,
मेरी अक्खीं नै धारां हाम्बदे छिल्लू नेई दिक्खे।
कदें पीता नेई नाड़ें दा छमबा लाइयै पानी
तुसं प्हाड़ें दे हौंके दी कदें बी पीड़ नेई जानी
तुसं नेई छिल्लू सुक्खे कुसै दी इन्तजारी च
तुसं नेई औंसियां पाइयां परोली च पसारी च
मेरा मंदा कि’यां बुज्झो मेरी हीखी कि’यां जानो।”

नारी ते ममता दियें बड़ी सैहज ते सूख्म अनुभूतियें दा एहसास करोआंदी कवित्री लिखदी ऐ :-

“एह कुरुतु मेरे गि’ल्लु दा, एह तम्बु एह टोपु,
लेफ सरहैना, शैल रजाटु ढिल्ला ढिल्ला कोटु।”

डुग्गर दे प्राकृतिक शलैपे दा वर्णन बी उंदी कविताएं च होए दा मिलदा ऐ जिस दा बखान करदी कवित्री लिखदी ऐ :-

“दिक्ख तवी दा निर्मल पानी, दिक्ख चन्हां दी चाल
कंजकां नौन नराते इत्थै, सोहनी मारै छाल।”

कवित्री कुतै बी होए ओह अपने आपै गी डुग्गर दी गोदा च बैठे दे मसूस करदी ऐ। ‘मेरी मुट्ठ बन्द’ कविता च डुग्गर, जम्मू ते पद्मा इक—दुए शा नखेड़े नेई जाई सकदे।

“मुट्ठी करियै बंद में बरसै च कीता ऐ शैहर
एह मेरे कच्छ, अ’ऊं न्हाड़े कच्छ, हर म्हीना दिन पैहर।”

जत्थै पद्मा सचदेव दियें कविताएं च डुग्गर प्रदेश दे डोगरें दी कहानी दिक्खने गी लभदी ऐ, उत्थै गै रीति-रवाज ते संस्कृति दे दर्शन बी उंदी कविताएं च होंदे न :-

“अस डोगरें आं आक्खने आं शानै कन्नै
असें जित्तियां न जंगा घमसानै कन्नै।”

पद्मा सचदेव हुंदियें मतियें रचनाएं च अपने बीते दे जीवन दियें नराषाएं ते पीछें दी सिद्धी आत्म अभिव्यक्ति ऐ। इक कविता च ओह आखदी ऐ :-

“पीड़ा दा इक शैहर कि जिस बिच्च रौहन्नी आं
हीखी दी इक लैहर कि जिस बिच्च बौहन्नी आं।”

‘उत्तरबैहनी’ कविता इक प्रतीकात्मक कविता ऐ जिस च जीवन जीने लेई उत्तर बैहनी नदी आंगू उल्टी मुहार फड़ियै जीने दा हीला तुप्पने दी रम्ज समझाई गेदी ऐ :-

“उऊं आं उत्तर बैहनी मेरा साथ निं कोई
इत्थै शैह गै शैह ऐ साथी मात निं कोई।”

‘रौंगला कष्मीर’ शीर्षक दी इक होर कविता च कवित्री ने इस गल्ला दा बड़ा दुख बुज्जे दा ऐ जे आपसी हिरखे दी मिसाल, इस कष्मीरा गी कोहदी नजर लग्गी गई। ओह कष्मीरै दी हालत दिक्खी बड़ा लचार मसूस करदी ऐ :-

“केह होआ कष्मीरै गी
कोहदी नजर लग्गी इसी।”

‘मेदां’ कविता च कवित्री ने मजूदा समें च मनुक्खी बिरती च इक्कलसोखी ते आपो अपनी जनेहियें संकुचित भावनाएं उप्पर दुक्ख बुज्जे दा ऐ -

“की माहनू नै हिरख नीं करदा माहनु इक्कलसोखा
खरा भला हा न्हाड़े पर पेदा ऐ कोहदा पौखा

मित्तरो कोटे सिक्के होई गे गल्लां होइयां
लम्मियां सरेआं बाहां राहियां मेदां।”

‘खाकी बरदी’ कविता च कवित्री ने पुलस ते फौज दी सख्त पैहरेदारी च शैहरा दी लाचार हालती दा वर्णन बड़े चित्त छूहने शब्दें च कीते दा ऐ :-

“खाकी बरदी हेठ पलदा जा रदा ऐ मेरा शैहर
केहड़ी शात्तर झलदा जा रदा ऐ मेरा शैहर।”

‘धैथियां’ संग्रैह जीवन संसार ते सबूरी कायनात दी नुमायंदगी करदा ऐ। दुग्गर संस्कृति दा नरोआ वर्णन :-

“गरज्जियै ब’र म्हेसी दे सब भेद-भाव,
नां कोई नौकर र’वै न साहब
धरतियें पर फसल नूहं अवा दी
सारे पिण्डै गी अज्ज खलाओ चाब।”

पद्मा हुंदी रचनाएं च शब्दालंकार ते अर्थालंकारें दी सुंदर साज-सजौट दे इलावा प्रतीकवाद ते बिम्बवाद दे नरोए प्रयोग बी बड़े चित्त लगदे न।

पद्मा सचदेव होर श्रेष्ठ ते उच्च कोटी दी कवित्री खुआने दी हकदार न। डोगरी भाषा इंदे पर नाज करी सकदी ऐ। पद्मा हुंदा नांS लैंदे गै डोगरी कविता कन्नै च गूंजन लगी पौंदी ऐ ते डोगरी कविता पढ़दे सार गै पद्मा दा चेता उठी औंदा ऐ। पद्मा होर छड़ी डोगरी कन्नै गै नेई भारत दियें दूइयें भाषाएं कन्नै बी हिरख करदियां न। हर डोगरा उंदे गीतें पर मस्त ऐ ते अक्सर डोगरी भाषा-भाषी पद्मा दे गीतें दा गुणगान करदे रौंहदे न। इंदी भाषा च व्यवहारकता, सरलता ते प्रभावपूर्णता दिक्खने गी लब्धदी ऐ।

11.4 अभ्यास आस्तै सुआल

1. डॉ. अरविन्द हुंदा जीवन परिचे दिंदे होई उंदी कविताएं दे प्रमुख रूझानें पर चर्चा करो।
2. पद्मा सचदेव हुदी कविताएं च वर्णित बक्खरे-बक्खरे रूझानें पर उदाहरणें समेत चर्चा करो।

B.A. Sem-III (Poetry)	DOGRI	UNIT-II LESSON No. 12
--	--------------	--

कवियें दा जीवन—परिचे ते डोगरी कविता—साहित्य गी उंदा योगदान

रूपरेखा

12.1 उद्देश्य

इस पाठ दे राहें विद्यार्थियें गी डोगरी कविता साहित्य च विशेष थाहर रक्खने आहले कवियें — 'वीरेंद्र केसर' ते 'कुंवर वियोगी' हुंदे व्यक्तित्व ते काव्य साहित्य कन्नै परिचित करोआना मुख्य उद्देश्य ऐ। तां जे छात्र इ'ने कवियें दे सरबंधै च सोआलें दे जबाव देई पाने च कुशलता हासल करी सककन।

12.2 पाठ—परिचे

इस पाठ दे अंतर्गत कवि वीरेंद्र केसर ते कुंवर वियोगी हुंदे जीवन—परिचे ते काव्य—साहित्य सरबंधी जानकारी दिती गेदी ऐ।

12.3 पाठ—प्रक्रिया

12.3.1 कवि वीरेन्द्र केसर ते डोगरी काव्य साहित्य गी उंदा योगदान

- वीरेन्द्र केसर हुंदा जीवन परिचे।
- वीरेन्द्र केसर हुंदियां रचनां
- वीरेन्द्र केसर दी काव्य साधना दा मूल्यांकन

12.3.2 कवि कुंवर वियोगी ते डोगरी कविता साहित्य गी उंदा योगदान

- कुंवर वियोगी हुंदा जीवन परिचे।
- कुंवर वियोगी हुंदियां रचनां
- कुंवर वियोगी दी काव्य साधना दा मूल्यांकन

12.3.1 वीरेंद्र केसर ते डोगरी कविता साहित्य गी उंदा योगदान

(i) जीवन परिचे

डोगरी दे नामवर गजल गोऽ शायर 'गजलें दे उस्ताद' 'वीरेन्द्र केसर' हुंदा नांऽ अपनी टकोह्दी पन्थान रखदा ऐ। इ'नें नमें शब्द, नमें विचार, नमें विषे बगैरा देइयै डोगरी गजलें गी समृद्ध कीता ते गजलें दे खेतर च अपनी चेची छाप बनाई इ'नें कविता ते गीत बी रचे पर इंदी टकोह्दी पन्थान इक शायर दे रूपै च ऐ। वीरेन्द्र केसर होर डोगरी शायरें च गूढ़ विचारें, लाक्षणिक शब्दावली, रौसले बिंबें ते नमें प्रतीकें दे शायर मन्ने जंदे न।

वीरेन्द्र केसर हुंदा जन्म अपने ननेहाल काली जनी, जम्मू च 3 दिसंबर 1945 गी होआ। इंदे पिताजी दा नांऽ श्री लालचंद ते माता जी दा नां सोमा देवी हा। इ'यां ते हर लुआद अपने माता-पिता दी अक्खीं दा तारा होंदी ऐ पर एह अपने माता-पिता दी इक्को-इक्क लुआद होने करी बड़े लाडले हे ते एह बी अपने माता-पिता गी अपना आदर्ष मनदे हे ते उंदे आसेआ आखी गेदी हर इक गल्ला गी सत्तवचन मन्नियै पालन करदे रेह न। इंदे पिता जी गौरमैट ट्रांसपोर्ट च मलाजम हे ते उ'नेंगी पैहलवानी दा बी शौक हा। एह अपनी मां जी गी हिरखै कन्नै 'बोबो' कुआलदे हे। इंदी शुरुआती पढ़ाई काली जनी च गै होई। इंदा दमाग कोई बी गल्ल सिखने च तेज हा, जेह्ड़ी गल्ल सुनदे ओह् कदें नेई भुलदी। बाहरमी जमाता तगर दी इंदी पढ़ाई रणवीर हायर सैकेंडरी स्कूलै च गै होई। पढ़ाई दी इस पढ़ाऽ दे दरान इंदे पिता जी दा सुर्गवास होई गेआ। फलसरूप एह बाहरमी जमाता च रेही गे। बाहरमी च रेही जाने दे इस झटके ने इंदी जीवन धारा गी बदली दिता। पही पढ़ना केह हा इ'नेंगी जिंदा रौहने आस्तै रुट्टी दा जुगाड़ करने च बी मुष्कलां औन लगी पेइयां। इससे दरान एह चाल्ली रपेऽ म्हीने उप्पर नौकरी करन लगी पे पर पढ़ाई दा शौक ते अधूरापन इ'नेंगी तुंबदा रौहदा। साहित्य च रुचि होने कारण गोष्ठियें च औंदे जंदे हे। पही इक दिन गोष्ठी च बैठे दे इंदे दोस्त डॉ. अषोक जेरथ होरें इ'नेंगी चुभ लांदे होई गलाया जे, "पढ़ना तेरे स्थाऽ च घट्ट ऐ पर कम-स-कम ग्रेजुएशन गै करी लैनी ही तां जे म्तेहानै दे ब्हान्ने कन्नै किष पढ़ाई होई जा।" उ'नें अपनियां किष कताबां इ'नेंगी दितियां। इस दौरान इ'नें डोगरी च आनर्स 'षिरोमणि' करी लेदी ही ते इ'नें लिट्रेचर च अट्ठें सालें बाद पढ़ाई शुरू करियै अंग्रेजी दा म्तेहान देइयै ग्रेजुएशन करी लैती। पही इ'नें एम.ए. डोगरी कीती। की जे केसर होर एजुकेशन डिपार्टमेंट च अध्यापक दे तौरा पर कम्म करदे हे इस करी डिपार्टमेंट ने इ'नेंगी बी.एड. करवाई ते इस चाल्ली इ'नें अपनी अकादमिक शिक्षा एम.ए., बी.एड.

तगर हासल कीती। नवंबर 1973 च गौरमैट हाई स्कूल 'जख' च ड्राईंग मास्टर बनियै अड्डाक उप्पर नौकरी करन लगी पे ते पही उत्थै गै त्र'ऊं म्हीनें बाद पक्के होई गे। नौकरी दे दरान इ'नें केई थाहरें दा भ्रमण कीता। इ'यां बक्ख-बक्ख थाहरें पर अध्यापन दा कम्म करदे-करदे खीर गौरमैट हाई स्कूल पलौड़ा च अट्ठ म्हीने नौकरी करने परैत 31 मार्च 2003 च रिटायर होई गे ते अज्जकल साहित्यक जीवन च रुज्झे दे न।

केसर हुंदा घिस्त जीवन दुखें-सुखें दी धुप्प-छां दा चित्र जन ऐ। केसर हुंदे घरै च कुल्ल चार जीव हे - केसर होर, इंदे पिता जी, इंदी मां जी ते इंदे मामा जी। केसर हुंदा 15 फरवरी 1976 च बसोहली दे 'माइता प्रेता' नांऽ दे ग्रां दे शुक्ल परिवार दी कुड़ी कन्नै ब्याह होआ। इंदे घर इक बारी पही खुषियें फेरी पाई। कोई ब'रे डेढ ब'रे परैन्त इंदे धर जागत होआ। उ'नें दिनें इंदी ड्यूटी गौरमैट मिडल स्कूल 'घाऽ मण्डी' ही। जागतै दे बाद कुड़ी ते पही जागतै दा जन्म होआ। पर बड्डा जागत मता कसरी रोहन लगी पेदा हा ते डाक्टरे गलाए दा हा जे जागतै दे दिलै दा इक बाल्ब खु'ल्ले दा ऐ ते दूआ खराब ऐ। उस दिनें शा एह पही तसीहें चढ़ी गे। एह जित्थें जंदे, जे किष करदे इंदे ध्यान जागतै च गै फसे दा रौहदा। इस्सै कारण एह दुए द'ऊं जायणें दी इन्नी दिक्ख-रिक्ख नेई करी सके। एह अपने इस समें दे दौरान आर्थिक रूपै च ते ठीक हे पर मानसक तौरा पर सूली जन टंगोए दे हे। किष चिरें परैत बड्डा जागत धोखा देई गोआ। केसर होरें पही लक्क बनेआ ते ब'रा 2005 च कुड़ी दा ब्याह कीता। कुड़ी शैल पढ़ी लिखियै शैल समांतर घरै च जाई पुज्जी ते अपने घर सुखी ऐ।

(ii) वीरेन्द्र केसर हुंदियां रचनां

वीरेन्द्र केसर हुंदे नांऽ च 'केसर' इंदे उपनाम दे तौरा पर अपने कुल परोआर दा सूचक ऐ पर अज्ज इंदे तखल्लस बनी गेदा ऐ जेहड़ा इंदे व्यक्तित्व गी शैल चाल्ली कन्नै अभिव्यक्त करदा ए। इंदे व्यक्तित्व च ईमानदारी, खुददारी दे रंगें च संवेदनशीलता दा केसर इ'यां घुले दा ऐ जे बाकी रंग बी इस्सै च रंगोई जन गेदे न। वीरेन्द्र केसर होर दृढ़ प्रतिबद्धता कन्नै चुनौतियें गी ललकारदे, ईमानदारी कन्नै अपनी संस्कृति दा सम्मान करदे, प्रकृति कन्नै सुभावक थमां बद्ध मोह रखदे होई जीवन दी सजीवता गी बुहास्सरदे होई जीवन गी सरल, सैहज ढंगै कन्नै जीने च विष्वास रखदे न।

जित्थूं तगर वीरेन्द्र केसर हुंदे साहित्यक जीवन दी शुरुआत दा प्रश्न ऐ तां उस शुरुआत दे चिन्न असेंगी इंदे बचपन च लेई जंदे न। एह शायद 10—12एं बरें दे हे। एह 'बोबो' कन्नै अपने पिता जी दे ननेहाल बाबा गहार गे। उ'नें दिनें एह चौथी पंजमी पढ़दे हे। उत्थें उ'नें दिनें लोक चन्न बड़े चाएं—चाएं गांदे हे ते चन्न गंडने आह्ला बड़ा पसोई—पसोई बाँहदा हा। एह भाएं बड़े गै निक्के हे पर अपने आपा च सोचदे जे एहदे च ब्हादुरी आहली केहड़ी गल्ल ऐ। द'ऊं तक्कां गै जोड़नियां न। इ'नें किश चन्न घड़े बी ते अपनी माऊ ते उंदी स्हेली गी सनाए बी। माऊ दी स्हेली ने बड़ा चबात बुज्जेआ ते उस गलाया जे तेरा एह जागत कोई अफलातून ऐ।

इनेंगी प्रजा परशद आहले जेहके अज्जकल बीजे.पी. आहले खोआंदे न अपने जलसें च लेई जंदे ते उत्थें एह देशभक्ति दियां फुटकल कवितां पढ़दे ते कदें—कदें गंढ त्रुप्प करदे रौहदे। इ'नेंगी जलसे च कवितां पढ़नियां ते वाहवाही लैना बड़ा सुखजन बझोंदा हा। एह उर्दू दे विद्यार्थी हे ते कन्नै गै इ'नेंगी नूर—उल जमा सदीकी नूर होर जेहड़े उर्दू दे लैक्चरर लगगे दे हे ओह इन्ने शैल ते सरोखड़ ढंगा कन्नै गजलां तफसील कन्नै, विस्तारपूर्वक ढंगा कन्नै समझांदे जे बस इनेंगी नंद आई जंदा। एहदे बाद एह देशभगती दे इलावा होर दुएं विशें उप्पर बी लिखन लगी पेदे हे। बेशक्क विषे कुसै जां कुसै ढंगा कन्नै बड़दे शायरें दे चोरी कीते दे होंदे हे। उ'नें दिनें इन्फरमेशन डिपार्टमेंट आसेआ डोगरी दी 'फुलवाड़ी' नांS कन्नै इक मैगजीन दे एडीटर हे, इ'नेंगी गलाया जे ओह इंदी गजल अपनी अखबारा च छापडन। एह बड़े चाएं—चाएं अपनी उर्दू दी गजल उ'नेंगी देई आए। दुए दिन जिसले एह दफ्तर पुज्जे तां विजय सूरी होरें अखबार इंदे हत्थ च पकड़ाई दिती। इ'नें दिक्खेआ जे इंदा नांS उस अखबार च छप्पे दा हा। घर परतोंदे बाकी चंचल शर्मा होरें जेहके 'फुलवाड़ी' दे एडीटर हे ने गलाया जे ओह इंदी डोगरी दी कविता 'फुलवाड़ी' च छापडन। इ'नें घर परतोंदे तगर अखबारै गी कोई दस बारी खोलियै अपनी गजल ते अपना नांS पढ़ेआ। इ'दे कोल मतियां सारियां रचना हियां जि'न्दे चा एह निक्के—मुट्टे कवि सम्मेलनें जां गोशठियें च प्रस्तुत करी सकदे हे। इ'नें डोगरी संस्था बी जाना शुरु करी दित्ते दा हा हून इंदे कोल खासियां रचनां हियां। रेडियो स्टेसन च इनेंगी डोगरी दे त्रिकुटा प्रोग्रामै च कविता पढ़ने दा मौका मिलेआ। इस चाल्ली इंदी रेडियो स्टेसन आहली बत्त पढ़री होई गई। एह बड़ी तेजियें कन्नै अगड़ियां मंजला मारदे होई कताबा दे बारे च सोचन लगी पे। पही कल्चरल अकैडमी दी मैगजीन 'शीराज़ा' च छपन लगी पेदियां हियां। पही इक दिन इंदे मित्तर हेमराज हुंदे उद्धमें कन्नै इ'नें अपनी पैहली कताब कल्चरल अकैडी च आर्थिक मदद आस्तै भेजी

दिल्ली ते हेमराज हुंदी प्रेस च गै 1980 च 'गिल्ला बालन' नांS कन्नै छपी ते इ'यां इंदियें सुतेतर रचनाएं दे प्रकाशन दा सिलसिला शुरू होआ जेहड़ा लगातार अगड़ा बधा करदा ऐ। इस कताब च गज़लां, गीत ते नज्म लखोए दे हे।

(1)	गिल्ला बालन	(गज़ल, गीत, कविता संग्रह)	1980
(2)	लावा	(गज़ल संग्रह)	1983
(3)	किश किरचां किश तुरियां	(कविता संग्रह)	1986
(4)	सीरां	(गज़ल संग्रह)	1993
(5)	निग्घे रंग	(गज़ल संग्रह)	1999
(6)	औंसियां	(गीत संग्रह)	2005

सम्मान

1. सीरां (गज़ल संग्रह), जम्मू-कश्मीर कल्चरल अकैडमी दा पुरस्कार।
2. निग्घे रंग (गज़ल स्रैह), साहित्य अकैडमी, दिल्ली।

(iii) वीरेन्द्र केसर दी काव्य साधना दा मूल्यांकन

वीरेंद्र केसर हुंदी शायरी च समाजिक विसंगतियों पर चर्चा, धोखा-फरेब, समाज च चढ़दे दा बोलबाला, जोरजबरी, आर्थिक नांबरोबरी, मतलबखोरी, सफलता ते गुण, आशावादी द्रिष्टीकोण, सैह्णशीलता, अंधविश्वास, समाजी कदरें च विघटन, धर्म पखंडें पर व्यंग, जीवन सुखें-दुखें दा मेल, दार्शनकता आदि दे भाव होंदे न।

वीरेंद्र केसर हुंदा मन्नना ऐ जे माहनु गी अपने दुखें ते औखी परिस्थितियों कन्नै दोस्ती करी लैनी चाहिदी जेहदे कारण ओह म्हेषां खुष ते आशावादी रौहग :-

“रोगी ने आपूं अपनी कारी करी लेई
शीशे ने जन्नी ब'टटें ने यारी करी लेई।”

माहनू दे जीवन च नराशा दा हिस्सा मता ऐ की जे हर इक सफलता कन्नै असफलता जुड़ी दियां
होंदियां न ते माहनू इ'नें नराशाएं दे घेरे च घोए दा नराश होन लगी पौंदा ऐ ते सुआल उट्टी
खडोंदे न। उ'नें सोआलें चा इक सुआल ओह अपने आपे गी पुच्छदे न :-

“रहानां जन में सोचा ना केह खा करदा ऐ सदियें शा
जिसदा हर इक हिस्सा जोरें भुक्ख करला करदा।”

वीरेंद्र केसर हुंदी शायरी च एह तत्थ उग्घड़दा ऐ जे धोखा उ'ऐ मनुक्ख दिंदे ऐ जिस पर भरोसा
होए अर्थात् कोई अपना मैहरम गै धोखा दिंदा ऐ :-

“एह सबै गै मेरे अपने, कोई ओपरा लगदा नेई,
पही मिगी कु'न हिरखै बट्टै निगोसारी देई गोआ।”

उ'दा मनना ऐ जे उप्परा-उप्परा लोक बड़े मिट्टे होइयै लोकें कन्नै व्यहार करदे न, पर अंदरों-अंदर
ओह जैहरे दा कम्म करा करदे होंदे न :-

“शैहदे आंगर मिलदा सारै
मौहरे आंगर होंदा की ऐ
कंध-कंधा जिनदी सारै
घर-घर भर एह भनदी जांदी।”

इस दुनिया च हर माहनू दे जीवन च सुखें-दुखें दा औना-जाना लगगे दा रौंहदा ऐ। अगर असेंगी
जिंदगी च सुख मिलदे न तां साढ़े च दुख बी जरने दी शक्ति होनी चाहिदी। कवि दे बोल न :-

“फुल्लें दा चन्ना गाहकी तूं
कन्डे बी किश खरीदी लै
मिट्टें ने भरना जात मड़ा,
कौड़ा बी जीहभा धरदा जा।”

वीरेंद्र केसर होरें अपनी शायरी च प्रतीकें दा प्रयोग करदे होई आत्मपरक शैली बरती दी ऐं

12.3.2 कुंवर वियोगी ते डोगरी कविता साहित्य गी उंदा योगदान

(i) जीवन परिचे

साहित्य रचना आत्म-अभिव्यक्ति दा इक सशक्त माध्यम ऐ। एह्दे राहें लेखक अपने मनोभाव बड़े प्रभावशाली ढंगै कन्नै प्रस्तुत करी सकदा ऐ। इक लखारी अपने भाव-बचार प्रगट करने आस्तै भाएं गद्य विधा जां पद्य विधा गी अपनान। कुंवर वियोगी होर बी उ'नें साहित्यकारें चा इक न जेह्ड़े गद्य ते पद्य दौनें च रचना करने च कुषल न।

कुंवर वियोगी हुंदा पूरा नांऽ श्री रंधीर सिंह ऐ ते 'वियोगी- उंदा तखल्लस ऐ। उंदा जन्म 4 सितंबर 1940 ई. गी जिला साम्बा च होआ। इंदे पिता होर गौर ग्रांऽ दे जम्वाल राजपूत हे, उंदा नांऽ पूरखा सिंह जम्वाल हा ते ओह पुलिस विभाग च इंस्पैक्टर हे। इंदी मता हुंदा नांऽ श्रीमती पुष्पा देवी हा। कुंवर वियोगी होर पंज भ्रांऽ हे ते इंदियां त्रै भैनां हियां ओह अपने घरै च जेठे पुत्तर न। कुंवर वियोगी हुंदा बचपन अपने ग्रांऽ दे कन्नै-कन्नै राजौरी, कोटली, जम्मू ते उधमपुर च बीतेआ। पर मता चिर ओह फत्तू चौगान च गै रेह। इंदे बचपनै च इंदे घर बड़ी गरीबी ही। वियोगी होरें गी 13 ब'रें दी बरेसा च गै अदब लिखने दा चस्का लग्गी गोआ हा। 1954 ई. शा 1956 ई. तगर उ'नें दिल्ली थमां छपने आह्ले 'खिलौना' ते 'समां' रसालें च हिस्सा लेइयै 'आल इंडिया' स्तर दे इनाम जित्ते दे न। 'खिलौना' पत्रिका बच्चे आस्तै ही जिस च वियोगी होर फोटो आस्तै शीर्षक लिखियै भेजदे हे जेह्ड़ियां पत्रिकाएं च छापियां जंदियां हियां ते 'समां' पत्रिका बड़्ढे आस्तै ही जिस च ओह निक्कियां-निक्कियां कहानियां लिखियै भेजदे हे।

वियोगी होरें अपनी शुरुआती शिक्षा पक्का डंगा प्राइमरी स्कूल थमां हासल कीती। छेमी जमातै शा दसमी जमातै तगर दी शिक्षा प्रताप मैमोरियल राजपूत स्कूल थमां हासल कीती। इसदे बाद इ'नें आरमी जमातै आस्तै जी.जी.एम. साईंस कालज च दाखला लैता। कालेज दी मुंढली पढ़ाई घरै दी आर्थक तंगी ते लैक आफ गाइडेंस दी वजह कन्नै खराब रेही। पर फही 1957 शा 1961 तगर कालज दी पत्रिका 'तवी' मैगजीन दी उर्दू ते अंग्रेजी सैकशनें दे अड़ीटर बी रेह। वियोगी होरें B.Sc., PGDM, PGDMC, MBA ते Post Graduation in Journalism दी शिक्षा हासल करी लैती दी ऐ। इ'नेंगी डोगरी, उर्दू, हिंदी, अंग्रेजी ते पंजाबी भाषाएं दा पूरा-पूरा ज्ञान ऐ। जुलाई 1961 च वायु सेना

च पायलटी करने आस्तै एयर फोर्स फलाइंग कालज च उठी गे। नौकरी दरान ओह तकरीबन सारे हिंदोस्तान च घूमे। कोई डेढ़ क साल उ'नें विदेश च बी नौकरी कीती। इ'दा रिटायर होने दा समां 1998 ई. हा पर 1988 ई. च अपनी श्रीमत दी कैंसर कन्नै मौत होई जाने करी इ'दा मन उदास होई गेआ ते उ'नें इस्तीफा देई दित्ता।

(ii) कुंवर वियोगी हुंदियां रचनां

कुंवर वियोगी होरें डोगरी च सन् 1956 ई. च लिखना शुरू कीत्ता। इस कोला पैहले ओह उर्दू ते अंग्रेजी च लिखदे हे। 12वीं जमाता च इ'नेंगी शेक्सपीयर दी सान्नाट कांसोलेशन स्लेबस च लग्गी दी ही जिस कोला प्रभावत होइयै उ'नें मतियां सारियां सान्नाटां लिखियां। वियोगी होरें पैहली बारी मुषायरे च हिस्सा लैता ते डोगरी दी गज़ल गी बतौर शायर दे रूपै च मुषायरे च सनाई। इस मुषायरे च उंदी बड़ी वाह-वाही होई जिसदा नतीजा एह निकलेआ जे इ'नें हर मुषायरे च शामिल होना शुरू करी दित्ता। इसदे बाद इंदियां मती सारियां रचनां 'तवी', 'योजना' ते 'त्रिकुटा' पत्रिका च छपियां। सन् 1961 ई. दे शुरू च श्री प्रषांत होरें 'रेखा' च लिखदे होई इंदी कविता 'भोल्ली' गी 1958-1961 ई. च डोगरी दे नमें शायरें द्वारा लिखी जाने आहली शायरी चा चुनी जाने आहली त्र'ऊं बेहतरीन कविताएं च शामिल कीता। कुंवर वियोगी गी नीलाम्बर देव शर्मा होने दी पदवी दित्ती ते इब्बी आषा प्रगट कीती जे उनेंगी वायु-सेना जाइयै बी लिखदे रौहना चाहिदा।

प्रकाशत काव्य संग्रैह

1. घर लम्मी कविता — 1979
2. पैहलियां बांगां — 1987

कहानी

1. कुक्कड़े दा फलसफा (डॉ. शीराजा अंक-2 च प्रकाषत)

निबंध

1. अक्खरें दा नषा (अक्खर-अक्खर चाननी निबंध संग्रैह च प्रकाषत)

2. संदोख सिद्धी (डॉ. शीराजा अंक – 179 च प्रकाषत)

मान-सम्मान

कुंवर वियोगी होर इक विशेष प्रतिभा दे मालिक व्यक्तित्व दा नांS ऐ। उ'नें जीवन दे जिस खेतरे च बी पदार्पण कीता उत्थै उ'नेंगी सफलता गै प्राप्त होई ऐ। अज्जै तगर उ'नेंगी जिन्हें मान-सम्मानें द्वारा सम्मानित कीता गेदा ऐ ओह इस चाल्ली न :-

1. बैस्ट फाइटर कन्ट्रोलर दा गोल्ड मैडल – 1966 च।
2. 'घर' लम्मी कविता उपर साहित्य अकैडमी द्वारा सम्मानित – 1980 च।
3. वायु सेना चीफ द्वारा प्रशस्ती – 1985 च।
4. नर्मी डोगरी संस्था द्वारा 'साहित्य रत्न' पुरस्कार – 2001 च।

(iii) कुंवर वियोगी दी काव्य साधना दा मूल्यांकन

कुंवर वियोगी हुंदे काव्य च तीर्थ-स्थानें प्रति भगते-श्रद्धालुएं दी आस्था ते उत्थूं दे बसनीकें दा आचार-व्यवहार, दुख-दर्द दा भाव, शाषत मुल्लें दा वर्णन, प्रगतिवादी विचारधारा, समाजी शोषन, मनुक्खी मनै दियां भावना, डुग्गर ते डोगरी भाषा-प्रेम, धार्मिक असंगतियां, आर्थिक परिस्थितियों दा वर्णन, व्यंग दा सुर, निराशावाद दा भाव आदि विषे दी प्रधानता ऐ।

कुंवर वियोगी हुंदा कथन ऐ जे साढ़े समाज च बाल ब्याह दा काफी प्रचार रेहा ऐ। लोक अपनियें निक्कियें-निक्कियें कुड़ियें दा ब्याह करी ओड़दे हे। पही ओह निक्कियां-निक्कियां कुड़ियां केई बारी बालपुनै च गै विधवा बी होई जंदियां हियां। ओह अपनी जुआनी दा दुख कुसै गी बी नेई हियां दस्सी सकदियां। उनेंगी अपना घर गै इक जेलखाना लगदा हा।

“इक पतैनी बाल रंडोई, ओहदा बी हा घर,
ओहदे तना दी जलन ते तप्पन दूर निं होंदी पर।

कवि ने अपनी कविताएं च किष अटल सचाइयें बारै बी चर्चा कीती दी ऐ। एह सच्च. ऐ जे माहनू इस दुनिया च औंदा ऐ ते इक-ना-इक दिन इस दुनिया थमां चली बी जंदा ऐ। इस करी कवि दा भाव ऐ जे जो किष बी तुस कमांदे ओ उसी खरची लैओ इस जीवन दा कोई पता नेई, एह मिट्टी दा बने दा मिट्टी च गै इक दिन खत्म होई जाना ऐ। जीवन दियां रौनकां, दौलतां सब इत्थें गै रेही जानियां न। आखर इक ना इक दिन एह सब खत्म होई जाना ऐ :-

“खरची लै जो होई कमाई, जीना ऐ किच्चर,
मिट्टी दा ऐ बनेआ, मिलना मिट्टी दे गै अंदर।”

कवि गी अपने डुग्गर प्रदेश कन्नै अनसम्ब हिरख ऐ। ओह अपने डुग्गर थमां दूर रौहदे होई बी उसी पल-पल चेता करदा ऐ। देष-प्रेम ते मातृभूमि प्रेम, हिरख-प्यार दा भाव चित्रण इस चाल्ली ऐ :-

“जे तुस जागे जम्मू पाससै बंदेओ ओदी घर,
सीस झुकाइयै उसदी मिट्टी दा करेओ आदर।
लहुआ ने तर तर करदे पुत्तर सीह-जुआन,
बंजर भाएं खुआंदा म्हेशां ए योधें दा घर।”

कवि उस परम-पिता परमात्मा अगें प्रार्थना करदा ऐ जे ओह उसी अन-थक्क का'न्नी देन जिस कन्नै ओह म्हेशां लिखदा र'वै। उसदा हत्थ कदें नेई रुकै। जदूं तगर ओहदे साहें च रवानगी बनी दी र'वै तदूं तगर ओहदे लिखने दा प्रवाह बी बने दा र'वै। जि'यां :-

“दुआऽ करना, मिगी परमात्मा अन थक कान्नी दे,
ते मेरी आँगले गी फगड़ने दी का'न्नी दे ताकत।”

कवि दा आखना ऐ जे ओह मंदर, मस्जिद नेई जंदा। उत्थे बैठे दे धर्म दे ठेकेदार उसी नास्तक, काफर आखदे न। ओह इ'नें पखंडियें कोल जाने थमां घर बैठे दे गै कविता दी देवी दी अराधना करना बेहतर समझदा ऐ :-

“मंदर, मसजद में निं जंदा,
आऊं माहनू अक्खड़,
हिंदू मिक्की नास्तक समझन,

मुसलमान काफ़र ।
नाम 'बजोगी' इश्क़ होए दा मिक्की कविता कन्नै ?
तां कविता देवी दी पूजा करनां अपने घर ।”
कुंवर वियोगी होरें अपने काव्य च हर चाल्ली दे विचार, हाव-भाव, खतोले, सोचां आदि दा उल्लेख
बड़ी शिद्दत कन्नै कीते दा ऐ ।

12.4 अभ्यास आस्तै सुआल

1. डोगरी गज़ल दे खेतरे च वीरेंद्र केसर हुंदा थाहर निश्चत करो।
2. कुंवर वियोगी हुंदे व्यक्तित्व पर रोषनी पांदे होई उंदे काव्य साहित्य दा मूल्यांकन करो ।

डोगरी साहित्य चर्चा पर आधारित सोआल

रूपरेखा

13.1 उद्देश्य

इस पाठ दे राहें पाठकें गी साहित्य ते उसदे रूप—सरूप कन्नै परिचित करोआने दे इलावा साहित्य ते समाज दे आपसी सरबंध बारै छात्रें दी जिज्ञासा गी शांत करना मुख्य उद्देश्य ऐ। इस पाठ दे अध्ययन परैन्त पाठक साहित्य सरबंधी पुच्छे गो सोआलें दे जबाव देई पाने च सक्षम होई सकडन।

13.2 पाठ—परिचै

इस पाठ दे अंतर्गत साहित्य सरबंधी जानकारी प्रस्तुत कीती गेदी ऐ।

13.3 पाठ—प्रक्रिया

13.3.1 साहित्य ते साहित्य दा रूप—सरूप।

13.3.2 साहित्य ते समाज दा आपसी सरबंध।

13.3.1 साहित्य केह ऐ? साहित्य दियां परिभाशां दिंदे होई उसदे रूप—सरूप पर विचार करो ?

साहित्य समाजी चीज ऐ। एहदे कन्नै मेल—बर्तन दी भावना प्रधान होंदी ऐ। साहित्य च रुचि उ'ऐ लैंदे न जेहड़े दुएं कन्नै रली—मिलियै रौहना पसंद करदे न, जि'नेई दुएं दियें भावनाएं कन्नै हमदर्दी होंदी ऐ। मनुख अपने जीवनै च पूर्णता चांहदा ऐ। हर चीजै दी जानकारी प्राप्त करने दी लालसा ओहदे च होंदी ऐ। उसने इससै तांहगा करी, इस सिश्टी च मता किश सोधी लेआ ऐ, पर अजें बी

मता किश सोधना बाकी ऐ। इ'यै तड़प, ज्ञानै दी इ'यै त्रेह, पूर्णता दी इ'यै मांग 'साहित्य' दा रूप लेइयै प्रगटोंदी ऐ।

साहित्य शब्द दा जन्म दौं रूपें च सिद्ध कीता जाई सकदा ऐ। पैहला रूप ऐ, 'साहित्यस्य भावः साहित्यम्' अर्थात् 'सहित' जां साथें-साथें होने दा भाव जां मेल साहित्य ऐ। दुए शब्दें च 'साहितयोः भावः साहित्यम्' सहित शब्द ते अर्थ दा भाव, अर्थात् नेहा मेल जेहड़ा हित (कल्याण) सहित जां कन्नै होऐ। साहित्य च शब्द ते अर्थ इक्कै दर्जे दे होंदे न, नां कोई घट्ट होंदा ऐ ते नां कोई बद्ध। शैल साहित्य च नां गै जरूरत कोला ज्यादा शब्द होंदे न ते नां गै घट्ट शब्दें दा जरूरत कोला जादा अर्थ होंदा ऐ। इक शब्द दा दुए शब्द कन्नै ते इक अर्थ दा दुए अर्थ कन्नै बनकदा मेल गै साहित्य होंदा ऐ। साहित्य उ'ऐ होंदा ऐ जेहदे च शब्द ते अर्थ इक-दुए कोला बक्ख-बक्ख सेही होने पर बी पढ़ने आहलें दे मनें च खुषी ते नंदै दे भावें गी जन्म दिंदे न।

साहित्य समाजी जीवनै गी अपने अंदर ब'न्नने दा जतन करदा ऐ। अस अपने आलै-दुआलै जे किष दिक्खने-सुनने आं जां महसूस करने आं, ओहदे करी साढ़े मनै च केई चाल्ली दे भाव-विचार जन्म लैंदे न। जेकर कोई लेखक जिस गल्ला गी जि'यां दिखदा जां महसूस करदा ऐ, उसी उ'आं गै साहित्य च तुआरी दिंदे ऐ उस साहित्य गी 'यथार्थवादी' आखेआ जंदा ऐ।


ललित कलाएं च साहित्य बी इक कला ऐ। भाशा राहें साहित्य च अभिव्यक्ति कीती जंदी ऐ, पर हर चाल्ली दी भाषा राहें अभिव्यक्ति गी साहित्य नेई आखदे। साहित्यकार अभिव्यक्ति राहें अनुभूति गी पाठकं तगर पुजांदा ऐ। ओह जिस रूपै च जीवन गी दिखदा ऐ, भोगदा ऐ जां महसूस करदा ऐ, उसी ओह कला-भरोचे ढंगै कन्नै प्रगट करदा ऐ। अनुभूति गी प्रगट करने आस्तै ओह भाव-भरोची भाषा आमतौरै पर प्रतीकात्मक होंदी ऐ। माहनु च जेहड़े भाव ते विचार पैदा होंदे न, जेहड़ी अनुभूति उसी होंदी ऐ, उ'नेंगी प्रगट करने दी लालसा जां खिच्च गै साहित्य गी जन्म दिंदी ऐ ते भाषा साहित्य दा माध्यम ऐ। अपनी खुषी-गमी, सुख-दुख, नंद ते बेदना गी शब्दें च प्रगट करियै ते एहदे च दुएं गी शरीक बनाने दी भावना कन्नै ग साहित्यकार साहित्य दी सिरजना करदा ऐ।

बक्ख-बक्ख विद्वानें अपने-अपने शब्दें च साहित्य दी परिभाषा दिती दी ऐ :-

1. "रस भरोचा वाक्य गै साहित्य होंदा ऐ।"

(आचार्य विश्वनाथ)

2. "सहित शब्द कन्नै साहित्य दे मिलने दा इक भाव दिक्खेआ जाई सकदा ऐ। ओह छड़ा भाव, भाव दा; भाषा, भाषा दा; ग्रंथ, ग्रंथ दा गै मेल नेई बल्के मनुक्खै, मनुक्खै दा; बीते दे समें दा अज्जै दे समें कन्नै, दूरै दा नेड़े कन्नै बड़ा नजदीकी डूहगा मिलन बी ऐ, जेहड़ा साहित्य बगैर होर कुतै मुमकन नेई।" (रवीन्द्रनाथ टैगोर)
3. "शब्दार्थ दा साहित्य जां सहभाव साहित्य ऐ।" (भामह)
4. "साहित्य जीवन दा कलात्मक चित्रण ऐ।" (क्रोचे)
5. "शब्द साहित्य दा शरीर न ते अर्थ उसदी आत्मा। दौनें दा मेल जरूरी ऐ।" (कारलाइल)
6. "साहित्य भाषा दा उच्चतम रूप ऐ।" (कालरेज)
7. "साहित्य इक मनै गी दुए मनै कन्नै जोड़ने दा साधन ऐ।" (टालस्टाय)
8. "सुंदरता ते मनोरंजन दे बिना साहित्य इ'यां गै जि'यां कषबोई बिजन फुल्ल।" (स्टीफन मैहयरम)
9. "भावें गी, आखने दी इक चतराई—पूर्ण ते रोचक बांकपनै कन्नै दस्सना साहित्य ऐ। (कुन्तक)
10. "समाजै दे मानसक ते बौद्धिक विकास गी काव्य दी शैली च आखना लिखना गै साहित्य ऐ।" (क्रिस्टोफर कॉडविल)



साहित्य दे रूप—सरूप गी मुख तौरा पर द'ऊं रूपें च बंडेआ जाई सकदा ऐ। पद्य ते गद्य एह दमें रूप इक किस्मै दे साहित्य दे शरीर न। 'पद्य' शब्द संस्कृत भाषा दी पद् धातु थमां बने दा ऐ ते 'गद्य' शब्द गद् धातु थमां। गद्य थमां पद्य च संगीत दी मात्तरा मती होंदी ऐ जिस करी एहदे च नियम ते नाप तोल बगैरा दी प्रधानता होंदी ऐ। एहदे च संगीत दा गुण मता होने करी सुनने च मता आनंद प्राप्त होंदा ऐ। 'पद्य' ते 'गद्य' एह दो लेखन शैलियां न। सुर, ताल, लय च बज्झी दी भाषा दा इस्तेमाल लोक, आम जीवन च नेई करदे। इस करी एह गल्ल बड़ी साफ ऐ जे गद्य दा सरबंध मानव जीवन कन्नै बड़ा पराना ऐ। प्राचीन समें च साहित्य मूंह जबानी रचेआ जंदा हा ते मूंह जबानी गै चेता कीता जंदा हा। मूंह—जबानी चेतै करने आस्तै पद्य शैली गै सखल्ली ते मनोरंजन रौहदी ऐ। पद्य अर्थात् छंदें च बज्झी दी रचना दा रूप सरूप गिने—मिथे दा होंदा ऐ; ओहदा सुर—ताल बड़ा टकोहदा होंदा ऐ। इस करी श्रोता उसी सुनियै ते जबानी चेतै करी लैंदा ऐ। इसै करी प्राचीन साहित्य मता सारा पद्य च गै नजरी औंदा ऐ।

गद्य ते पद्य च इक टकोहदा फर्क एह ऐ जे गद्य दे मकाबले च पद्य च भाव—तत्त्व दी प्रधानता होंदी ऐ। गद्य बचार—प्रधान गल्लें आस्तै जि'न्दे च बुद्धि—तत्त्व दी प्रधानता होंदी ऐ, मता रास औंदा ऐ। दौनें च बुनियादी फर्क इ'यै। गद्य च ताल—लय दी ओह पाबंदी नेई जेहड़ी पद्य च होंदी ऐ ते पद्य च भाव—तत्त्व बुद्धि—तत्त्व कोला सरोखड़ ऐ।

साहित्य दा मान—मुल्ल गद्य च होने जां पद्य च होने करी घटदा—बधदा नेई। साहित्य दौनें रूपें च लिखेआ गेआ ऐ ते अज्ज बी लखेआ करदा ऐ। गद्य च बी ते पद्य च बी। साहित्य दे गै अंदर दौनें शैलियें गी बरतने आस्तै खेतरें दी बंड बड़ी टकोहदी ऐ।

साहित्य च पद्य विद्या दा इस्तेमाल बड़ा आम होंदा ऐ। शुरू च बषक्क साहित्य च ज्ञान—विज्ञान, दर्शन, राजनीति आदि आस्तै बी पद्य गै बरतोआ पर समें दे कन्नै—कन्नै जि'यां—जि'यां जीवन ने विकास करना शुरू कीता उ'आं—उ'आं गै साहित्य दे एह दमै रूप बी बक्खरे होंदे गे। ते पद्य विद्या दे अंतर्गत कविता, गज़ल, गीत, दोहे, चमुखे, सवैया, छंद आदि रूप सामनै आए ते गद्य विद्या दे अंतर्गत कहानी, उपन्यास, नाटक, निबंध ते आलोचना आदि दा रूप प्रगटोंदा लब्धा।

साहित्य जीवन दी परछाईं ऐ। साहित्य साढ़ी आत्मा दी खराक ऐ। साहित्य साढ़े मनै चा हीन भावना गी कड़्ढी दिंदा ऐ ते जीवन पर भरोसा करना सखांदा ऐ। साहित्य असेई जीने दा ढंग सखांदा ऐ। साहित्य आदमी गी बोलने-बरतने दी सुशीलता सखांदा ऐ दुएं कन्नै रौहने-बौहने दा ढंग सखालदा ऐ। मनुक्खी समाज ते जीवन च जिस चाल्ली दे बी बदलाऽ औंदे गे साहित्य ने बी उस प्रभाव गी ग्रैहण करदे होई विकास दी बत्ता पर अगड़ी गैं बधाई। शुरुआती समें च बषक्क साहित्य दे मुख तौरा पर दो रूप गैं सामनै आए पर अज्ज एह केई रूपें च प्रगटोंदा लब्बदा ऐ।

13.3.2 साहित्य ते समाज दा आपसी केह सरबंध ऐ?

जां

साहित्य ते समाज इक दुए पर निर्भर न इनें दौनें दे आपसी सरबंध दे आधार पर अपने विचार प्रस्तुत करो ?

साहित्य समाज दा दर्पण ऐ, समाज दा प्रतिबिंब ऐ। समाज दा मार्गदर्शक ऐ ते समाज दा लेखा-जोखा ऐ। कुसै बी राष्ट्र जां सभ्यता दी जानकारी उसदे साहित्य लोक जीवन दा अभिन्न अंग ऐ, कुसै भी काल दे साहित्य थमां उस समें दी परिस्थितियें, जनमानस दे रैहने-सैहने, खान-पान ते अन्य गतिविधियें दा पता चलदा ऐ। समाज साहित्य गी प्रभावत करदा ऐ ते साहित्य समाज पर प्रभाव पांदा ऐ। एह द'वै इक्कै सिक्के दे दो पहलू न। साहित्य दा समाज कन्नै उ'ऐ सरबंध ऐ जेहड़ा सरबंध आत्मा दा शरीर कन्नै होंदा ऐ। साहित्य समाज रूपी शरीर दी आत्मा ऐ, साहित्य अजर-अमर ऐ, इक महान् विद्वान 'योननागोची' दे अनुसार समाज नष्ट होई सकदा ऐ, राष्ट्र भी नष्ट होई सकदा ऐ पर साहित्य दा नाश कदें भी नेई होई सकदा।

'साहित्य' शब्द दी व्युत्पत्ति 'सहित' शब्द कन्नै होई दी ऐ। 'सहित' शब्द दे दो अर्थ होए न – 'स' अर्थात् 'कन्नै-कन्नै' ते 'हित' अर्थात् 'कल्याण'। इस दृष्टि कन्नै साहित्य शब्द थमां एह अभिप्राय होआ जे साहित्य इक ऐसी लिखत समग्री ऐ जिसदे शब्द ते अर्थ च लोकरहित दी भावना सन्निहित रौहदी ऐ। अर्थ आस्तै विस्तारपूर्वक लिखत समग्री दे साहित्य शब्द दा प्रयोग प्रचलत ऐ जि'यां इतिहास-साहित्य, राजनीति साहित्य, विज्ञान साहित्य, पत्र साहित्य बगैरा। इस चाल्ली साहित्य ते समाज दा कदें नेई त्रुटने आह्ला सरबंध ऐ। समाज दी गतिविधियें थमां साहित्य म्हेषा प्रभवत होंदा ऐ। साहित्यकार समाज दा चेतन ते जागरुक प्राणी होंदा ऐ। ओह समाज दे प्रभाव थमां अछूता नेई

रेहियै उसदा अभिन्न अंग होंदा ऐ। इस आस्तै ओह समाज दा कुषल चित्रकार होंदा ऐ। उसदे साहित्य च समाज दा बिंब—प्रतिबिंब रूप लभदा ऐ।

माहनू समाजी जीव ऐ। कन्नै ओह बचारपील बी होंदा ऐ। इस्सै करी अपने समाजै दा ओहदे उपपर प्रभाव पौंदा ऐ। इस्सै चाल्ली साहित्य दा बी। समाजी कठनाइयें कोला छुड़कने दा रस्ता उसी साहित्य गै दसदा ऐ। हर युगै च लखोए दे साहित्य च, उस समें दे समाज दी ते लोकें दे सुखै—दुखै दी तस्वीर लब्धी जंदी ऐ। उंदी आषा—नराषा, उंदी सगोसारी—निगोसारी ते उंदियें तांहगें दा रूप उस समें दे साहित्य दे शीषे च टकोहदा लब्धी जंदा ऐ। इस चाल्ली आखेआ जाई सकदा ऐ जे साहित्य ते समाज आपूं बिच्चें बज्झो दे होंदे न।

साहित्य मनोरंजन बी करदा ऐ, पर छड़ा मनोरंजन करना साहित्य दा मकसद नेई होंदा। साहित्य जीवन दी गम्भीरता च झांकने दा रस्ता ऐ पर एहदे आस्तै साहित्य पढ़ने आहलें च बी जीवन गी जानने बारै इक तांहग होनी जरूरी ऐ।

राष्ट्रकवि मैथिलीशरण गुप्त दे शब्दें च — “सिर्फ मनोरंजन न कवि दा कर्म होना चाहिदा उस च उचित उपदेश दा भी मर्म होना चाहिदा।”

साहित्यकारें साहित्य गी लेइयै अपने विचार व्यक्त कीत दे न। आचार्य रामचंद्र शुक्ल ने ‘साहित्य गी जनता दी चित्तवृत्ति दा संचित प्रतिबिंब’ मन्नेदा ऐ। महावीर प्रसाद द्विवेदी ने ‘साहित्य गी ज्ञानराषि दा संचित कोष’ गलाए दा ऐ। पंडित बाल कृष्ण भट्ट ने ‘साहित्य गी जन समूह दे मनै दा विकास’ मन्ने दा ऐ।

माहनू सभ्यता दे विकास च साहित्य दा म्हत्त्वपूर्ण योगदान रेहा ऐ, विचारें साहित्य गी जन्म दिता ते साहित्य ने माहनू दी विचारधारा गी गतिशीलता प्रदान कीती, उसगी सभ्य बनाने दा कम्म कीत्ता, माहनू दी विचारधारा च परिवर्तन आहनने दा कम्म साहित्य द्वारा गै कीत्ता जंदा ऐ। कुसै भी राष्ट्र जां समाज च अज्ज तगर जिन्ने भी परिवर्तन आए, ओह साहित्य दे माध्यम राहें गै आए, साहित्यकार समाज च फैली दियें कुरीतियें, विसंगतियें, विकृतियें, अभावें, असमानताएं आदि दे बारे च लिखदा ऐ। इंदे प्रति जनमानस गी जागरुक करने दा कम्म करदा ऐ। साहित्य जनहित आस्तै होंदा ऐ।

माहनू गी जन्म थमां लेइयै मृत्यु तगर जीवन दे हर खेतर च समाज दी जरूरत पौंदी ऐ। माहनू समाज दा इक अंग ऐ, जीवन च माहनू दे कन्नै केह होआ करदा ऐ, उसी साहित्यकार शब्दें च रचियै साहित्य दी रचना करदा ऐ, अर्थात् साहित्यकार जेहड़ा दिखदा ऐ, अनुभव करदा ऐ, चितन करदा ऐ, विष्लेषन करदा ऐ उसगी कलमबद्ध करदा ऐ। साहित्यकार साहित्य दी रचना करदे समें अपने विचारें ते कल्पना गी बी सम्मिलित करदा ऐ। जिनें समाजें च लिखित साहित्य दी पिरत नेई पेई दी ऐ उत्थे बी लोक साहित्य जिंदे च लोक गीत, लोक-कथां, गाथां, कारकां, बारां आदि राहें साहित्य समाजिक देनदारियें गी नभाऽ करदा ऐ। साहित्य दा मुल्ल इस्सै गल्लै च ऐ जे उस च लोकें दियें भावनाएं दा चित्रण किन्नी सफलता कन्नै होए दा ऐ ते पढ़ने आहली जनता पर उसदा किन्ना प्रभाव पवा करदा ऐ। साहित्य समाजिक जीव माहनू गी स्हेई मायने च समाजिक जीव होने दा एहसास करोआंदा ऐ। उसगी उसदे समाजिक कर्तबबै बारै सोहगा करदे होई ओहदे अधिकारें बारै बी सचेत करदा ऐ। स्हेई मायने च साहित्य गै समाज दे चित्रण दा निर्माण करदा ऐ।

साहित्य ते समाज दा आपूं चे बड़ा गूढ़ा सरबन्ध ऐ। साहित्य ते समाज दोऐ कदम कन्नै कदम मलाइयै चलदे न। समाज दे बगैर साहित्य दा सृजन संभव नेई। समाज दा चित्रण गै साहित्य च होंदा ऐ। साहित्य दे अधार पर गै समाज दा परिवर्तन होंदा ऐ। साहित्य आस्तै साधन ते समाज गै ऐ। साहित्य च व्यक्त चित्रण समाज दा गै प्रतिबिंब होंदा ऐ। साहित्य दा उद्देश्य समाज दा हित साधदे होई उन्नति दे मार्ग पर लेई जाना ऐ। साहित्यकार समाज दा प्रतिनिधित्व करदा ऐ ते समाज गी विचार प्रदान करदा ऐ।

13.4 अभ्यास आस्तै सुआल

1. साहित्य दे रूप-सरूप पर विस्तारपूर्वक चर्चा करो।
2. साहित्य ते समाज इक दूए दे पूरक न। उदाहरणें समेत इस मत दी पुष्टी करो।

डोगरी साहित्य चर्चा पर आधारित सोआल

रूपरेखा

14.1 उद्देश्य

इस पाठ के अंतर्गत कविता के कल्पना के संबंधों के विद्यार्थियों की मनोतुष्टि की शांत करना मुख्य उद्देश्य है। तां के विद्यार्थी कविता के कल्पना के मूल अर्थ की समझी सकने के सक्षम होई सकन।

14.2 पाठ-परिचय

इस पाठ के कविता के परिभाषा के तत्त्व के इलावा साहित्य के कल्पना की जरूरत के संबंधी जानकारी प्रस्तुत कीती गेदी है।

14.3 पाठ-प्रक्रिया

14.3.1 कविता के परिभाषा के उससे तत्व।

14.3.2 कल्पना के साहित्य के आधार।

14.3.1 कविता की युक्ति परक परिभाषा के होई उससे तत्त्व पर लोऽ पाओ ?

कविता के माहनु के भावों की रक्षा होती है। सृष्टि के पदार्थ के व्यापार-विशेष की कविता इस चाली व्यक्त करदी है जि'यां ओह पदार्थ के व्यापार विशेष अखियें सामने नचन लगदे न। उंदी उत्तमता के अनुत्तमता के विवेचन करने के बुद्धि के मां के लेने की जरूरत नेई पौंदी। कविता की प्रेरणा के मां के मनोवेगों के प्रवाह के जोरें के मां के बगन लगदे न। आखने के मतलब है के कविता के मनोवेगों की उत्तेजित करने के एक उत्तम साधन है। केकर क्रोध, करुणा, दया, प्रेम आदि के मनोभाव माहनु के अंदर निकली जान तां ओह किश बी नेई करी सकदा। कविता के मां के मनोभावों की उच्छवासित करिये

साढ़े जीवन च इक नमां जीवन पाई दिंदी ऐ। अस सृष्टि दे सौंदर्य गी दिक्खियै मंत्र-मुग्ध होई जन्नेआं।

कविता दा सरबंध मनै कन्नै होंदा ऐ ते मनै दी कोई निश्चत हद्द नेई होंदी।

भारती विद्वान

1. “जिस चाल्ली आत्मा दी मुक्तावस्था ज्ञान-दषा खोआंदी ऐ, उससै चाल्ली हिरदे दी मुक्तावस्था रस-दषा खोआंदी ऐ। हिरदे दी इससै मुक्ति दी साधना आस्तै माहनू दी वाणी जेहड़ा शब्द विधान करदी आई ऐ उसी कविता आखदे न।” (आचार्य रामचन्द्र शुक्ल)
2. “दिब्ब ज्ञान ते आनन्ददायक शब्द-अर्थ दे रूप च आत्मा दे प्रगट होने गी कविता गलाए दा ऐ।” (डा. आनन्द शंकर ध्रुव)
3. “कवि दी भाव-प्रधान मानसक प्रतिक्रियाएं दी संसार दे प्रति कल्याण गी प्रियरूप देने आहली अभिव्यक्ति काव्य ऐ।” (बाबू गुलाबराय)
4. “कविता ओह रचना ऐ जेहड़ी स्हाड़े मनै गी छूहियै रोमंचत करी जा।” (रवीन्द्रनाथ टैगोर)
5. “रसै कन्नै भरोची दी रचना कविता ऐ।” (विश्वनाथ)
6. “आत्मा दी अनुभूति गै काव्य ऐ।” (जयशंकर प्रसाद)
7. “कविता च जेहड़े त्रै मुख्य गुण होने लोड़चदे न, ओह न – सादगी, असलियत ते जोश।” (महावीर प्रसाद द्विवेदी)

पञ्चमी विद्वान

1. “भाव पक्ख गी प्रधानता दिंदे होई कविता गी शांति दे समें च कठेरे गेदे सशक्त भावें दा हिरदे थमां आपमुहारा उस्सरने आह्ला प्रवाह आक्खे दा ऐ।” (वर्ड्सवर्थ)
2. “कविता सच्चाई ते परसन्नता गी रलाने दी कला ऐ जिस च बुद्धि दी मदाद लेई कल्पना दा प्रयोग कीता जंदा ऐ।” (डा. जॉनसन)
3. “कविता गी सादा ते रागात्मक होना चाहिदा ऐ।” (मिल्टन)
4. “कविता च भावतत्व दा मता ते बुद्धितत्व दा घट्ट होना जरूरी मनदे न।” (हाऊसमैन)
5. “कविता आनंद दा रूप ऐ।” (शैले)

6. "सन्हाकड़े शब्दें दा सरोखड़ क्रम च होना गै कविता ऐ।" (कालरेज)
7. "कविता जीवन दी आलोचना ऐ।" (मैथ्यू आर्नल्ड)
8. "साहित्य जीवन दे मुल्ल बनांदा ऐ ते विज्ञान उ'नें गी पूरा करने दी शक्ति दिंदा ऐ।" (जूलियन हक्सले)

डोगरी भाशा दियें कविताएं च बी असेंगी कविता दियां किष परिभाषां मिलदियां न। कविता दे भाव पक्ख पर बल दिंदे होई केहरी सिंह मधुकर होरें गलाए दा ऐ जे मनै दी हिरखी भावें दा प्रगटीकरण गै कविता ऐ। प्रो. रामनाथ शास्त्री होरें कल्पना तत्व गी प्रमुख मनदे होई कविता गी गासे दे सैलें दी तलबगार गलाए दा ऐ। वेदपाल दीप होरें कविता गी शब्दें दा अर्थवान प्रयोग आक्खे दा ऐ।

काव्य दे सरूप ते उसदी परिभाषा पर बचार करदे होई काव्य दे केई तत्व — सौंदर्य, कला, कल्पना, भाषा-शैली भाव आदि पर लोऽ पाई दी ऐ। काव्य-साहित्य दे मूल चार तत्व न :-

1. भाव तत्व
2. बुद्धि तत्व
3. शैली तत्व
4. कल्पना तत्व

1. भाव तत्व

मनुक्ख अपने भावें दे कारण गै जनौरे कशा बक्खरा ऐ। प्रेम, घृणा, करुणा, क्रोध आदि भावें कन्नै सांझ होने कारण गै ओह बाकी मनुक्खै कन्नै भावात्मक सरबंध स्थापत करदा ऐ। कविता च भाव-तत्व दी अहम भूमिका ऐ की जे इसदे राहें कवि सूक्ष्म थमां सूक्ष्म भावें गी लेइयै बी साहित्य रचना करी सकदा ऐ। भावें दे राहें गै मनुक्ख कल्याण च अपना कल्याण दिखदा ऐ। काव्य च भाव-तत्व दी सफलता आस्तै भाव सरबंधी त्रै निजम महत्त्वपूर्ण :-

1. **भाव-उदात्तता** — काव्य च उदात्त भावें दा गै चित्र-वचित्र प्रयोग होना चाहिदा। भावें दी जिन्नी उदात्तता होग, उ'न्नी गै रचना महान् होग। उदात्त भाव गै उदात्त रसानुभूति करांदे न।

2. **भाव—गहनता जां भाव तीव्रता** — काव्य च भावें दी तीव्रता होना भी जरूरी ऐ। रस—शास्त्र च इसगी भाव गलांदे न।

3. **भाव—विस्तार जां भाव—वैविध्य** — काव्य च इकरसता गी बचाने आस्तै भावें दी विविधता बड़ी जरूरी ऐ।

उप्पर बखाने गेदे त्रै निजमें दा निर्वाह गै श्रेष्ठ ते महान् साहित्य दी उपलब्धि करांदा ऐ।

2. बुद्धि तत्व

बुद्धि तत्व जां विचार तत्व साहित्य गी विचार—सम्पदा प्रदान करदा ऐ। कलाकार दा कोई वषिष्ट उद्देश्य होंदा ऐ, जीवन दी कुसै विशेष विचार—दृष्टि गी ओह् प्रतिपादित करना चाहदा ऐ, कोई विषय संदेश देना चाहदा ऐ। इससै उद्देश्य आस्तै ओह् अपने विचारें गी काव्य च अभिव्यक्त करदा ऐ। मनुकखै दी उन्नति दा प्रमुख कारण उसदी बुद्धि ऐ। बुद्धि तत्व दे स्हारै गै अज्ज इंसान ने तरक्की दियां मंजला तैऽ कीती दियां न। जित्थूं तोड़ी कविता सिरजना च बुद्धि तत्व दा सोआल ऐ तां कवि इससै दे राहें अपने मनै दे सूक्ष्म भावें गी शब्दें दा चोला पोआई सकने दी समर्थ रखदा ऐ।

3. शैली तत्व

भाव तत्व आह्ला लेखा शैली तत्व भी काव्य—साहित्य दा मूल तत्व ऐ। भाव आत्म—तत्व ऐ तां शैली शरीर तत्व। शब्द ते अर्थ इ'यां ते सभनें दी सांझी सम्पत्ति होंदे न पर साहित्यकार उनेंगी ऐसे मार्मिक रूप च प्रस्तुत करदा ऐ जे पाठक प्रभावत होई गै जंदा ऐ। जिस चाल्ली भाव अभिव्यक्ति माहनू दी सहज प्रवृत्ति ऐ उससै चाल्ली अपनी अभिव्यक्ति गी सुंदर चमत्कारपूर्ण, प्रभावशाली ढंगै कन्नै प्रगट करना भी उसदी स्भावक इच्छा होंदी ऐ।। इससै थमां साहित्य च कलात्मक शैली दी उत्पत्ति होंदी ऐ अर्थात् शैली च कलात्मकता दा समावेश होंदा ऐ। जिस चाल्ली स्वस्थ आत्मा दे होंदे होई बी बाहरले शारीरिक आकर्षण, सौंदर्य, स्वच्छता दी जरूरत होंदी ऐ, उससै चाल्ली काव्य च भाव—तत्व रौहदे होई बी शैली दी कलात्मकता 'सुन्ने पर सुहागा' दा कम्म करदी ऐ।

4. कल्पना तत्व

‘कल्पना’ शब्द अंग्रेजी के Imagination का पर्याय है। ‘इमेजीनेशन’ का अर्थ है काल्पनिक। कल्पना शक्ति कन्नै बी कवि सधारण घटनाएं गी असधारण बनाई दिंदा ऐ। कल्पना गै कवि दी सृजन-शक्ति ऐ। कवि कष जे किष नेई होंदा जां जिस वस्तु गी ओह हासल नेई करी पांदा, उसदी ओह कल्पना करी लैंदा ऐ। कल्पना के राहें गै कवि कुसै शैल वस्तु ते भाव दी अनुभूति करी सकदा ऐ।

काव्य के उप्पर दिते गेदे चारें तत्वें का आपस च गूढ़ा सरबंध ऐ। कल्पना, शैली ते विचार तत्व मूल रूपै च भाव-तत्व दी श्रेष्ठ सिद्धि च गै सहायक होंदे न। कल्पना भाव गी पुष्ट करदी ऐ, उसदी नमी-नमी समग्री कट्ठी करदी ऐ, नमें-नमें चित्र उपस्थित करियै भाव ते कला दौनें गी बल दिंदी ऐ। कवि अपने मनै के भावें गी अपनी बुद्धि के स्हारें कल्पना दी चासनी च गलेफियै प्रस्तुत करदा ऐ तां जे उसदी अभिव्यक्ति यथार्थ का एहसास करोआई सकै।

14.3.2 कल्पना थमां केह अभिप्राय ऐ। साहित्य च कल्पना का थाहर दस्सदे होई उसदे रूपें बारै चर्चा करो ?

साहित्य सिरजना च कल्पना का मकाम बड़ा टकोहदा ते लाजमी ऐ। एह ओह शक्ति ऐ जेहड़ी अतीत, वर्तमान ते भविष्य च सामापन बनाई रखदी ऐ। कल्पना शब्द कल्प+अन्+आ के जोग कन्नै बने का ऐ जिसका अर्थ ‘सरिष्टी करना’ जां ‘मिथी लैना’ होंदा ऐ।

असल च कल्पना भावें दी दासी ऐ। एहदे राहें गै कवि जां कलाकार अपने मनै के भावें गी इन्ने शैल ढंगै कन्नै प्रस्तुत करदा ऐ जे पाठके के मनं च बी उ’ऐ जनेह भाव जागृत होई जंदे न। असल च कल्पना कवि दी सूक्ष्म बुद्धि दी डोआरी होंदी ऐ जेहदे जोरें कवि लोक-परलोक तगर होई औंदा ऐ। इक कवि दी कल्पना जिन्नी उच्चै ते सभावक होग ओहदी रचना उन्नी गै उत्तम ते सराहने जोग बनी सकग। कल्पना शक्ति इक कवि गी छड़े नमें बचार ते शब्द गै नेई सुझांदी, उसी जीवन के केई डूहगे भेतें का पता बी दिंदी ऐ ते इस्सै मूजब कवि लोक ऐसियां-ऐसियां गूढ़ ज्ञानै दियां गल्लां आखी जंदे न, नेहियां भविष्य-बाणियां करी जंदे न जे आम लोक उ’नेंगी पढ़ियै दंग रेही जंदे न।

कल्पना असलै च सूक्ष्म बुद्धि ऐ जेह्दी मदद कन्नै बगैर कुसै तर्क जां दलील दे सच्चाई तगर पुज्जेआ जाई सकदा ऐ। अपनी कल्पना शक्ति दे राहें साहित्यकार नमें भाव ते नमें बचारें गी जन्म दिंदा ऐ। ओह एह्दे मूजब अपनी भाशा च बी चमत्कार पैदा करदा ऐ। कवियें—लेखकें गी कोई इक घटना जां गल्ल, इक खास ढंगा कन्नै प्रभावत करदी ऐ। प्रभावत करने आहली घटना गी ओह अपनी कल्पना दे जोरें नमें मोड़ दिंदा ऐ। उस कहानी जां घटना दे पात्रें गी अपने खास ढंगा कन्नै समझाने ते चित्रन दी कोशिश करदा ऐ। ते खास गल्ल एह् ऐ जे पात्रें दे ओह सब्भै रूप असेंगी सच्चे जींदे—जागदे ते कुदरती सेही होंदे न। असल च मनुक्खी जीवन इक समुंदरै आंगर ऐ जिस च कवि ते साहित्यकार डुब्की लाइयै उसदे अंदर छप्पे दे अनमोल मोती तुप्पी टकांदे न। ते फही उ'नें भावें रूपी मोतियें गी कल्पना राहें प्रस्तुत करदे न।

कल्पना शक्ति कवि गी सिर्फ नमें—नमें भाव, बचार ते शब्द गै नेई दिंदी ओह ओह्दी रचना—शैली पर बी बड़ा प्रभाव पांदी ऐ। शैली दे इ'नें बक्खरे—बक्खरे रूपें लेई बी कवि ते साहित्यकार दी कल्पना गै मती जिम्मेवार होंदी ऐ पर इक गल्ल एह् बी ध्यान देने जोग ऐ जे उ'नें रचनाएं च यथार्थ ते कल्पना दा इक संतुलन होना चाहिदा ऐ।

‘कल्पना’ दियां किश परिभाषां प्रस्तुत न :-

1. “जेह्ड़ी शक्ति विज्ञान च बुद्धि ते दर्शन च द्रिष्टी दा कम्म करदी ऐ, उ'ऐ कविता च कल्पना दा।”
(डा. श्याम सुंदर दास)
2. “कल्पना ओह शक्ति ऐ जेह्दे राहें अस अनदिक्खियें चीजें दे चित्तर मनै च बनाई लैने आं।”
(डा. गुलाब राय)
3. “कल्पना सभनें शा बड्डी सच्चाई ते परमात्मा दी प्रतिभा दा प्रमुख हिस्सा ऐ।”
(शेक्सपीयर)
4. “कल्पना इक जादुई शक्ति ऐ जेह्ड़ी पाठक गी चानचक्क प्रभावत करी लैंदी ऐ।”
(वहीद कुरेष्ी)
5. “कल्पना मानसक कौशल ऐ।”
(बुडवर्थ)

साहित्यकारें कल्पना दे मुख तौरा पर त्रै रूप मन्ने दे न :-

1. मेल कराने आहली कल्पना
2. रचनात्मक कल्पना
3. ज्ञान कराने आहली कल्पना।

1. मेल कराने आहली कल्पना

इस कल्पना राहें कवि बख-बख चीजें गी इक थाहरै पर किट्ठा करियै उनें गी इक लड़ी च परोई ओड़दा ऐ। इस शक्ति राहें कवि लखें क्रोहें दी दूरी पर पेदियें बख-बख चीजें गी किट्ठा करने दी सकत रखदा ऐ। मसाला दे तौरे पर कवि जिसलै कुसै खूबसूरत नारी दी कल्पना इक चन्नै कन्नै करदा ऐ तां उत्थै उसदी कल्पना शक्ति कम्म करदी ऐ। इस चाल्ली मेल कराने आहली कल्पना राहें कवि बख-बख चीजें गी इस चाल्ली किट्ठा करदा ऐ जे चीजां बख-बख होंदे होई बी रिष्ठे च बन्होई दियां लभदियां न ते उंदे च कोई ओपरापन नेई बझोंदा।

2. रचनात्मक कल्पना

कल्पना दे जिस रूप कन्नै कवि अपनी रचना दी सिश्टी करदा ऐ, जेहदे कन्नै ओह अपने भावें ते द्रिष्टीकोण गी नमीं भाषा दिंदा ऐ, जेहदे कन्नै ओह बे-जान चीजें च जान पांदा ऐ ते इ'यां ओह कम्म करी दसदा ऐ जेहड़ा इस दुनिया च ईश्वर गै करी सकदा ऐ, उस कल्पना शक्ति गी 'रचनात्मक कल्पना' आखने आं। एह शक्ति कवि गी नमें भाव, नमीं भाषा ते नमियां सोचां गै नेई सुझांदी, बल्के उसी अपनी रचना लेई नमां रूप बी सुझांदी ऐ।

3. ज्ञान कराने आहली कल्पना

कल्पना दा एह रूप कवि गी ओह शक्ति दिंदा ऐ जेहदे कन्नै ओह जानू-पछानू चीजै गी इक नमीं नजरा कन्नै दिखदा ऐ ते उंदे नमें-नमें अर्थ लांदा ऐ। इस शक्ति करी कवि पुरानेपनै च इक नवीनता तुप्पी लैंदा ऐ ते मनुक्खी मना दे आम भावें गी इक नमां रूप देइयै इक चमत्कार जन पैदा करी दिंदा ऐ। कल्पना दे इस रूपा करी कवि पुराने प्रतीकें गी नमें अर्थ दिंदा ऐ ते अपनियें अनमेल

सोचें गी पुराने प्रतीकें जरिये व्यक्त करदा ऐ। रूपक ते प्रतीकात्मक रचना इस्सै कल्पना शक्ति दी देन न। रहस्यवादी साहित्य च इस कल्पना शक्ति दी मती बरतून होई दी मिलदी ऐ।

कल्पना शक्ति इक ऐसी शक्ति ऐ जिस दे अभाव च साहित्य सिरजना दी उम्मीद करी पाना बड़ा औखा ऐ। कल्पना दे मिश्रण राहें गै इक रचनाकार अपने जीवन च भोगे दे यथार्थ गी अपनी रचनाएं च स्भावक ढंगै कन्नै आहनी सकदा ऐ।

14.4 अभ्यास आस्तै सुआल

1. कविता दा अर्थ स्पष्ट करदे होई, इसदे तत्वे पर रोशनी पाओ।
2. कल्पना दे प्रकारें पर नोट लिखो।

B.A. Sem-III (Poetry)	DOGRI	UNIT-III LESSON No. 15
--	--------------	---

डोगरी साहित्य चर्चा पर आधारित सोआल

रूपरेखा

15.1 उद्देश्य

इस पाठ दे तैहत विद्यार्थियें गी प्रबंध काव्य ते श्रव्य काव्य सरबन्धी जानकारी प्राप्त करवाना मुख्ख उद्देश्य ऐ। तां जे विद्यार्थी इ'नें विधाएं सरबन्धी पुच्छे गेदे सुआलें दे परते देई पाने च सक्षम होई सककन।

15.2 पाठ—परिचे

इस पाठ च प्रबंध काव्य दे अर्थ ते भेदें—प्रकारें दे इलावा श्रव्य काव्य दे सरबन्धे च बी जानकारी दिक्ती गेदी ऐ।


15.3 पाठ—प्रक्रिया

15.3.1 प्रबंध काव्य अर्थ ते भेद।

15.3.2 श्रव्य काव्य।

15.3.1 प्रबंध काव्य दा अर्थ स्पष्ट करदे होई उसदे भेदें—प्रकारें बारै तफसीली जानकारी देओ?

प्रबंध काव्य साहित्य दी इक विधा ऐ। प्रबंध काव्य च कोई मुख्ख कथा काव्य दे शुरू थमां खीर तगर इक क्रमबद्ध रूप च चलदी ऐ। कथा दा क्रम बिच कुतै बी नेई त्रुट्टदा ते गौण कथा बिच—बिच सहायक बनियै औंदियां न। प्रबंध काव्य दे मुख्ख तौरा पर त्रै भेद कीते जंदे न — महाकाव्य, खण्डकाव्य ते एकार्थ काव्य।



महाकाव्य

महाकाव्य वृहदाकार ते विस्तृत खेतर आह्ला काव्य होंदा ऐ जिसदे अंतर्गत मनुक्खी जीवन दी सपूरी झांकी चित्रत होंदी ऐ। कथा सर्ग च विभक्त होंदी ऐ ते चंगी चाल्ली संयोजत होंदी ऐ। महाकाव्य बड्डा काव्य होंदा ऐ। इस च जीवन दी व्यापकता होंदी ऐ। महाकाव्य दे नेकां लक्षण न। उंदे च सभनें थमां प्रसिद्ध ते मान्य मत आचार्य विष्णनाथ दा ऐ। उ'नें अपने साहित्य-दर्पण नांऽ दे ग्रंथ च महाकाव्य दे लक्षण दस्से दे न। उंदे अनुसार महाकाव्य सर्गबद्ध होंदा ऐ। उस च कोई देवता जां उच्च वंष दा नायक होंदा ऐ। शंगार, वीर ते शांत रसें चा कोई इक रस अंगी होंदा ऐ ते बाकी रस उसदे अंग होंदे न। कथा ऐतिहासक जां लोक च प्रसिद्ध होंदी ऐ। शुरू च अशीवाद, नमस्कार दा निर्देश होंदा ऐ। उस च सज्जनें दी प्रशंसा ते दुर्जनें दी निंदा होंदी ऐ। अट्ठ थमां मते सर्ग होंदे न। हर इक सर्ग च इक गै छंद होंदा ऐ पर सर्ग दे खीरै च छंद बदलोई जंदा ऐ। कुतै इक सर्ग च नेकां छंद बी होंदे न। उस च सूरज, चंद्रमा, दिन रात, वन, पर्वत, ब्याह आदि दे विस्तृत वर्णन होंदे न। उसदा नामकरण कवि दे नांऽ कन्नै जां नायक दे नांऽ कन्नै होंदा ऐ। इ'नें सारे लक्षणें गी सुविधा दी द्रिष्टी कन्नै अट्ठ वर्गे च बण्डेआ जाई सकदा ऐ :

1. सर्गबद्धता
2. छन्दबद्धता
3. कथानक
4. नायक
5. रस
6. लक्ष्य
7. वर्णन
8. नामकरण

1. महाकाव्य

‘महाकाव्य’ दा नांऽ लेंदे गै बशक इक महान काव्य दा बोध होंदा ऐ पर महान काव्य ते महाकाव्य च बड़ा भारी अंतर होंदा ऐ। दोनो दी आपो-अपनी स्थिति ऐ। कुसै बी ‘काव्य’ दे कन्नै ‘महा’ शब्द लाई देने कन्नै कोई रचना महाकाव्य नेई बनी जंदी ऐ। कोई बी काव्य रचना अपनी उदात्तता दे कारण महान होई सकदी ऐ। इस थमां एह स्पष्ट होंदा ऐ जे काव्य रचना च स्थापत कीता गेदा काव्य दा कला पक्ख जां भाव-पक्ख उसगी महान काव्य ते बनाई सकदे न, पर महाकाव्य नेई। उदाहरण आस्तै डोगरी च ‘झुल्ल बड़ा देआ पतरा’ महान काव्य ते होई सकदा ऐ पर महाकाव्य नेई। इसदी तुलना च ‘रामायण’ ते ‘बेदन धरती दी’ महान काव्य बी हैन ते महाकाव्य बी। इस थमां स्पष्ट ऐ जे ‘महाकाव्य’ महान काव्य बी होई सकदा ऐ पर महान काव्य महाकाव्य कदाचित नेई होई सकदा। महाकाव्य दा अपना इक बक्खरा रचना-विधान ऐ। इसदे होने कारण गै कोई रचना महाकाव्य खोआई सकदी ऐ ते उसदे नेई होने पर ओह काव्य दा कोई बी रूप होई सकदी ऐ पर महाकाव्य नेई।

‘महाकाव्य’ आस्तै अंग्रेजी च ‘ऐपिक’ (Epic) शब्द बरतोंदा ऐ। “पाश्चात्य समीक्षा च काव्य दे दो मूल विभाग कीते गेदे न — इक ‘विषयी प्रधान (Subjective)’ ते दूआ ‘विषय-प्रधान’ (Objective)। विषयी प्रधान काव्य गै प्रगति काव्य गलाया गेदा ऐ ते विषय-प्रधान गी ऐपिक आखेआ गेदा ऐ। प्रगति-काव्य च भावना ते गति दी प्रधानता होंदी ऐ ते महाकाव्य च विवरण जां प्रक्थन दी। प्राचीन अंग्रेजी महाकाव्य दा नायक कोई उच्च कुलै दा व्यक्ति होंदा ऐ। इसदे इलावा केई बारी अंग्रेजी महाकाव्ये दा सरबंध देवताएं कन्नै बी होंदा ऐ।

2. खण्डकाव्य

‘खण्डकाव्य’ साहित्य च प्रबंध काव्य दा इक रूप ऐ। जीवन दी कुसै घटना विषे गी लेइयै लिखेआ गेदा काव्य खण्डकाव्य ऐ। ‘खण्डकाव्य’ शब्द थमां गै स्पष्ट होंदा ऐ जे इस च मानव जीवन दी कुसै इक गै घटना दी प्रधानता रौंहदी ऐ। जिस च नायक दा जीवन संपूर्ण रूपै च कवि गी प्रभावत नेई करी सकदा। कवि नायक दे जीवन दी कुसै सर्वेत्कृष्ट घटना थमां प्रभावत होइयै जीवन दे उस खण्ड विशेष दा अपने काव्य च पूर्णतया उद्घाटन करदा ऐ।

प्रबंधात्मकता महाकाव्य ते खण्डकाव्य दौनें च रौहदी ऐ पर खण्डकाव्य दे कथासूत्र च जीवन दी अनेकरूपता नेई होंदी। इस आस्तै इसदा कथानक कहानी आहला लेखा शीघ्रतापूर्वक खीरै आहले पाससै जंदा ऐ। महाकाव्य दी मुख कथा दे कन्नै नेकां प्रासंगिक कथां बी जुडी दियां रौहदी ऐ। इस आस्तै इसदा कथानक उपन्यास आहला लेखा आहिस्ता—आहिस्ता फलागम आहले पाससै बधदा ऐ। खण्डकाव्य च सिर्फ इक प्रमुख कथा रौहदी ऐ, प्रासंगिक कथाएं आस्तै इस च कोई जगह नेई।

इस च बी कथा गी सर्गे च बण्डेआ गेदा होंदा ऐ। इक छंद दा दूए छंद कन्नै सरबंधत होंदा ऐ। साहित्यपददर्पण अचार्य विश्वनाथ ने खण्डकाव्य दे लक्षण दस्सदे होई गलाए दा ऐ जे खण्डकाव्य ओह काव्य होंदा ऐ जेहड़ा काव्य दे इक अंश दा अनुसरण करै। इसदा अर्थ होआ जे खण्डकाव्य च जीवन दे कुसै इक अंश दी घटना दा वर्णन होंदा ऐ। जीवन दा कोई इक खास पक्ख उस च लैता जंदा ऐ। विचारकें खण्डकाव्य दे बक्ख—बक्ख लक्षणें गी अपनी दृष्टि कन्नै दस्से दा ऐ। खण्डकाव्य च मुख रूपै च चार गल्लें दा होना जरूरी मन्ने दा ऐ :—

1. खण्डकाव्य इक लघु कथा काव्य होंदा ऐ।
2. उस च जीवन दी विधवता नेई रौहदी।
3. उस च घटनाएं दी बहुलता नेई होंदी।
4. खण्डकाव्य घटना प्रधान नेई होइयै चरित्र प्रधान होंदा ऐ।

इक खण्डकाव्य च कथा दे आधार उपर पूर्णता होंदे होई बी उस च ओह सारे गुण नेई होई सकदे जेहड़े इक महाकाव्य च दण्डी, रूद्रट आदि आचार्य दे अनुसार जरूरी मन्ने गेदे न। मुट्टे तौरा पर महाकाव्य ते खण्डकाव्य दे सिर्फ आकार च गै अंतर सेही होंदा ऐ पर वास्तविकता एह ऐ जे आकार दी निश्चित प्रकार च बी बड़ा बड़ड़ा अंतर होंदा ऐ। ‘रूद्रट’ ने “प्रबंध काव्य दे बड़े ते लौहके रूपें दा कथन करियै पैहले गी महाकाव्य ते दुए गी खण्डकाव्य आक्खे दा ऐ। लौहके काव्य च चतुर्वर्ग (धर्म, अर्थ, काम, मोक्ष) चा कुसै इक दा निरूपण होंदा ऐ। इस च करुण रस दा वर्णन होऐ ते अंत च नायक दी खुषहाली दा वर्णन होना चाहिदा ऐ।” इसदे अलावा खण्डकाव्य च सर्गे दे विभाजन दा नियम बी नेई होंदा। खण्डकाव्य दा कथानक ऐतिहासिक, समाजिक आदि कुसै बी खेतर कन्नै सरबंधत होई सकदा ऐ पर एहदा खेतर सीमत होंदा ऐ।


3. एकार्थ काव्य

‘एकार्थ काव्य’ प्रबंध काव्य का त्रिया रूप ऐ। इस च महाकाव्य का विस्तार ते होंदा ऐ पर महाकाव्य दे लक्षण नेई होंदे। एह बी सर्गे च बज्जे दा होंदा ऐ पर इस च इक्कै घटना गी विस्तार कन्नै दस्सेआ गेदा होंदा ऐ। एह महाकाव्य ते खण्डकाव्य दी बिचली चीज ऐ। महाकाव्य का कथानक केई मोड़ लेइयै अगें बधदा ऐ। पर इस च कथानक सिद्धा चलदा ऐ। उस च पेचीदगी पैदा नेई होंदी। इस च इक्कै सिद्धी कथा होने करी इसी ‘एकार्थ काव्य’ आखदे न।

उप्पर बखाने गेदे विवेचन दे आधार पर गलाया जाई सकदा ऐ जे प्रबंध काव्य इक विस्तार आहली रचना ऐ जिसगी विद्वानें त्र’ऊं वर्गे च बंडे दा ऐ। महाकाव्य, खंडकाव्य ते एकार्थ काव्य। प्रबंध काव्य दे एह त्रैवे रूप अपने-अपने लक्षणें कारण अपनी इक खास अहमियत रखदे न।

15.3.2 श्रव्य काव्य बारे विस्तारपूर्वक चर्चा करो।

रूप-रचना दे आधार पर विद्वानें काव्य दे दो भेद कीते दे न – श्रव्य काव्य ते द्रिश्श काव्य। जिस काव्य का आनन्द सुनियै जां पढ़ियै लैता जाई सकै उसी ‘श्रव्य काव्य’ आखदे न। श्रव्य काव्य दे विद्वानें त्रै भेद कीते दे न – प्रबन्ध काव्य, निबन्ध काव्य ते निर्बन्ध काव्य।



1. प्रबंध काव्य

प्रबंध काव्य दा अर्थ ऐ विस्तार आहली रचना। प्रबंध काव्य च कथानक दी महत्ता होंदी ऐ ते सारी रचना च कथानक दी निरन्तरता बनी रौहदी ऐ। प्रबंध काव्य च समूलचे जीवन दे बखो-बख पैहलूएं दा चित्रण होए दा होंदा ऐ, जेहड़ा कथानक गी प्रभावशाली बनाई ओड़दा ऐ। प्रबंध काव्य दे त्रै भेद न :- महाकाव्य, खण्डकाव्य ते एकार्थ काव्य।

महाकाव्य

महाकाव्य दा खेतर बड़ा विस्तृत होंदा ऐ। ओहदे च जीवन दी अनेकरूपता दस्सी जन्दी ऐ। पर खंडकाव्य च इक्कै मुख घटना गी महत्ता दित्ती जंदी ऐ। महाकाव्य दी कथा च व्यक्ति दी महानता राहें जातीय भावना गी प्रगट कीता जंदा ऐ। एहदा नायक कोई उच्च कुलै दा होंदा ऐ ते प्रधानता वीर रसै दी होंदी ऐ। एहदी कथ्य इतिहास प्रसिद्ध जां पौराणिक होने करी प्रख्यात होंदी ऐ। केई बारी इ'नें कथानकें दा सरबंध देवताएं कन्नै बी होंदा ऐ ते ओह बी दूए किरदारें कन्नै रलियै संघर्ष करदे न।

खंडकाव्य

खंडकाव्य च माहनू दे जीवना दे कुसै इक अंश जां हिस्से दा वर्णन होंदा ऐ। महाकाव्य आहला लेखा ओहदे च सम्पूर्णता जां व्यापकता नेई होंदी। एह जीवन दे कुसै इक पैहलू गी लेइयै चलदा ऐ। एहदे च इक्कै रस होंदा ते इक्कै घटना दी प्रधानता होंदी ऐ। पर एह कहानी एकांकी आहला लेखा अपने आपै च पूर्ण होंदी ऐ। घटनाएं दा सिलसिला, कथानक दी गति ते पात्रें दा विकास खंड-काव्य च बी बराबर होंदा ऐ।

एकार्थ काव्य

प्रबंध काव्य दे उ'आं ते दो गै भेद न – महाकाव्य ते खंडकाव्य ब किष विद्वान एहदे त्रीए रूपै दी बी गल्ल करदे न ओह ऐ 'एकार्थ काव्य'। श्री विश्वनाथ प्रसाद मिश्र होरें इसगी महाकाव्य ते खंडकाव्य दे मझाटे दी विधा मन्नेआ ऐ।

2. निबंध काव्य

निबंध काव्य च वर्णनात्मक जां कथात्मक कविता औंदी ऐ। एह्दे च पदें दा इक लम्मा सिलसिला होंदा ऐ। एह् पद कड़ियें आह्ला लेखा आपूं बिचें बज्जे दे होंदे न। पूरा इक ताल—मेल बनेआ रौह्दा ऐ। दीनू भाई पंत हुंदी कविता 'शैहर पैहलो—पैहल गै' वर्णनात्मक शैली दे काव्य दा इक शैल नमूना ऐ। निबंध काव्य दा असली रूप असेंगी 'बारें' च लभदा ऐ। एह् बारां बी दो चाल्ली दियां होंदियां न — लोक बार ते साहित्यक बार।

3. निर्बंध काव्य

उस काव्य गी आखदे न जेह्दे च कोई बंधन नेई होऐ। एह् काव्य कथा दी एकता ते छंदें दे बंधन दौनें कोला मुक्त होंदा ऐ। किष लोक इसी आजाद काव्य जां आजाद नज़म बी गलांदे न की जे कवि कुसै बी विशे पर, कुसै बी चाल्ली अपने भाव आजादी कन्नै प्रकट करी सकदा ऐ। एह्दे च कथा तत्व दे थाहर भावें जां बचारें दी प्रधानता होंदी ऐ। एह्दे कई रूप ऐसे बी हैन जिंदे च हर इक बंद जां पद अपने आप च पूर्ण होंदा ऐ। निर्बंध जां आजाद काव्य दे त्रै रूप न — मुक्तक, गीत ते अतुकांत मुक्तक।

1. मुक्तक

मुक्तक काव्य दे तैह्तर हर पद अपने आपै च सम्पूर्ण होंदा ऐ। ब' डोगरी साहित्य च एह्दे मुख्य रूप गज़ल, चंपक्ते, दोहे, कुंडलियां, सवैया ते रुबाई बगैरा न।

2. गीत

गीत मुक्तक काव्य दा इक बड़ा गै लोकप्रिय रूप ऐ। गीत दा संगीत कन्नै बड़ा गूढ़ा नाता ऐ। एह् इक भावपूर्ण रचना ऐ जिसी गाया जाई सकदा। एह्दी शैली च कोमलता ते प्रवाह दा होना जरूरी ऐ। एह्दे कोमल, भावपूर्ण भाव मनै गी छूही—छूही लेंदे न। इसी अंग्रेज़ी च 'लिरिक' आखदे न। गीतें दियां दौं किस्मां न — लोकगीत ते साहित्यक गीत। लोकगीत कुसै बी समाज दे पद्य साहित्य दी नीह् होदे न। इंदे लिखने आह्लें दा असें गी कोई पता—थौह् नेई होंदा। इ'नें गीतें राहें असें गी उस समाज दे संस्कृति, रीति—रवाजें ते आस्था—विश्वासें दा पता लगदा ऐ। साहित्यक गीत बी केई प्रकार

दे न। उंदा विशे कोई बी होई सकदा ऐ, पर मुख विशे न — प्रकृति—चित्रण, प्रेम—भक्ति, देश—प्रेम, करुणा, आषा—निराषा ते हास्य—व्यंग बगैरा। इंदे लेखकें दा असेंगी पता होंदा ऐ।

3. अतुंकांत मुक्तक

निर्बंध काव्य दा इक होर रूप असेंगी 'अतुंकांत मुक्तक' च मिलदा ऐ। एह गिने—मिथे दे छंदें दी बंदश कोला मुक्त होंदा ऐ। इसी अंग्रेजी च 'फ्री वरस' गलांदे न। इंदे च पंक्तियें दी भाएं खीरी तुक नेई मिलै पर अपना इक छंद ते इक लै जरूर होंदे न। तुकें ते छंदें दी कैद शा मुक्त होने करी इसी आज़ाद कविता बी आखदे न। किश कवियें दा बचार ऐ जे ओह अपने गम्भीर चिंतन ते सूक्ष्म भावें गी तुक, छंद आदि दी बंदशें च रेहियै चंगी चाल्ली ते पूरे रूपै च प्रगट नेई करी सकदे, इस लेई उ'नेंगी फ्री वरस जां आज़ाद कविता दा सहारा लैना पौंदा ऐ।

उपरोक्त विवेचन दे आधार पर गलाया जाई सकदा ऐ जे श्रव्य काव्य ने साहित्य जगत च इक टकोहदा थाहर बनाई लैते दा ऐ।

15.4 अभ्यास आस्तै सुआल

1. 'महाकाव्य' केह ऐ? इक सफल महाकाव्य दे लक्षण निर्धारत करो।
2. श्रव्य काव्य दे भेदें प्रकारें बारै विस्तारपूर्वक चर्चा करो।

आधुनिक डोगरी कविता भाग- II पर आधारित लोहके जबाब आहले सुआल

रूपरेखा

♦ उद्देश्य

इस पाठ च –सुरग देस’, –ते बाकी इतिहास’ ते ‘कलयुग’ काव्य–रचनाएं दी विषे–वस्तु दे मूल–भाव दा विश्लेशन पढ़िये विद्यार्थी कुसै बी रचना दे अंतच च छप्पे दे गुढ विचार तगर पुज्जने दे काबल होई सकडन । उं’दे च कुसै विशे जां भाव गी समझने–समझाने बारै समर्था पैदा होग ते उं’दी विचार शक्ति च तीव्रता ते पैन्ने पन दा गुण बंदोग ते मठोग ।

♦ पाठ परिचे

उप्पर बखानी गेदी त्रौहनें रचनाएं दी प्रायोगिक तौरा पर स्पष्टी–करण करने दे उद्देश्य कन्नै समग्री सम्पन्न कीती गेदी ऐ ते विद्यार्थी इस पाठ गी पढ़िये कुसै काव्य–रचना दे मर्म गी समझी सकन इसलेई इस पाठ लेई आधार बनाई गेदिये कविताएं बारै सपूरी जानकारी दिती गेदी ऐ ।

♦ पाठ–प्रक्रिया

♦ ‘सुरग देस’ कविता दी विषेवस्तु दा विषलेषन ।

- (i) कविता दा परिचे ते इसदा मूल–भाव
- (ii) कविता दी विशे–वस्तु ते उसदा स्पष्टीकरण

♦ ‘ते बाकी इतिहास’ कविता दी विषेवस्तु दा विषलेषन ।

- (i) कविता दा परिचे ते इसदा मूल–भाव
- (ii) कविता दी विशे–वस्तु ते उसदा स्पष्टीकरण

♦ ‘कलयुग’ कविता दी विषेवस्तु दा विषलेषन ।

- (i) कविता दा परिचे ते इसदा मूल–भाव
- (ii) कविता दी विशे–वस्तु ते उसदा स्पष्टीकरण

♦ ‘सुरग देस’ कविता दी विषेवस्तु दा विषलेषन ।

- (i) कविता दा परिचे ते इसदा मूल–भाव

एह कविता श्री किशन स्मैलपुरी होंरे लिखी दी ऐ । इस कविता राहें कवि ने डुग्गर देसै दा बखान कीते दा ऐ । कवि गी अपनी डुग्गर धरती कन्नै प्यार ऐ, डुग्गर दी हर उस चीजै कन्नै प्यारे जेहड़ी इस देसै च होंदी ऐ की जे जेकर कुसै ने सुरगै गी दिक्खना ऐ तां इयै गै ओह धरती ऐ जित्थे सुरग ऐ होर कुतै नेई ।

(ii) कविता दी विशेषस्तु ते उसदा स्पष्टीकरण

इस कविता च कवि ने अपने दुग्गर देसै गी सुरग दे समान समझे दा ऐ । कवि दा गलाना ऐ जे एह देस दुग्गर दी धरती कुसै सुरगै कोला घट्ट नेई की जे इ'यै ओह देस ऐ जित्थै हर ओह चीज, हर ओह शखसियत ऐ जेहड़ी सुरगै थमां बी न्यारी ऐ । इस दुग्गर देसै च भांग-संभात दे फुल्ल खिड़े दे न जेहड़े इस देसै बी अपनी -अपनी खुशबू कन्नै लोत-पोत करा दे न । की जे इ'यै ओह धरती ऐ जित्थै शिवें दा वास ऐ, त्रिकुटा पर्वतें च माता वैशनों आइयै बस्सी दी ऐ ते कालका माता जम्मू शैहरा दी रक्षा ते लोकें दा कल्याण करा दी ऐ । इत्थै गै रिशी-मुनि ज्ञानियें दी कोई कमी नेई, ज्ञान दा भंडार ऐ, कुसै ने जेकर मुक्ति गी प्राप्त करना ऐ तां उसगी इस धरती दी सुरग नुमां पौड़ी थमां लडना पौना ऐ । जित्थै इन्न किश इन्ने देवी-देवते बसदे होन ओह देस कुसै सुरगै शां कि'यां घट्ट होई सकदा ऐ । इससै धरती पर बुराई उपपर अच्छाई दा प्रतीक बनियै बावा जित्तो जनेह बलिदानियें जनम लैता, देसा दी रक्षा आस्तै, देसै दी आन-वान ते मान बधाने लेई मियां डिडो, बाज सिंह ते जरनैल जोरावर सिंह जनेह हिम्मती ते बहादुर लोकें दी एह धरती ऐ । दुग्गर दियां जनानियां (नारां) बी कुसै चाल्ली कुसै कौला घट्ट नेई हैन, समूलचा दुग्गर गै इसदी गुहाई दिंदा ऐ जे दुग्गर च दलेरें, बहादुरें ते साहसी लोकें दी कमी नेई ।

प्राकृतिक तौरा पर बी दुग्गर देस दा कोई मकावला नेई, इत्थै फाड़ लें च ठंडिया-ठंडियां छामां बगदियां न, कुतै-कुत लौहकियां बाइयां बी थक्के-हुट्टे दे लोकें गी ठंडे नीर कन्नै जाजगी भरदियां न, झीड़े दे बूहटें गी दिक्खियै इ'यां बझोंदा ऐ जे इस थमां शैल थाहर होर कुतै नेई होई सकदा । झीड़ें च बस्से दे उ'नें लोकें च मनै गी मस्त ते सकून पजाने आहलियें भाखें कन्नै ते कलां दी दुंगी ते गैहराद थमां ओत-परोत एह देस ऐ । इ'यै ओह देस ऐ जित्थै चनाऽ ते रावी अपनी मस्त चाल्लै कन्नै इस देसै दा इतिहास लिखदे न, गंगा समान देवका ते सुर्य पुत्री तौह बगदी ऐ, मानसर ते सरुईसर जनेहियां झीलां न जेहड़ियां दुग्गर दी प्रकृति गी होर गुहाड बख्खादियां न । इ'न्ना किश जिस जिस देसै च होए ओह देस क्या कुसै सुरगै कोला घट्ट कि'यां होई सकदा ऐ तां गै कवि आखदा ऐ सुरगै दी गल्ल नेई ना अड़ेआ जस्स अपने देसै दे गा अड़ेआ ।

(iii) ते बाकी इतिहास' कविता

कविता दा परिचे ते उसदा मूल भाव

'ते बाकी इतिहास' कविता दी सिरजना प्रो. रामनाथ शास्त्री होरें कीती दी ऐ । इस कविता राहें प्रो. शास्त्री होरें दुग्गर दे इतिहासक सफर उपपर जनरसानी कीती दी ऐ , उ'दा मनना ऐ जे अजे तगर दुग्गर दा इतिहास सिर्फ 'त्र'ळं लोकें गै लिखे दा ऐ , जि'दे च बाबा जित्तो, दाता रणपत ते मियां डिडो जनेह बलिदानियें गै दुग्गर दा इतिहास दी पुट पाई दीऐ ।

(iv) कविता दी विशेषस्तु ते उसदा स्पष्टीकरण

इस कविता च कवि ने दुग्गर दे इतिहास गी लेइयै चिंता बुज्झी दी ऐ, कवि दा मनना ऐ जे डोगरें दे इतिहासै दी कथ अजें कुसै लोक कथा आडर गै ऐ जेहड़ी पलै च गे मुक्की जंदी ऐ , जेहड़ी कुसै लम्मी कथा आडर नेई ऐ जिसगी सुनदे खासा समां लग्गी जा, जां जिसगी सुनने लेई खासे समें दी लोड़ पौंदी ऐ । कवि दे मतावक इस दुग्गर धरती दे इतिहास दी जेकर गल्ल कीती जा तां इतिहासै दे पन्नं गी उंगली पर गिनेआ जाई सकदा ऐ । जेकर सभनें थमां पैहले इतिहास दे मुंड दी गल्ल कीती जां तां आखेआ जाई सकदा ऐ जे इस दुग्गर धरती पर जुल्म दे खलाफ, बावा जित्तो जनेह करसानी करने आहले

नौजुआने अपने हक्क दे खलाफ अवाज चुक्कियै जुल्म दे अगै अपना मत्था नेई टेकियै इक बलिदानी दे रूपै च डुग्गर दे इतिहास लिखने लेई पैहलो-पैहल मुंड पाया हा ।

दूआ इतिहासक पन्ना दाता रणपत होरें लिखेआ जिनें जुलमी ताकतें अगै अपना मत्था नेई टेकियै न्याऽ कीता ते उससै दे हक्कै च फैसला दित्ता जेहड़ा इसदा हक्कदार हा, भामें उसदे बाद उनें अपना बलिदान बी देना पेआ, ते अज्ज तगर बावा जित्तो साई डुग्गर च इंदी बड़ी मानता ऐ ।

त्रीआ सफा मियां डीडो दे रूपे च लखेआ जिन्ने जुल्म दे खलाफ अपनी तलवार चुक्कियै अपने देसै गी बिदेसी जुल्मी नीतियें गी अंगीकार नेई करियै उंदा विद्रोह कीता ते डुग्गर गी अजाद रूपै च दिक्खने दा सुखना दिक्खेआ, ओह कुसै बी रूपै च कसै दे हथै दी कटपुतली बनने लेई कदें बी तैयार नेई हा ते इसगी ओह पाप समझदा हा ते इससै पापे गी मटाने लेई -मियां डीडो जनेह अपनी ईन, आन-वान गी बचाने लेई अपना बलिदान देइयै डुग्गर देसै दी रक्षा कीती ।

खीर कवि दा एह मनना ऐ जे उंदा नज़र च अजें तगर डुग्गर धरती दे इतिहासें च इयै त्रै पतरें लखाऐ दे न होर किश नेई । बस इनें त्रै पतरें दे इलावा बाकी किश बी नेई । डुग्गर दी धरती दा कण-कण डुग्गर दे हर इक गी एह सुआल पुच्छदा ऐ जे दस्सो केह जवाब देचै अपनी इस धरती गी जित्थै आइयै असें अपना बपचन, जुआनी ते बजुर्गीयत गजारनी ऐ, दस्सों इस डुग्गर दे साथियें , केह जवाब देचै ।

(v) कविता दा परिचे ते इसदा मूल-भाव

‘कलयुग’ कविता श्री रोमाल सिंह भड़वाल होरें लिखी दी ऐ । कविता दा मूल भाव एह ऐ जे कवि कलयुग गी भेड़ा नेई आखियै चंगा कुआलदा ऐ की ते जिन्ना किश उसदी नज़र च कलयुग ने दित्ते दा ऐ उन्ना शायद कोई युग नेई देई सकेआ । इंसानी दे सारे आराम दायक सुख-सुभिधा, आधुनिककरण दे इस युग च सहूलता तुंदा गैई-गैई पर इससै कलयुग दी गै देन ऐ । इस करियै जिन्ना चंगा कलयुग ऐ उन्ना होर कोई युग नेई ।

(vi) कविता दी विशेषस्तु ते उसदा स्पष्टीकरण

कवि दे आखने दा भाव एह ऐ जे कलयुग कोई भेड़ा युग नेई ऐ सगुआं एह बड़ा शैल ते सभने गी सुख- सुभिधा कन्ने माला-माल करने आह्ला युग ऐ । कवि दे मतावक कवि ने बाकी द’ऊं युगें दे बारे च बी पढ़े दा ऐ ते उस युग च बी लोक इन्ने सुखी नेई हे, रिशी-मुनियें दा युग हा जे ईश्वर दी तलाश च अपनै-आपै गी बी गवाई बैठे ते आम लोक बी कुसै चाल्ली इस युगै साई ओह सुख नेई भोगी गे जेहड़े लोक इस युगै च भोगा दे न । इससै युग च गै रोज नमें-नमं अविश्कार होआ दे न रोज नमियां-नमियां चीजां दिक्खने गी औंदियां जेहड़िया साढ़े मनोरंजन ते साढी जरूरता मतावक हर इंसान कश पुज्जा दी ऐ । जि’यां कला दे प्रेमी गी सुनने आहले आस्तै माहनु ने रेडियो दा अविश्कार करी दित्ता ते पही इस कोला बी अगै जाइयै टैलीविजन दा अविश्कार करी दित्ता जिनें लोकें गी पैहले तुस रोडियो च सुनदे हे हुन साम-धाम अपने कमरे दे बंद दरवाजे च दिक्खी सकदे ओ, एह सब इससै युग करी मुमकन होई सकेआ ऐ इस करियै कवि कलयुग दी महिमा गांदा ऐ । इस कोला अगै जाइयै कवि आखदा ऐ जे इससै युगै दे आदमी ने चन्नै तगर जाने दे रस्ते तुप्पी टकाए न, होर अगै पता नेई केह-केह करना ऐ। इससै युग ने माहनु दी सुख-सुभिधा आस्तै लोकें दे फासले घट्ट कीते न केईयें म्हीनें दे समें गी घँटे च तब्दील करी दित्ता ऐ, मोटरा गड़िडियां बनाइयै लोकें गी इक दुए कशा पजाइयै इक दूए गी सोचने-समझने, जानने दे इच्छुक लोकें दी त्रेह शांत कीती ऐ, बिजली दे चम्तकार कन्ने इस धरती उप्पर रोशनी गै रोशनी करी दित्ती ऐ ते इससै बिजली कारण अज्ज दा माहनु किन्ने सुख भोगा दा ऐ, शायद गै उससै युग च माहनुएं इन्ना

सुख भोगेआ होना । कवि दे मतवाक इस्सै युगै च जेकर कुसै नै बी अपने अंदर विश्वास, श्रद्धा ते निश्चा करियै भगवान गी पाने दी कोशिश कीती तां भगवान ने इस्सै युगै आइयै बी दर्शन दिते न ।

कवि लोकें कशा पुच्छदा ऐ ते कु'न आखदा ऐ ते कलयुग भैड़ा ऐ बलिके कलयुग कषा कोई बी युग शैल कि'यां होई सकदा ऐ । एह युग कदें बी कुसै गी माड़े कर्म करने गी नेई आखदा , उल्टा चंगे गी गै करने लेई दसदा ऐ । लोक आपे माढ़े कर्म करदे न ते इस युगै गी ऐहमें जानियै झूठा बदनाम करा दे न । खीर च कवि आखदा ऐ जे कलयुग, कला दा युग ऐ जेहड़ा नित्त रोज-नमियां चालां चलियै लोकें गी ज्ञान दा, सुख-सुभिदा दा भंडार दिंदा ऐ ।

कविताएं दी विशेषवस्तु दा विश्लेशन

रूपरेखा

♦ उद्देश्य

इस पाठ च 'झुरियां', , 'शवील' अगनी दी' ते 'प्याह होए बस प्यार होए' कविताएं ' दी विषे-वस्तु ते उ'दे मूल-भाव दा स्पष्टीकरण पढ़िये विद्यार्थीयें च इ'नें रचनाएं दे गूढ़ ते सूखम विचारें गी समझने दी समर्थ पैदा होग ते इस कन्नै उ'दी विचार ते अभिव्यक्ति दी शक्ति च पढ़ौता ते पैन्नेपन द गुण बी ओग ।

♦ पाठ परिचे

उप्पर बखानी गेदी त्र'ऊं काव्य दा विश्लेशनात्मक द्रिष्टी कन्नै अध्ययन करने दे उद्देश्य कन्नै आधार बनाई गेदियें काव्य रचनाएं दी हर-द्रिष्टी कन्नै पूर्ण समग्री प्रदान कीती गेदी ऐ ।

♦ पाठ-प्रक्रिया

'झुरियां' कविता दी विशेषवस्तु दा विश्लेशन ।

- (i) कविता दा परिचे ते उसदा मूल-भाव
- (ii) कविता दी विषे-वस्तु ते उसदा स्पष्टीकरण

♦ 'शवील अगनी दी' कविता दी विशेषवस्तु दा विश्लेशन ।

- (i) कविता दा परिचे ते उसदा मूल-भाव
- (ii) कविता दी विषे-वस्तु ते उसदा स्पष्टीकरण

♦ 'प्यार होए बस प्यार होए' कविता दी विशेषवस्तु ते उसदा विश्लेषण ।

- (i) कविता दा परिचे ते उसदा मूल-भाव
- (ii) कविता दी विषे-वस्तु ते उसदा स्पष्टीकरण

♦ 'झुरियां' कविता दी विशेषवस्तु दा विश्लेशन ।

- (i) कविता दा परिचे ते इसदा मूल-भाव

एह कविता श्री अरविंद होरें लिखी दी ऐ । इस कविता राहें कवि ने अपनी माऊं दी झुरियें गी गिनने दी कोशिश कीती दी ऐ जेहड़ी के समें ने उसदी माऊं गी देई दित्तियां न, इ'नें झुरियें दे पौने दा कारण ओह अपने-आपै गी गै मिथदा ऐ, ओह जानदा ऐ जे इ'नें झुरियें दी पुरुआ उसदे पैदा होंदे गै पेई

गेई ही ते हुन जिंदगी दे इस सफर च आइयै इ'नें सारियें झुरियें गी बड़ी मुश्कलें गिनने दी कोशिश करदा ऐ ।

(i) कविता दी विषेवस्तु ते उसदा स्पष्टीकरण

इस कविता च कवि ने “झुरियां” शिर्शक दे तैहत् उ'नें झुरियें गी गिनने दा जतन कीते दा ऐ जेहड़ियां समें ने उसदी माऊ गी देई दितियां न । झुरियां इंसान गी उसदी बिद्ध अवस्था च औदियां न पर समां केई बारी उस दी रफतार कशा जल्दी चली पौंदा ऐ । कवि अपने – आप गी हौंसला देइयै उस क्रूर समें गी साक्षी मन्नियै उ'नें झुरियें गी गिनने दा जतन करदा ऐ जेहड़ियां उसदी माऊ गी थोइयां न । पैहली झुरी उसदी माऊ गी उसलै पेई ही जिसलै उसदा ब्याह करियै ओहदे अपने घरै कुसै दुए घर जाना पेआ हा, अपना बचपन छडिडयै उ'नें चेते दियें ग'लिसें गी छोड़ियै जाना पेआ जेहड़े इस समाज दी देन ऐ । दूई झुरी उसगी उसलै पेई ही जदूं ओह अपनी माऊ दे टिड़के च हा ते अपनी माऊ दा लहु पीयै उसगी बरोस मिली हीख ओहदी जिंदगी दी पुरुआत होई ही । इक झुरी ओह जदूं इस दुनिया च औने दे बाद उसनै अपनी माऊ दी छाती चा चूसी ले गेआ ओहदी माऊ दी मुआ दी रौनक, पही एह सिलसिल समें दी देख-रेखस च चनदा रेआ ते पही इक होर झुरी जदूं खुसी लेआ हा कुसै कुड़ी ने तेरे कोला ते पही होर किन्नियां गै झुरियां जेहड़ियां तेरे चेहरे च न ।

कवि अपनी माऊ गी ओह सब किश आहनी देना चाहंदा ऐ जेहड़ा के डुगगर च पैदा होई दी हर कुड़ी निक्के होंदे हसदी, खेलदी, अपनी साथनं कन्नै राड़े चित्रदी रस्सा टपदी, गीह खेढदी, दपट्टे लेई कनारियां कढदी, तवियै च जाइयै कुड़ियें दा खेढना, ओह सब बचपन दे रंगीन सुखने बेफिकरी जिंदगी, जिस च कोई गम नेई, चौने पाससै खुशियां गै खुशियां होंदिया सब किश परताई देना चाहंदा ऐ पर इस आस्तै ओह अपनी माऊ गी निक्की यानी दे रूपै च दिक्खना चाहदा ऐ, तो गै कवि आखदा ऐ जे इक दिन कदें माएं तूं ओह कुड़ी बनी जा, बस इक दिन ।

(iii) ‘शबील अगनी दी’ कविता दा परिचे ते उसदा मूल भाव

एह कविता श्री शिवराम ‘दीप’ होरें लिखी दी ऐ । इस कविता राहें कवि अपने –आपै गी उ'नें बंधने शा मुक्त करना चाहदा ऐ जेहड़े उसगी समें नै पाई दिते हे, ओह हुन उ'नें सारें बंधने गी तोड़ नेई चाड़ी सकदा ऐ अपने-आपै गी मुड़ियै उससै अगनी पाससै लेई जाना चाहंदा ऐ जेहड़ी उसगी सकून पजांदी ऐ ।

(iv) कविता दा स्पष्टीकरण ते उसदा मूलभाव

इस कविता च कवि दा एह आखना ऐ जे हुन ओह सारियां जिम्मेवारियां नेई नभाई सकदा जेहड़ियां उसनै पाई दियां हियां । ओह अपने प्रीतम गी हुन एह आखदा ऐ जे हुन उसदे कश नेई रौहना चाहंदा ओह उत्थूआं चली जाना चाहंदा ऐ । की जे उसगी हुन उ'नें हवाएं च जैहरीलापन नजर आवा दा ऐ ते उ'नें जैहरीली हवाएं च होर ज्यादा चलने च असमर्थ ऐ, उत्थै ओहदा बौहना मुश्कल होआ दा ऐ, उसगी ओह सारे पल अंगारे आहला लेखा सेका दिंदे रौहंदे न जेहड़े उसगी ओहदे करी मिल न । ओह आखदा ऐ जे हुन में किन्ना गै चिर बौहना ऐ उस तेरे झुठै पिच्छै जेहड़ा अंदरा दा खोखला ऐ, सारा तेरा निजाम झुठै दी विना पर बने दा ऐ, इस खोखलेपन थमां मिगी छुटकारा दे मिगी इस झुठै दी रास नेई प'वै दी । हुन मिगी जान दे अपनी असलीयत कोल ते झुठे कनूनै दा में ज्यादा साथ नेई देई सकदा, होर नेई में एह सब जरी सकदा तेरी खातर । जिन्ना तेरे लेई करना हा ओह करी लेआ हुन में उ'नें सारें बंधने शा मुक्त होना चाहना जेहड़े में तेरे करी पाए हे ते तेरे इस खोखले निजाम दा में ज्यादा साथ नेई नभाई सकदा । तेरे

आसेआ दिते दे तेरे सुखने दी दुनिया गी में जिन्ना किश करी सकदा हा ओह सब करी दित्ता, जो तेरा बनाई सकदा हा ओह सब बनाई दित्ता ते हुन में मुक्त होना चाहना हुन में उरसै सच्च दे पाससै जाना चाहना जेहड़ा बड़ा नरोआ ऐ बड़ा पक्का, जेहड़ा सच्चें गै सच्च ऐ । में हुन उतथै जाना चाहनां जित्थै हर आत्मा प्यासी ऐ, हर रुह कौड़ घुट्ट भरदी ऐ जित्थै हर कोई मतलब दी दुनिया कशा बेखबर ऐ, हुन उतथै गै मिगी जान दे , जित्थै जाइयै पही में खोली लै शवील अगनी दी, मुड़ियै उरसै अग्गी च जान दे जेहदे सेके मिगी अंदरुनी सकून पजांदे न ।

(iv) 'प्यार होए' बस प्यार होए कविता दा परिचे ते उसदा मूल भाव

एह कविता श्री दर्शन दर्शी होरें लिखी दी ऐ । इस कविता दा मूल भाव एह ऐ जे कवि अपनी चबक्खी प्यार गै चाहंदा ऐ होर किश नेई । ओह आखदा ऐ जे कुसै बी चाल्ली दी अड़चना नेई होन सिर्फ हर बक्खी अपनी खुशबू खलारदा प्यार होए, बस प्यार होए। ओह प्यार दी कामना करदा ऐ ते हर बक्खी इसदी होने दी तस्दीक चाहंदा ऐ ।

(iv) कविता दी विषेवस्तु ते उसदा स्पष्टीकरण

कविता च कवि सिर्फ प्यार दी कामना करदा ऐ । ओह चाहंदा ऐ जे हर बक्खी सिर्फ—प्यार गै होए । ओह प्यार च कुसै बी चाल्ली दी बंड नेई करना चाहंदा । ओह दुनिया दे इस बंड बंडाऽ कशा प्यार गी दूर रखना चाहंदा ऐ । ओह प्यार गी कुसै बी चाल्ली इ'नें बुराइयें कशा दूर लेई जाना चाहंदा ऐ । ओह प्यार च कुसै बी चाल्ली जमां तकसीम नेई करना चाहंदा नां गै कुसै चाल्ली जखां देना चाहंदा ऐ जेहड़ियां घटी बी जान ते बधी बी जान, ओह इ'नें घाटें—बाद्धें दी दुनियां शा अपने प्यार गी मुख चाहंदा ऐ ।

कवि आखदा ऐ जे निर्मल पानी साहीं सुच्चा ते भगवान साहीं सच्चा हिरख प्यार मंगदा ऐ। ओह झूठा दी दुनियां कशा दूर लखियै सच्चै दी विना उप्पर खड़ोने आह्ला प्यार चाहंदा ऐ । ओह इंसान दे बक्ख—बक्ख रूपें गी नेई चाहंदा जेहड़े झूठ फरेब, नफरत, बेईमानी दी विनाऽ बर खड़ोते दे न । ओह ओहदे असली रूप गी गै दिखला चाहंदा ऐ जेहदे च पवित्रता आह्ला लेखा सुच्चा प्यार पलदा होए । ओह दुनिया दे इस झूठे निजाम कशा दूर, बैर—विरोध कशा दूर, फर्को—फर्की कशा दूर, प्यार गी दिखना चाहंदा ऐ ।

कवि इत्थै एह बी आखदा ऐ जे में दुनिया दे इस सारे निज्जू च सगगोरार ऐख मेरे कशा ओह सबकिश ऐ जेहड़ा इस दुनिया दी मांग च ऐ । मेरे मनै च कुतै दूर जाने दा खब्हाशिया बी हैन कुदरती शलैपे शा माला—माला बी आं, शाही ठाठ—वाठ ते शानो—शैकत बी ऐ, पर इ'नें सारियें चीजें गी मेरे शा लेई लै । मिगी इ'दे शा वंचित करी दे, मिगी इ'दी कोई जरूरत बी नेई । आधुनिक सुख—सुविधा दे सारे जरियै बी मेरे कशा लेई लै । इ'नें सारियें चीजें दे भारा कशा भी मुक्त करदी ऐ । बस मुक्त करी दे । कुसै सच्चे आश्क साहीं इक यार थोए ऐ जेहदे मनै च छड़ा प्यार गै होऐ, छड़ा प्यार गै होऐ ।

.....

B.A. Sem-III (Poetry)	DOGRI	UNIT-IV LESSON No. 18-19
--	--------------	---

डोगरी साहित्य चर्चा पोथी पर आधारत लोहके जबाव आहले सोआल

रूपरेखा

18–19.1 उद्देश्य

पाठ सं. 18 ते 19 दे तैहत साहित्य सरबन्धी ते उसदी बक्ख–बक्ख विधाएं गी लेइयै विद्यार्थियों दे मनै च पैदा होने आहली लौहकी–लौहकी जिज्ञासाएं गी शांत करना इ'नें पाठें दा मुख्य उद्देश्य ऐ। तां जे विद्यार्थी स्तेहान च पुच्छे जाने आहले लोहके–लोहके सोआलें दे जबाव देई सकने च निपुण होई सककन।

18–19.2 पाठ–परिचे

पाठ 18 ते 19 दे तैहत साहित्य ते उसदे पद्य रूप दे तैहत औने आहलियें सभनें विधाएं पर सोआल तयार कीते गेदे न।

18–19.3 पाठ–प्रक्रिया

(i) इ'नें पाठें दे तैहत साहित्य दे पद्य रूपें गी इक क्रमबद्ध रूप च प्रस्तुत करने आहली प्रक्रिया गी अपनाया गेदा ऐ।

18.3.1 साहित्य दियां परिभाषां लिखो ?

‘साहित्य’ शब्द दी व्युत्पत्ति ‘सहित’ शब्द कन्नै होई दी ऐ। ‘सहित’ शब्द दे दो अर्थ न – ‘स’ अर्थात् ‘कन्नै-कन्नै’ ते हित अर्थात् ‘कल्याण’। इस दृष्टि कन्नै साहित्य शब्द थमां अभिप्राय होआ जे साहित्य इक ऐसी लिखत समग्री ऐ जिसदे शब्द ते अर्थ च लोक रहित दी भावना सन्निहित रौह्दी ऐ। साहित्य दे सरबंघै च बक्ख-बक्ख विद्वानें दे विचार इस चाल्ली न –

(I) भारती विद्वान

1. “व्यापक अर्थ च साहित्य ऐसी शाब्दिक रचना मात्र दा वाचक ऐ जिस च किश हित दा प्रयोजन होए ते अपने रुढ़ अर्थ च काव्य जां भावनां प्रधान साहित्य दा पर्याय ऐ।”
(बाबू गुलाब राय)
2. “साहित्य कन्नै साढ़ा आशय उनें वशिष्ट ते प्रतिनिधि रचनाएं थमां ऐ जेहड़ा समाज ते समाजिक जीवन गी चंगी जां माड़ी दशा च लेई जाने दी समर्थ रखदी ऐ।”
(आचार्य वाजपेयी)
3. “साहित्य रस भरोचे वाक्य दा नांS ऐ।”
(विश्वनाथ)

(II) पच्छमी विद्वान

1. हड़सन दे अनुसार – “साहित्य उंदे सभनें दा सजीव लेखा ऐ, जेहड़ा किश माहनू ने जीवन च दिक्खे दा ऐ, जेहड़ा किष उसदे बारे च अनुभव कीत्ता ऐ ते जेहड़ा किश उनें पहलुएं दे बारे च सोचेआ ऐ जिंदा साढ़े सभनें कन्नै तात्कालिक स्थायी सरबंघ ऐ। इस चाल्ली ओह भाशा दे माध्यम राहें जीवन दी अभिव्यक्ति ऐ।”

2. रोबर एस्कार्पी – “साहित्य दा कोई निश्चित गुण, अर्थ ते स्वरूप नेई होंदा ओह वाङ्मय दी पूरी दुनिया दा इक हिस्सा होंदा ऐ। साहित्य गी समझने आस्तै साहित्य तत्थ दी विशिष्ट स्थिति गी समझना जरूरी ऐ।”
3. “साहित्य इक मना गी दुए मना कन्नै रलाने दा साधन ऐ।” (टालस्टाय)

18.3.2 कविता शब्द दी उत्पत्ति बारै दस्सदे होई कविता सरबंधी विद्वानें दे विचार स्पष्ट करो।

शब्द ते अर्थ जिसलै मिलदे न तां काव्य दा सृजन होंदा ऐ। शब्द च अपार शक्ति होंदी ऐ। शब्द शक्ति गै काव्य सृजन च अन्तर्निहित अर्थ गी व्यक्त करने दा साधन ऐ। इस थमां गै अर्थ दा बोध होंदा ऐ।

कविता इक व्यापक शब्द ऐ जिसदे अंतर्गत पूरा सृजनात्मक साहित्य औंदा ऐ। प्राचीन भारती साहित्य च ‘काव्य’ शब्द दा इस्तेमाल व्यापक रूपै च उ’नें सभनें रचनात्मक विधाएं आस्तै होंदा रेहा ऐ जिसगी अज्ज अस साहित्य दी संज्ञा दिन्ने आं। कवि शब्द दी उत्पत्ति ‘कु’ धातु च ‘इच’ प्रत्यय लगने कन्नै होई दी ऐ। ‘क’ दा अर्थ ऐ शब्द करना, बोलना। इस चाल्ली मन्नेआ जाई सकदा ऐ जे शब्दें राहें अपने भावें—विचारें आदि दी अभिव्यक्ति कराने आह्ला कवि खोआंदा ऐ

1. “रस दी अनुभूति कराने आहली वाणी काव्य ऐ।” (आचार्य विष्णनाथ)
2. “सुंदर अर्थ गी प्रगट करने आहली रचना गै काव्य ऐ।” (पंडितराज जगन्नाथ)
3. “लोकें गी आनंद देने आहली रचना गै काव्य ऐ।” (पंडित व्यास)
4. “कविता शब्द ते अर्थ दा उचित मेल ऐ।” (आचार्य भामह)
5. “कविता कवि विशेषदी भावनाएं दा चित्रण ऐ।” (महादेवी वर्मा)
6. “कविता पद्यात्मक रचना ऐ जिसी कल्पना दी सहायता कन्नै सच्चाई ते रस दा मेल कराने दी इक कला बी आकखी सकनेआं।” (डा. जान्सन)
7. “कविता लय—ताल च बज्जी दी भाशा च माहनू दे मनै दी ठोस ते कलात्मक व्याख्या ऐ।” (डेस्टन)
8. “कविता मनुखें दी भाशा दा सभनें कोला उत्तम रूप ऐ जेहड़ा सच्चाई पर

टिके दा ऐ। कविता जीवन दी भावना प्रधान व्याख्या ऐ।” (मैथ्यू आर्नल्ड)

9. “कविता इक ऐसी रचना ऐ जेह्दे च श्रेष्ठ शब्द श्रेष्ठ क्रम च प्रयुक्त होए दे होंदे न।” (कॉलरिज)
10. “कविता शब्दें दी, मनै गी छूहने आहली रचना ऐ जेह्दी सच्चाई गी साढ़े सामनै उ’आं गै गुहाड़दी ऐ जि’यां इक चित्रकार रंगें कन्नै साढ़े सामनै इक चित्र खड़ेरी दिंदा ऐ।” (मैकाले)

उप्पर बखानी गेदी परिभाषाएं दे आधार पर एह गलाया जाई सकदा ऐ जे “कविता, साहित्य दी ओह विधा ऐ जिस च कुसै कहानी जां मनोभाव गी कलात्मक रूपै थमां कुसै भाषा आस्सेआ अभिव्यक्त कीत्ता जंदा ऐ।”

18.3.3 “महाकाव्य बारै बक्ख-बक्ख विद्वानें दे विचार स्पष्ट करो ?”

महाकाव्य दे संदर्भ च भारती ते पाश्चात्य विद्वानें दे विचार —

भारती परिभाषां

1. “महाकाव्य मर्मस्पर्शी घटनाएं पर आधारत होंदा ऐ। एह महान कवि दी ऐसी छंदोबद्ध रचना ऐ, जिस च मानव जीवन दी कुसै जगमगादी समस्या दे महा-प्रवाह दा उद्घाटन, उदात्त वर्णन शैली, व्यंजक भाषा, पूर्ण रसात्मकता ते उच्चकोटि दे षिल्प-विधान राहें कीता जंदा ऐ। इसदा नायक कुसै बी लिंग, जाति जां वंश दा होइयै बी अपने गुणें थमां कवि दे आदर्श गी मूरतीमान करने आहला होंदा ऐ।” (डा. शशामनन्दन किशोर)
2. “महाकाव्य इक नेही छंदोबद्ध प्रवचनात्मक रचना होनी चाहिदी ऐ जिस च विशेष दी सधारणता ते नायक दी महानता दे कन्नै-कन्नै कथावस्तु दी इक सूत्रता, छलकदा रस प्रवाह, वर्णन विशुद्धता, उदात्त भाषा-शैली, जीवन दा यथासाध्य सामूहिक चित्रण ते जाति सरबंधी भावनाएं ते संस्कृति दी सुंदर अभिव्यक्ति होऐ।” (डा. गोविन्दराम शर्मा)
3. “महाकाव्य ओह बृहदाकार सुनियोजित ते उदात्त उल्लेखनीय काव्य ऐ जिस च कुसै महान नायक दी समृद्धि दा विशाल चित्रण, महान उद्देश्य ते व्यापक सौंदर्य सृष्टि होई दी होऐ।” (डा. सक्सेना)

पाश्चात्य परिभाषा

1. “महाकाव्य च उच्चकोटी दे पात्रं दी पद्यबद्ध अनुकृति रैहदी ऐ। इस च सिर्फ़ इक चाल्ली दा छंद ग्राह्य होंदा ऐ ते इसदा रूप विवरण होंदा ऐ पर महाकाव्य दे कार्य—व्यवहार च समें—सीमा दी कोई मर्यादा नेई होंदी। महाकाव्य च उसदे विवरण रूप दे कारण इक गै समें च घटने आहलियां नेकां घटनां प्रस्तुत कीतियां जाई सकदियां न।” (अरस्तु)
2. “महाकाव्य बड़े आकार आह्ला कथात्मक काव्य—रूप ऐ, जिस च महत्त्वपूर्ण घटनाएं दा वर्णन होंदा ऐ, किश चरित्रें दे क्रियाशील ते दलेरी भरोचे जीवन दी कथा होंदी ऐ। उसी पढ़ने परैन्त, असें गी इक खास चाल्ली दा आनंद मिलदा ऐ ते साढ़े अंदर माहनू दी महत्ता उसदे गौरव ते उपलब्धियें दे प्रति दृढ़ आस्था बनदी ऐ।” (सी.एम. बावरा)
3. “महाकाव्य आस्तै गंभीर शैली विशाल—काव्य आकार समृद्धता ते युग जां जाति दी अभिव्यक्ति दा होना जरूरी होंदा ऐ ते नायक वीर होना चाहिदा ऐ।” (टिलार्याड)

18.3.4 महाकाव्य दे तत्वे पर लोऽ पाओ ? ।

महाकाव्य दे अंतर्गत विशे च गंभीरता, नायक च शालीनता ते उद्देश्य च महानता पर बवेचन कीत्ता गेदा ऐ। महाकाव्य दे सत्त तत्व उपलब्ध न जिंदा ब्यौरा इस चाल्ली ऐ :-

1. **कथानक** — महाकाव्य दा कथानक नां ते मता लम्बा होना चाहिदा ते नां गै मता संक्षिप्त। कथानक सर्गबद्ध होए तां जे नाटक दी पंजें संधियें दी पद्धति असानी कन्नै अपनाई जाई सकै। नाट्य—संधियें गी अपनाने दा मूल कारण इयै जे नाटक आह्ला लेखा महाकाव्य च संघीटता आई सकै।
2. **चरित्र—चित्रण** — महाकाव्य दा दूआ प्रधान तत्व नायक जां मुख पात्रें दा चरित्र—चित्रण ऐ। नायक गी धीरोदात्त, उच्च कुल कन्नै सरबन्धत ते सर्वगुण संपन्न होना चाहिदा। चरित्र—चित्रण दे आधार पर पात्रें दे त्रै रूप न — वास्तविक पात्र, परम्परागत पात्र, आदर्श पात्र।
3. **कथोपकथन** — महाकाव्य दे बृहदाकार च कथोपकथन दा महत्त्वपूर्ण स्थान ऐ। कुतै—कुतै प्रसंग—परिस्थिति पात्रानुरूप रोचक संक्षिप्त संवाद जित्थै इक पास्सै कथा च स्वभाविकता पैदा करदे

न, उत्थै दूए पाससै रोचकता दी बी समृद्धि करदे न। असल च हास्य, व्यंग्य ते वाक्चातुर्य बगैरा कन्नै संवाद सरस ते संजीव बनदे न।

4. **युग—चित्रण** — “महाकाव्य दे विशाल कलेवर च जीवन दी बक्ख—बक्ख स्थितियें—परिस्थितियें दा चित्रण होना चाहिदा। युगीन समाजिक, धार्मिक, राजनीतिक, सांस्कृतिक आदि परिस्थितियें ते भावनाएं दी पूरी—पूरी झांकी दस्सी जा ते मानवता, विश्व—बंधुत्व, समाजिक संघर्ष आदि दा सरस ते सजीव चित्रण बी होए।

5. **रस—भाव** — “महाकाव्य च रस दी अभिव्यंजना जरूरी ऐ। रस दी उत्पत्ति पात्रें ते परिस्थितियें दे संपर्क ते संघर्ष जां प्रतिक्रिया थमां होंदी ऐ। महाकाव्य च शंगार, वीर, करुण ते शांत रस चा कोई इक अंगी रस होना चाहिदा ते बाकी रस अंगरूप च उस रस दे सहायक होन। इस चाल्ली महाकाव्य च रस ते भाव दा अस्तित्व निरंतर रूप च होना चाहिदा।

6. **भाषा—शैली** — “भाषा—शैली बी महाकाव्य दा तत्व ऐ। भाषा च सरलता, सजीवता, स्वभाविकता, भावानुरूपता, अलंकार विधान, लाक्षणिक व्यंजक प्रयोग, मुहावरे—खुआन ते कलात्मक प्रयोग आदि सब्भै गुण होने चाहिदे। महाकाव्य दी शैली गरिमामयी, उदात्त ते गंभीर होनी चाहिदी।

7. **उद्देश्य** — “महाकाव्य दा उद्देश्य अवश्य गै महान होंदा ऐ जिस च चतुर्वर्ग दी प्राप्ति, धर्म, कर्म ते मोक्ष गी बी म्हत्तव दित्ता जंदा ऐ। एह उद्देश्य प्रतीकात्मक जां व्यंग्यात्मक बी होई सकदा ऐ पर कुतै—कुतै प्रतक्ख, अप्रतक्ख ते उपदेशात्मक रूपै च बी झलकदा ऐ।

निष्कर्ष दे तौरा पर आखेआ जाई सकदा ऐ जे इस चाल्ली महाकाव्य दे उप्पर दित्ते गेदे तत्वे दी औचित्यपूर्ण स्थिति महाकाव्य गी सफल बनांदी ऐ।

19.3.1 महाकाव्य दे लक्षणे बारे जानकारी देओ?

महाकाव्य च महान कथानक दी संपूर्णता जरूरी ऐ। उस च लौकिक जां परलौकिक जीवन दी नियोजना, नमें संदेश, वर्णन सरबन्धी प्रसंगों दी उचित स्थापना ते मानवीय जीवन दे सच्च ते आदर्श दा समवित रूप होंदा ऐ। बक्ख-बक्ख विद्वानें राहें महाकाव्य दे लक्षणे दा ब्यौरा प्रस्तुत ऐ –

1. भामह

“महाकाव्य सर्गबद्ध होना चाहिदा, उसदा अकार बड्डा होना चाहिदा, शब्द शिष्ट ते अर्थ पूर्ण होने चाहिदे। महाकाव्य अलंकार युक्त होऐ ते उसदे आधार श्रेष्ठ चरित्र होन। मंत्र, दूत, जुद्ध बगैरा दे वर्णनें राहें नायक दी जित बी दस्सनी चाहिदी। महाकाव्य दी कथा पंज संधियें कन्नै युक्त होनी चाहिदी ते उस च मते व्याख्यात्मक अंश नेई होने चाहिदे।”

2. दण्डी

“महाकाव्य दा सर्गबद्ध होने दे कन्नै-कन्नै उसदे शुरू च अर्शीवाद, नमस्कार ते वस्तु-निर्देश होंदा ऐ, उसदी कथा इतिहास-प्रसिद्ध जां उस थमां बक्ख बी होई सकदी ऐ। महाकाव्य दा चतुर्वर्ग फल दी प्राप्ति होऐ ते उसदा नायक चतुर ते उदात्त होना चाहिदा। महाकाव्य अलंकृत जरूर होना चाहिदा। उस च रस ते भावें दी समानता होऐ। सर्ग मते बड्डे नेई होन, ते कथावस्तु नाटकीय संधियें थमां युक्त होऐ।”

3. विष्णनाथ

“इतिहास सरबन्धी जां प्रसिद्ध कथानक, सर्गबद्ध कथावस्तु, संधियें दा नर्वाह, शंगार, वीर ते शांत रसें चा कुसै इक दी प्रमुखता ते अन्य रसें दा सहायक होना, चतुर्वर्ग फल-प्राप्ति, अह्म थमां मते सर्ग,

सर्ग दे खीरै च छंद परिवर्तन, सज्जन-स्तुति ते दुर्जन-निंदा, संध्या, सूरज, रात, पर्वत, सागर, स्वर्ग, आदि दा वर्णन महाकाव्य दे लक्षण होंदे न।

निष्कर्ष दे तौरा पर महाकाव्य ओह काव्य रूप ऐ जिस च सधारण कथानक, विराट चरित्र, कल्पना, गंभीर अभिव्यंजना शैली, विशिष्ट शिल्प विधि ते मानवतावादी जीवन द्रिष्टी थमां उसदा रचेता जुग-जीवन दे म्हान बोध दे सांस्कृतिक भूमिका पर प्रतिबिंबित करदा ऐ।

19.3.2 महाकाव्य ते खण्डकाव्य च फर्क-भेद स्पष्ट करो।

‘महाकाव्य’ शब्द इक समस्तपद ऐ। एह ‘महा’ ते ‘काव्य’ दे मेल कन्नै बने दा ऐ। इसदा अर्थ ऐ – “ऐसा काव्य जेहड़ा अपने आकार गै नेई बल्के विशे-वस्तु दे स्हाबें बी बड़ा होऐ।” महाकाव्य साहित्य दी इक विधा ऐ जिस च जीवन दा सर्वांग चित्रण होऐ दा होंदा ऐ। इसदे अलावा महाकाव्य दी व्यापकता दे उल्ट खण्डकाव्य च जीवन दे कुसै इक घटना, इक हिस्से, इक कम्मै दा चित्रण होंदा ऐ। इस च निश्चत उद्देश्य दी भावना निहित होंदी ऐ। महाकाव्य ते खण्डकाव्य दमें प्रबंधकाव्य न पर पही बी फर्क-भेद न :-

1. महाकाव्य दा कथानक विस्तृत ते अवांतर प्रसंगे दे वर्णन कन्नै युक्त ऐ। महाकाव्य च जित्थै व्यापकता होंदी ऐ उत्थै खण्डकाव्य च गैहराई होंदी ऐ। महाकाव्य दा कथानक इतिहास जां परम्परा प्रसिद्ध होंदा ऐ, पर खण्डकाव्य दी वस्तु पूर्णतः काल्पनिक बी संभव ऐ।
2. महाकाव्य दे नायक धीरोदात्त ते सद्गुणयुक्त व्यक्ति होंदे न। उंदे च आम तौरा पर देव ते राजाऐं गी मता लैता जंदा ऐ। खण्डकाव्य च नायकें दी प्रकल्पना देव जां ख्यात च कीर्ती जंदी ऐ।
3. महाकाव्य च सारें रसों दी योजना होंदी ऐ पर खण्डकाव्य च इक गै रस दी प्राप्ति होंदी ऐ।
4. महाकाव्य च प्रकृति दा सांगोपांग चित्रण तथा लोकरीतियों दा चित्रण रौहदा ऐ। जदके खण्डकाव्य च सीमत घेरे च इनें विशों दा विस्तृत समावेश संभव नेई बल्कि प्रकृति दा थोड़ा जनेहा चित्रण होई सकदा ऐ।
5. महाकाव्य दे इक सर्ग च इक गै छंद दी योजना होंदी ऐ ते सर्ग दे खीरै च छंद परिवर्तन होई जंदा ऐ। कुतै-कुतै सर्ग च नेकां छंद भी मिलदे न। सर्ग दे खीरै च अंगों दी कथा दी सूचना

दिती जंदी ऐ। इस च पंज संधियें दा विधान ऐ। खण्डकाव्य दी रचना इक छंद च मिलदी ऐ ते नेकां च बी। सर्ग दे खीरै च छंद बदलने जां अगें दी कथा दी सूचना देने दा निजम नेई ऐ। इस च संधियें दी व्यवस्था नेई कीती जंदी।

निष्कर्ष दे तौरा पर गलाया जाई सकदा ऐ जे महाकाव्य ते खण्डकाव्य च कोई विशेष भेद नेई ऐ। दौनें दी भाशा उत्कृष्ट होनी चाहिदी ऐ ते इंदा उद्देश्य जीवन च उच्चे आदर्श दी स्थापना होनी चाहिदी ऐ।

19.3.3 खण्डकाव्य दे रूप—सरूप पर चर्चा करो।

महाकाव्य आहले लेखा जिस काव्य दी रचना होंदी ऐ पर जिस च पूर्ण जीवन ग्रैहण नेई करियै खण्ड जीवन गै ग्रैहण कीत्ता जंदा ऐ, जिस थमां ओह प्रस्तुत रचना दे रूपै च पूर्ण प्रतीत होए। इस आस्तै महाकाव्य दे इक जां इक थमां मते सर्गें गी खण्डकाव्य नेई आखी सकदे भामें उंदे च जीवन दे इक खण्ड दी झलक कि नेई दस्सी गेदी होए की जे उनें सर्गें आस्तै पूर्वापर दी अपेक्षा होंदी ऐ। खण्डकाव्य दा विस्तार बी थोड़ा होंदा ऐ।

1. खण्डकाव्य, जीवन दी कुसै महत्त्वपूर्ण घटना दी पूर्ण अनुभूति ऐ जिस थमां जीवन दे सरबंधत पक्खै दा उज्जवल रूप झलकदा ऐ पर इस महत्त्वपूर्ण घटना दा विस्तारपूर्वक वर्णन करने कन्नै एह महाकाव्य नेई बनी जंदा।
2. खण्डकाव्य च मुख्य घटना दे कन्नै गौण घटनां बी होई सकदियां न जेहड़ी मुख्य घटना गी उत्कर्षता प्रदान करै पर उंदा कोई स्वतंत्र बजूद नेई होंदा।
3. खण्डकाव्य च इक गै मुख्य मार्मिक संवेदना होंदी ऐ।
4. इसदी कथा च आरम्भ, विकास ते चरमसीमा दा क्रम बी रौहदा ऐ।
5. इस च निष्पत्त उद्देश्य दी भावना निहित होंदी ऐ।
6. खण्डकाव्यें च सर्गबद्धता अनिवार्य नेई ऐ ते सर्ग रखे जान तां उंदी संख्या निश्चित नेई। खण्डकाव्य ऐसी प्रबन्ध रचना ऐ जिस च नायक दे जीवन दी उस प्रमुख घटना दा छंदोबद्ध चित्रण होंदा ऐ जेहड़ा पूर्ण होए ते सरबंधत पक्खै दा वशिष्ट रूप प्रस्तुत करै।

19.4.4 हेठ लिखे दे काव्य रूपें पर नोट लिखो।

(i) मुक्तक

अग्नि पुराण च मुक्तक दी परिभाषा इ'यां मिलदी ऐ –

“मुक्तकं श्लोकऐवेकष्वमत्कारक्षमः सताम्”

अर्थात् मुक्तक, सज्जनें गी इक्कै श्लोक च चमत्कार दस्सने दी सरमत्थै आहली लघु रचना होंदी ऐ। एह परिभाषा गै मुक्तक दे रूप–सरूप गी गोहाड़दी सेही होंदी ऐ अर्थात् मुक्तक इक्कै छंदै च सीमत होंदा ऐ ते कविता–प्रेमियें गी सवैया, कुण्डलियां, गजला आदि मुक्तकें दा खास साहित्य मिलदा ऐ। मुक्तकें गी गौर कन्नै सुनियै इ'यां सेही होंदा ऐ जे मुक्तक भरोचा बचार प्रगट करने मूजब गै बजूद च आए दे होन। आचार्य आनंदवर्धन होरें मुक्तक च रस गी मती म्हत्ता दिंदे होई आक्खे दा ऐ जे “मुक्तक च रस दी प्रतिष्ठा गै उसदे पद दी व्यवस्था बनांदी ऐ इस करी कवि आसेआ उस्सै दा आसरमां लैता जाना चाहिदा ऐ। उंदे मताबक कोई बी स्थायी जां संचारी भाव मुक्तक दा रूप ग्रैहण करी सकदा ऐ। मुक्तक च वाक्य जां बचार दी एकता होई सकदी ऐ।

कुण्डलियां – ‘कुण्डलिया’ हिन्दी दा छंद ऐ जिस च दोहा रोला छंद रलियै काव्य च चमत्कार पैदा करदे न। इस च कुल छे पद होंदे न। पैहले दऊं पद दोहे दे ते चार पद रोला दे। दोहे च 13+11 दे स्हाबें 24 मात्रा ते रोला च 11+13 मात्रां दे स्हाबें 24 मात्रां होंदियां न। कुण्डलियें च कुल्ल रलाइयै 144 मात्रां होंदियां न। कुण्डलियां दा मुंडला शब्द गै खीरै च बी होंदा ऐ। एहदे च कुसै इक भाव जां बचारै दा चित्रण होंदा ऐ। कुण्डली जादातर उपदेश प्रधान होंदी ऐ। किशन स्मैलपुरी हुंदे कविता संग्रैह ‘अरुणिमा’ चा कुण्डली दा इक उदाहरण प्रस्तुत ऐ –

“भांत सभांते फुल्ल फल, ठण्डे मिट्ठे नीर।

रंग बरंगे पखरू, ते उच्चे पर्वत पीर

उच्चे पर्वत पीर, जड़े गासा गी छूंदे

चन्नै छुट्ट निं होर, कुसै ने बोलदे कूंदे

बन्न सबन्ने देश, किशन तूं भाएं झांते

होर बी दिक्खे दृश कुतै ने भांत सभांते?”

(ii) सवैया

एह बी हिन्दी दा इक छंद ऐ। इस च कुल्ल चार चरण होंदे न पर पंगती दी खीरली तुक मिलदी ऐ। हर इक चरण च 22 थमां 26 मात्राएं दा होना जरूरी ऐ। सवेइयें किषन स्मैलपुरी होरें लिखे दे न –

“साधनां करदे सोभदे साधु, सुच्चिएं सोचें सब सरकारां
साथें-साथें सोभदे-साथी, साथें-साथें सुंदर नारां
सोहे सियाले सुख-सुहांदे, सज्जनें साथें सैलियों धारां
बादियां ब्हारां कियां ए सोभन, जेकर सज्जन लैन नां सारां।”

(iii) गज़ल

गज़ल शब्द मूल रूप च अरबी भाशा दा शब्द ऐ ते इसदा अर्थ औरत बारै गल्ल करना, उसदे प्रेम-पलैपे दी चर्चा करना ऐ। इक गज़लै च घट्ट कोला घट्ट पंज शेऽर होंदे न। शेऽर च दऊं ‘मिसरे’ जां सतरां होंदियां न। पैहले शेऽर गी ‘मतला’ ते खीरले गी ‘मक्ता’ आक्खेआ जंदा ऐ। गज़ल दी भाशा बड़ी असरदार होनी चाहिदी ऐ। शेऽरें च मात्रा दा स्हाब नेई होंदा, लय दी गल्ल चलदी ऐ। डोगरी दे गज़ल गोऽ शायरें सिर्फ हिरख प्रीतै दी गै गल्लै गी गज़ल दा विशे नेई बनाया बल्के उनें समाजै दे बड़े संजीदा विषें पर गज़ला लिखियां न। गज़लें दे किश उदाहरण प्रस्तुत न :-

1. “मेरा केह गोआचग मेरे कोल केह ऐ
नां ए भाग जागे, नां ए भाग सौने।”
2. माला च मस्त कोई हा, तस्बीह च कोई हा
सब ओपरेपनै च हे, अपने च कोई नेई।
3. जित्थै कुतै बी जाओ, उत्थै गै ताहनें-मीहनें
एह जैहर कियां खाने, एह जैहर कियां पीने।”

(iv) गीत

गीत संस्कृत दी 'गै' धातु थमां बने दा ऐ इसदा अर्थ गाई जाने जोग रचना ऐ। गीत संगीत दे बगैर अधूरा ऐ। गीत दी पैहली पंक्ति 'स्थायी' खोआंदी ऐ। जिसगी गीत गांदे होई हर अंतरे दे बाद दुहराया जंदा ऐ। गीतें गी द'ऊं भेदें च विभाजित कीत्ता गेदा ऐ – लोक गीत ते साहित्यिक गीत। लोकगीतें दे रचनाकार गुमनाम होंदे न। लोकगीतें च बिहाइयां, लोरियां, घोड़ियां, सुहाग, बिषनपते, छंद, भाखां आदि विधां प्रमुख रूपै च शामिल न। लोक गीतें राहें असेंगी कुसै समाज दी सांस्कृतिक, धार्मिक, आर्थिक आदि स्थितियों दा, रीति-रवाजें दा, आस्था-विश्वासें दा बोध होंदा ऐ। गीतें दा इक उदाहरण प्रस्तुत ऐ :-

“कोई बदली गासैं छाई, रामा, नेई बरदी
कु'न जानै के दरद-बछोड़े, कोदी ऐ भरमाई? रामा ...
नां कून्दी नां दर्द सुनांदी, नां गै नजरां चुकदी,
दूरें गेदी, सोचें पेदी, किज चलदी पही रुकदी,
सिकल दपैहरी गी जोगी, संजां गेआ बनाई?
रामा, नेई बरदी।

(v) चपंक्ता

मुक्तक दे चपंक्ता रूपै च कुल्ल चार पंगतियां होंदियां न। इस दी पैहली, दूई ते चौथी पंगतै दी आपूं चें तुक मिलदी ऐ ते त्री दी तुक बख्खरी होंदी ऐ। सारे छंद च इक्कै विशे होंदा ऐ ते चौथी पंगती पर जोर पाया गेदा होंदा ऐ। जि'यां :-

“अल्ले दागें दी गल्ल कीती ऐ,
त्रुटदे धागें दी गल्ल कीती ऐ।
असें दुनिया दी चुगली लाई नेई।
अपने भागें दी गल्ल कीती ऐ।

(vi) दोहा

एह दो पदें आह्ला छन्द ऐ दौनें दे दऊं चरण होंदे न। इ'यां दोहे च चार चरण मन्ने गेदे न। सम
(दुए ते चौथे) चरण च आरां मात्रां ते विषम (पैहले-त्रीए) च तेरां मात्रां होंदियां न। हर पद च कुल्ल
मात्रां चौबी होंदियां न। जि'यां '—

“शीशा घस्सी घस्सियै, इसदी शान निं रोल।

जे दागें दी शर्म ऐ, तूं मुंह अपना गोल।।

हत्थ कदें नेई अड्डना, प्राण जान तां जान।

ए मरदें दी ईन ऐ, ए मरदे दी शान।”

दौनें पुस्तकें पर आधारत वस्तुनिश्ठ सोआल
रूपरेखा

20.1 उद्देश्य

विद्यार्थीयें च विशेष-विषय सम्बन्धी तीव्र अभिव्यक्ति दी समर्था जुटाने दे उद्देश्य कन्नै लौहके-लौहके सुआलें दे नमूने दित्ते गेदे न जिनेंगी पढ़ियै ने अमल करियै विद्यार्थी कुसै विशेष दे बारे च तौले, तुरंत ते स्हेई उत्तर देने च समर्थ होउन ।

20.2 पाठ परिचे

इस पाठ च विशेष-परक वस्तुनिष्ठ सुआलें दे दो उपपाठ प्रश्न- पत्रों दे नमूने दित्ते गेदे न ते उदें जबावे दी कुंजी बी ।

20.3 पाठ प्रक्रिया

अ) खाली थाहर भरों

आ) स्हेई उत्तर चुनों

20.3.1 खाली थाहर पूरे करों :

1. कैकर, गीहटें, टोएं, टिब्बें हदद मुकाई ऐ ।

अस.....मारु कंडी डुगगर देस खुआई ऐ ।

2. पंजाबी.....पारसी दे बी सूफी मतै गी पढ़ेआ ऐ

3. गाऽ लम्मियों गाऽ अड़ेआ ।

4. परमेशर ऐ मीरें दा.....दा नेई।
5. कलयुग एह राज.....ऐसे कम्म बनाऽ
6. पत्थर उसलै पर सिज्जलदे जिसलै कोई.....टंगोई जंदी।
7. जिंदगी दा सफर.....हा दनां बैठे हे अस।
8. फीता कटिटयै..... जित्थै आई बौहदा।
9. दिन चढ़दे सूरज नै.....धोली दिता।
10. जिंदगी दी.....च हारें जदू।
11. 'डोगरी साहित्य चर्चा' पुस्तक.....होरें लिखी दी ऐ।
12. 'डोगरी साहित्य चर्चा' दा दुआ संस्करण.....च छपेआ।
13. पुस्तक 'डोगरी साहित्य चर्चा' दा पैहला संस्करण.....ब'रे च प्रकाषत होआ।
14. 'डोगरी साहित्य चर्चा' दा दूआ संस्करण.....ने छपोआया।
15. साहित्य माहनू दी.....दी गै खोज ऐ।
16. हर इक साहित्य रचना दे.....पक्ख होंदे न।
17. हर खेतरै च कम्म करने आहलें गी.....पढ़ना चाहिदा।
18. साहित्य.....भरोचे बाक्य दा नांऽ ऐ।
19. कविता च..... दा गुण बड़ा म्हत्तवपूर्ण ऐ।
20. कविता.....दा रूप ऐ।
21. संस्कृत आचार्य काव्य दे दो.....कीते दे—न।
22. प्रबंध काव्य दा दूआ रूप..... काव्य ऐ ।
- 23.

दिक्खो स्हेई उत्तर

- | | | | |
|-----------|------------------------|--------------------------|--------------|
| 1. पत्थर | 2. उर्दू | 3. भाखें | 4. गरीबें |
| 5. अनोखा | 6. लाश | 7. लम्मा | 8. चीफ—गैस्ट |
| 9. सुच्चा | 10. दौड़ | 11. प्रो० लक्ष्मी नारायण | 12. 2006 |
| 13. 1969 | 14. डोगरी संस्था जम्मू | | 15. पूर्णता |
| 16. दो | 17. साहित्य | 18. रस | 19. कल्पना |
| 20. आनंद | 21. भेद | | 22. खण्ड |

20.3.2 हेठ दित्ते दे जबावें चा स्हेई पर (✓) दा नशाल लाओ :-

1. 'डोगरी साहित्य चर्चा' पुस्तक दा पैह्ला संस्करण छपेआ।
क) 1970 ख) 1969 ग) 1971
उ० ख
2. 'डोगरी साहित्य चर्चा' दा दूआ संस्करण छपेआ।
क) प्रो० लक्ष्मी नारायण ख) प्रो० वीणा गुप्ता ग) प्रो० चम्पा शर्मा
उ० क
3. पुस्तक 'डोगरी साहित्य चर्चा' दा दूआ संस्करण छपेआ।
क) 2005 ख) 2007 ग) 2006
उ० ग
4. 'साहित्य जीवन दा कलात्मक चित्रण ऐ' । आक्खे दा ऐ।
क) ऐमरसन ख) क्रोचे ग) कुन्तक
उ० ख
5. 'साहित्य भाषा दा उच्चतम रूप ऐ' आक्खे दा ऐ।
क) कालरेज ख) विश्वनाथ ग) अज्ञात
उ० ख
6. 'कविता पद्यात्मक रचना ऐ' आक्खे दा ऐ।
क) मैकाले ख) डा० जान्सन ग) हैज़लट
उ० ग
7. 'कविता संगीतमय बचार ऐ' आक्खे दा ऐ।
क) विश्वनाथ ख) मम्मट ग) कारलाइल
उ० ग
8. 'कविता जीवन दी आलोचना ऐ' आक्खे दा ऐ।
क) वर्डस्वर्थ ख) मैथ्यू आर्नल्ड ग) शैले
उ० ख
9. प्रबंध काव्य दे भेद न।
क) दो ख) त्रै ग) चार
उ० त्रै

